

Ekwo

Azáya

Onye Mpfuchiru Chileke

1 ¹Ọwaa bụ ọphulenyia iphe, e-me l'alị ndu Jiuda yee mkpụkpu Jierúsalemụ. Onye phuru iya nụ bụ Azáya nwa Emọzu. Teke ọ phuru iya bụ teke ndu-a bụ eze ndu Jiuda, bụ iya bụ Uzáya; Jiótamu; Éhazu; yee Hezekáya.

Chileke abarụ ndibe iya mba

²Gùbe igwe; nùmakwa! Gẹ gùbe alị ngabekwa nchi; kele Chipfu pfuakwaru opfu. Ọ sọru-a: “Mu hewaru ụnwegirima mu; mee p̄hẹ metsee; t̄eme ẹp̄he gb̄e bya ekwefuru mu ike. ³Eswi makwaru onye nwe iya nụ. Nkapfụ-igara bya amaru iphe, onye nwe iya nụ eyejeru iya nri; obenu lẹ ndu Ízurelụ ta adụdu ọphu ẹp̄he maru; mbụ lẹ ndu ono, bụ ndibe mu ono bẹ iphe edoduru ẹnya.”

⁴Oowaa! Unubẹ ọha iphe-ẹji-a! Unubẹ ndu ẹjo-iphe jiru ẹhu-a! Eri ndu ẹjo-ememe-a! Ụnwegirima ụrwuali-a! Ndu-a gwọbewartu Chipfu. Ẹp̄he ta agụbeeduru Onye nsọ kẹ ndu Ízurelụ iphe; ẹp̄he woru azụ ghaaru iya. ⁵?Denu g'o gude e je a-nụ unu aphụ ọzo? ?Bụ gūnu meru g'o gude unu kw̄e ẹka lekwefuru Chileke ike? Ishi bụkotawa unu ọnyá ọnyá; t̄eme meji nọdu ebuhwaa unu ebuhu. ⁶E -shikp̄o l'ichirupfu-ọkpa unu jasụ l'echi ishi unu ta adụedu ẹka iphe te emedu unu. Iphe, d̄ukota iya nụ bụ igbiri-ẹchachi; m̄kpoo ọnyá; m̄kpoo ẹka alwa unu mee t̄orit̄ori, adụdu ọphu a sarụ asasa; ọphu ọ d̄udu ọphu e kechiru ekechi; ọphu ọ d̄udu ọphu e meberu ọbvụ.

⁷Alị unu b̄waa ochobu. Mkpụkpu unu b̄uru iphe, ọku tsufugbaaru. Opfu, unu k̄oru b̄e ndu ọhozo nọ l'ip̄hu unu eripya. Ọ dabyiru karaphongu g'ẹka ndu ọhozo lw̄uru. ⁸E woru ada Zayonu ono t̄ogbo okorobo gẹ nwa m̄kp̄u, a t̄uru dobe l'opfu-vayinu; gẹ nw̄ulo-ẹgu, a kp̄uru l̄egu akp̄uru-eli;

gę mkpukpu, ndu ọhogu iya nọ-pheru mgburugburu. ⁹Ọ -tọ bụ lę Chi-
pfu, bụ Ọkalibe-Kakọta-Ike haru haphodoru anyi nwanu ọphu phoduru
nụ; mę anyi aduępho gę mkpukpu Sodomu; mbu-a; anyi gege aduępho gę
mkpukpu Gómora.

¹⁰Unu nưmakwa Opfu Chipfu; unubę ndu-ishi ndu Sodomu! Unu nga-
bękwa nchị numa ekemu, Chileke anyi turu; unubę ndu Gómora! ¹¹Ọ
suru-a: “Ọ tọ duedu iphe, mu guberu ikpoto ngweja, unu anọduje egwe
anụ mu. Ebili ono, unu akpoje ọku nụ mu ono; yę ęba-anụ unu ndu
ọphu kachaa ree; jiakwaru mu ępho jigharu mu iya ęka. Mee eswi; yę
kę nwaturu; yę k'ęghu te emejeękwa g'iphu tusahu mu. ¹²G'unu abyaję
l'iphu mu; ?bụ onye asuje unu g'unu bya; mbu g'unu byaru mu azotoshi-
ru ọma-unuphu? ¹³Unu ta abyajęhekwa mu anụ iphe, adudu iphe, ọ bụ!
Ụnwù-isensu, unu akpoje ọku nụ mu tukoakwaru buru mu ahuma ahu-
ma. Ọbo Ọnwa-ọphúú; mę ọbo eswe-atuta-unme; mękpoo ekukọbe, unu
ekukọbeje onwunu g'ọ ha; dukotakwa mu ashi. Ọ buępho l'ọ tọ duedu
ejo ndzukọ unu ọphu aduadaa mu ashi. ¹⁴Ọbo-ọnwa-ọphúú, unu anọduje
abo; mękpoo ọbo-iphe unu ozokpo, bụ ndu ọphu geru egeru dukotakwa
mu ashi. Ephe tukowaru anyi mu ęrwa. Mu tanyawaru iya nshi; ike bu-
wa mu.

¹⁵“G'unu achi-lije ęka epfu anụ mu-a bę mu ewofujekwa ęnya l'ęka ono.
Unu -pfuru nụ mu nta pfua imo; mu ta angadu nchị; kęle ọchi nọ unu
l'ęka. ¹⁶Unu jenụ asachaa onwunu; mee onwunu g'unu gbuchafu! Unu
wofunu ejo-ememe ono, unu eme ono l'iphu mu! Unu hanaa eme ejo-iphe!
¹⁷Unu nwunaa eme iphe, du ree! Unu chonaa ikpe, pfuru nhamunha! Unu
ahua ndu eme ndu ọzo ewere ahuhù! Unu gbajenuru nwogbee, enwedu
nna ọdzori! Unu agbachitajeru nwanyi, ji iya anọedu ndzu!”

¹⁸Wakwa iphe, Chipfu epfu baa: “Unu byanụ g'anyi chia idzù; g'idzù
anyi tuko wua nanu! iphe-ęji unu -duchakpoonu ęji eke uswe-uswe bę
oo-mechaa chaahaa pemu pemu g'aka-mini-sunoo. Teke ọ bụ l'ooke gbo-
gbogbo g'uswe bę oo-mechaa chaahaa phuuphuu g'oghu ọchaa. ¹⁹Ọ -buru
l'oohe unu ihee; teme unu nọdu emeje iphe, a suru g'unu mee bę unu
e-rikwa iphe, kachaa ree, shi l'alı-a. ²⁰Obenu teke unu jikaru bya ekwe-
fu ike bukwa ogu-echi bę a-sujashi unu. Nokwa iphe, shi Chipfu l'onu bụ
ono.”

Jierúsalemu bụ mkpukpu, eme iphe-ęji

²¹Lewarọ gę mkpukpu ono, e shi gude ęka ono byaru bya aburu ovuo-
ba! Mbu mkpukpu, duru teke buępho ikpe, pfuru ọto bę e shi anọduje iya
ekpe; mkpukpu, apfubekoto shi buru eburu l'ime. Nta-a bę ọ buwaa ndu
egbu nemadzu bu iya. ²²Mkpola-ọchaa, i shi nweru buwaa nshı-mkpola.
Eguru męe ngu ono buwaru iphe, e gude mini gwanyishia. ²³Ndu-ishi
l'ime ngu bukotawa ndu kwefuru Chipfu ike; bya aburu ndu ephe lę

ndu-oshi gba l'ogbo. G'ephe ha yeru ɛnya l'eri ɔphalazu. Tɛme ɔ buɛru-pho g'a nɔ phe; l'aduɛ phe ree. Onye enweɛdu nna bɛ ɛphe ta agbajɛduru ɔdzori; ɔphu ɛphe angajɛdu nchi l'ɔpfu ɛhu nwanyi, ji iya anɔedu.

²⁴Noo g'o gude Nnajiuphu; mbu Chipfu, bu Okalibe-Kakota-Ike; mbu Okalibe kɛ Izurelu pfua su: "Ihee; gɛ mu bya emee ndu mu l'ephe du l'ukukanyi iphe; gude du onwomu obu. Gɛ mu bya egude ndu ohogu mu gwata ugwo iphe l'onwomu. ²⁵Gɛ mu bya adaa unu ɛka kɛ njo. Gɛ mu bya ahuchafuchaa nshi-mkpola ono, a gwakoberu unu ono rengurengu; bya atuko ɛrwu, du unu l'ehu rwushia. ²⁶Mu e-dophuchaa ndu-ikpe unu azu g'ephe du g'ephe shi du teke ndiche. Mu emee ndu akpo-zijeru unu uzo g'ephe du g'ephe shi du lɛ mbu. E -mechaa laawata unu eku mkpu-kpu, pfuberekoto; mkpukpu, e gude ɛka."

²⁷Mkpukpu ono, no l'eli ubvu Zayonu ono bɛ ee-gude ikpe, pfuru oto gbafuta. Lɛ gude apfubekoto gbafuta ndu izimanu lwaru azu lɛ mkpukpu ono. ²⁸Obenu lɛ ndu kwefuru Chipfu ike; mɛ ndu iphe-eji bɛ aa-tuko tsu-pyashia. Tɛme iphe, bukpo ndu gwoberu Chipfu abukotaru ola-liswi.

²⁹Achi ono, aasogbaa nsu ono e-mechaa mee unu iphe-iphere; g'o bu iya bɛ unu yeru ɛnya-a; mbu lɛ mgbabu ngweja ono, unu hotaru ono e-mechaa tu unu eberebete; ³⁰kele unu e-mechakwaa du g'achi, laru ekwo; mbu g'opfu, a koru l'eka mini adudu. ³¹Ndu shihuru ike e-mechaa du g'ephuuruu. Ozi, ephe jeru abukotaru ekoroku; kele ephenebo a-tuko kekota oku; ɔphu ɔ du du onye suru agbanyi oku obu.

ɛhu-guu ojeje

(Mayi 4:1-5)

2 ¹Qwaa bu ɔphulanya,
Azaya nwa Emozu phuru l'ehu
ndu Jiuda yɛ ndu Jierusalemu.

²Su-a; o -rwua teke ikpazu
bɛ ee-me g'eli ubvu ono,
a kpuru eze-ulo Chipfu
ono nguru anguru;
mee ya g'o buru eze l'eka
iphe,
bukpo ubvu ozo nogbaa.

Mbu l'ee-me iya g'o kakota
ubvu ozo l'eli.

Noo teke ohamoha a-nodu
awu awu-pfu iya.

³Ikpotu nemadzu a-bya bya asu:
"Unu bya g'anyi je l'eli ubvu
kɛ Chipfu!

Unu g'anyi je l'ulo Chileke
ke Jiékọpu!

Ọo ya e-zì anyi ọ̀zo iya;
k'ọphu anyi a-wata
etso ọ̀zo, ọ̀ tọ̀ru.”

Noo kele ekemu e-shi l'úbvú
Zayonu futa;
mbù l'opfu Chipfu e-shi le
mkpukpu Jierúsalemu
bya.

⁴ Ọo ya e-doshi opfu,
dugbaaru ọ̀ha yẹ ọ̀ha
ibe iya.

L'ọ bya edoshiaru ikpoto
nemadzù opfu,
duru pẹ̀ nù.

Ephe e-woru ogu-echi pẹ̀
kpukwaa l'ọ̀ buru ọ̀gu;
woru arwa pẹ̀ kpua
l'ọ̀ buru nwa mma,
e gude akọcha iphe.

Ọ̀ tọ̀ duedu ọ̀ha,
a-patakwadu ogu-echi
ejepfu ọ̀hozo ọ̀gu;
ọ̀phu ephe anwuedu alwu
ọ̀gu ọ̀zobaa.

⁵ Unubẹ̀ ọ̀nu-ulo Jiékọpu;
unu byanu g'anyi tsoru
ìphóró ọ̀phu Chipfu
nwuberu anyi.

Eswe ke Chipfu

⁶ I jikawaru ndibe ngu ono; mbù ọ̀nu-ulo Jiékọpu onoya; kele omamanshi ndu shi ọ̀zo ẹ̀nyanwu-awawa jiru iya ejiji. Teme ephe nọ̀du agba eja ge ndu Filisitayinu. Ephe le ndu ọ̀hozo je akua okpa. ⁷ Alì pẹ̀ bụ̀ iphe, jiru iya nù bụ̀ mkpọ̀la-ochaa me mkpọ̀la-ododo. Ọ̀phu ẹ̀ku pẹ̀ abvudu abvubvu. Alì pẹ̀ bụ̀ iphe, jiru iya nù bụ̀ ìnya; ọ̀phu ugbo-ìnya pẹ̀ abvudu abvubvu. ⁸ Alì pẹ̀ bụ̀ iphe, jiru iya nù bụ̀ nshi nshi; ọ̀ buru iphe, ephe abaru eja bụ̀ iphe, ephe gude ẹ̀ka pẹ̀ gẹ̀degede mee.

⁹ Noo g'ọ̀ gude e jee ewoze nemadzù alì. Mbù l'amadu be ee-me g'ọ̀ rwua alì. B'a gukwaru pẹ̀ nvu!

¹⁰ Gbanuru laa lagbara-mkpuma! Je je edomia onwongu l'ime alì; kele iitsu Chipfu ebvu; teme akpabiri iya nọ̀du eye ngu ebvu! ¹¹ Onye etu

onwiya epha bẹ ee-mechaa mee g'ęnya lwa. Le mee gẹ ndu etse etsetse phuru yoo. Ọ bụru Chipfu kpoloko bụ onye ee-kutse m'o -rwua mbọku ono. ¹²O nwekpọerupho ujiku lanu, Chipfu, bụ Ọkalibe-Kakọta-Ike doberu iphe, bụkpoo ndu eku onwophe yee ndu akpa ngganga; bya edobekwaru iya pho ndu ekutse onwophe. Ọo mbọku ono bẹ ee-kuze phe ali. ¹³Mbọku ono bẹ e doberu iphe, bụ oshi sida, nọ l'úbvú úbvú Lébanonu, bụ oshi, tsekotaru agbaragba bya ajaa àjàjà; bya edobekwaru iya pho iphe, bụkotakpoo achi, nọ l'ali Beshanu; ¹⁴bya edoberu iya úbvú úbvú, hagbaa ephekerephe ephekerephe; mę obvu, ha l'eli l'eli. ¹⁵O doberu iya iphe, bụkpoo oje, hagbaa ephekerephe; mękpoo igbulo, a kpushiru ike; ¹⁶mękpoo ugbo-mini ndu Tashishi g'ọ hakọta; mękpoo iphemiphe, e meru; ọ nọdu ama mma. ¹⁷Onye etu onwiya epha bẹ ee-me g'ęnya lwa. Le mee gẹ ndu etse etsetse phuru yoo. Ọ buerupho Chipfu kpoloko bẹ ee-kutse mbọku ono. ¹⁸Nshi ta adudu adudu ophu kpọ.

¹⁹Mbọku ono bẹ nemadzu a-gbaru laa l'ogba, nọ l'agbara-mkpuma; gbaru laa l'enu, a turu l'ali; kele epehe atsụ Chipfu ebvu; teme akpabiri iya nọdu eye phe ebvu teke ono, ọo-gbalihu gẹ ya nmaghua mgboko l'ophu anmaghu ono. ²⁰Mbọku ono bẹ nemadzu a-chiru nshi ono, epehe gude mkpọla-ochaa mę mkpọla-ododo mee dobe agwa agwagwa ono chiru phekaaruru anu, bụ molu yee utsu-nwankuta. ²¹Epehe a-gbaru laa l'eka agbara-mkpuma gbaru uwa; mękpoo l'ime ogba, nọgba l'eli úbvú; kele epehe atsụ Chipfu ebvu; teme akpabiri iya nọdu eye phe ebvu teke ono, ọo-gbalihu gẹ ya nmaghua mgboko l'ophu anmaghu ono.

²²Hanaa akporu obu yeru nemadzu; kele mkpakọ iphe, o nweru bụ unme, ọotu l'imi. ?Bụ gunu ozo bẹ oo-mefuba ọnyá?

Ike, duru ndu Jierúsalemu yee ndu Jiuda

3 ¹Sụ-a; lekwa lẹ Nnajiuphu, bụ Chipfu; bya aburu Ọkalibe-Kakọta-Ike abyakwa anafu ndu Jierúsalemu; yee ndu Jiuda eka iphe eshije erwu phe eka. Ọobya phe anafu eka epehe eshije akpata nri; mę eka epehe eshije ekuta mini-angugu; ²nafu phe ndu ike du; mę ndu ojogu; nafu phe ndu-ikpe; mę ndu mpfuchiru Chileke; nafu phe ndu agba eja; mę ndu bụ ọgerenya; ³nafu phe ndu-ishi ndu ojogu; mę ndu nweru okwa; nafu phe ndu mgbazi; mę ndu maru eme ọna; mękpoo iphe, bụ ndu agba eja doru enya. ⁴Mu e-me g'ọ bụru unwokoroby, a-buru ndu-ishi phe; mbu l'oo ndu angukwadu era a-bujeru eze phe. ⁵Ndiphe a-wata akpa nwibe phe ehu. Onyenonu l'odaru yee nwibe iya; obutobu yee obutobu iya aduru l'opfu. Unwu-ogbo-lanu etso ndu bụ ọgerenya opfu. Ndu adudu iphe, epehe bụ etsokwapho ndu aakwabe úbvú opfu.

⁶A -nonyaa; nemadzu azu nwanna iya gburumu; mbu onye shi l'ibe nna iya; zu iya gburumu su: “Ọo ngu a-buru ishi anyi eshinu i nweru uwe nwilile. Ọ bụru ngu maru g'ii-me mekọta ọla-l'iswi-a.”

⁷Noo teke onye ono a-rashì sù: “Waawakwa-o! Mu ta asùkwa iya emekòta. Mu te enwekwa nri; òphu mu enwekwa uwe, eeye l'èhu. Unu te emekwa mu onye-ishi ndu ndu-anyi-o!”

⁸Ò buru iphe, kparù iya nù bù lè ndu Jierúsalemù bẹ upfu duru l'òkpa. Mbù lè ndu Jiuda adawaa iko. Iphemiphe, ephe epfu epfupfu; yee iphe, ephe emekòta ememe tukurù buru emeswe Chipfu; mbù aturwuepho atiphu Chipfu ono, egbu nwìinwii ono. ⁹G'iphu gbaru phẹ bukpoada iphe, agba phẹ ekebe. Ephe nòdu anòduje asa iphe-èjì phẹ asasa gẹ ndu Sòdo-mu. Òphu ephe edomidu iya edomi. Nshìo phẹ! Noo kele ephe gudewaa èka phẹ setarù onwophẹ eze iphe-èhuka.

¹⁰Karù onye pfulerekoto l'òo-duru iya lè ree; kele oo-ri akpuru, eme oma iya mītaru. ¹¹Nshìo ndu ejo-iphe; kele ephe a-lakòta l'iswi. Aa-pfu phẹ ugwo iphe, èka phẹ metaru.

¹²Ndibe mu bù unwokorobya akpa phẹ èhu. Teme ò buru unwanyi bù ishi phẹ.

Sù-a; ndu mu! Ò kwa ndu edu unu ụzo gude unu ephu ụzo. Ephe duru unu haa ụzo shiahaa òphu abụdu ụzo.

Ikpe, Chipfu e-kpe ndibe iya

¹³Chipfu ñakwa l'èka òo-nòdu kpee ikpe l'ùlo-ikpe. Ò gbalihuwaru pfulu gẹ ya kpee ndiphe ikpe. ¹⁴Chipfu watararù ekpe ndu bù ògerenya ikpe; waa ndu-ishi ndibe iya sù: “Ò kwa unu mebyishiru opfu-vayinu mu. Iphe, unu gwetarù l'ibe ndu ụkpa kùkwaru l'ibe unu. ¹⁵?Denu g'o gude unu gwee ndibe mu arakabya; bya egwee iphu ndu ụkpa rwukuru rwukuru? Noo iphe, Nnajiuphu epfu; mbù Chipfu, bù Òkalibe-Kakòta-Ike.”

Òkwa, aanmaru unwanyi Jierúsalemù

¹⁶Chipfu sùru-a: “Unwanyi, bu l'úbvù Zayonu kunùkakwaru onwophẹ. Ephe abujeru; ephe -nòdu eje ije ephe eworu olu ngakobe alò enya vaavaavaa; tò nwehu eje degengu degengu degengu; azò iphe, ephe gba l'òkpa jògongu jògongu. ¹⁷Noo g'o gude Nnajiuphu je l'eworu èkpa-ebyi ghaa unwanyi, bu l'úbvù Zayonu l'ishi. Mbù lè Chipfu e-me g'ishi chaa phẹ swarìswari.”

¹⁸Mbòku ono bẹ Chipfu a-nashìchaa phẹ iphe, ephe gude ama mma; mbù iphe obu, a zuru phẹ jògoro-jògoro obu; mẹ òphu ephe gude kechita ishi; mẹ iyagba, ephe tukurù l'olu; ¹⁹mekpoo iphe-nchì; mẹ iphe-èka; mẹ òphu e gude ekpuchi iphu; ²⁰iphe, e gude edozi egbushi; mẹ iyagba-ishi-ikpere; mẹ òlòkpo, eeswe l'upfu; mẹ ekpemu manù, eshi mkpò; mẹ nwanshi phẹ; ²¹echi, ephe agba lè mkpùshi-èka; mẹ òphu ephe eye l'imi; ²²eguru uwe kpowula-kpowula phẹ; mẹ ukpo phẹ; mẹ èkwa achìchi phẹ; mekpoo nwèda okpoga phẹ; ²³mẹ onyo phẹ; mẹ nweguru uwe ocha ephe eyeje l'ime èhu; mẹ èkwa, ephe agbaphuje l'ishi; mẹ òphu ephe ajìkobeje l'ukuvu.

²⁴Noo g'òo-du; teke ephe gege anòdu ete iphe, eshi mkpò; ephe eshiaha ishi. Teke ephe gege edo onwophẹ olokpo l'upfu; ephe ekebechia onwophẹ eri. Teke ephe gege enweru egbushi, ama ntumatu; ephe akpùshia ishi akpùshi. Teke ephe gege eye uwe, ama ntumatu; ephe eyechia uwe-aphu. Mma ono, ephe shi ama ono aghakòbe buru iphe-iphere.

²⁵Unwoke unu bu ugu-echi be ee-gude gbushia phe. La tuko ndu ojogu unu gbushia l'ogu. ²⁶Onu-abata Jierúsalemú echia mkpu ekwa gu aphu anwuhu. Mbù le Jierúsalemú a-du ge nwanyi, gba eka nwa; gwodoshihu l'ali.

4 ¹Ozo bu l'o -rwua teke ono be unwanyi esaa a-wu-pfutaje nwoke lanu su iya: “Jiko nafunu anyi iphere owa-a! Hanaa g'o buru-a l'anyi a-zaru laaru epha ngu. Anyi a-nodu-a azu onwanyi le nri; anmaru onwanyi ekwa.”

Eedophu Jierúsalemú azu l'onodu iya

²O -rwua teke ono be onye ono, bu ekali Chipfu a-nodu ama ntumatu; teme lo dukwapho akpabiri. Mebyi iphe, amishi l'ali a-buru iphe, ephe e-gude eku onwophẹ; buru iphe, ephe e-gude du ubvu l'enya; mbu nwa ndu ophu phoduru nu l'ali ndu Izurelu. ³Nwa ndu ono, phoduru le ubvu Zayonu ono; mbu nwa ndu ono, phoduru le Jierúsalemú ono be ee-kuje ndu du nso; mbu ndu e deru epha phe le ndu dzu ndzu le Jierúsalemú. ⁴O buru Nnajiuphu a-sachafu inyinyi, du nwada Zayonu onoya lehu. Oo-gude unme nkiya sachafu mee, tukoru Jierúsalemú ehu; mbu unme ophu o gude ekpe ikpe bya aburu unme, enwu oku. ⁵Oo ya bu; Chipfu abya l'ubvu Zayonu l'ophu; mekpoo iphe, bu ndu ono, edzukobeje leka ono; bya emeta urwukpu, akpu tuutuutuu doberu phe leswe; meta oku, enwu phoophoophoo doberu phe lenyashi; kele eka ono g'o ha be ee-gude odu-biribiri Chipfu kpuchia. ⁶Oo-buru ikpuka buru ibvu duru phe gokpomoku taa du phe leswe; bya abukwarupho eka ephe a-gbabaje je anodu zee ndzu; yee eka ephe e-domije onwophẹ me igwe -nodu alwa yegeyege mini; yee mo -nodu edze oke mini.

Ebvú kẹ opfu-vayinu

5 ¹Ge mu gu ebvu nu onye mu yeru obu.
Mu e-gude opfu-vayinu iya gu ya.
Onye mu yeru obu gbaru opfu-vayinu losu,
no lokpa-ubvu.
²O hazeru iya ahaze bya atutushichaa ya mkpuma

bya ahóta akpuru vayinu,
 kachaa ree kúa ya.
 O bya akpua ọlo-nche
 dobe iya;
 bya emetakwa iya pho ẹka
 aakuje mee.
 O ọdu ele iya ẹnya amita
 akpuru vayinu, du ree.
 Obenu l'ọ gbẹ buru ẹjo
 akpuru bẹ ọ mitaru.

³“Oo ya bu lẹ-a; unubẹ ndu bu lẹ Jierúsalemu; me ndu ọphu bu l'alì ndu Jiuda; unu yeeshikwa ọnu l'ẹhu mu l'opfu-vayinu mu ono. ⁴?Bụ gunu bẹ mu gege emebaaru opfu-vayinu mu-a, bụ iphe, mu emeadaru; meru g'o gude mu lee ẹnya l'oo-miru mu mebyi, du ree; ọ bya ami amimi bya amia ẹjo mebyi.

⁵“Nta bẹ mu a-karu unu iphe, mu e-me opfu-vayinu mu. Mu a-phokashi iphe, e gude kpọ-buta iya akpọ-buta g'iphe mebyishia ya. Mu etsukposhia igbulọ iya haa ya g'a zọo ya ọlitolì. ⁶Mu e-me iya g'ọ buru alì, a gbadoru agbado. A taa kochabaedu iya akocha; ọphu eegbubaedu iya ọgu. Oo ya bụ g'olekarara; yee ọgara-mbo ezee l'ẹka ono. Mu akaru igwe g'o to dze-baekwa mini wushiru iya.”

⁷O kwa ọnu-ọlo Ízurelu bụ
 opfu-vayinu ono,
 Chipfu,
 bụ Ọkalibe-Kakọta-Ike
 gbaru ono.
 O buru ndu Jiuda bụ
 iphe ono, ọ kuru iya ono,
 tūbaru iya l'ẹnya ono.
 O shi ele ẹnya mgbazi;
 ọ buchiaru iphe,
 ọ humaru
 bụ mgbaghashi.
 O lee ẹnya apfubekoto;
 ọ buru iphe-aphu bẹ
 ọ humaru.

Aphụ, Tso ru ndu Ízurelu

⁸Nshio unubẹ ndu anatajẹ ọlo yekwa l'ọlo unu; nata alì onye ọzo ye-kwa l'alì k'unu; jasụ unu atuko ekameka nata buru l'obotegu nkinyi unu. ⁹Chipfu, bụ Ọkalibe-Kakọta-Ike pfuakwaru mu; mu numa sụ: “Tororo opfu bụ l'ọlo, du igwerigwe e-mechakwaa dabyiru iphoro. Mbụ l'oko

ulo ono, bugbaa eguru ulo ono e-mechakwaa buru ulo, e te budu ebubu. ¹⁰Eka ee-gude eswi iri, a jigbaberu ebo ebo koo okoro ujiku ophu be nwa mee-vayinu, aa-pyitaje iya e-jijeepho otumu mee eto. Onye kuru mebyi iphe, jiru ogbongu lo wota iya iphe, jiru nkweka kpoloko.”

¹¹Nshio ndu etehuje le nchi-abohu jeshia achọ eka epe a-ngu mee; ndu anguje mee jasụ l'echi abali; mbụ jasụ enya ekee phe voo l'eka epe angu iya. ¹²Egube ndu ono egudeje une; me ogelenda aku l'eka epe abo iphe. Epe egbu opu; aphụ upyi; angushi mee. Oe epe ta akpadu ishi iphe, Chipfu eme; ophu epe akwabedu ozi, o gude eka iya jee ubvu. ¹³Noo g'o gude e je akpu ndibe mu le ndzu; kele iphe te edojedu phe enya. Ndi-be phe, bu ndu nweru okwa bu egu e-mechaa gbua phe. Igwe-oha phe a-buru egu-mini a-gu-gbushi phe. ¹⁴Oo ya bu l'ali-maa be egu kabawaa agugu. O saepho onu ke gabala ghekahu. O buru l'ime iya be ndibe phe, aakwabe ubvu a-wuba. Igwe-oha phe awuba iya; ndibe phe ndu aswoje uswo; me ndu rigbarigba-mee a-tuko wuda iya.

¹⁵Noo teke ee-woze nemadzu ali. Mbụ l'amadu ta aduedu iphe, oobukwaduru. Enya alwa ndu etse etsetse. ¹⁶Obenu l'ikpe, pfuru oto ono, Chipfu, bu Okalibe-Kakota-Ike kperu ono be ee-gude kutsee ya ekutse. Mbụ le Chileke ono, du nsọ ono e-goshi le ya du nsọ. O buru apfubekoto nkiya be oo-gude goshi iya. ¹⁷Noo teke aturu a-ta nri go bu lo no legu eka eecheje iya. Unwu aturu ataaha nri l'eka iphe ndu eze laru l'iswi.

¹⁸Nshio ndu egudeje okpukpu-eregede akpu ejo-iphe wuruwuru; teme epe egude okpukpu-eswi akpu iphe-eji. ¹⁹Nshio ndu ono, asuje: “Ge Chileke menaa egwegwa mee iphe, oo-du ike mee g'ephe huma! G'o rwukponaa! G'iphe obu, Onye Nso ke ndu Izurelu tberu ememe obu mekponaa g'ephe maeduru iphe obu!”

²⁰Nshio ndu ewojeru ejo-iphe kua iphe, du ree; woru iphe, du ree kua ejo-iphe. Ndu ewojeru ochii dochia enya iphoró; woru iphoró dochia enya ochii. Ndu ewojeru iphe, atso ilu dochia enya iphe, atso utso; woru iphe, atso utso kua iphe, atso ilu.

²¹Nshio ndu edobesuje l'ephe maru iphe; dobesukwapho l'ephe kwaru enya.

²²Nshio ndu bu iphe, e gude maru phe bu angu mee. Teme o buru phe be angu ngwaragwa mee wukoru; ²³mbụ ndu ewehaje onye-ikpe nmaru opfu lo nuru phe iphe-uphalazu; bya anafu onye iswi du mma ikpe, pfuru oto, e gege ekpe iya. ²⁴Oo ya bu le-a; o kwa g'ire-oku erichaje ekperema okponku erichaa; eswa okponku alaa pyete l'oku, enwu phoophoophoo-a; nokwa g'ogbarabvu phe e-repyahu; okoko phe etsua duu g'urwuku; kele epe jikaru edobe ekemu, o turu; mbụ Chipfu, bu Okalibe-Kakota-Ike. O buru opfu Onye Nso ke ndu Izurelu ono be epe gburu tuppee. ²⁵Noo g'o gude ehu nodu eghushi Chipfu egu ike l'iphe, ndibe iya meru iya. O wolia eka chia phe gbaa; chikata phe tua. Eli ubvu nodu anma jiiijiii. Odzu

phẹ dakaa p̄opoo l'oma gbororo. Ọ d̄uchakpoo nno; ẹhu n̄odu eghulẹ iya-a eghu g'ooḡhu iya; ọ paliẹle-a ẹka g'ọ paliru iya.

²⁶Ọ b̄ururo ọha, n̄oro ụzenya ụzenya bẹ ọ paliru ẹkwa-ọhubama; mb̄u ọ b̄ururo ndu n̄o l'ẹka mgboko jeberu bẹ ọokporu okwe. Ẹphe shi l'ẹka ono ezi taphutaphu agba abya. ²⁷Ọphu ọ d̄udu g'ẹphe ha g'ọ ka mma l'ọ onye lanu, ike ọso bvuru; ọphu ọ d̄udu onye ọphu mgb̄enya rweru; ọphu ọ d̄udu onye mgb̄enya turu; ọphu ọ d̄udu onye ọphu akpo, o keru l'upfu t̄o-woru at̄o-wo l'upfu; ọphu ọ d̄udu onye ọphu eri akp̄okpa iya gbabuhuru. ²⁸Apfu phẹ t̄up̄yichaa z̄inguzingu. Ụta phẹ g'ẹphe ha ḡokobechawaa rengurengu. Nz̄okpa inya phẹ n̄odu egbunwutaj̄echaa ọku. Ọkpa ụgbo inya phẹ n̄odu ezichaa phaaphaaphaa g'oke ph̄erephere. ²⁹Ọrà, ẹphe ara d̄u g'ẹka oduma as̄u ekiri. Mb̄u l'ẹphe agb̄o ụja ḡe nwada oduma; ẹphe n̄odu as̄u k̄ororo, anyap̄yash̄i ndu d̄uwaa ḡe nri ph̄e; apataj̄e ph̄e r̄o t̄ugbua; ọ t̄o d̄udu onye agbaru ph̄e mkpu.

³⁰Mb̄oku ono bẹ ẹphe a-t̄u ụzu kpua ya g'ẹka mini agba gborogboro. Onye ọphu pazetaru ẹnya lee l'al̄i ono; ọobuerupho iphe, ọo-h̄uma b̄u ọchii ȳe mkpam̄ehu; mb̄u l'iph̄óró b̄e urwukpu e-mechaa l'ọ gbah̄u ọchii.

Ozi Azáya

6 ¹L'apha eze, b̄u Uzáya nw̄uhuru b̄e mu h̄umakwarupho Nnajiuphu l'ẹka ọ n̄o l'aba-eze; ọ n̄odu ephekerephe; bya ab̄uru onye e kutseru ekutse. T̄eme igbur̄onu uwe iya t̄uko eze-ulo Chileke ono l'ophu sweta. ²Ndu n̄o iya l'eli b̄uru ụnwu-ọjozi-imigwe, b̄u serafu; g'ẹphe ha fuchaa ñk̄u ishii ishii. Ñk̄u lab̄o b̄e ẹphe egudeje kpuchia iphu ph̄e; ẹphe egude ẹbo kpuchia ọkpa ph̄e; bya egude ẹbo ẹphe ephephe. ³Ẹphe n̄odu epfugbaa an̄u nwibe ph̄e as̄uje:

“Ns̄o! Ns̄o! Ns̄o! Chipfu,
 b̄u
 Ọkalibe-kangok̄otaru-n̄u
 d̄u ns̄o!
 Mgboko l'ophu b̄e akpabiri
 iya jiru!”

⁴Ẹphe -pfua opfu ono; itso, gude eze-ulo Chileke l'ophu angak̄ota anganga. Ẹnwuru-ọku abya ejīep̄ho ẹka ono k̄e pȳimu!

⁵T̄obudu iya b̄u; mu su: “Nsh̄io mu! Ephuhu mu. Noo k̄ele mu b̄u onye ọnu-urwu; t̄eme mu buru l'echilab̄o ndu ọnu-urwu; t̄eme mu bya egude ẹnya mu h̄uma onye eze ono, b̄u Chipfu ọphu b̄u Ọkalibe-Kak̄ota-Ike!”

⁶T̄obudu iya b̄u; onye lanu l'ime serafu ono bya ephepfuta mu. Ọ b̄uru iphe, o gude l'ẹka b̄u icheku-ọku, ọku d̄u. Ọ b̄uru ákp̄a b̄e o gude kp̄atá ọku ono l'ọru-ngw̄eja Chileke. ⁷Ọ woru icheku-ọku ono daa mu l'onu; bya as̄u mu: “Lenu; a daakwaru ngu ọku l'onu. Nta-a b̄e e nwefuakwaru ngu ụta, shi d̄uru ngu n̄u; t̄eme a pf̄uwa ụgwo iphe-aji ngu l'ophu.”

⁸Noo teke mu nūmaru olu-opfu Nnajiuphu l'ẹka oopfu sù: “?Bù onye bẹ mu e-zi ozi? ?Bù onye e-jeru anyi ozi?”

Mu sù: “Wakwa mu! Zia mu iya!”

⁹Ọ sù: “Ngwa; je akaru ndu-a; sù phẹ lẹ-a: ‘Unu a-nūma nūma nta nūma imo; ọlẹ ọ tọ dudu iphe, edo unu ẹnya. Unu elee ẹnya nta lee imo; ọlẹ ọ tọ dudu iphe, unu a-hūma.’ ¹⁰Mee ndu-a g'ọkpoma nmaa phẹ agba-dagba. Liimee gẹ nchì nyì phẹ ẹrwa. Liimee g'ẹnya nyìhu phẹ. Ọdumeka bẹ ẹphe e-gudekwa ẹnya phẹ hūma; gude nchì phẹ nūma; gude ọkpoma phẹ nwùta iphe; dakọbe bya leemee g'ẹphe wekọrohu.”

¹¹Mu bya ajia sù: “Jiko Chipfu; ?bù teke ole bẹ ọo-duberu nno?”

Ọ sù: “Ọo-dù nno jasù mkpukpu ono adabyiru buru ochobu. Ọ tọ dudu onye e-buru iya nù; jasù ọlọ atuko buru okorobo ọlọ, adudu onye bu iya nù. Alì emebyishihu buru mkpọkoro alì. ¹²Sù-a; ọo-dù nno jasù teke yẹbe Chipfu e-me g'onymonye laa ẹka dù ẹnya. Laaparun alì l'ophu tọgbo iphoru. ¹³Sù l'a makwaru-a l'oke-lanu-l'uzo-iri a-phodu lẹ ndu alì ono. Ọlẹ ọ kwaphọ e -mechaa; ẹphe aburu mkpurupyata. Ọlẹ ọ bụ; ọo g'eegbutsu-je oshi achi; ọzoo oshi akpurata; upfu iya akwaa l'alì-a; bụ g'oo-mecha nweru nwa ndu a-phodu nù l'ime oshilokpa Ízurelu, bụ ndu a-duru mube Chipfu nsọ.”

Ozi, Azáya ziru eze, bụ Éhazu

7 ¹Teke Éhazu bụ eze ndu Jiuda; mbụ Éhazu ono, bụ nwa Jiótamu; Jiótamu buru nwa Uzáya; ọ buru teke ono bẹ Rezinu, bụ eze ndu Arámu; yẹle Peka nwa Remalaya, bụ eze ndu Ízurelu wu-lihuru je etsoo ndu Jierúsalemu ọgu; ophu ẹphe adudu ike lwu-kpee phẹ.

²Tọbudu iya bụ; e pfuaru iya ndu ọnu-ọlọ Dévidi sù phẹ: “Ndu Arámu bẹ ẹphe lẹ ndu Ifuremu jeakwaru atugba nanu.” Opfu ono mee; obu tea-haa Éhazu yẹle ndibe iya ophe; g'ẹka pherephere enwunga oshi, bvuru l'egbudu.

³Noo ya; Chipfu bya asù Azáya: Lufu g'unu lẹ nwa ngu, bụ Sheya-Jia-shubu swiru jepfu Éhazu l'ishi mgba-mini Okpuru-uzo-imeli; mbụ l'uzo ono, eeshije eje l'egu Ọsa-iphe ono. ⁴Sù iya: “Tọkwa ẹhu; dobekwa onwongu doo; ophu i tsukwa ebvu. G'ọ tọ bukwaru nwa icheku-ọku labo ono, anyihu anyihu ono l'e-me g'obu phedu ngu; mbụ nwa hanyihanyi, ẹphe aba; mbụ Rezinu; yẹle ndu Arámu; waa kẹ nwatibe Remalaya; ⁵kẹle ndu Arámu; yẹle ndu Ifuremu; yẹle nwatibe Remalaya chikwaru ejo idzu g'ẹphe e-shi mebyishia ngu. Ẹphe sùru-a: ⁶G'anyi je alwuta ndu Jiuda l'ogu. G'anyi je atukaa phẹ nanunanu; woru keeru onwanyi. Anyi eworu nwatibe Tabẹlu dobe g'ọ buru eze, l'ẹka ono.’

⁷“O bekwanu lẹ Chipfu, bụ Ọkalibe-Kakota-Ike sùru l'ọ tọ byadu anwu nno! L'ọ too medu ememe ophu. ⁸?Tọbudu Damasukosu bụ ishi mkpukpu ndu Arámu; onye bụ ishi ndu Damasukosu buru Rezinu? A -bya anọ

ùkporo apha ẹto l'apha ise bẹ ee-gwe ndu Ifuremu arakabya; k'ophu ephe ta asueduru aburu ọha ẹka pẹ. ⁹Su-a; ?tọ bụdu Samériya bụ ishi mkpu-kpu ndu Ifuremu; onye bụ ishi ndu Samériya bụru nwatibe Remalaya? I-pfuduru pfushia ike l'iphe, i kweru bẹ ii-mechakwaa; i tji pfuduru apfuru ophu.”

Iphe, abyabya Imanelu egoshi

¹⁰Chipfu gbeshikwa ọzo bya asu Éhazu-a: ¹¹“Pfuaru Chipfu, bụ Chileke ngu g'o mee iphe-ohubama goshi ngu; m'obeta ọ -buru l'ẹka dọ omilomi g'alì-maa; ọzoo l'ephekerephe ẹka kachaa ephekerephe.”

¹²Éhazu sukwanu: “Mu te epfukwa. Mu te ejekwa ahụ Chipfu ama.”

¹³Noo ya bụ; Azáya sụ: “Unu ngabekwa nchị; unubẹ ndu ọnu-ulo Dévidi! ?Nemadzụ, unu anọduje egburwashị ẹhu ono teke asuduru unu? ?Unu eme g'unu watafua egburwashị Chileke mu ẹhu ọo? ¹⁴Noo g'o gude Nnajiuphu l'onwiya je l'eme iphe-ohubama nū unu. Lẹ nwamgboko yee nwoke teke akwaswee a-tsuta ime nwua nwa nwoke; teme l'ọ gua ya 'Imanelu', bụ iya bụ 'Chileke nọ swiru anyi'. ¹⁵Iphe, ọo-nodu eri bụ manụ, e meru l'era-eswi; yee manụ-ẹnwu; mę ọ -maerupho iphe ree k'ophu ọo-jikaje ejo-iphe hata iphe-oma. ¹⁶Ọle o -betashia teke nwata ono a-maru iphe ree k'ophu ọo-jikaje ejo-iphe hata iphe-oma; alì ndu eze labo ono, iitsu ebvu ono a-bukotawaru ochobu.

¹⁷“Chipfu dobeakwaru teke unu eje iphe-ehuka; ndibe unu ejee iphe-ehuka; ndu ọnu-ulo nna unu pẹ ejekwapho iphe-ehuka; mbụ egube iphe-ehuka, adudu ọ-du-g'oo-ya, dujeru nū; e -shi gę ndu Ifuremu shichaa lẹ ndu Jiuda bukafu. Ndu oo-gude bya ọgu ono bụ eze ndu Asiriya.”

¹⁸O -rwua teke ono bẹ Chipfu e-ku shishishi phekuta ijiji, shiro l'ohu enyimu Ijiputu bya ephekutakwapho ẹnwu, shi l'alì ndu Asiriya. ¹⁹Ephe atuko bya akuru lẹ nkwegbo nkwegbo mkpoda-obvu; mę lẹ mgbaka mgbaka agbara-mkpuma; tuko egbudu, obvu dọ sweta; bya atuko ọgba, mini aduje kujia.

²⁰O -rwua mboku ono bẹ Nnajiuphu e-gude akiriko, ọ nataru l'azu enyimu Yufurétisu; mbụ eze ndu Asiriya; gude kpua unu ishi; kpua unu éjí ọkpa; bya akpukwapho unu éjí-agba.

²¹O -rwua mboku ono bẹ onye lanu a-kutaje nweswi yee egbu labo do-be ndzụ. ²²Ọ buru era, a-nodu agbo iya jojojo l'e-me g'onye ono nweru manụ, dọ shii, ọo-nodu eri, bụ manụ ophu e meru l'era-eswi. Mbụ l'iphe, bukpo nwa g'ephe ha phodu l'alì ono a-noduepho eri manụ, e meru l'era-eswi; yee manụ-ẹnwu.

²³O -rwua mboku ono; iphe, bukpo ẹka e shi nweru unu vayinu labo lẹ vayinu ukporo iri, e shi eretaje ẹkpa-ego ise buwaa iphe, a-du iya nū bụ ọgara-mbo yee olekarara. ²⁴Iphe, nemadzụ e-gudeje eje iya a-buru uta yee apfu; kele alì ono l'ophu bụ iphe, e-ji iya nū bụ ọgara-mbo yee

olekarara. ²⁵A -bya l'úbvú úbvú ono, bú ẹka e shi egudeje ọgu akọ akọko; nemadzú ta adudedu ike eye iya ishi; kele ọgara-mbo yẹ olekarara a-túko iya sweta. Lọ búru ẹka eswi yẹ aturu a-nodu awu-phe.

Ndu Asiriya bú ndu Chipfu gude eje ozi

8 ¹Noo ya; Chipfu bya asúkwa mu phọ-a: “Wota ẹkwo, eedeje iphe; ẹkwo, dú ọsa dee iphe; gudekwa mkpara-ẹkwo mmanu dee ya. Iphe, ii-de iya bú ‘Maha-Shalalu-Hashi-Bazu’, bú iya bú ‘Eme ẹgwegwa l’okwata; ezi kororo l’iphe onye ọzo.’ ²Li kua onye uke Chileke, bú Uráya; yẹle Zekaraya nwa Jieberekaya, bú phẹ bú ndu e gude ire phẹ ẹka g’ẹphe búru ndu ekebe.”

³Noo ya; mu bya ejepfu nyee mu. Ọ tsúta ime nwua nwa nwoke. Chipfu bya asú mu: “Iphe, ì-gú nwata ono búkwa ‘Maha-Shalalu-Hashi-Bazu.’ ⁴Kele-a; nwata ono -bya amaru eku ‘nnana’ yẹ ‘nene’ bẹ eze ndu Asiriya byakwaru bya achítakota ẹku ndu Damasúkосу yẹ iphemiphe, ndu Samériya nweru.”

⁵Chipfu byakwa bya epfuru yeru mu ọzo sù: ⁶“Eshinu ndu-a jìkaru mini ono, asọ nwa rima ono; mbú mini Shilowa; bya etechiaru ẹswa kpua eze Rezinu yẹ nwatibe Remalaya ⁷bẹ Chipfu abyakwa agbapayabẹ phẹ l’eze utso, e-shi l’enyimu Yufurétisu. Utso ono bú eze ndu Asiriya; yẹ akpabiri iya l’ophu. Utso ono a-túko ọgba iya l’ophu gbafushihu; bya atuko ọma iya sweta; ⁸sọru gborogboro sọba l’alì ndu Jiuda; awùchaa ya awùwù; bya awọchaaru iya l’ẹkpìri. Nkù iya, ọ túsaru atusa atuko uswekete alì ngu ono gbarwee; gùbe Ìmanelu!”

⁹Unu chia mkpu ọgu; unubẹ ọhamoha! G’a chíkashikwaa unu achíkashi! Unu ngabẹkwa nchì; unubẹ ndu bu l’ẹka dú ẹnya! Unu dzukọbekwa k’ọgu; ọle aa-chíkashikwanu unu achíkashi. Sù-a; unu dzukọbe k’ọgu; ọle aa-chíkashikwanu unu achíkashi. ¹⁰Unu chíkpo idzu g’unu e-me iphe! Ọle aa-gbaghashìle iya-a. Unu pfua g’unu e-me iya! Ọle ọ tọo dudu g’unu pfuru iya. Noo kele Chileke nọ swiru anyi!

Atsù Chileke ebvu

¹¹Chipfu bya ebyibe mu mkparawa ẹka iya ono bya epfuru yeru mu; lọ mu ẹka lẹ nchì sù mu gẹ mu te etsokwa ndu-a. Ọ sù mu-a: ¹²“Iphe, ndu-a sùru l’ọ bú achì ejo idzu; unu b’ekwekwa l’ọ bú achì ejo idzu! Iphe, ẹphe atsù ebvu; unu ta atsúkwa iya ebvu; ophu unu ejekwaru iya aphuru kparìkpari! ¹³Ọo Chipfu, bú Ọkalibe-Kakọta-Ike bú onye unu e-kweje l’ọ dú nsọ. Ọ búru iya bú onye unu a-tsùje ebvu; búru iya bú onye unu a-noduje aphù kparìkpari l’iphu iya. ¹⁴Tẹme ọ búru iya a-buru ẹka e doberu nsọ. Teke a byaru l’ẹka ọnu-ulo Ízurelu ono nọ; ẹphenebo bẹ ọo-buru mkpuma, ee-vukotajẹ daa iko bya abúkwarupho agbara mkpuma, e-meje g’ẹphe daa iko. A -byakwanu l’ẹhu kẹ ndu Jierúsalemù l’ọ búru igbudu yẹ

ónyà, a gbaberu phẹ. ¹⁵ Ephe a-dụ igwerigwe kpọo ya ọkpa. Ephe adaa tsukwoshihu; l'a nmakokwaa phẹ phọ l'ónyà; kpua phẹ lẹ ndzụ."

¹⁶ Iphe-a, mu epfu g'e meje-a bẹ ee-woru kechia ekechi; l'e woru ekemu ono suchia g'ọ kwaaruu ndu etsoje mu nụ. ¹⁷ Mbẹdua a-nọdu kwabẹru Chipfu; mbụ onye ono, woru iphu iya wohaaruu ọnu-ulo Jiékpọu ono. Ọ buru iya bẹ mu e-le ẹnya iya.

¹⁸ Wakwa mu baa; mu l'unwegirima ono, Chipfu nuru mu ono. Anyi bụkwa iphe, egoshi iphe; bya aburu iphe-ọhubama, duru ndu Ízurelu; mbụ iphe, shi l'ẹka Chipfu, bụ Ọkalibe-Kakọta-Ike; bya aburu Chipfu, bu ebubu l'úbvú Zayọnu.

¹⁹ Ndiphe asuje ngu g'i je l'aji l'ibe ndu aphụ ọphulenyaa mẹ ndu emeje ọmamashi; ndu bụ okpurọswa bẹ ephe aphuje; teme ephe nọdu anọduje epfu l'ime ọnu l'ime ọnu; ?buchia Chileke bẹ e te ejechidaa ajita iphe? ?Denu g'o gude ọ buru onye nwuhuru anwuhu bẹ ndu dzụ ndzụ ejejechia aji iphe?

²⁰ TUBE nvọ l'ekemu; yele iphe, mu karu g'e meje. Ọ -buru l'ephe te epfu-ndu akunyabe opfu ono; ọo ya bụ l'ephe taa ahumadu iphóró nchi-abọhu.

²¹ Aphụ a-tsuru phẹ; ẹgu emeshia phẹ ike; l'ẹka ephe tsoru alị ẹka ono aghaphe ọtorii. Teke mbà tueru phẹ phọ; ẹhu agbangahu phẹ. Ephe apalia ẹnya imeli wata ephu onye eze phẹ iphu; yele Chileke phẹ. ²² Ephe abyakwa apazeta ẹnya lee lẹ mgboko. Iphe, ephe a-huma abuerupho aphụ yee ọchii, l'a-nọdu agba nụ yee ragaraga iphe, a-nọdu eye phẹ ebvu. L'e woru phẹ chie l'ẹka gbakotaru tsukiribaa.

9 ¹ Ọle g'ọ duhabe; e -mechaa bẹ ọ tọ duedu iphe, adu ragaraga l'ẹnnya ndu nọ l'iphe-ẹhuka. Teke k'ichee bẹ ọ tọ dudu iphe, a guberu alị ndu Zebulun yee alị ndu Nafutali. Obenu l'o -be l'iphu bẹ aa-kwabẹ ndu bu eze-enyimu ntse ùbvù; mbụ ndu bu l'azụ ẹnnyimu Jiódanu azụ iya ọphuu, bụ iya bụ alị Gálili, bụ ẹka ono, ndu ọhozo bu ono.

A nwuru anyi nwaswa

- ² Sụ-a; ndu nọ l'ime ọchii
humaakwaru iphóró,
paru ẹka.
Ndu k'ono, bu l'alị ono,
gbakotaru tsukiribaa ono
bẹ iphóró nwuakwaru
ke phorokotokongu.
- ³ Ọha ono bẹ i mewaru;
ọ ka shii; bya emee;
ẹhu ka phẹ atsọ ọtso.
Ephe nọdu anọduje l'iphu
ngu ete ẹswa gẹ ndu

ete ɛswa ekpu iphe,
 ɛphe metaru l'opfu,
 ɛphe kọ́ru;
 gẹ́ ndu ete ɛswa l'ẹ́ka
 ɛphe eke iphe,
 ɛphe kwataru l'ọkwata.

4 L'ọ́ bụ-a g'i meru teke
 i mekperu ndu
 Midiyanu teke ndiche
 phọ́ bụ́ g'i chikashiru ivu-erwa,
 shi nyipyabe ndibe ngu;
 bya anyakashia mgborigwè,
 e shi swebe phe l'ukuvu;
 yee oshi,
 ndu emekpa phe ẹhu shi
 gude echi phe echachi.

5 Akpokpa ndu ojogu g'ọ́ ha,
 e gude lwua ogu;
 mekpoo iphe, bụ́ uwe,
 a rwaphuru le mee be bụ́
 iphe,
 e doberu k'akpo oku;
 mbu l'oo-du ge nkụ,
 e gude aphu-nwu oku;

6 kele a nwuru anyi nwaswa;
 mbu l'a nuru anyi nwa
 nwoke.

Ọ́ bụru iya bụ́ onye a-buru
 onye-ishi.

Iphe, aa-nodu eku iya bụ́
 “Onye mkpozi-uzo,
 du biribiri”;
 yee “Chileke,
 bu Okalibe-Kakota-Ike”;
 waa “Nna-ojejeje”;
 waa “Onye-ishi,
 eme ge nchi du doo”.

7 Abubu, oo-buru onye-ishi;
 yee nchi-odoo,
 e-shi iya l'eka a-nodu aka
 shii eje ala l'iphu;
 teme ophu o byadu

abvụ abvụbvụ.
 Oo-nọdu l'aba-eze
 ochochoroche iya,
 bụ Dévidi bụru eze.
 Oo-gude ekpe ikpe, pfuru ọto;
 waa apfubekoto mee ya
 g'o keru jingujingu;
 mbụ mee ya g'ọ nguru
 anguru e -shi lẹ teke ono
 jasụ l'ojeje.
 O bụru g'ọ phụ-tabe Chipfu,
 bụ Okalibe-Kakọta-Ike
 l'ehu l'e-me g'o mee ya.

Ndu Ízurelu akpatsu Chipfu ẹhu-eghu

8 Nnajiuphu pfuwaru iphe, ya e-me oshilokpa Jiékọpụ. Iphe ono tukoru ndu Ízurelu l'ishi; 9 k'ophu bụ lẹ ndu Ízurelu l'ophu a-makotaru iya; mbụ ndu Ifuremu; mękpoo ndu bukọta lẹ mkpukpu Samériya; ndu egudeje eku onwophe yee etsetse, shi phe l'okpoma sụ: 10 “Ụlo ono, e gude ẹja kpua ono bẹ dakposhihuakwaru nụ. Ọle anyi a-pyikwanu mkpuma kpukwaa ya. Oshi sịkamo ono bẹ e gbutsuakwaru. Ọle anyi e-wokwanuru oshi sida je adzakwaa l'ozo iya.”

11 Ọle Chipfu byaru eyeeru ndu ohogu Rezinu okpukpu-ike g'ephe je etsoo phe ogu; mbụ lẹ ndu ohogu phe bẹ ọ tugbawaru nanu doberu phe. 12 Ndu Arámu shiakwa l'uzo ẹnyanwu-awawa. Ndu Filisitayinu shi l'uzo ẹnyanwu-arịba saa onu gabala bya eworu ndu Ízurelu lwua. Ọle iphemiphe ono mechaaru; ẹhu nọdu eghuele-a Chileke egbu. O paliẹle-a ẹka g'ọ paliru iya.

13 Ọle ndu Ízurelu ta adakobeduru lwapfuta onye ono, chiru phe iphe ono; mbụ l'ephe ta achoduru Chipfu ono, bụ Okalibe-Kakọta-Ike ono. 14 Ọo ya bụ lẹ Chipfu e-bufu ndu Ízurelu ishi bufu phe odzu; sashia igu; pheshia ẹswa l'akpuru ẹnyanwu lanu. 15 O bụru ndu bụ ogerenya; yee ndu nweru ẹnya bụ phe bụ ishi obu. O bụru ndu mpfuchiru Chileke, bụ ndu ezi iphe, abudu ire-lanu bụ mgbodzu. 16 Ndu edu ndu Ízurelu eduswekwa phe edu-swe; teme ephebedua, eedu ụzo obu bụru ndu e duphuru ụzo. 17 Ọo ya bụ lẹ ndu bụ okorobyala l'alị ono te emedu g'ehu tsoo Nnajiuphu utso. Ndu enwedu nna yee unwanyi, ji phe nwuhuru bẹ ọ toọ phuduru obu-imemini. Noo kele onyemonye te emedu ele Chileke; teme onyemonye buwaru onye ẹjo-iphe; bya egudewaa onu epfu mkpokoro opfu. Ọle iphemiphe ono mechaaru; ẹhu nọdu eghuele-a Chileke egbu. O paliẹle-a ẹka g'ọ paliru iya.

18 Ẹjo-iphe, ephe eme enwu phuruphuru g'oku. Ootsu ogara-mbo etsu olekarara. Teme o tuko epfukala, nọ l'oswa l'ophu eze wowooowo;

k'ophu bú l'ire-òku iya zelihuru tsoru ẹnwuru-òku iya ala l'eli l'eli. ¹⁹Oke ẹhu-eghu Chipfu, bú Okalibe-Kakọta-Ike bẹ a-nma alì ono l'ophu swọko-swoko. O búru ndu Ízurelù a-búru manù-òku, aa-nọdu ekpu l'òku ono g'o gude bulihu ebulihu. Ophu ọ dudu onye aphujeru nwune iya obu-ime-mini. ²⁰Ẹphe e-gbu l'ẹkutara ria; ẹgu agule phe-a. Ẹphe eria k'ẹkicha; o too jikwa phe phọ. Onyemonye a-taahaa anù onye yee ya bú. ²¹Mbù lẹ ndu Manáse a-taahaa anù ndu Ifuremu. Ndu Ifuremu ata kẹ ndu Manáse. Ẹphe atùko gha iphu tsoahaa ndu Jiuda ọgu. Ọle iphemiphe ono mechaaru; ẹhu nọdu eghuẹle-a Chileke eghu. O paliẹle-a ẹka g'ọ paliru iya.

10 ¹Nshio ndu ono, anọduje atụ ekemu, apfuduru-oto; mbù ndu asù-je g'e mee iphe, egbupyata anù; ²k'ophu a taa haduru ndu ukpa engé; yee k'ophu ẹphe a-nafù ndibe Chileke, bú ndu eemekpa ẹhu iphe, rwuberu phe nù. Ndu woru ndu ji phe anọdu dobe nri eriri. Teme ẹphe nọdu ana ndu enwedù nna nfù. ³?Bù gùnù bẹ unu e-me mbọku Chileke abya unu agbaphe; mbù mbọku, mkpurupyata e-shi ụzenya bya? ?Bù onye bẹ unu a-gbapfu g'ọ dzoo unu? ?Bù awe bẹ unu a-ha ẹku unu? ⁴O tọ dukwa iphe, aphodu nù; gbahaa g'ẹphe kpua unu lẹ ndzù; lọo unu wuru-wuru l'alì; ọzoo ẹphe egbua unu egbugbu. Ọle iphemiphe ono mechaaru; ẹhu nọdu eghuẹle-a Chileke eghu. O paliẹle-a ẹka g'ọ paliru iya.

Ikpe, Chileke e-kpe ndu Asiriya

⁵“Nshio gùbe Asiriya; mbù gùbe ọha ono, bú ngu bú oshi-mpalẹka, mu egudeje egoshi ẹhu-eghu mu. Teme ọ búru l'ẹka ngu bẹ mgboro oke ẹhu-eghu mu ono nọ gẹdegede. ⁶Mu a-chiru Asiriya yeru ọha, amadu mube Chileke. Mbù lẹ mu e-woru iya nwuaru ọha, akpatsuje mu ẹhu-eghu; g'ẹphe kwaa ya ọkwata kee iphe phe l'ọha. Ẹphe azoo phe tolitoli g'onye azoka ẹpuchi lẹ gbororo.”

⁷Obenu l'ọ tọ búdu iphe ono dú yẹbedua l'obu. O tọ búduro iphe ono bú iphe, ọori. Iphe, bú uche iya bú emebyishi iphe emebyishi; g'o mee g'ọha, dú igwerigwe chíhu. ⁸O -nọdu l'ootu onwiya ẹpha sù: “?O kwa lẹ ndu-ishi ojogu mu bukota eze eze? ⁹Mkpukpu Kaluno ?tọ búdu gẹ mkpukpu Kakemishi dú bú g'ọ dú? O búru gẹ mu meru mkpukpu Hamatu bú gẹ mu meru mkpukpu Apadu; búru gẹ mu meru mkpukpu Samériya bú gẹ mu meru mkpukpu Damasukosu. ¹⁰Eshinu ẹka mu duru ike gudechaa alì-eze ndu agwo ọbvù; mbù alì-eze ophu nshi phe ka kẹ Jierúsalemù yee Samériya shii; ¹¹?buchia Jierúsalemù yee nshi nshi, dú iya nù bẹ mu ta anudu aphù ẹgube ono, mu nuru ndu Samériya yee iphe, ẹphe agwa ono?”

¹²Nnajiuphu -meghechaephò iphe, oome l'ẹhu úbvú Zayonu yee Jierúsalemù bẹ oo-pfu sù: “Mu a-hù eze ndu Asiriya ahùhù; kẹle o lekeberu ẹnya gude obu iya eku onwiya; bya egude ẹnya etse etsetse.

¹³“Noo kẹle ọ sùru: ‘Oo ike okpu nkemu bẹ mu gude mee iphe-a, mu meru-a. O búru mmamiphe mu bẹ mu gude mee ya; opfu l'iphe edoje

mu ɛnya. Oke-alì ɔnwu-eliphe bẹ mu meru ɔphu oke adɛdu l'ɛka o shi dɛ. Mu kwaa ɛku phẹ l'ɔkwata; bya emekpee ndu eze phẹ kele mu gbaru mkparawa. ¹⁴Oo g'aachitaje ɛpfune ɛnu-a bu gẹ mu tɔfuru ɛka chita ɛku ɔhamoha. O buru gẹ nemadzɔ achikoje ɛkwa-iphe, a gbagharu agbagharu-a bu gẹ mu chikoberu ndu alì, shi ɛkameka l'ophu. Ophu ɔ dudu g'ɔ ka mma l'oo ndu alì ɛka lanu chiru nkù kpa; ɔzokwanu jaa ɔnu too; ɔzoo raa pfurii.' ”

¹⁵Obenu lẹ Chipfu suru-a: “Ogbunku; ?oo-ku onwiya kughata onye gude iya egbu iphe tɔ? Tɔ mma, egudeje ekwobu oshi ?oo-wata eku-ru onye gude iya nu onwiya? G'ɔ bu lẹ mgborígwè a-dù ike ngalia onye apaliye iya nu; ɔzokwanu g'oshi-mpaleka wata etu onwiya ɛpha sù lẹ ya ta abɛkwa oshi.”

¹⁶Oo ya bu lẹ Nnajiuphu; mbu Chipfu, bu Okalibe-Kakota-Ike l'a-chiru ejo iphe-ememe yeru ndu ojogu iya ono, gbaru mkparawa ono. O buru l'ime ɛhu phẹ bẹ oo-mecha phɛ-nwua o-nwu-phuruphuru ɔku. ¹⁷Iphóró ndu Ízurelu a-buru ɔku; mbu l'onye nsɔ kẹ ndu Ízurelu a-buru ɔku, enwu enwunwu. O buru eswe ujiku lanu bẹ oo-nwu phoophoophoo kekota ɔgarambo; yẹ ɔbyambvu, dukota iya nu. ¹⁸Eguru ono, ɔswa iya dù ono; yẹ alì phẹ ono, dù ree ntumatu ono bẹ oo-mecha mebyishichaa l'ɔ laa pyetee g'onye iphe eme; ¹⁹k'ophu bu l'oshi, a-phodu l'oke ɔswa iya ono a-dù ole-mole shingushingu kpo; k'ophu nwatanshi e-dekota iya l'ekwo.

²⁰O -rwua teke ono bẹ nwa ndu phoduru nu l'ime ndu Ízurelu; mbu nwa ndu ophu wafuru nu l'onu-ulo Jiékopu ta akpɔedu obu eyeru ndu ono, echije phẹ pyaapya ono. O buru onye ɛphe a-kporu obu yeru ɔkpo-be eyeru a-buru Chipfu; mbu Onye nsɔ kẹ ndu Ízurelu. ²¹Nwandu ono, phoduru nu ono e-mechaa lwa; mbu lẹ nwa ndu a-phodu l'onu-ulo Jiékopu e-mechaa lwa lwapfuta Okalibe-Kakota-Ike ono, bu Chileke. ²²Su-a; mbu l'a makwaru-a l'unube Ízurelu ha g'eja, dù l'aguga ɛnyimu. O lẹ ɔ bu-a nwuphodu nemadzɔ e-mechaa lwa. Ola-l'iswi phẹ bẹ a tubuwaru l'onoo g'oo-dù. G'oo-me iya ono a-buru l'orwuberu iya. ²³O buru Nnajiuphu; mbu Chipfu, bu Okalibe-Kakota-Ike l'e-gude ɛka iya mebyishia ɔhamoha obu l'ophu, bu iphe, a tubuwaru l'oo-me phẹ.

Aphu, Chipfu a-nu ndu Asiriya

²⁴Oo ya bu lẹ-a; wakwa iphe, Nnajiuphu, bu Chipfu ophu bu Okalibe-Kakota-Ike eepfu baa: “Unubẹ ɔnwu mu, bu ndu bu l'úbvú Zayonu; unu ta tsukwa ndu Asiriya ebvu; mbu ndu ono, anɔduje echi unu oshimpaleka ono. Teme ɛphe nɔdu apaliye mgboro echi unu gẹ ndu Ijiputu shi echije iya unu-a. ²⁵O tɔ dukwa g'oo-no-beru; ɛhu eghubuhu mu eghu l'opfu ɛhu unu. Mu eworu oke ɛhu-eghu mu ghaaru ɛphebedua woru phẹ mebyishia.” ²⁶Chipfu, bu Okalibe-Kakota-Ike l'e-gude ɛchachi chia phẹ gbaagbaa egube ono, o chiru iya ndu Midiyanu lẹ mkpuma Orebù.

Mgboro iya be ọo-palikwapho maaru mini egube ono, o meru iya l'ali ndu Ijiputu ono. ²⁷Le mboku ono be ee-zi unu ivu ehu phe g'o to tukoru unu l'ukuvu. La nyafu iya unu g'o to tukuehe unu l'olu. Iphe ono, e gude kegbabe unu ono agbabuhu kele unu pawaru okporokpo.

Ndu Asiriya abya ogu

²⁸Ndu ohogu ono bahuwaru mkpukpu Ayatu shita je aghabua mkpukpu Miguronu. O buru eka ephe jeru je akube iphe phe bu le mkpukpu Mikumashi. ²⁹Ephe gbaa gorogoro nyighatakota mgbaka mgbaka ubvu epfuje su: "Eka anyi a-kwa bukwa le mkpukpu Geba." Ndu mkpukpu Rama wata anma pyaapyaapya. Ndu mkpukpu Gibiya, bu eka Solu shi buru; ye okpa l'oso gbala. ³⁰Unu chia mkpu; unube ndu mkpukpu Galimu! Unu ngabekpodapho nchi; unube ndu mkpukpu Layisha! Unu kaa; unube ndu mkpukpu Anatotu! ³¹Ndu mkpukpu Madumena be agbawaa oso. Ndu mkpukpu Gebimu nodu edomishiwaa onwophe. ³²O buru mboku ono be ephe e-jeta je agburu le mkpukpu Nobu. Ephe egbu eka swikiswiki l'iphu ubvu Zayonu ono; mbu l'eli ubvu Jierusalemu.

³³Lewaro; Nnajiuphu; mbu Chipfu, bu Okalibe-Kakota-Ike e-gude okpehu, paru eka kwafu ekali-oshi ono. Ee-gbutsu oshi ono ndu ophu duje phengara phengara; mbu mee; ndu ophu du ogologo alwazeta ali. ³⁴Lo gude ogbunku gbukaa epfukala keze oswa ono. Oo ya bu l'oswa ono, no l'ubvu ubvu Lebanonu ono l'adaa l'iphu onye ono, bu Okalibe-Kakota-Ike ono.

Ekali Jiesi

11 ¹Mkpirikpu upfu-oshi ono, bu Jiesi l'e-rwuta irwu. O buru l'ogbarabvu iya be ekali e-shi nyikata.

²Unme ke Chipfu a-nodu iya l'ehu; mbu Unme, emeje g'a maru iphe; bya abukwarupho Unme, emeje g'iphe doo enya;

Unme mgbazi; bya abukwarupho Unme, emeje g'ike du; Unme, emeje g'a nwuta iphe; bya abukwarupho Unme, emeje g'a tsu Chipfu ebvu.

³O buru iphe, a-duje iya ree bu g'a tsuje Chipfu ebvu.

- Ọ tọ bụkwa iphe,
 o gude ẹnya hụma bẹ
 oo-gudeje ekpe ikpe;
 ọphu ọ bụkwa iphe,
 ọ nūmaru lẹ nchị bẹ
 oo-gudeje kpebua iphe,
 dụ k'ekpebu.
- 4 Ọ chia iphe, meru nū bu
 l'oo-kpeje ndu adudu
 g'ọ dụ phẹ ikpe, pfuru ọto.
- Ọ bụru ikpe,
 pfuru nhamunha bẹ
 oo-gudeje kpebua ikpe
 ndu ụkpa l'eliphe-a.
 Eliphe l'ophu bẹ oo-gude
 mgboro,
 dụ iya l'onu chia gbaagbaa.
- Ọ bụru unme,
 ọ turu atutu bẹ oo-gude
 phua ndu ejo-iphe teerii.
- 5 Apfubekoto a-buru iphe,
 oo-ke l'upfu.
 Apfushi ike, l'iphe,
 o pfuru aburu iphe,
 ọo-tubutajẹ uwe iya l'upfu.
- 6 Ejo-nkuta-ọswa bẹ oo-me;
 yẹe unwu aturu akpaahaa
 eghirigha.
 Agụ yẹe eghu adọaha l'ẹka
 lanụ.
 Nweswi; mẹ nwoduma;
 mękpoo anụ,
 atsujẹ onwiya ebà a-tuko
 akpa eghirigha.
- Ọ bụru nwatanshiji bẹ
 a-nọduje eche phẹ nụ.
- 7 Ne-eswi; yẹe ejo anụ-egbudu,
 bụ biye a-nọdu ata nri
 eghirigha.
 Unwu phẹ atuko adọ l'ẹka lanụ.
 Teme oduma aburu anụ,
 a-nọdu ata ẹswa g'oke-eswi.

⁸ Nwa, angü ẹra a-nọduje
l'ọnu ẹnu óghù ebvu ebvu.
Nwatanshii, a mífúwaru ọnu
l'ẹra ewojeru ẹka ye
l'ẹnu ogiji.

⁹ Iphemiphe ono ta adúdu
ọphu emeka nemadzú iphe;
ọphu ọ búro k'emegbu l'úbvú,
e doberu mu nsọ l'ọphu;
kele ọo gẹ mini do-jiru
ọma ẹnyimu-a bú g'eliphe
l'ọphu a-madzuru Chipfu.

Alwalwa ndu a kpuru lẹ ndzú

¹⁰ O -rwua teke ono bẹ ọgbarabvu Jiesi ono a-búru ẹkwa-ọhubama k'unwu-eliphe. Ọ búru iya bẹ ọhamoha a-nọduje agba agbapfu; ọkpoku iya a-dú akpabiri l'ẹnya. ¹¹ Mbú l'o -rwua mbọku ono bẹ Nnajiuphu a-ma-chi ẹka iya ọzo k'ugbo ẹbo nafutafuchaa nwandibe iya ndu ọphu a-phọdu l'alì ndu Asiriya; mẹ l'alì ndu Ijiputu; mẹ l'alì Paturọsu; mẹ ndu ọphu e-shi l'alì ndu Kushi; mẹ ndu ọphu e-shi l'alì ndu Elamu; mẹ ndu ọphu e-shi l'alì Shina; mẹ ndu ọphu e-shi lẹ mkpukpu Hamatu; mẹ ndu ọphu e-shi-gba l'ọha, bukube eze-ẹnyimu. ¹² Ẹkwa-ọhubama bẹ ọo-paliru ọhamoha; bya atuko ndu Ízurelu, a kpuru lẹ ndzú chitachaa; l'o rwukọbe ndu Jiuda ono, a tukuru nanunanu ono. Ẹka oo-shi rwukọbe phe bú lẹ nkulahú eliphe ọzo ẹno ono. ¹³ Okophoo ndu Ifuremu e-phukashihu; l'e mee gẹ ndu ọhogu ndu Jiuda chihu. Mbú lẹ ndu Ifuremu te ekoeduru ndu Jiuda okophoo; ọphu ndu Jiuda adueduru ndu Ifuremu ẹhuka. ¹⁴ Ẹphe e-zi phaa je ndu Filisitayinu bu l'ọzo ẹnyanwu-ariba swokoswoko. Ẹphe abyakwapho erwukọbe onwophe je akwagwoo ndu bu l'ọzo ẹnyanwu-awawa. Ẹphe a-zú ndu Edomu yee ndu Mowabu gburumu. Ẹphe emee ndu Amonu ẹphe anodu phe l'ẹka. ¹⁵ Chipfu l'e-me g'ọ tahu; mbú nkulahú eze-ẹnyimu Ijiputu. Ọ búru pherephere, ekpo pharaphara bẹ oo-zi gude phee ẹka l'eli eze nggele Yufurétisu. Oo-me iya l'ọ ta-bushihu atabushihu; tabuha uzi ẹsaa; k'ọphu nemadzú a-zoje gedengu gedengu ghata iya. ¹⁶ Nwandibe iya ndu ọphu phoduru nu, e-shi l'alì ndu Asiriya alwa bẹ aa-toğboru oji, a-dabyiru ke phorokotokongu; egube ono, a toğboru iya ndu Ízurelu teke ono, ẹphe shi l'alì ndu Ijiputu alwa ono.

Ebvu ekele

12 ¹Su-a; mbọku ono bẹ
ii-su:
“Mu e-kele ngu ekele gube

- Chipfu; keḷe mu shi mee;
 ẹhu nọdu ẹghu ngu ẹghu.
 Ọle nta-a bẹ ẹhu-ẹghu ngu
 jizetawaru;
 ị bya awata mu adu obu.
- 2 Lenu; ọ kwa Chileke bu
 onye ndzota mu.
 Mu a-kporu obu ye l'eka ọ nọ;
 ọphu ndzu agudu mu;
 keḷe Nnajiuphu,
 bu Chipfu ono bu ọkpehu
 mu bya aburu iya bu
 olu ebvu mu.
- Teme ọ bya nta-a bya aburu
 onye dzoru mu nu.
- 3 Ọ kwa ẹhu-utso bẹ ii-gude seta
 mini lẹ welu ndzota.”
- 4 Noo mboku, ịi-wata epfu su:
 “Unu kele Chipfu ekele;
 unu raku epha iya!
 Unu mee g'ohamoha
 madzuru iphe-oma,
 o meru!
 Raa ya arara l'epha iya paru
 eka!
- 5 Gu-ku Chipfu ebvu ekele;
 keḷe iphe-oma,
 o megbaberu nyiberu
 anyibe.
 Unu mekwapho ge mgboko
 l'ophu madzuru iphe ono,
 o megbaberu ono!
- 6 Unube oha,
 bu l'ubvu Zayonu;
 unu tua uzu ẹhu-utso;
 keḷe onye ono,
 nọ l'echilabo unu ono
 paru eka;
 mbu Onye Nso ke
 ndu izelelu.”

Epfu opfu ẹhu ndu Bábilónu

13 ¹Ọwaa ẹ́ ọzi, Chileke ziru zidoru ndu Bábilónu. Ọ ẹ́ru onye o ziru iya ẹ́ Azáya nwa Emoẓu.

²“Palia ẹ́kwa-ọhubama l'eli úbvú, dabyiru swachamu. Nọdu l'ẹ́ka ono chiaru pẹ́ mkpu. Pheeru pẹ́ ẹ́ka g'ẹ́pẹ́ shia ọnu-uzo baḥu l'ẹ́ka ndu a maru epha pẹ́ nọ. ³Mbeḍua, ẹ́ Chipfu tuwuru ekemu nẹ́ ndibe mu, ẹ́ ndu mu doru nsọ; bya achikobekwapho ndibe mu, ẹ́ ndu okpehu du g'ẹ́pẹ́ je egoshi l'ẹ́hu eghu mu eghu; mbe ndu ẹ́hu anọduje atso lẹ́ mu paru ẹ́ka.”

⁴Numakpodapho uzu, aatu l'eli úbvú; g'ikpoto ndu paru ẹ́ka apaa. Numakpodapho wọwoowo, ohamoha atu; g'oha, eme ndzuko. Ọ kwa Chipfu, ẹ́ Okalibe-Kakota-Ike achikobe ndu a-lwuru iya ọgu. ⁵Ndu ono shi ẹ́ka du ẹ́nya; epe shi l'ẹ́ka igwe jeberu. Ọ ẹ́ru Chipfu; yele ndu bu ngwoḡu, o gude egoshi l'ẹ́hu eghu iya eghu be l'eme g'ọ bya emebyishikota ndu alẹ́-a l'ophu.

⁶Unu kwaa idemini ẹ́kwa; kele eswe Chipfu duwaa ntse! Mbọku ono a-ẹ́ru eswe ala iphe l'iswi. Ọ ẹ́ru l'ẹ́ka onye oo-shi ẹ́ Okalibe-kangokotaru-nu. ⁷Oo ya ẹ́ l'ẹ́ka onyemonye a-tulwahu. Obu eterwuhu onyemonye. ⁸Epe atsuhu ebvu; ẹ́hu aphuhu pẹ́ uphu; l'oburu iphe-ẹ́huka byaru pẹ́ ge nwanyi, ime eme. Onyemonye adu nwibe iya akpabiri. Epe agbanwube iphu ẹ́huka ẹ́huka. ⁹Lekwa lẹ́ mbọku ke Chipfu abyaakwaa. Mbọku ono a-ẹ́ru eswe omeliwe; bya aburu mbọku oke ẹ́hu-eghu. Noo mbọku, ee-me ge mgboko l'ophu ẹ́ru ochobu. Laa-tuko ndu iphe-ẹ́ji, nọ iya nẹ́ mebyishia. ¹⁰Mbọku ono be kpokpode, nọ l'igwe g'ọ ha te ekekwa paapaapa. Enyanwu ekeru l'ẹ́ka ọwataje wata agba ọchii. Ophu onwa echidu ilile.

¹¹Chipfu suru-a: “Mu a-nu eliphe l'ophu aphu iphe-ẹ́ji iya. Mu anu ndu ejo-iphe aphu ejo-iphe, epe eme. Mu emee ge ndu anọduje aba abaa te ekuhe onwophe; bya ekuzeta ndu eku onwophe l'okponu okponu pẹ́. ¹²Mu e-me ge nemadzu du uko lẹ́ mgboko; mbe g'ọ ka okpobe mkpola-ododo adu uko. Lo kakwapho mkpola-ododo ophu shi l'alẹ́ Ofi adu uko. ¹³Mbe-a; mu e-me g'imigwe l'ophu nmahu jijijijii. Eliphe anmaa jijijijii jasọ okporiberu l'ẹ́ka o shi nguru. Ọ ẹ́ru iphe, a-kpa iya nẹ́ bu oke ẹ́hu-eghu ono, ẹ́ ophu a-nodu eghu mube Chipfu, ẹ́ Okalibe-Kakota-Ike l'eswe oke ẹ́hu-eghu mu ono.

¹⁴“Ọ ẹ́ru ge mgbada, aachi ọso agbaje-a; ọzoo g'aturu, enwedu onye eche iya nẹ́ agbakashiḥuje-a ẹ́ g'onnyemonye a-nodu agba agbapfu ndu epe l'ephe ẹ́. Mbe l'onnyemonye a-ze l'oso agba ala ẹ́ka a nwuru iya. ¹⁵Onnyemonye a -humakwanuru ahuma; aa-nmafua ya epho. Teke o ẹ́ru onye e guderu egude; ọola l'ogu-echi. ¹⁶Unwegirima pẹ́ be aa-nodu l'iphe pẹ́ gbubushia mkpirikpu mkpirikpu. La kwaa iphe pẹ́ l'okwata; phatoshia unwanyi, epe alu alulu.

17“Lekwa; ọ kwa ndu Midiya bẹ mu a-kpatsu g'ẹphe jepfu phẹ ọgu. Ndu adudu iphe, ẹphe guberu mkpọla-ọchaa; ọphu mkpọla-ododo agudu phẹ ẹgu. 18Apfu phẹ e-yebushi unwokorobyia phẹ eyebushi. Ọphu imemini akpuru-iphe, shi l'ẹpho a-dudu phẹ. Ephe -gude ẹnya huma unwegirima nshii; ẹphe ta aphuduru phẹ obu-imemini. 19Tẹmanu-a; alì ndu Bábilonu ono, bụ ẹka e gude akwabẹ alì-eze ọzo ùbvù ono; mbụ ẹguru alì ono, bụ iya meru ndu Bábilonu; ẹphe nọdu eku onwophe ono; alì ono bẹ Chileke e-mechaa mebyia g'e mebyiru Sodomu yẹ Gómóra. 20Ọ tọ bubaeduru ẹka ee-buru eburu jasụ l'ojeje. Ọphu nemadzu abyadu ebuba l'ime iya; e -shi l'ogbo sweru ogbo. Ọphu ọ dudu ndu Arabu akpọbe iya ọlo-ekwa; ọphu ndu eche aturu adọbedu iya aturu phẹ. 21Iphe, a-doru iya nụ a-buru anụ, ebu l'echiegu. Ọ buru nkuta-oswa bụ iphe, akujeru l'ulo, wushiru iya nụ. Mgbashi-ujiku akukwaru iya phọ. Eghu-oswa apfu-phẹ karagidingu karagidingu l'ime iya. 22Achi-anmabu a-noduje l'ulo phẹ, a kpushiru ike ara ntumatu. Nkuta-oswa akuru l'ulo phẹ ndu ọphu shi buru ẹguru ọlo. Ọzo bụ lẹ teke ee-me iya iphe ono dūwaa ntse; mbụ l'ọ tọ nọdu ọdu l'ọ nwua.”

14 1Chipfu a-phuru Jiékpọ obu-imemini k'ọphu bụ l'oo-mechaa họtá Ízurelu ọzo; mee g'ẹphe buru l'alì phẹ ọzo. Ndu lwaru alwalwa ayikwaru iya phọ. Ndu lwaru alwalwa ono ẹphe l'onu-ulo Jiékpọ ebua ẹghirigha. 2Ohamoha l'e-duta phẹ dulata l'alì ẹphebe ndu Ízurelu gẹdege-de. Ndu Ízurelu ono a-buru ndu e-nweru ohamoha; mee phẹ; ẹphe aburu phẹ ohu: unwoke l'unwanyi l'alì ọphu Chipfu nuru phẹ lonwiya. Ephe aghaa ọhu kpua ndu ono lẹ ndzu; mbụ ndu ono, shi kpua ẹphebedua lẹ ndzu ono; buru ndu a-nodu elekota ndu shi emekpa phẹ ẹhu.

Adada eze ndu Bábilonu

3Chipfu e-me g'obu tushihu unubẹ ndu Ízurelu l'aphu-a, unu erigba-be-a; mẹ iphe-ẹhuka-a, unu ejegbabe-a; mekpoo ozi mkponwu-ẹhu-a, e keru unu-a. 4Noo teke unu a-wata aturu eze ndu Bábilonu phukuku sụ: Onye-a, bụ nwa-mmekpa-ẹhu-a gbẹ mekwadupho bugengu! Ehu gbẹ ghubuhuwa iya nụ eghu! 5Chipfu gbajishiwaru mgborígwè, ndu ejo-iphe ono shi swebe phẹ l'olu; mekpoo oshi, ndu-ishi shi gude echi phẹ ẹchachi; 6bụ ndu shi egudeje ẹhu-eghu echi ndiphe iphe nchipyabẹ; mbụ l'ẹphe gude ẹnya, ata phẹ kpitikipiti lwu-kpee oha, dū igwerigwe; ọphu ọ dudu onye egbo phẹ nụ. 7Eliphe l'ophu bẹ atutawa unme nta-a. Teme nchì dūwaa phẹ doo. Olu-ebvu gbufu phẹ l'onu. 8Mbụ l'oshi payinu; mekpoo oshi sida k'úbvú úbvú Lébanonu bẹ ẹhu tukocharu atso l'opfu ẹhu ngu. Ephe tuko epfu sụ: Nta-a, e wozewaru ngu-a bẹ ndu ekwo oshi ta abyaedu anyi ekwotsushi.

9“Alì-maa kwagebewaru akwagebe g'ọ gba ngu ndzuta mẹ ì -lashia. O doziwaru unwumaa, l'abya ngu ndzuta; mbụ maa iphe, bukpo ndu ono, shi

bùru ishi l'eliphe-a. Ndu ono bẹ o meru g'ẹphe gbẹshichaa agbẹshi l'aba-eze phe; mbù ndu shi bùru eze ohamoha. ¹⁰G'ẹphe ha l'e-yeru ngu onu sù ngu: 'Gùbedua kwaphọ mechaaru bya aduhukwa edzu g'anyịbedua; mbù bya abuhukwaru iphe, anyi bù? ¹¹Akpabiri ngu ono g'ọ ha bẹ e nwuwaru ye l'alì-maa; yẹle oha-gengugengu ogumogu ngu onoya. Èkà bụwaa iphe-azẹe, ì zẹ l'eli. Mgbashiride bụwaru ẹkwà, ì phùshiru l'iphe-azẹe ngu obru.' ”

¹²Lewarọ g'i shi l'imigwe daa l'alì; gùbẹ kpokpode nchi-abọhu; mbù gùbe nwatibe onma-ẹwa-utsu! E chitsuwaru ngu chiru ngu ye l'eliphe; mbù gùbẹ onye shi byapyabẹ ohamoha l'ophu! ¹³I pfuwaru l'ime okpoma ngu sù: “Mu e-kuli onwomu kuba l'imigwe. Mu a-pali aba-eze mu g'ọ ha l'eli l'eli; g'ọ kakọta kpokpode kẹ Chileke l'eli. Mu e-je anmakoru l'eli úbú-ndzukọ ono, nọ l'uzo isheli ono. ¹⁴Mu a-tukoeppo akpaminigwe l'ophu nyighakọta je anọdu; mee onwomu gẹ mu ha gẹ Okalibe-kakọta-shii.”

¹⁵Obenu l'a byazeru ngu byaru ngu ye l'alì-maa; l'ohulohu nsukutu ono.

¹⁶Iphe, bù ndu humaru ngu nù a-gbẹ lerwebaa ngu ẹnya elerwe; ẹphe awata arì oriri ẹhu ngu sù: “Tọ bụnaa onye-a bù onye ono, meru mgboko; ọ nmahu jiiijiii-a; mbù onye ono, akpabiri iya guderu alì-eze l'ophu? ¹⁷?Tọ buna iya bù onye ono, meru mgboko l'ophu; ọ dọ g'echiẹgu; tsupya-shiru mkpukpu, a kpùshiru ike, nọ lẹ mgboko; ophu ọ dudu ndu mgboko, ọ kpuru lẹ ndzù, duru ophu o kweru g'ẹphe la ibe phe-a?”

¹⁸Iphe, bukpuo ndu shi bùru ndu-eze, ohamoha l'ophu bẹ e mekọta-ru ona lia. Onye ophu nonu l'ooze l'ime ilu nkiya. ¹⁹Obenu lẹ gùbedua bẹ a chifuru l'ilu nkengu; tuphaa ngu g'onye gbataru ekali-oshi tuphaa. A chikoo ndu e gburu egbugbu tupyabe ngu; mbù ndu e gude ogu-echi nmafushia ẹpho; ndu wuru laa lẹ mkpuma ophu nọ l'alì-maa. Oo g'odzu, a zoru pyakapyaka aduje-a bù g'ì dọ. ²⁰E tee lidu odzu ngu g'e liru kẹ ndu ophu; kẹle ì mebyishiwari alì ngu; bya egbua ndibe ngu pyaapya. Awa ndu ẹjo-iphe bẹ a ta abyakwa ephotaje ephota ophu ozobaa. ²¹G'e dozia ẹka ee-dobe unwu iya gbushia gbudoru iphe-ẹji, nna phe oche metaru. G'ẹphe te ejekwa agbalihu kẹ gẹ mgboko bùru okiphe phe; ẹphe egude mkpukpu lẹ mkpukpu phe buchishia eliphe l'ophu.

Chileke e-mebyishi Babilonu

²²Lẹ Chipfu, bù Okalibe-Kakọta-Ike pfukwaru sù: “Gẹ mu bya agbalihu tsoo Babilonu ogu; mbù lẹ mu e-me g'ẹpha Babilonu chihu; yẹle ndibe iya, wafuru nù; mekpoo awa iya yẹle oshilokpa iya. ²³Mu e-me alì ono l'ophu g'ọ bùru alì ẹbyi. Mu emee ya l'ọ bùru alì ọda. Mu e-gude ọla-l'iswi zaa phe l'ẹza.” Noo iphe, Chipfu, bù Okalibe-Kakọta-Ike eepfu.

Chileke e-mebyishi Asiriya

²⁴Chipfu, bù Okalibe-Kakọta-Ike ribuwaru iya l'angu sù-a: “Tororo bù opfu bù l'ọo gẹ mu tumberu g'iphe dọ bù g'oo-dọ. O bùru iphe, mu pfuru

bù iphe, e-me nù. ²⁵Mu e-gwekwa ndu Asiriya uji; mbù ndu Asiriya ono, nò l'alì mu ono. Ndu òphu nò l'eli úbvú iya bè mu a-zò tólitoli nwufu phẹ. Òphu ndibe mu evuèdu ivu èhu phẹ. Òphu mkpa phẹ adùedu phẹ l'ukuvu.” ²⁶Nokwa gẹ mu chíru l'òo-dùru ùnwu-eliphe l'ophu bù ono. Nokwa èka njo, mu machìru l'èhu òhamoha l'ophu. ²⁷Noo kele òo Chipfu, bù Òkalibe-Kakòta-Ike tuburu l'onoo g'òo-dù. Òphu ò dükwa onye sùru agbanwe iphe, o pfuru. Ò machiakwaru èka; òphu ò dükwa onye sùru iya esela èka azù.

Chileke e-mebyishia Filisitayinu

²⁸Ò kwa l'apha eze ono, bù Éhazu nwùhuru bè mu natarù ozi-a. Ozi òbu sùru-a: ²⁹“Unu te etekwa èswa; unubẹ ndu Filisitayinu g'unu ha; opfu lẹ mgboro, e chiru unu gbajihuru; kele iphe, e-shi l'agwo ono futa bukwa ogiji. Akpuru, òo-mita buru òkpontu, apfu saa saa. ³⁰Noo teke onye kachaa akpa nri l'ime ndu akpa nri a-huma nri riaha. Ndu adudu g'ò dù phẹ azẹ pyakoo; ò tọ dudu iphe, byaru eme phẹ nù. Obenu l'ogbarabvu nke-ngu bè mu e-gude òkpa-nri mebyishia. L'o woru nwa ndibe ngu; nwa ndu òphu phòduru nù phùshikota tẹrii.

³¹“Chia mkpu gube oguzo! Taa uzu-èkwa unubẹ mkpukpu ndu Filisitayinu l'ophu! Unubẹ ndu Filisitayinu g'unu ha; unu tuko zashihu azashihu; kele enwuru-òku shikwa l'uzo isheli akpu tuntuutuu abya. Òphu ò dudu onye a-nodu eje nkinyi iya l'ogbo-ogu phẹ.”

³²?Bù onu gunu bè ee-yeru ndu-ozì, shi l'òha onoya? “Onu, ee-ye bù lẹ Chipfu meakwaru Zayonu; ò nguru anguru. Ò buru l'ime iya bè ndibe iya, aakpa èhu a-gbaba je eze ndzù.”

Chileke e-mebyishi Mówabu

15 ¹Òwaa bù ozi, Chileke ziru zidoru ndu Mówabu. Mkpukpu Aru, nò l'alì ndu Mówabu buakwaa mkpurupyata. Ò buru enyashi bè e gude mebyishia ya. Mkpukpu Kiru, nõkwapho l'alì ndu Mówabu buru mkpurupyata. Ò buru enyashi bè e gude mebyishia ya. ²Ndu mkpukpu Dibonu wuru jeshia l'ulo agwa phẹ; èka ephe meru; ò ha l'eli jeshia akwa èkwa. Mbù lẹ ndu Mówabu atù uzu-èkwa ndu mkpukpu Nebo; yee kẹ Medeba. Onyemonye kpushiru ishi bya akpushia éjí-agba. ³Ndu eje lẹ gbororo yegbaa uwe-aphu. Ndu nò l'oma ulo-eli mẹ ndu kuru l'edupfu tuko atù uzu-èkwa; arwaphu onwophe l'alì akwa ntumatu. ⁴Ndu mkpukpu Heshibonu mẹ ndu mkpukpu Eleyale tuko echi mkpu k'ophu ndu nò lẹ mkpukpu Jiahazu anù olu phẹ. Noo g'ò gude ndu ojoğu ndu Mówabu chishia mkpu; kele meji tsukahuru phẹ. ⁵Uzu èkwa atù mu l'obu l'iswi èhu Mówabu; kele ùnwu iya, eje phururugbada agba oso agbarwuchaa mkpukpu Zowa; ndu agbarwua mkpukpu Egulatu-Shelishiya. O nwechaaru ndu òphu jerwuchaaru mkpukpu Luhiti. Ephe -nodu eje; ephe

akwa ntumatu. Teke ephe tsoru uto ala mkpukpu Horonayimu be ephe no l'uzo raa ekwa ola-l'iswi phe ono. ⁶Mini, no le nggele Nimurimu tashihuru; eswa nwulwashihu. Egbudu kposhihu nku; ophu o duedu iphe, du oyii, phoduru iya nu. ⁷Eku, ephe kparu akpakpa kube; mbu akanya, ephe seru dobe be ephe e-vuta je adaghata nggele oshi wilo; ⁸kele oji-leta togbo, ephe echi agba Mowabu mgburugburu. Uzu-ekwa, ephe atu rwuchaaru mkpukpu Egulayimu. Teme erwubvu phe rwuchaa mkpukpu Biye-Elimu. ⁹Mini mkpukpu Dimonu be mee jiwari ejiji; obenu le mu emebakwaaro mkpukpu obu, bu Dibonu iphe, ka njo. Mbu le mu a-chiru oduma ye go tagbushia ndu shi iya nu agba oso ndzu phe; tagbushikwapho nwa ndu ophu phoduru l'ali ono l'ophu.

16 ¹Ndu Mowabu chitaru nwaturu go buru iphe-oku; chiru je anu eze ndu ali-a. Mbu l'e shi le mkpukpu Sela chiru iya je aghaa echiogu tughua jeshia l'ubvu Zayonu je achije ya ndu bu iya nu. ²O kwa gunwu-enu, a chikaru l'epfune epheje nanunanu-a bu gunwanyi Mowabu agba nanunanu shia aguga nggele Anonu ibiya ophu eerwuje iya erwurwu.

³Ephe nodu epfu su: "Unu kpozinaaru anyi uto! Unu pfunaaru anyi iphe, l'e-me nu! Unu menaa g'ononyo unu buru anyi ibvu, l'a-du ke kpuchii ghenyashi. Unu dominaa anyibe ndu eje phururugbada; ophu unu atukwa anyibe ndu agba oso ndzu jala. ⁴Unu kwenu g'anyibe ndu ono, a chiru oso shi l'ali ndu Mowabu lwapfuta unu. Unu kpuchinaa anyi g'onnye mmebyi ono te emebyi anyi!

"O -rwua teke ndu mkpamehu a-chihuwa; ndu mmebyi abwaru buggu; ndu emeje nemazu ewere buubekpo l'ali-a l'ophu; ⁵be Chileke e-goshi n-yemobu iya; woru onye apfushije ike l'iphe, o pfuru, shi l'onu-ulo Dévidi mee go buru eze; mbu onye abujeru; o -nodu ekpe ikpe lo kpe iya l'uzo, pfuru oto. Ophu opadu apfubekoto aka lanu."

⁶Anyi numawaru ge ndu Mowabu ekube onwophe; l'ephe anyanuka ndu; teme ephe nodu etse etsetse. Lekuku ono, ephe eku onwophe ono; mekpoo sukusuku ono, du phe lehu ono be pawaru aka. Ole epha ono, ephe etu onwophe ono bukota okorobo iphe.

⁷Noo go gude ndu Mowabu nodu ara ekwa Mowabu obu arashi iya ike. Mbu l'ephe tukoru ara ekwa iya. Unu rashikwa ekwa ike; go rwukwaa unu lehu, bu opfu ehuka-ulo, e gude kpa mkpukpu Kiru-Harsetu. Unu gua aphu iya; kele e tsuwaru iya pyaapya. ⁸Egu mkpukpu Heshibonu be iphe, a koru iya nwukotawaru lwaa. Vayinu, a koru le mkpukpu Sibuma nwukwapho lwaa. Ndu-ishi ohamoha zowaru okpobe vayinu, du iya nu pyaapya; mbu vayinu, shi abaje uba barwua mkpukpu Jiaza; mbu bawaro uba tsowaruro uzo echiogu. Eri iya bawaro uba ono jerwuchaa eze-enyimu. ⁹Noo ya; mbedua nodu arakwapho ekwa egube ono, ndu Jiaza ara ono. Mu arakwapho ekwa vayinu ndu Sibuma. Unube ndu

Hëshibonu; unubę ndu Eleyale; mu gudeakwa ęnya-mini awu unu ęhu; kele okwe, e shi erwujeru ekpu iphe, unu meberu l'alı me ọ -chashiahaa; yęe okwe, e shi erwuje me a -kpataahaa ya akpata; be bukotawa sutu-kumu. ¹⁰Ęhu-utso yęe ete ęswa be a nafuwaru ęgu ono, a kọru oshi-omi ono. Ọphu ọ duedu onye anodujekwadu l'egu-vayinu ono agu ebvu; ọzo-kwanu nọdu iya erwu okwe. Ọphu ọ duedu onye anodujekwadu l'egu ono aku meę-vayinu. Noo kele mu buchiwaru akwa ęvu, e shi anoduje l'ęka ono akwa. ¹¹Ọkpoma mu akwa ękwa alı ndu Mówabu; mbu l'okpoma azu mu uzu g'onye akpo ogumogu. Ime obu mu nọdu akwaru ndu Kiru-Haresetu ękwa. ¹²Ndu Mówabu -nọdu eje l'ęka ęphe agwaje iphe; buępho ike be ęphe eme g'ọ ka phe abvubvu. Mbu teke ono, ęphe eje l'agwa phe je iya agwagwa bu iphe, abudu iphe be ęphe eme.

¹³Noo opfu, Chipfu pfuhawaru l'opfu ęhu ndu Mówabu. ¹⁴Obenu le nta a be Chipfu ono suru: "L'ọ kwa apha ęto be ọ phoduru; mbu l'aaguakwaru alı ndu Mówabu apha g'onye-ozi, e ziru ozi, ọo-nọdu eje. Apha ęto be ọ phoduru ubvu ono, alı ndu Mówabu du ono; mekpoo ikpoto igwe ọha ono, bu iya nu ono abukotaru ndu a gubeduru iphe. Nwa ndu a-phodu nu aha nwanshii shii; teme ọphu ike adudu phe."

Chileke a-nu ndu Aramu; waa ndu Izurelu aphu

17 ¹Qwaa bu ozi, Chileke ziru le k'ęhu ndu mkpukpu Damasukosu: "Lewaro; Damasukosu e-mechakwaa bu-buhuru mkpukpu. Iphe, oo-mecha buru bu ikpozu. ²Mkpukpu le mkpukpu ono, azagba Arowa e-mechaa bukotaru ęka e budu ebubu. Ee-mechaa pakotaru iya haaru aturu; waa egbu g'ọ buru ęka ęphe a-dojeru; ọ to dudu onye eye phe ebvu. ³Mkpukpu le mkpukpu ono, a kpushiru ike ono be e-mechaa chihu l'alı ndu Ifuremu. Ọphu ndu Damasukosu e-nweeduru onye a-buru eze phe. Ọo g'ee-me ndu Izurelu iphe-iphere-a bukwapho g'ee-me ndu Aramu. Nokwa iphe, yębe Chipfu, bu Okalibe-Kakota-Ike eepfu bu ono."

⁴"O -rwua teke ono be ubvu, aakwabę oshilokpa Jiękopu a-ngachafu. Okporokpo ono, ọ du ono awufu. ⁵Izurelu a-du g'onye akpata iphe l'opfu; g'onye egbu ereshi, pfuru apfuru, bu ęka be oogudeje ekpokobe iya. Teme l'ọ dukwapho g'onye akpa ukpa oyoko ereshi le nsuda Refayimu. ⁶Ọle mkpakwa iya a-phodunu iya-a. Ọo-dukwapho g'ęka a nmaru oshi-olivu yigayiga; l'ọ phodu nwebo ozoo ęto le mkpakpa onu ękali-oshi, olivu obu; phodukwapho ęno ozoo ise l'eze ękali iya, mishiru ike. Noo iphe, Chipfu, bu Chileke ke ndu Izurelu epfu bu ono."

⁷O -rwua mboku ono be amadu a-gharu onye meru iya nu iphu. Mbu lenya phe be ęphe a-tuko ghaa l'ęka Onye Nso ke ndu Izurelu no. ⁸Ęphe ta aghaeduru oru-nshi phe iphu; mbu iphe, ęphe gude ęka phe mee. Ọphu ęphe agubeedu itso Ashera iphe; yęe onu ęka ęphe akpoje oku l'iphe, eshi kwękweekwee, bu iphe, ęphe gude ęka phe mee.

⁹O -rwua mbòku ono bẹ mkpukpu phẹ, a kpùshiru ike a-dù g'ẹka a gbadoru agbado l'ime ọswa; ọzoo l'eli úbvú; ọ bọru ndu meru iphe, a gbadoru iya bọ ndu Ízùrelu. Ẹkameka atùko bọru okorobo ẹgu.

¹⁰Kele-a; unu zòhawaru Chileke, bọ iya dzòtaru unu ono. Unu ta anyataduru onye ono, bọ agbara-mkpuma; bya abọru onye meru unu; unu gbashia ike ono. Ọ bọru iphe ono meru g'ọ gude; o -betakponu unu kọ akpuru oshi, kakòtakpoo ree; ọzoo l'unu kọru vayinu, unu dzetaru l'ọhozo; ¹¹mbụ-a; o -betakpo unu mee g'ọ wata aba ọba mbòku ono, unu kuru iya ono; o be l'utsu iya; ọ wata atụ ige; unu ta awòtakwa iya mebyi; kele ọ bọephò nrimaphụ yẹ iphe-ẹhuka bẹ mbòku ono a-buru.

Alwụ-kpe ndu ọhozo

¹²Oowaa! Ọ kwa ọha, dù igwerigwe aba hanyihanyi. Hanyihanyi, ẹphe aba dù g'ẹka Eze Ẹnyimu aphụ gbudugbudu. Oowaa! Gẹ ndiphe swòkoberu. Ẹphe aphụ gbudugbudu g'ẹka oke-mini asọ gborogboro! ¹³O -betakponu ọhamoha phuchaa gbudugbudu gẹ mini, a kuru ikpete; ọ bụ-a mba bẹ ọo-baru phẹ; ẹphe agbamihu ọkpobe agbamihu. La chiru phẹ ye lẹ phẹrephere g'ẹswa ereshi, a nọ l'eli úbvú aphushi; yẹ gẹ bẹbere iphe, phẹrephere apaphe l'ẹka oke phẹrephere ezi. ¹⁴O -be l'uzenyashi; iphe, eye ebvu atùko kuru. Nchi -bya abọhu; ẹphe abvuwaa. Noo ọnodu ndu ono, egwe ivu anyi ono; mbụ okiphe ndu ono, akwa iphe anyi l'okwata ono.

Aphụ, Chileke a-nụ ndu Kushi

18 ¹Nshio gube alị ono, aanu ẹphu ñkù iphe, ephegbaa l'aguga ẹnyimu ndu Kushi; ²mbụ unubẹ ndu ezije ndu-ozu unu; ẹphe etsoru mini. Mbụ ẹphe egude ọgbo-ẹji daghaa mini. Sụ-a; unubẹ ndu-ozu ọkpa-ẹgwa; unu lapfunu ndu ono, ha l'eli bya akwọ akpo-ẹhu bururu ono! Unu lapfunu ndu ono, aatsụ ebvu l'ẹka dù ntse mẹ l'ẹka dù ẹnya; mbụ ọha, ike dù l'ọgu; abyajẹ alwua lwuta; ọha, nggele nggele sọ-bushiru asọ-bushi!

³Unubẹ unwu-eliphe l'ophu; mbụ unubẹ ndu bu lẹ mgboko-a; unu le-nu! E -woliẹpho iphe-ọhubama imeli imeli l'eli úbvú bẹ unu a-huma iya-a. Teke e gbuẹrupo opu ono bẹ unu a-numa iya-a. ⁴Waa iphe, Chipfu pfuru nụ mu baa: “Mu a-noduepho nggujungguji gbẹ l'ẹka mu bu tufu ẹnya ele; g'anwụ echi phuuphuu teke okpomoku dù; ọzoo g'urwukpu, akwa iji l'ọnanwu. ⁵Kele-a; a -bya erwu teke emetajẹ iphe, e meberu l'alị; mbụ teke iphe e meberu l'alị agbawashikwadu ige; iphe ono, shi bọru okoko ono abọwaru mebyi iphe, chawaru k'awota; noo teke ọo-bya bya egude mma beshichaa ẹkali iya ono chita. ⁶Noo teke aa-tuko g'ẹphe ha haaru udele, bu l'oma úbvú; parụ phẹ haaru unwu anu, bu l'ẹgbudu. Unwu ẹnu egude phẹ kpaa nri jasụ ọnanwu alaa. Unwu ejo-anu, bu l'ẹgbudu egude phẹ kpaa nri jasụ udzumini abvu.”

⁷Noo teke aa-wata ewota iphe-oma gude bya anu Chipfu, bu Okalibe-Kakota-Ike. O buru ndu a-nodu ewotaru iya iphe obu bu ndu ono, ha l'eli bya akwo akpo-ehu bururu ono; mbu ndu ono, aatsy ebvu l'eka du ntse me l'eka du enya ono; ndu bu oha, ike du l'ogu bya alwu-je lwuta; oha, nggele nggele so-bushiru aso-bushi. Iphe-oma obu be ee-gudeje bya l'ubvu Zayonu, bu iya bu eka aanoduje araku Chipfu, bu Okalibe-Kakota-Ike.

Aphu, Chileke a-nu ndu Ijiputu

19 ¹Qwaa bu ozi, Chileke ezi le k'ehu ndu Ijiputu. Unu lenu! Chipfu nokwa l'urwukpu ezi phaaphaaphaa agba abya Ijiputu. Agwa ndu Ijiputu nodu anma pyaapyaapya l'iphu iya. Meji rwshihu ndu Ijiputu. ²“Mu a-kpali ndu Ijiputu g'ephe tsoje ndu Ijiputu ibe phe opfu; k'opfu unwune a-nodu etso unwune phe ugu. Obutobu etso obutobu iya opfu. Mkpukpu etso mkpukpu ibe iya ugu. Ali-eze etso ali-eze ibe iya opfu. ³Meji a-tofu ndu Ijiputu. Ephe -chichaa idzu iphe, ephe e-me; mu emee ya; o too dudu g'ephe chiru iya. Ephe ejee l'aja l'iphu nshi; jee l'aji g'ephe kpata maa ishi. Ephe ejee l'aji l'eka ndu aji maa; me l'eka ndu agba aja. ⁴Mu e-woru ndu Ijiputu ye l'eka ndu a-nodu eme phe ome-liwe. O buru onye a-buru ishi phe bu eze, eme engiringa.” Noo iphe, o pfuru; mbu Nnajiuphu, bu Chipfu; bya aburu Okalibe-Kakota-Ike.

⁵Mini, du lenyimu Nayilu a-tashihu. Ogbu ogbu nggele akposhihu nku du kpokoro-kpokoro-kpokoro. ⁶Mini, awu l'ose a-nodu eshi ishi. Nggele nggele, nogbaa l'ali ndu Ijiputu awata alwa ali ali eje jasul'otahu ree. Okpete okpete; yee eji eji atuko nwushihukota; ⁷mekwapho iphe, a kuru l'aguga enyimu Nayilu, no lonu-enyimu ono. Opfu, a koru akoko l'ogbu ogbu enyimu Nayilu l'a-dukota kpokoro kpokoro kpokoro. Pherephere atuko iya pata; a taa humaedu iya. ⁸Ndu egbuje ema a-tsu ude kwashia enya-mini. Mbu iphe, bukpo ndu eseje ikokoro lenyimu Nayilu; ndu anoduje ese ugbu-egege le mini a-tuko nwupuyashihu. ⁹Ndu egudeje ogbu ochaa, ama mma gude akpa iphe a-chihu. Ndu ekwe okpobe ekwa ochaa a-buru ndu iphere e-gude. ¹⁰Ndu bu phe gude ali ndu Ijiputu aburu ndu e gweru arakabya. Iphe, bukpo ndu eri ugwo aburu ndu aphu tsoru.

¹¹Ndu-ishi le mkpukpu Zowanu bukota ndu eswe. Ndu maru iphe, bu ndu anoduje akpo-ziru Fero uzo nodu akpo-zi mkpo-zi onye-eswe. ?Denu g'unu e-shi su Fero: “Mbueda yikwa le ndibe ngu ndu ophu maru iphe. Mu buru nwa onye eze, shi l'ichee.” ¹²Su-a; ?bu awe be ndibe unu ndu maru iphe no nta? G'ephe goshinu unu g'iphe du; ephe emee g'unu maru iphe, Chipfu, bu Okalibe-Kakota-Ike doberu k'eme ndu Ijiputu. ¹³Ndu-ishi le Zowanu bukotawa ndu eswe. Ndu-ishi le mkpukpu Memufisu be e me-waru mkpurukpuru-enya. Ndu ono, bu mkpuma, gude ulo l'okpa-ipfu phe ono be dusewaru ndu Ijiputu uzo. ¹⁴Chipfu chwaru unme, achije enyaji

chiru ye phe l'ehu. Ephe mee; ndu Ijiputu nõdu akpo galagala l'iphemi-phe, ephe eme egube ono, onye nguru mee anõduje akpo galagala l'eli egbo, o gbõru ono; ¹⁵k'õphu bu l'õ tõ duedu iphe, ishi õzoo õdzu emeru ndu Ijiputu; õphu õ duedu iphe, ekwo-igu õzoo okpete emekwaduru phe.

Ndu Ijiputu a-baru Chipfu eja

¹⁶Teke ono be ndu Ijiputu a-du g'unwanyi. Ephe e-rwuhu le ndzu-agugu; o buru eka o paliru eka abya phe echichi; mbu Chipfu, bu Okalibe-Kakõta-Ike. ¹⁷Ali ndu Jiuda aburu iphe, ee-gudeje eye ndu Ijiputu ebvu. Onye -nõmaru eka e kuru epha ndu Jiuda; ndzu erwuta iya. O buru iphe, a-kpa iya nu bu iphe, Chipfu, bu Okalibe-Kakõta-Ike e-mechaa mee phe.

¹⁸Teke ono be mkpukpu ise l'ali ndu Ijiputu a-wata epfu opfu-ali ndu Kenanu. Ephe eria nte l'ephe a-nõdu l'eka Chipfu, bu Okalibe-Kakõta-Ike. Mkpukpu ono be nanu a-nõdu aza "Mkpukpu Ola-l'iswi."

¹⁹Le mbõku ono be ee-dobe eka aa-gwaje Chipfu l'echilabo ali ndu Ijiputu. La kpu iphe, e gude anyata Chipfu akpukpu dobe l'oke ali iya.

²⁰Ooburu iphe-õhubama me iphe, agba ekebe le Chipfu, bu Okalibe-Kakõta-Ike nwu enya l'ali ndu Ijiputu. A -nõdu eme phe mkpawere; ephe raku Chipfu; l'o zia onye a-dzõta phe nu. Onye ono abya anafuta phe.

²¹Oo ya bu le Chipfu e-me ge ndu Ijiputu maru iya. O buru mbõku ono be ephe a-marweta Chipfu amarweta. Ephe e-gude anu yee nri gude bya agwaa Chipfu. Ephe -rifu nte l'owa-a iphe, ephe e-meru Chipfu baa; ephe emeeru iya ya. ²²Chipfu a-tu ndu Ijiputu ehü. O -tuchakwaa phe ehü ono mee ephe ewekõrohu. Ephe alwapfuta Chipfu; l'o ngabe nchi l'arworwo, ephe arwo iya; mee; ephe ewekõrohu.

²³Teke ono be oji a-dabyiru swanmangu shi l'ali ndu Ijiputu je adajaa ali ndu Asiriya. Ndu Asiriya ejeahaa Ijiputu. Ndu Ijiputu ejeahaa Asiriya. Ndu Ijiputu ephe le ndu Asiriya atuko abaru Chipfu eja eghirigha. ²⁴Le mbõku ono be ndu Izurelu a-buru ndu k'eto me a -gua Ijiputu yee Asiriya, bu ndu a-buru iphe-õma, duru eliphe l'õphu. ²⁵Chipfu, bu Okalibe-Kakõta-Ike a-gõru õnu-õma nu phe su: "G'õnu-õma buru ke Ijiputu, bu ndibe mu; yee Asiriya, bu ndu mu gude eka mu mee; yee ndu Izurelu, bu ndu bu okiphe mu."

Iphe, oozu; mbu onye mpfuchiru, gba ehü oto

20 ¹Lapha, Tatanu byaru mkpukpu Ashidodu; mbu teke Sagõnu, bu eze ndu Asiriya ziru iya; o bya etsoo ndu Ashidodu õgu; naa mkpu-kpu phe; ²be Chipfu gude Azáya nwa Emõzu pfua opfu. Iphe, o pfuru bu: "Yefu uwe-aphu ono, i yeru l'ehu ono; yee akpokpa ono, i yeru l'okpa ono!" O yefu iya gbaru ehü oto wata aghaphe; gbakwarupho okpa oto tsoru ejephe. ³Tõbudu iya bu; Chipfu pfua su: "Oo egube ono, onye-õzi mu, bu Azáya

gba ẹhu ọto gbaru ọkpa ọto gphawaa apha ẹto ono; ọ buri iphe-ohubama; yee iphe, du biribiri, e meru ndu Ijiputu yee ndu Kushi ono; ⁴noo g'eze ndu Asiriya a-kpu ndu Ijiputu yee ndu Kushi le ndzu; yeshia phe uwe; gbabe phe ọkpa ọto kpuru phe lashia; me unwokoroba phe; me ndu bu ogerenya phe; ebohu egheeru phe onu g'o buchaaru iphe, ee-gude mee ndu Ijiputu iphe-iphere. ⁵Ndu kpuru obu yeru ndu Kushi; bya egude ndu Ijiputu eku onwophe be ndzu e-rwuta; teme iphere emekwa phe pho. ⁶Noo mboku iphe, bu ndu bukube eze-enyimu-a e-pfu su: 'Unu humawaro iphe, meru ndu ono, anyi kpuru obu yeru ono; mbu ndu ono, anyi gbaru oso gbapfu g'ephe yeru anyi eka nafuta anyi l'eka eze ndu Asiriya! ?Denukpoo g'anyi e-me nahu?'

Alwu-kpe ndu Babilonu

21 ¹Owa-a bu ozi, Chileke ezi ndu bu l'echiegu ono, no l'aguga eze enyimu ono:

Oo g'oke-pherephere eshije l'echiegu ndohali ezi abya ono; bu g'oo-shi l'echiegu ono bya. Mbụ l'oo-shi l'ali, eye ebvu bya. ²Ejo ophulanya be e goshiru mu; eka nwoderu-oye deru ndu ali iya ye; nwokwata nodu akwa okwata.

Unube ndu Elamu; unu gbalihu lwua ugu! Unube ndu Midiya; unu no-pee ndu ohogu unu mgburugburu! Lude ono, ephe meru; ndiphe tsua ono g'o ha be Chileke buchiakwaru. ³Noo g'o gude ogwehu mu l'ophu nodu emekota mu ehuka; ehụ nodu aphukota mu uphu. Mu dupeho ge nwanji, ime eme. Anuma, mu numaru iya mee mu; mu kpohu kulakula. Ahuma, mu humaru iya nmakota mu ehụ jiiijijii. ⁴Meji nodu aku mu pheripheri; ndzu-agugu mee mu; ehụ nodu anma mu anmanma. Nchi-ejihu, shi aduje mu ree shi byawaru bya aburu iphe, anyi mu ishi edzu.

⁵Ephe gweshia nri; bya atogbochaa utute-ukpo; bya awata eri nri; angu iphe, aangụ angungu. A nonyaepho; ọ buri: "Unu zelihi unube ndu-ishi ojogu! Unu tua manụ le ngwogu unu!"

⁶Waa iphe, Nnajiuphu pfuru mu baa. "Je je edobe onye-nche, a-nodu elefu enya! G'onye ono pfujekwa iphe, ọ humaru! ⁷O -huma ugbo-inya; me ikpoto ndu agba l'inya; me ndu agba nkapfu-igara; ozo ndu agba inya-kamelu; g'o rukota onwiya; mbu rukota onwiya okpobe arukota."

⁸Noo ya; onye-nche ono chia mkpu su: Onye nwe mu nu; mboku-mboku be mu a-noduje l'onyi-eli-a eche nche. Mbụ l'enyashi mboku-mboku be mu anoduje nche l'eka a suru ge mu nodu. ⁹Lekpodapho; o nweru onye no l'ugbo-inya; me ikpoto ndu agba l'inya etso iya. O nodu epfu su: "O daakwaru! Mkpukpu Babilonu daakwaru! Ozo bu l'iphe, bu agwa mkpukpu ono l'ophu, bu iphe, bu agwa nkephe be e chikotawaru pyaapya; o rwukota ali."

¹⁰Su-a; unube ndibe mu; unube ndu e gweru uji l'oma eka eechichaje balị; iphe, mu epfuru unu bukwa iphe, mu numaru l'onu Chipfu, bu Okalibe-Kakota-Ike; l'onu Chileke ke ndu Izurelu.

Ozi, Chileke ziru l'èhu ndu Edõmu

¹¹Wakwa ozi, Chileke ziru lè k'èhu Duma.

O nwekwaru onye gbè l'alì Siye eku mu oku sù: “Onye-nche; ?abali jeberu ijebe-agma? Onye-nche; ?enyashi jeberu ijebe-agma?”

¹²Onye-nche yee onu sù: “Nchi abõhuakwa; bya ejihuekwapho. O -buru l'unu akpata ishi; unu kpata ishi. Unu lwadupho azu ozobaa.”

Ozi, Chileke ziru l'èhu ndu Arabu

¹³Waa ozi, Chileke ziru lè k'èhu ndu Arabu.

Su-a; unubè ndu ije, shi l'alì ndu Dedanu; unu je je adõru l'õswa ndu Arabu. ¹⁴Unu kutakwa mini, unu a-nu ndu mini agu; unubè ndu õphu bu l'alì Tema! Unu wotakwa nri bya anu ndu agha phurii! ¹⁵Ndu ono bè bu ndu gbalaru õgu-echi; mbu ndu a miliru mma; ephe nahu gbalaa. Ndu e setaru apfu kè kíkiki g'a gbaa. Ephe shi l'èka õgu ekpo õku ono nahu gbalaa.

¹⁶Wakwa iphe, Nnajiuphu pfuru mu baa: “Aaguakwaru ndu Keda apha õgu g'onye e butaru ozi, õo-nõdu eje. O kwa apha lanu bè o phõduru; iphe, bukpuo ùbvù, aakwabèje ndu Keda a-bvukota. ¹⁷Nwa ndu a-phõdu nu l'ime ndu agbajè apfu; mbu ndu ike du l'unwu Keda ta abaèdu ishi; kè le o kwa Chipfu pfuru iya; mbu Chileke kè ndu Ízurelu.”

Ozi, Chileke ezi l'èhu ndu Jierúsalemù

22 ¹Owaa bu ozi, Chileke ezi ndu bu lè Nsuda Ophulenyà ono.

Su-a; ?bu gunu eme ngu nta-a, meru g'o gude; ndibe ngu tukõ wufu wuba l'õma mkpotsu ulo; ²mbu gube mkpukpu ono, bu iphe, jiru iya nu bu etsu ùtsù. Gube mkpukpu, agba gharagharagbara bya eme rigbarigba.

Ndibe ngu, e gburu egbugbu ta abukwa õgu-echi bè e gude gbua phe. Ophu o bukwa l'egu õgu bè ephe nõ nwuhu. ³Ndu-ishi ngu g'ephe ha tukõwaru ye õkpa l'õso gbalaa. A kpuru phe lè ndzu; õphu e gudedu apfu. Iphe, bukpuo unubè ndu e guderu bè a tukõtaru mkporo tugbabe atugbabe; l'unubè ndu gbalaruõro teke ndu õhõgu unu nõkwaduro enya. ⁴Noo g'o gude mu sù: Unu wofu mu rõ enya. Mbu-a; unu haa mu gè mu kwaa ekwa kwaghee ya akwaghe. G'e b'ejekwa mu egbogbo l'èka o bu ndibe mu bè eeme omeliwe ono. ⁵Kèlè Nnajiuphu, bu Chipfu; mbu Okalibe-Kakõta-Ike bè meakwaru eswe mbõku ono; o buru mbõku, ùtsù daru; a zõ iphe pyaapya. Ndzu rwuta onyemonye lè Nsuda Ophulenyà ono. Eswe mbõku ono bè ee-nwukpõshi igbulõ; l'a nõdu araku eze ùbvù g'o gbaa mkpu.

⁶Ndu Elamu byakwa bya achita ekpa apfu phe jeshia õgu; bya achita ndu gude ugbo-inya alwuru phe õgu; mè ndu gude ìnya eje õgu gude jeshia. Ndu Kiru bya ekpuhaa iphe-mgbobuta phe woru ghebe õnu. ⁷Nsuda

unu ọ́phu kachaa ree bú iphe, jiru iya nù bú ụ́gbo-ìnya. E woru ndu gu-de ìnya eje ọ́gu yechaa g'ẹ́phe che ọ́nu-abata mkpúkpu nche. ⁸Ọ́o ya bú l'iphe, gbobotaru alí Jiuda bẹ́ a nashìchawaru iya.

O be mbọ́ku ono; unu leaha ẹ́nya ngwọ́gu ono, kùru l'ibe eze, e me-ru l'oshi sida, shi l'ọ́swa, dù l'úbvú úbvú Lébanonu. ⁹Unu hụ́mawaru lẹ́ mkpúkpu Dévidi gbaru ọ́ru l'ẹ́ka dù igwerigwe. Unu kukọ́o mini, dù l'okpuru mkpozeta sùkaa ya. ¹⁰Unu bya agụ́a ụ́lo, dughaa lẹ́ Jierúsalemú ọ́gu; bya aharu phẹ́ tsukpọ́shia gude mekwaa agbarike igbulọ́ Jierúsalemú. ¹¹Unu bya atụ́a okpuru lẹ́ mgbaka igbulọ́ labọ́ ono gẹ́ mini shi l'akahụ́ okpuru ono wúbata iya dọ́ru. Ọ́phu unu agbapfuduru onye bú iya tọ́ru okpuru ono atútú; mbụ́ ọ́phu unu akpakpọ́darunu onye ono ishi; mbụ́ onye ono, bú iya chíru idzu l'ọ́wa-a g'ọ́o-dù teke dughakpowaro ẹ́nya ẹ́nya kpọ́.

¹²Tọ́budu iya bú; o be mbọ́ku ono; Nnajiuphu; mbụ́ Chipfu, bú Ọ́kalibe-Kakọ́ta-Ike bya ekua unu sù g'unu bya araa ẹ́kwa gụ́a aphụ́; g'unu kpúshia ishi; chíta uwe-aphụ́ yee. ¹³Ọ́le ọ́ bú; leanarọ́ ẹ́nya! Ẹ́hu atsole-a unu! Unu nọ́du emele-á ẹ́mereme; egbushi eswi; egbushi atúru; atashi anụ́; angúshi mee! Unu -gbẹ́shi unu asụ́: “Unu g'anyi rikwaa nri ngụ́a mee! ?Ọ́ kwarọ́: o -be echele; anyi anwụ́hu-a?”

¹⁴Ọ́le Chipfu, bú Ọ́kalibe-Kakọ́ta-Ike mekpọ́oru ọ́wa-a; mu maru; mu gude nchị́ mu nụ́ma iya; mbụ́ l'ọ́ sùru-a: “iphe-ẹ́ji-a, unu eme-a bẹ́ a ta abyakwa asachafụ́ asachafụ́ jasụ́ g'unu a-nọ́-beru. Noo iphe, oopfụ́; mbụ́ Nnajiuphu ono, bú Chipfu; bya abụ́ru Ọ́kalibe-Kakọ́ta-Ike.”

Aalọ́ Shebuna ẹ́ka lẹ́ nchị́

¹⁵Waa iphe, Nnajiuphu epfu; mbụ́ Chipfu ono, bú Ọ́kalibe-Kakọ́ta-Ike. O sùru-a: “Tughua je asụ́ onye-ozí ono, mbụ́ Shebuna, bú iya bẹ́ unu-phu ibe eze dù l'ẹ́ka; je asụ́ iya: ¹⁶?Bù gúnú bẹ́ iime l'ẹ́ka-a? Tẹ́me ?bù onye harụ́ ngu g'ì bya anọ́du tụa ilu, ee-li ngu? Ì bya anọ́du atụ́ ilu ngu l'ephekerephe; egbubashi ẹ́ka ìi-nọ́duje tuta unme l'ime agbara mkpuma. ¹⁷Lenú! Chipfu abyaakwa ngu azụ́ gburumu pfuúrii; tughakpọ́ephe etupha; mbụ́ gùbe onye ono, bú oke-dù-ike ono. ¹⁸Oo-wee ngu kperekpere gẹ́ bọ́lu je eworu ngu chie l'ọ́ha, kwata ha ọ́kpobe ọ́sa. Ọ́ bụ́ru l'ẹ́ka ono bẹ́ ìi-nọ́du nwụ́hu. Tẹ́me ọ́ bụ́ru l'ẹ́ka ono bẹ́ ẹ́guru ụ́gbo-ìnya ngu ono akwashì; mbụ́ gùbe onye ono, bú iphe, e gude achị́ ụ́lo nnajì ngu ọ́chí ono! ¹⁹Chipfu a-nashì ngu ọ́kwa ngu; chífu ngu l'ẹ́ka ì nọ́ eje ozi.

²⁰“O -be mbọ́ku ono bẹ́ mu e-ku onye ejeru mu ozi, bú Ẹ́liyakimu nwa Hilikaya. ²¹Mu achị́ta uwe kpowula-kpowula ngu woru yee ya; chíta akpọ́, iikebutajẹ́ uwe woru mee ya mgburugburu; woru ike, shi dù ngu nù nù iya. Ọ́ bụ́ru iya a-bùru nna ndu bu lẹ́ Jierúsalemú; mẹ́ ndu ọ́nu-ùlo Jiuda. ²²Ọ́ bụ́ru iya bẹ́ mu e-ye igodo ọ́nu-ùlo Dévidi l'ẹ́ka; ọ́ -gùhaa ụ́zo ghebe ọ́nu; ọ́ tọ́ dudu onye byaru agụ́-chi iya nù. Teke ọ́ gụ́-chikwanuru

uzo; o tọ dudu onye byaru aguha iya nu. ²³ Mu e-me iya g'ọ nguru anguru ge nggu, a kpoberu kpọ-mia akpọ-mi. Ee-gude iswi ẹhu iya kwabẹ ndibe nna iya ùbvù.

²⁴ “Iphemiphe, bukpo iphe, e gude akwabẹ ndibe nna iya úbvú bẹ aatuko nyabekota iya lolu; mbu ndu ephe l'iya bu abubu; me unwu, ephe nwutaru anwuta; ngwa ulo l'ophu, bu ndu ophu enya lwaru l'ibe phe; e -shikpo l'ochi jasụ l'ipoti.” ²⁵ Chipfu, bu Okalibe-Kakota-Ike suru-a: “Le mboku ono bẹ nggu ono, e shi kpobe kpọ-mia akpọ-mi ono a-kpofu daa. Ngwa-ulo ono, e shi kobegbaa ya ono aburu gwoo l'alị. Nokwa olu Chipfu.”

Ozi, Chileke ezi ndu mkpukpu Taya

23 ¹ Waa ozi, Chileke ziru le k'ehu mkpukpu Taya. Unu kwashia enya-mini; unube ugbo-mini ke mkpukpu Tashishi; kele mkpukpu Taya be e mebyishiwaru. Nta-a ta aduedu ulo, du iya nu. Ophu o duedu odu ugbo-mini, du iya nu. O buru aka e shiro bya emee g'ephe maru bu l'alị Sayipurosu. ² Unu dakwaa gbèè unube ndu bukube eze-enyimu; mekpoo unube ndu agba ngho, bu ndu shi le mkpukpu Sayidonu. Ndu unu ziru ozi daakwaru eze-enyimu jeshia aka unu ziru phe. ³ Ephe dawaru enyimu olemole. Iphe unu shi egudeje akpa okpoga bu witi, a koru laguga enyimu Shihọ; mbu witi ophu a kpataru laguga enyimu Nayilu. Mkpukpu unu shi egube ono buru aka ohamoha azukota aswa.

⁴ G'iphere buru ke gube mkpukpu Sayidonu; mbu gubedua, bu onye ike du, bu leze-enyimu; kele eze-enyimu yewaru onu su lime teke emeswekwaa ya; ophu ya nwujekwaru nwa. Ophu ya ehejekwaru nwa nwoke; ophu ya emetsejekwaru nwa nwanyi.

⁵ Ndu Ijiputu -numaephe iphe, meru le Taya be oo-gburwashị phe ẹhu shii.

⁶ Unube ndu bukube eze-enyimu; unu daghakwaa eze-enyimu la l'azu iya ke Tashishi! Unu rakwaa ekwa rashia ya ike! ⁷ Bu mkpukpu-a be unu shi anoduje eme emereme-a? Mbu akahu mkpukpu ndiche ono; onye okpa iya ephenebo dutaru je aka du enya; o je eburu buru onye byaru abyabya. ⁸ Bu onye kabẹ chiaru Taya ejo idzu owa? Mbu mkpukpu ono, ekpubeje ndu ozo okpu-eze ono; mkpukpu, ndu agba oke-ngho lime iya bukota ndu-ishi ndu-ishi; ndu buephe l'ephe agba ngho buru ndu mgboko l'ophu akwabẹ ùbvù. ⁹ O kwa onye chiru iya dobe g'ọ du nno bu Chipfu, bu Okalibe-Kakota-Ike; g'ọ gude mee g'eku-onwonye k'iphe, bukpo ndu nweru akpabiri kpua epho l'alị; lookuzetakwapho iphe, bukpo ndu aakwabẹ ùbvù le mgboko l'ophu.

¹⁰ Unu gbawaro alị unu ophorokpo g'eka enyimu Nayilu byaru utso; unube ndu Tashishi! O tọ duedu onye no-chikwaduru unu uzo. ¹¹ Chipfu

machiwaru ẹka maberu eze-enyimu; bya emee g'ali-eze ndu mgboko nmakota jijijiji. O tuwaru ekemu su l'owa-a iphe, ee-me ndu Kėnanu; g'a tuko iphe, bukpo ẹka e meru; o nguru anguru, du iya nu mebyishikota. ¹²O pfuru su: “Unu tee meekwa emereme; unube ndu Sayidonu, bu unube ndu ophu e gweru uji nta! Unu gbalihunu daghata azu iya ophu jeshia ali Sayipuros. Unu -jerwukponu ẹka ono be unu ta abyakpokwanu atuta unme obu.”

¹³Unu lekpodapho enya l'ali ndu Babilonu; mbu ndu ono, adudu iphe, a guberu phe nta-a ono! Ndu Asiriya mewaru iya; o buru ẹka unwu anu, shi l'echegu abyaje adoru. Epe tsoru iya ogo; bya eworu ulo, a kpshiru ike, du iya nu g'o ha tsukposhia; mee ya; o buru ochobu.

¹⁴Unu raa ekwa rashia ya ike; unube ugbo-mini ke mkpukpu Tashishi; kele mkpukpu, unu shi dakobe be e mebyishiwaru!

¹⁵O -rwua teke ono be aa-zoha mkpukpu Taya no ukporo apha eto l'apha iri, bu iya bu iphe, eze anoje lokwa eze iya. Ukporo apha eto l'apha iri ono -bvupho l'o nwuru ndu Taya g'ebvu ono, ndu agba ukpara aguje ono, suru:

¹⁶“Wota ogumogu tsoru oma
mkpukpu ghaphecha;
gube nwanyi-ukpara,
a zoharu azoha!
Kpo ogumogu obu
rengurengu;
gua ikpoto ebvu guru
ye iya;
k'ophu aa-nyata ngu
ozobakwa.”

¹⁷Le-a; ukporo apha eto l'apha iri ono -bvupho be Chipfu a-bya emee ndu Taya enweru iphe ozo. Epe alaphu azu l'iphe ono, shi kwowaru phe ehu ono, bu iya bu agba ukpara. O buru ndu epe l'iya a-nodu eme iya bu ali-eze ndiphe l'ophu. ¹⁸Ole urwu, oo-rita; me ugwo, aa-pfu iya a-bukotaru iphe, ee-doberu Chipfu. O too dobedu iya l'oba; ophu o dudu ẹka oochikobe iya. Urwu, o ritaru aburu ndu aa-nuje iya bu ndu no ndzu no-doru Chipfu; ge ndu ono nweru nri nweru okpobe uwe; nweru iya k'etsutsu iya.

Aphu, Chipfu a-nu ndiphe l'ophu

24 ¹Lekwa! Chipfu abyakwa eme g'eliphe l'ophu dabyiru iphoro. Mbu mee ya go buru ochobu. Oo-mebyishi iphu iya chikashia ndu bu iya nu. ²O buru g'e meru onye bu g'ee-me onye! G'e meru ndu-uke bu g'ee-me nemadzu mmanu. G'e meru nnaji bu g'ee-me ohu. G'e meru ne nwe ulo bu g'ee-me nwamgboko, ejeru iya ozi. G'e meru onye ere erere bu

g'ee-me onye azú azúzu. G'e meru onye jeru ejita úgwó bú g'ee-me onye jieru úgwó. G'e meru onye jeru ejita úgwó oke ntúkwasé bú g'ee-me onye ejie oke ntúkwasé. ³Eliphe l'ophu bẹ ee-me g'ọ dabyikọtakporu iphoro; mbú mebyishikọtakpoo ya g'ọ ha. Ọ kwa Chipfu pfuru opfu-a l'onwiya.

⁴Eliphe l'ophu agbanwúshihu agbanwúshihu anwú lwaalwaa anwúlwasihu. Mgboko l'ophu nọdu atahú atahú anwúkwapho lwaa. Iphe, bú ndu eekutse l'eliphe nọdu atahúkotakwapho atahú. ⁵Ọ kwa ndu nọ lẹ mgboko pharwúru mgboko; kẹlẹ ẹphe jikaru eme iphe, ekemu pfuru; bya agbanwee iphe, a sùru g'e meje; bya emebyia ọgbandzu ojejoje onoya. ⁶Noo g'ọ gude ọnu, Chileke tǔru nọdu ere phuruphuru lẹ mgboko. Ọ búru ndu bu iya nù e-vuta ọnwu iya. Ọo ya bú lẹ ndu bu lẹ mgboko bẹ e kepyashikotawaru. Ọphu nwa ndu ọphu phọduru nù abaeđu ishi. ⁷Mẹe ọphúú tashihuru. Vayínu ata mée nwúkota lwaa. Iphe, bú ndu eme rigbarigba tsuahaa pfupfufu.

⁸Èguru ọda nkwa ono, ẹphe akú ono búru bugemu. Wọwoowoo, ndu angú-sweshi onwophẹ iphu atú búru sùtukumu. Ogumogu ono, shi atso ikpoki ono daa nyonyoronyo. ⁹Ọphu ẹphe abujeeduru; ẹphe -nọdu angú mée; ẹphe agú ebvu-mée eye iya. Mée, atsu atsutsu nọdu atsowa ndu angú iya nù ilu. ¹⁰Mkpúkpu ọla-l'iswi ono dabyiwaru ophorokpo. Ụlo onyemonye bẹ a gú-chishichaaru agú-chishi g'ọ tọ dọ onye a-bahú iya nù. ¹¹Ẹphe wúshiru lẹ gbororo ara g'a nù phẹ mée g'ẹphe nǔa. Ẹhu-útso l'ophu tǔko gbahúkota ọchii. Ọphu ete ẹswa aduedu l'eliphe mgburugburu. ¹²A haa mkpúkpu ono; ọ búru ikpọzu. E woru ọguzo, e shi yee ya gbua pyaapya. ¹³Noo g'ọo-dú l'eliphe l'ophu bú ono. Nokwapho g'ọo-dúru ọhamoha. Ọo-dú g'ẹka a nmarú oshi olivu yigayiga; ọzoo gẹ nwantúkantuka akpúru vayínu, phọduru l'ẹka a wọru vayínu.

¹⁴Ẹphe e-mechaa wolía olu tǔa ọzu; mbú tǔa ọzu ẹhu-útso. Ẹphe eshirọ l'úzo ẹnyanwu-adada tǔta ọnu gẹ Chipfu paberu ẹka. ¹⁵Ọo ya bú gẹ ndu nọ l'úzo ẹnyanwu-awawa jaa Chipfu ajaja. Gẹ ndu bukube eze-ẹnyimu tukwaapho Chipfu ono, bú Chileke kẹ ndu Ízurelú ẹpha! ¹⁶Anyi nọdu anuro ebvu, a -gbẹ l'ẹka igwe beru alí beru agú, asuje: “G'ajaja búru k'onye ono, pfuberekoto ono!”

Mbẹdua sùkwanu: “Mu wúfuakwaru! Mu wúfuakwaru! Nshìokwa mu nshìo! Ndu oderu-oye edeakwaru amadú eye! Ẹphe gudeakwa ẹregede ederu amadú eye!” ¹⁷Nggiri; yee nsúkutu; mękpoo igbudu tǔkokwaru kwaberu unubẹ unwu-eliphe! ¹⁸Onye nǔmaru ọkporo nggiri -gbalaaha l'o je adalahú lẹ nsúkutu. Onye -shikwanú lẹ nsúkutu nyifuta; igbudu atúpyabe iya. Ụzo-mini ọzo-mini, nọkota l'igwe ghekotawaru ọnu. Ọkpa-ulo mgboko l'ophu nọdu angakota anganga. ¹⁹Mgboko l'ophu gbawashihuwaru agbawashihu. Mbú lẹ mgboko gbajahawaru ẹbo. Mgboko aphuwaa kpakpakpa aphushi iya ike. ²⁰Mgboko l'ophu angaakwaa phuphu g'onye mée l'atsú. Ọotu kpekengu kpekengu g'ulo, bvuru l'ẹka oke

phèrèphèrè ezi. Mbù l'èjo-iphe, o meshiru bẹ ikpe iya nmarù iya nmashia ya ike; k'òphu bụ l'òo-da darwua ali; òphu ọogbalihubaedu.

²¹O -rwua mbòku ono bẹ Chipfu a-hù ndu nọ l'èphèkèrèphè ahùhù k'ìphè-èji, èphè nọ l'èka dù èphèkèrèphè mee; hùkwapho ndu eze, nọ l'èli-phe ahùhù kwapho. ²²Ee-rwukòbè phè l'èka lanù g'onye rwukòberu ndu mkpòro l'òka-mkpòro. La tų-chia phè l'òka-mkpòro òbu parù haa. A -nọ-pho ujiku olemole l'e je ahùa phè ahùhù. ²³Noo teke iphèrè a-dù ọnwà; l'e meru ujikputeru nù ẹnyanwu. Noo kẹlè Chipfu, bụ Ọkalibè-Kakọta-Ike a-buru eze l'èli ùbvù Zayọnu yéfua lẹ Jierúsàlẹmu. O je l'egoshi ndu bụ ọgerenya mkpụkpu ọdu-biribiri iya.

Etu Chipfu ẹpha

- 25** ¹Gùbè Chipfu;
 ọ bụ ngu bụ Chileke mu.
 Mu a-nọdu ekutse ngu;
 eku ẹpha ngu gude aja
 ngu ajaja.
 Noo kẹlè i mewaru iphe,
 dù biribiri.
 Ìpfushije ike l'iphe,
 ì chìru idzu iya e -shi
 teke ndiche;
- ² kẹlè i mewaru mkpụkpu;
 ọ buru ikpọzu;
 mbù mee mkpụkpu,
 a kpụ-pheru igbulọ
 mgburugburu;
 ọ buru ọla-l'iswi.
 Èka ndu ọhọzo kpuru;
 ọ nguru anguru bẹ i mewaru;
 ọ buru ẹka mkpụkpu
 aduèdu;
 ọphu a byadu emezibaa
 ya jasụ l'ojejoje.
- ³ Noo g'o gude ọha ike dù je
 a-nọdu akwabẹ ngu
 ùbvù.
 Ndu mkpụkpu ono,
 ndu bu iya nù bụ ndu
 ewebushi akurepho ono
 a-tụko wata ngu eyeru
 nsọ.

- 4 Ọ kwa ngu shikpọo eshinu
 bụru onye ndu adudu
 g'ọ dụ phẹ anọduje l'ẹka
 ezeru ndzu.
- Mbụ l'ị bụ onye abujeeru;
 iphe -nọdu atsu nemadzu
 l'ehu l'ọ gbaba ngu l'ime
 je anọdu zeeru ndzu.
- Ọ bụru ngu bẹ aagbabajẹ
 l'ime je anonyabe mẹ
 oke pherephere nọdu ezi;
 mbụ l'ọo ngu bụ ibvù
 onye okpomọku ekpo;
 keke mkpawere ndu
 ewebushi akurepho
 dụ g'ẹka oke
 pherephere eme g'o
 nwutsua igbulọ;
- 5 bya adukwapho
 g'okpomọku, ekpo l'alị,
 mini adudu.
- Ọ bụ ngu emeje gẹ ndu
 ohozo,
 atụ kwokwokwo dobe
 onu doo.
- Ọo g'ibvù, shi l'urwukpu
 atuzetajẹ okpomọku-a
 bụ g'iiyanyije erwu
 úbvù ndu ewebushi
 akurepho.

Nri ọbo-iphe, Chipfu e-shiru ndibe iya

6 Ọo l'eli úbvù-a bẹ Chipfu, bụ Okalibe-Kakota-Ike a-nọdu kua ndiphe l'ophu oku iphe-eriri, tsuru ẹba; gaarụ phẹ mée ndiche; mbụ shiaru phẹ anụ, bụ anụ, ụmi jiru ejiji; yee mée, doru erwu. 7 Ọzo bụ l'ọo l'eli úbvù-a bẹ ọo-nọdu mebyishia phulaphu-la ẹkwa ono, e gude phukputechaa ohamoha ono; mbụ ukpo ono, e gude phụ-chia oha l'ophu onoya. 8 Lo mebyia onwu lwua ya ree jasụ l'ojejeje. Mbụ lẹ Nnajiuphu, bụ Chipfu le-hushi onyemonye ẹnya-mini l'ẹnya. Iphe-iphere ono, e shi eme ndibe iya ono bẹ oo-me g'ọ bụkọta l'eliphe mgburugburu; keke ọo iphe ono bẹ Chipfu pfuru.

9 Ọ -rwua mbọku ono bẹ ẹphe a-sụ: “Lenu! Ọ kọkọwaa Chileke anyi baa. Anyi kporu obu yeru iya; ọ dzọo anyi. Onye-a bụ Chipfu; anyi kporu obu yeru iya. G'ehu tsọo anyi! G'anyi teje ẹswa l'ọ dzọo anyi!”

Aphụ, Chipfu a-nụ ndu Mówabu

¹⁰ Kẹle ẹka Chipfu a-dukwa l'eli úbvú-a. Mbụ lẹ ndu Mówabu bẹ aa-zọ tọlitoli l'ibe phẹ ẹgube ono, aazọje ẹswa ekperema pyakapyaka l'ikpọzu ono. ¹¹ Ẹphe a-chiru ẹka labọ tũkaa g'onye ebvu mini, tũkaru ẹka l'eli mini ebvu mini onoya. Tẹme l'ọ bya emee g'eku onwophẹ ono lwa phẹ alị; g'ẹphe amahabe ẹrengete iya. ¹² Ọo-byazeta phengarangu igbulọ ono, unu kpuru; ọ nguru anguru ono. Oo-me iya l'oodukpoo mkpulalị ọkpobe adudu; mbụ l'oo-wozetakpọ ya alị ọkpobe ewozeta; mbụ worwua ya alị gẹdegede kpọ.

Ebvu Ajaja

26 ¹ O -rwua mbọku ono; waa ebvu, aa-gụ l'alị ndu Jiuda baa:

“Anyi nweru mkpukpu,
shihuru ike.

Ọ buru ndzọta bẹ Chileke
gude kpụ-pee ya
mgburugburu g'igbulọ.”

² Unu gụhaa ụzo mkpukpu
ono ghebe onu;
k'ophu ọha ono,
pfuberekoto ono,
bụ ndu apfushije ike l'iphe,
ẹphe pfuru ono abahụ.

³ Ii-kebe iya l'oma; mbụ onye ono,
uche iya dū l'ẹka ị nọ;
opfu l'ọ kpọru obu yeru
ngu ono.

⁴ Unu kpọru obu yeru Chipfu
jasụ lẹ tuutuutuu lẹ mịimiimii;
kẹle Nnajiọha,
bụ Chipfu bụ oke agbara
mkpuma ojejeje.

⁵ Ndu woliru onwophẹ eli
bẹ o kuzetaru;
bya emee gẹ mkpukpu, a kpuru;
ọ ha ephekerephe
ephekerephe lwazetakpọ
mkpulalị;
mbụ l'o gweru iya
pyakapyaka jasụ o rwua alị;

- o woru iya gwọo
l'urwuku.
- 6 E gude ọkpa azọ iya ọtilitoli;
mbụ ọkpa ndu e shi
emekpa ẹhu;
mbụ ntụ-ọkpa ndu adudu
g'ọ dū pẹ.
- 7 Ụzo, ndu p̄fuberekoto
eshi p̄furu nhamunha.
Sụ-a; ḡube onye obu ḡuru
ìphóró;
ọo ngu meru ụzo ndu
p̄fuberekoto;
ọ nọdu akwọ teretere.
- 8 Ḡube Chipfu;
anyi nọkpoep̄ho eme iphe,
ekemu ngu p̄furu;
gude nno daa gb̄e
ngaberu ngu.
Epha ngu;
ȳe ẹngiringa ngu bụ iphe,
aduje anyi ree l'obu.
- 9 Oghoroko ngu aduje mu
l'enyashi.
O -be l'utsu l'ọ dukwa mu phọ
g'asụ lẹ mu humaru
ngu.
Teke i kpērupho
unwu-eliphe ikpe;
ndu bu iya nū amaru iphe,
bū ap̄fubekoto.
- 10 Ndu ẹjo-iphe abujeru;
e -mechakp̄ooru p̄e
eze-iphe-oma;
ẹphe ta anwutadu iphe,
bū ap̄fubekoto.
Ēphe -nọdachakponu l'alì
ndu obu p̄e ḡuru ìphóró;
ẹphe emē-a iphe,
bū iphe, ap̄fuduru-oto.
Ēphe ta akpadu ishi kēle
Chipfu parū ẹka.

- 11 Gùbe Chipfu;
 ì paliwaru ẹka ephekerephe;
 obenu l'ẹphe ta ahụmaduru
 iya.
 G'ẹphe hụmanu g'opfu-ẹhu
 ndibe ngu aphụ-beru
 ngu l'ẹhu;
 g'iphere adụ phe!
 G'ọku, duru ndu ọhogu ngu
 tsupyashikwaa phe!
- 12 Gùbe Chipfu;
 ọ bụ ngu e-me gẹ nchị
 dụ anyi doo.
 Iphe, bụkpoo iphemiphe,
 anyi meru bụkota ngu
 bẹ meru iya nụ anyi.
- 13 Gùbe Chipfu, bụ Chileke anyi;
 ndu bụ nnajiuphu ọzo,
 abụdu gùbedua shiakwa
 bụru nnajiuphu anyi.
 Obenu l'ọo gùbedua kpoloko
 bẹ anyi akwabẹ ùbvù.
- 14 Ndu k'ono nwùhuakwaru;
 ẹphe ta anọekwa ndzụ.
 Ndu maa, lashìwaru nù;
 ta alwajeekwa azụ.
 Ì hùru phe ahùhù; mee phe;
 ẹphe bụru ọla-l'iswi;
 bya emee phe g'a ta
 nyatajẹhe phe anyata ophu.
- 15 I mewaru ndu ndu-anyi;
 ẹphe ka igwerigwe;
 gùbe Chipfu.
 I mewaru ndu ndu-anyi;
 ẹphe ka igwerigwe.
 I shi ẹgube ono mee
 onwongu;
 a kwabẹahaa ngu ùbvù;
 gùbe onye kporibecharu
 oke alì ono l'ophu.
- 16 Mbụ-a Chipfu;
 ọ kwa ngu bẹ ẹphe

gbapfutaru teke iphe atsu
phẹ l'ẹhu.

Teke ìhù phẹ ahùhù bẹ ẹphe
tùkoru wata ngu araku.

17 Oo gẹ nwanyi, dù ime;
ime nõdu emewaa iya;
anõduje aswìkposhi onwiya;
echi mkpu l'oome iya ẹhuka-a;
noo g'anyi shi dù nõdu
ngu l'iphu; gùbe Chipfu.

18 Anyi shi dù ime;
anyi nõdu aswìkposhi
onwanyi l'ẹka oome
anyi ẹhuka.
E mechaa; o dù g'anyi nwuru
phẹphẹphẹ;
mbù l'anyi ta adudu ike
dzọta unwu-eliphe;
ọphu ndu buchiru mgboko
adaduru.

19 Sù-a; ndibe ngu,
nwuhuru anwuhu
e-mechakwaa nõdu
ndzù ọzo.
Ogwẹhu phẹ e-teta gbalihu.
Unubẹ ndu bu l'ime urwuku;
unu gbalihu rwua okwe
ẹhu-utso.
Iji, akwaru unu dukwa g'iji,
akwa lẹ nchi-abọhu.
Mgboko e-mechakwaa
chifutagbua ndu shi
nwuhuhawa nù,
dù iya l'ime.

Adzọ ndu Ízurelù ndzù

20 Ndu mu; unu tųgbua bahù l'ulo unu je agù-chia onwunu ọzo!
Unu domia onwunu nwanshii; jasù oke ẹhu-eghu iya adazeta; 21 kẹ-
le-a; unu lenu! Chipfu shiakwa ẹka o bu eje afuta; g'ọ bya ahùà
ndiphe ahùhù k'iphe-ẹji, ẹphe meru. Mgboko l'ọphu e-kprofuta-
kọta ndu e gburu l'ime iya; ọphu oodomiẹdu ndu a nõ iya l'ime
phushia.

27 ¹O -rwua mbòku ono bẹ Chipfu e-gude ogu-echi, aha gengugengu. Ogu-echi, parụ ẹka bya adụ ike bẹ oo-gude hùta ẹjo-oke-agiyi ono ahùhù; mbụ ọkpụ-wuruwuru ono, bụ agwọ; ẹjo-oke-agiyi ono, bụ iya bụ nwoswi nggẹgeringge agwọ ono; mbụ l'ẹjo anụ, bugbaa lẹ mini bẹ ọo-phushichaa tẹterii.

²O -rwua mbòku ono bẹ Chipfu e-pfu sụ: “Unu gụa ebvu nụ opfu-vayinu ono, eye mebyi ntumatu ono. ³Ọ kwa mụbe Chipfu eleta iya ẹnya. Mu agba iya mini mkpụrumkpuru. Mu nọdu eche iya nche eswe l'enyashi; g'ọ tọ dụ onye e-mebyi iya nụ. ⁴Èhu te eghujekwa mu eghu. Ọ -bụkwanuru l'è woru obvu obvu yẹe mkpọ mkpọ tọ-chishia mu ụzọ; mu azọọ ya ọkpa ghata mẹ a -nọdu l'iphu ọgu; chiru phẹ ye l'ọku g'ọku kee. ⁵Ọdumeka; g'ẹphe gbapfutaẹle mu-a bya anọdu mu l'ẹka zee ndzụ. G'ẹphe byalẹ-a gẹ mu l'ẹphe doshia; g'opfu ta adụheru mu l'ẹphe.”

⁶E -mechaa l'ụzọ iphu; bẹ oshilọkpa Jiékpọ e-mechaa gbaa ọgbarabvu. Mbụ lẹ ndu Ízurelụ e-mechaa tụa ige; phọo ishi; mịa amimi gude mebyi mị-jia mgboko l'ophu.

⁷Mbụ-a; iphe, Chipfu chiru iya; ?ọ hakpọwanu g'ophu o chiru ndu chiru iya iphe? ?E gbubekpọwaru iya nụ g'e gburu ndu gburu iya nụ? ⁸Iphe, o gude baarụ iya mba bụ l'ọ harụ; e tsoo ya ọgu kpua ya lẹ ndzụ; mbụ ọ bụru ẹjo phẹrephere, shi l'ụzọ ẹnyanwu-awawa bẹ o gude bya agụ-lia ya. ⁹Wakwa g'ee-gude byachia ikpe, nmarụ oshilọkpa Jiékpọ baa; tẹme ọ bụkwaru iya phọ a-buru mebyi, ọ mịru, bụ iya bụ l'ee-huchafu iphe-ẹji iya: Teke oo-gwe mkpuma ẹnya agwa iya rwukuru-rwukuru g'onye egwe ńdzú. Itso Ashera taa duedu; ophu ẹnya ẹka aakpoje ụnwù-isensu ọku aduedu ophu apfukwaduru nụ.

¹⁰Noo kele mkpukpu, a kpushiru ike dabyiwaru iphoro. Ọ bụru ochobu ẹgu mbukọbe; bụru ẹka a gbadoru g'echiegu, adudu onye bu iya nụ. Ọ bụru ẹka ono bẹ aanọduje eche eswi; bya aburu ẹka aadọbeje iya; ọ nọdu ata ẹkali-oshi, dụ iya nụ l'ọoburu ẹchachi. ¹¹Teke ẹkali iya ono kpohuru nkụ l'eegbushia ya. Ụnwanyi abya evuta iya jeye l'ọku; kele ndu-a bụ ndu enweddu egomunggo. Ọ bụru iphe ono meru g'o gude ophu imemini phẹ adudu onye meru phẹ nụ; mbụ ophu ọ dudu iphe-oma, oo-meru phẹ mẹ ililekpoo.

¹²O -rwua mbòku ono bẹ Chipfu e-shiepho l'onu ẹnyimu Yufurétisu tụtukoo ndibe iya g'onye atutushi ẹswa l'ereshi; gbiriri jasụ lẹ nggele Iji-putu. Mbụ l'unubẹ ndu Ízurelụ bẹ aa-nọdu atutukọbe nanunanu. ¹³Mbòku ono bẹ ee-gbu eze opu. Ndu ono, nọ l'alị ndu Asiriya ala l'iswi ono; mẹ ndu ophu a kpuru lẹ ndzụ laa alị ndu Ijiputu; a-tụko lwakọbe bya abaaharụ Chipfu eja l'úbvú, dụ nsọ ono, nọ lẹ Jierúsalemu onoya.

Aphụ atsọru ndu Ifuremu

28 ¹Nshio mkpukpu Samériya, bụ okpu-eze ono, ndu Ifuremu gude eku onwophe ono; gude iya angughajeru mẹe ẹka ono! Nshio ẹguru okoko

ono, anwawa anwanwa ono; mbụ okoko, bụ iya bụ ẹguru iya; bya abụru ogbunwiiinwii ya ono, a tų-koberu l'ishi nsụda, emehuje iphe ono! Nshio mkpukpu ono, ẹphe egudeje eku onwophe; mbụ ndu mee kwatsuru ono! ²Lenu; Nnajiuphu nwekwaru onye okpehu dų shii; teme o shihu ike. Oo-gbalikpoe ya pho byia l'alı ke gbaa; g'eka a tųru akamini; g'eka oke pherephere mebyishiru iphe; g'eka igwe ezi pherephere; edze oke mini, aso gborogboro. ³Okpu-eze ono, ndu Ifuremu gude eku onwophe ono; gude iya angughajeru mee eka ono be ee-gude okpa tee pyakapyaka. ⁴Okoko ono, anwawa anwanwa ono; mbụ okoko, bụ iya bụ ẹguru iya bya abụru ogbunwiiinwii ya ono, a tų-koberu l'ishi nsụda, emehuje iphe ono; l'a-dų g'akpuru oshi figu, chakeru achake. Ahuma, nemadzu ahuma iya; bya awotawa iya parų l'eka; bųwaa g'ọ wata iya eriri.

⁵O -rwua mboku ono be Chipfu, bụ Okalibe-kakota-ike a-buru okpu-eze, egbu nwiiinwii; bya aburu okpu, l'eme phe g'ephe dų ubvu l'enya; mbụ nwa ndibe iya ophu a kpų-phoduru le ndzu. ⁶Su-a; oo Chileke l'a-buru onye a-nodu eyeru onye-ikpe eka g'o kpee ikpe, pfuru oto; lo buru iya a-buru onye angeje ndu alwu ogo ike g'ephe nwufu ndu ohogu phe onu-oguzo mkpukpu.

Ndu uke yele ndu mpfuchiru Chileke, ngunukaru mee

⁷Ndu owa akpokwapho kulakula mee; teme ẹphe gudewaa angu mee, shihuru ike dakashihu. Su-a; ndu-uke Chileke ẹphe le ndu mpfuchiru Chileke nguakwaru mee, shihuru ike; akpo kulakula. Mee riakwaru phe ishi. ẹphe nguru mee, shihuru ike akpo kulakula. ẹphe nodu anoduje akpo garigari m'ephe nodu aphu ophulanya. ẹphe -nodu epfu iphe, ee-me; ẹphe epfusweshi iya epfusweshi. ⁸Iphe, bukpo teburu g'ọ ha be ẹphe gbokotaru egbo kpua; k'ophu bų lo to dudu eka akpoduru iya idzu.

⁹“?Bụ onye be oome g'o zia iphe? ?Bụ onye be oome g'iphe, oozii doo enya? ?Bụ unwegirima nshii, aamifu onu l'era too; mbụ ndu bų-wokwadu-a be a nafuru phe era. ¹⁰Kele o kwa ekemu be e woru tų-kobe l'ekemu; mbụ l'ekemu tų-koru l'eli ekemu. A bya akaa iphe l'eli iphe, a karu iphe; kaa iphe l'eli iphe, a karu iphe. E metota l'eka-a; metota l'eka pho.”

¹¹O kwa onye epfu l'onu-oku yee onye epfu opfu-alı ndu ozo be Chileke e-gude pfuru opfu nų ndu-a; ¹²mbụ ndu ono, o suru: “Eka-a bų okpoku atuta unme; ge ndu ike bųru nodukwa iya tuta unme. Teme eka-a buru eka atuta unme.” Ophu ẹphe angaduru nchi. ¹³Oo ya bų l'opfu, Chipfu epfu eyeru phe a-buru ekemu be e woru tų-kobe l'ekemu; mbụ l'ekemu tų-koru l'eli ekemu. A bya akaa iphe l'eli iphe, a karu iphe; kaa iphe l'eli iphe, a karu iphe. E metota l'eka-a; metota l'eka pho; k'ophu ẹphe e-jekwanu adaa idaphu-azu; meka iphe; dalahu l'onyà; l'aanmata phe.

Mkpuma, gude ulo, a togboru l'ubvu Zayonu

¹⁴Oo ya bų; unu numakwa opfu, Chipfu epfu anu unube ndu mgbonu! Mbụ unube ndu ono, bų ndu-ishi le Jierusalemu ono! ¹⁵Unu anoduje

epfu ọkpụ-ọnu ọkpụ-ọnu sụ: “Anyi l'anwụhu gbaakwaru ndzụ; mbụ l'anyi l'alị-maa yeakwaru ẹka l'ẹkwo. Teke Ochi-gbaagbaa ono, e-dzuru ẹkameka ono rwuru bẹ ọ tọ dukwa iphe, oo-me anyi; kele ọo adzụ ụka bẹ anyi meru; ọ bụru iphe, anyi egudeje ezeru ndzụ; ughoshi l'onwiya bụru ẹka anyi ejeje je edomia onwanyi.”¹⁶ Wakwanụ iphe, Nnajiuphu, bụ Chipfu pfuru baa: “Lekwa; mu tọgboakwaru mkpuma l'úbvú Zayọnu; mkpuma, a hụwaru ama; bya aburu mkpuma, vu oke aswa; mkpuma, e doberu l'ishi ẹka o gude ọkpa-ulo gudeshia ya ike; k'ọphu bụ l'onye dakoberu iya nụ ta abyadu anga anganga. ¹⁷Ọo ikpe, pfuru ọto bẹ ya e-me oshi ọnyeka. Ọ bụru apfubekoto a-buru iphe, e gude eme g'ọ pfuru nhamunha.”

Ọ bụru akamini e-kpota iphe ọbu, unu gude ezeru ndzụ ọbu; mbụ adzụ ụka. Mini abya asọpyabe ẹka ono, unu ejeje je edomia onwunu ono. ¹⁸Ọgbandzu unu l'anwụhu bẹ tee vuẹduru ire. Ọphu ẹká, unu l'alị-maa yeru l'ẹkwo apfueduru. Teke o-chi-gbaagbaa ono, e-dzuru ẹkameka ono rwuru; l'oochita unu tọgbo. ¹⁹Ọ tọ dukpoda teke ọ bya; ọphu o zikọta unu. Ụtsu g'utsu; eswe l'enyashi bẹ ọo-byajẹ bya ezia zighata. Mbụ l'onye-ozia doru ẹnya bukwa ndzụ e-rwuta iya. ²⁰Kele iphe-azẹe taa sụedu nemadzụ azẹe lochia onwiya alochi. Ukpo apaa gbẹrere k'ọphu ọ tọ sụedu nemadzụ aphụ onwiya. ²¹Noo kele Chipfu a-gbalihu g'ọ gbalihuru l'eli úbvú Perazimu. Ehu eghuahaa ya egbu g'o ghuru iya lẹ nsuda Gibiyonu. Noo teke oo-je ozi iya; jee ya g'o to jejehaadaru iya; mbụ mee ụngara nkiya g'o to mejehaadaru iya.

²²Nta-a bụ lẹ-a; unu hakwa agba mgbonu; ọdumeka bẹ ee-mekwa g'ẹgbirigba unu kabaa unu anyị ẹrwa. Ọ kwa Nnajiuphu; mbụ Chipfu, bụ Ọkalibe-Kakọta-Ike bẹ pfuru mu sụ mu l'a tų-buwaru l'ee-mebyishi alị-a l'ọphu.

Mmamiphe Chileke

²³Unu ngabẹ nchị numa olu mu! Unu gebekpọdapho numa iphe, mu epfu! ²⁴Teke onye akoje opfu akoshi ẹka ọo-nma iphe; ọonoduje akọepho okoro nno eje tọo? Bụ iphe, ọonodujeepho eme bụ egbukposhi bẹ ọonodujeepho egbukoshi alị akpa iya eja eje tọo? ²⁵Ọ -kọchaa ya kpasaa ya; ọ dų ree; tọo ghajedu iya akpuru dilu; ghaa akpuru kominu; kua ya witi l'ẹka rwuberu iya nụ; ghaa balị l'ibiya ọphu a karu iphe; bya aghaa ereshi-supelutu l'okoke alị iya ọbu? ²⁶Ọ bụru Chileke iya anoduje ego-shi iya iphe, oo-me; bya abukwaru iya pho anoduje ezi iya iphe, bụ: o -mee ya; l'ọ bụru ọkpobe iya. ²⁷E tee gudejekwa mgborígwè, eegudeje echishi ereshi echishi akpuru dilu. Ọphu eegudejedu ogba-kperekpere-nzoshi-iphe ewephe l'eli kominu. Akpuru dilu bụ oshi bẹ eegudeje echishi iya. Ọ bụru mgboro bẹ eegudeje echishi kominu. ²⁸?Eegwepiyashi witi egwepiyashi tọo? Waawakwa. E te egwejedu iya ngwe lanu. Ọobujeru; e -wechaa ya ogba-kperekpere-nzoshi-iphe; l'ọ phushia ya ẹswa; ọle o too

gwepyakwanu iya egwepya. ²⁹Iphemiphe ono bukotaru onye o shi l'eka bu Chipfu, bu Okalibe-Kakota-Ike. Iphe, otu-beje k'ememe du biribiri; mmamiphe iya be pakwaru eka.

Nshio mkpukpu Jierusalemu

29 ¹Nshio Ariyelu; gube Ariyelu; mbu mkpukpu ono, Dévidi shi buru ono! Unu guru apha ye l'apha. Unu bo obo-iphe bogbabe mgburugburu. ²Obenu le Ariyelu be mu e-me g'o jee iphe-ehuka. O-gu aphu kwashia enya-mini. Oo-due mu pho g'eka aakpoje ngweja oku l'oru-ngweja. ³Mu e-keru ngu ugu kepee ngu mgburugburu; woru ose-ogu buphee ngu mgburugburu. ⁴Ee-wozekpo ngu ali k'ophu ii-nodu l'ali aka gberegberere. Olu ngu eshi l'ali adafuta nwiphiphe. Mbu l'ii-nodu l'ali epfu nwa hohoho ge nwamaa. O buru l'ali be ii-ze; olu ngu obu ada nwa rwirwii.

⁵Ndu ohogu ngu, dukpoo igwerigwe be ee-gwe uji g'urwuku, du nukuru nukuru. Le mee igwerigwe ndibe ngu, ewebushi akurepho; ephe etsu dududu geswa ereshi. Teke ono teke ono; mbu a -bya amaru; ⁶be Chipfu, bu Okalibe-Kakota-Ike e-me phereketeke. O -nodu abya lo tu egbigwe; ali anma jijijiji; ekameka aphu tititi; oke pherephere ezi; oke mini edze; oku, anodu enwu phoophoophoo; ekepyashi iphemiphe. ⁷Noo teke ikpoto oha, a-nodu etso Ariyelu ugu a-wufuta; ephe etsoo ya ugu; mekpoo ulo, a kpushiru ike, du iya nu; no-pee ya mgburugburu. O -nodu eme lo du iya ge nrwo; go bu ophulanya be ophu lenyashi. ⁸Oo-du g'eka onye ugu agu rworu nrwo ge ya eri nri; o tehushia; ugu nodu ugu iya ro l'eka oogu iya; g'eka onye ugu-mini ugu rworu nrwo eka ya angu mini; o tehushia; ekpiri kpohukwa iya pho nku go kpohuru iya; kele mini obu agule iya pho googu iya. Noo goo-du ikpoto oha l'ophu, etso ubvu Zayonu ugu bu ono.

Iphe, e-me ndu ta angaduru Chileke nchi

⁹G'o tufukwaa unu ehul! G'o dukwa unu biribiri! Unu watakwa atsu ishi! Unu ba aphuekwa uzo! Ge mee, unu anguduru watakwa unu atsu-tsu! Unu awata akpo garigari lebe unu angu mee, shihuru ike! ¹⁰Chipfu meakwaru g'oke mbenya tu unu. O kechiakwaru unu enya; unube ndu mpfuchiru Chileke; o kpuchiwaa unu ishi; unube ndu aphu ophulanya. ¹¹Ophulanya-a l'ophu ta adukwa iphe, o bu unu. O du-a unu g'opfu, e pfuru dee ya lekwo woru nyachia. Teke i wokwanuru ekwo obu nu onye maru ugu ekwo bya asu iya go ngge gua jiko; iphe, oo-pfu bu le ya taa dukwa ike ugu iya. La nyachikwaru iya anyachi. ¹²Ozoo li woru ekwo obu nu onye amadu agugu bya asu iya: "Nggenu gua jiko." Iphe, oo-pfuru ngu bu: "Mu ta amakwa g'aaguje ekwo."

¹³Su-a; wakwa iphe, Nnajiuphu epfu baa: "Ndu-a buepho epfupfu be ephe epfujeru mu lephe no mu ntse. O buru eli onu be ephe gude akwabe

mu ùbvù. Obenu l'obu phẹ nọgbaa mu ụzenya. Ebvù, ẹphe atsu mu bu iphe, ẹphe gude eme iya bu ekemu, nemadzu turu. ¹⁴Ọo ya bu ẹ-a; mgbo lanufua be mu e-mefu-a ndu-a iphe, a-du phẹ ebvu l'anya. Mu e-me iphe, du biribiri tu-kobe l'iphe, du biribiri. Mmamiphe ndu maru iphe be a-la l'iswi. Nkwamanya ndu iphe edoje ẹnya edomia onwiya edomi."

Ele ẹnya l'iphu a-ka ree

¹⁵Nshio unube ndu ono, ejeje l'eka du omilomi je edomia iphe, ẹphe chiru idzu ememe; domia ya ge Chipfu ta ahuma iya; ndu anoduje l'ochii eme iphe, ẹphe eme ariro su: "?Buro onye humaru anyi? ?Buro onye a-maru iphe anyi eme?" ¹⁶Unu ewoju iphe gha igharaphu g'onye ari l'okpu-ite a-du g'urwa, o gude akpu ite. ?O duru teke iphe, e gude eka mee a-su onye meru iya nu: "O to bukwa ngu meru mu?" ?O duru teke ite a-su okpu-ite: "O to dukwa iphe, i maru g'eeme?"

¹⁷O to dukwa g'oo-no-beru l'e woru ubvu ubvu Lebanonu mee g'o buru ali, iphe emehuje; ali, iphe emehuje abya ezee du g'oswa.

¹⁸O -be mboku ono be ndu ada nkuchi a-numachaa opfu, e deru lekwo ono. Ndu atsu ishi ahumachaa iphe l'ime ochii, gbaru tsukiribaa. ¹⁹Ndu wozeru onwophe ali be a-nodu l'eka Chipfu ehu atso phe utso. Mbụ ẹ ndu adudu g'o du phe a-nodu l'ime Onye Nso ke ndu Izurelu ete eswa. ²⁰Ndu ewebushi akurepho a-chihu; ndu mgbonu taa dudu; ndu nweru ẹnya eme ejo-iphe l'eenwutsushikota phe g'ephe ha; ²¹mbu ndu egudeje onu mee g'ikpe nmaa nemadzu l'iphe, iswi du iya mma; woru onya gbaaru onye agbaru nemadzu odzori l'ulo-ikpe; gbaa ekebe ugho jasu l'e woru ikpe nma onye iswi du mma.

²²Ọo ya bu ẹ-a; wakwa iphe, oopfu anu onu-ulo Jiekoju; mbu Chipfu ono, bu iya gbafutaru Ebirihamu ono. O suru-a: "Iphere taa adukwa oshilokpa Jiekoju ozo; ophu iphu agbachihuedu phe agbachihu ozo. ²³Teke ẹphe a-huma unwegirima, mu a-nu phe be ẹphe e-dobe-a epha mu nso. ẹphe ekwetakwapho l'onye nso k'oshilokpa Jiekoju be du nso eviya. ẹphe anmahu pyaapyaapya l'iphu Chileke ke ndu Izurelu. ²⁴Ndu te ebvuduru ebvuru l'iphe ke Chileke aburu ndu iphe edoje ẹnya. Ndu aguphe aphu ekwe mee iphe, a suru g'ephe mee."

Ọgbandzu, enwedu ishi

30 ¹Wakwa iphe, Chipfu epfu baa: "Nshio unube unwu ono, bu ndu ejo-okpoma; mbu ndu anoduje eme iphe, abudu idzu mu; ndu ẹphe l'ibe phe achije idzu atugba buru nanu; ole ẹphe te egudekwanu Unme nkemu eme iya; ndu eme iphe-eji akube l'eli iphe-eji; ²ndu wufuru lashia ali ndu Ijiputu l'ebe epfuru mu iya; ndu bu Fero be ẹphe ele ẹnya l'eka g'o yeru phe eka gbobuta phe g'o to du iphe, e-me phe nu; ndu gbapfuru ndu Ijiputu je anodu phe l'eka ezeru ndzu. ³Ole egbobuta, Fero

a-nòdu egbobuta unu bẹ iphere iya e-mechaa dọ unu; mbụ l'ẹka ndu Iji-putu, unu gbararụ; e-mechakwana tee unu ntụ l'iphu. ⁴A makwarụ-a lẹ ndu-a bẹ ndu-ishi pẹ nọwa lẹ mkpukpu Zowanu; mbụ lẹ ndu ẹphe ziru ozi byarwutawaru mkpukpu Hanẹsu. ⁵Ọlẹ onyemonye bẹ ee-mekọta g'ẹphe bụru ndu iphere dọ. Ọ bụru iphe, a-kpa iya nụ bụ ndu ono, adudu iphe, ẹphe gude pẹ eme ono; ndu te eyeduru pẹ ẹka; ọphu ẹphe abaduru pẹ urwu. Ọ buerupho iphe-iphere yẹ iphe ata uta bẹ ẹphe a-buru pẹ.”

⁶Ọwaa bụ ozi, Chileke ezi lẹ k'ẹhu unwu anụ, nọ l'echiegu ndohali: “Ndu ono, e ziru ozi ono wuru je aghaa alị iphe-ẹhuka yẹ mkpawere; alị, oke oduma; yẹ ne oduma bugbaa; ẹka ọkpontu; yẹ ẹjo agwo ọzo bugbaa; mbụ l'ẹphe vu ẹku pẹ l'okpurukpu nkafu-igara; bya evuru iphe, vu oke-aswa pẹ l'okpurukpu inya-kamẹlu; evujeru ọha, ta abaduru pẹ urwu; ⁷mbụ evujeru ndu Ijiputu l'ẹbe abụ lẹ n-yemẹka pẹ duru urwu, ọobaru pẹ. Noo g'o gude ya kua ndu Ijiputu 'Eze-oke-agiyi Ọ-nọ-kẹ-mmanụ'.”

Ndu kwefuru ike

⁸“Jekwa ebyiaru pẹ iphe-a, mube Chipfu epfu-a l'okwekpu; mbụ dekwaa ya edede l'ekwo-aphuphu; k'ọphu abukwanuru; o -rwua l'iphu; l'ọ bụru iphe-ekebe, a-nọ jasụ l'ojejeje. ⁹Lẹ ndu-a bukwa ndu kwefuru ike; bya aburu unwu ẹregede; mbụ unwegirima, o too hedu ihee angabẹ nchị l'okwa, Chipfu anmaru pẹ. ¹⁰Ẹphe nọdu asuje ndu ọphulenyaa: ‘Unu ta aphuhakwa ọphulenyaa ọzobaa!’ Bya asụ ndu mpfuchiru Chileke: ‘Unu te ekpuhajeekwaru anyi iphe, gbaru anyi l'ememe! Unu pfujeru anyi iphe, atso uto anuma! Unu gbebejeru anyi mpfuchiru egbebe! ¹¹Unu haaru anyi uto! Unu gbeshiru anyi l'uto! Unu ba byahẹ anyi l'iphu! Unu te epfuhuru anyi kẹ Onye Nso kẹ ndu Ízurelu!’ ”

¹²Ọo ya bụ lẹ-a; wakwanu iphe, oopfụ; mbụ Onye Nso kẹ ndu Ízurelu: “Eshinu unu jikaru anuma ozi, mu ziru unu; bya asụ l'ọo mkpawere bẹ unu a-chiru upfu kwẹ; bya akporu obu ye l'ẹregede; ¹³bẹ iphe-ẹji ono a-buru unu igbulọ, ha ephekerepẹ, gbaru ọru; teme ọ nọdu ada adada; g'ejia epfua; ọ dawanu teke ono teke ono. ¹⁴Ọo-kukposhihu g'onye kukposhiru ite-urwa; tukaa ya nanunanu ẹhuka ẹhuka; k'ọphu bụ l'ibiribe iya bẹ a taa humadu g'ọ ka mma l'ọo mkpebahụ iya g'e gude guta ọku l'ovokoku; ọzokwanu g'e gude kwota mini l'obvu-mini.”

¹⁵Wakwa iphe, oopfụ baa; mbụ Nnajiuphu, bụ Chipfu, bya aburu Onye Nso kẹ ndu Ízurelu: “Izimanu -lwa unu azu; unu daa ngaberu mu; l'a dzo-ta unu. Unu -dakpoeppo gbẹdemu bya adakobe mu; ike adu unu. Obenu l'ọ tọ dudu iphe ono, duru ọphu unu meru. ¹⁶Ọ buchia iphe, unu pfuru bụ waawaa; l'unu e-nyikotachia inya gude gbala. Ọ bụru iphe ono meru g'o gude unu je l'agbala. Temе unu sukwapo l'unu a-nodu l'inya okpa-egwa

gude agbala. Ọo ya bụ ịe ndu a-ọdu achị unu ọso ọbu a-bụkwarupho ndu ọkpa-ẹgwa. ¹⁷Unu ụmadzu labo l'ụkporo ụmadzu iri etsukahuje gba-la me onye lanu yee unu ebvu. Teke a du ise yee unu ebvu; unu atuko g'unu ha zelihi gbalaa jasụ nwa ndu a-phodu l'echilabo unu aduwa ge nwa itso, bvuru le mkpakponu eze ubvu; mbu ge nwa ekwa, aku peepee l'eli ubvu." ¹⁸Ole oo-ọndulekwa-a agu Chipfu g'o meeru unu eze-iphe-oma. Ọo-gbalihule-a phuru unu obu-imemini; kele Chipfu bu Chileke, ekpeje ikpe, pfuru nhamunha. Ehu-utso be a goru nu iphe, bukpo ndu pfuru echeru iya nu.

Iphe-oma, Chileke e-meru ndibe iya

¹⁹Su-a; unube ndu Zayonu; mbu unube ndu bu le Jierusalemu; unu a-kwata ekwa gberuma. Oo-mekwaru unu eze-iphe-oma; me unu raa ekwa raku iya! Ọo epho anuma, onuma iya; lo za unu enu. ²⁰Nnajiuphu-nukponu unu nri mkponwu-ehu; bya echebe unu mini eje iphe-ehuka; e tee domieduru unu ndu ezi unu iphe; unu egude enya unu gedegede huma phe. ²¹?Unu shiru ekutara-o; unu shiru ekicha-o; iphe, nchi unu a-ọduapho anu lazụ unu a-buru: "Wakwa ụzo baa! Unu tsokwaru iya!" ²²Noo teke unu a-turwu nshi unu ono, a wuru mkpola-ochaa ono. Unu aturwuwapho nteke unu ono, e gude mkpola-ododo wua ono. Unu eworu phe tuphashia g'onye etupha nkirika-ekwa bya asu phe: "Unu garu aka laa!" ²³Noo teke Chileke a-wata edzeru unu mini; edze iya ekpu l'iphe, unu meberu l'ali. Nri, aakota l'ali emehuaha emehu; bya adukwapho shii. Noo teke iphe-edobe unu a-wata akpa ntusaru-ehu. ²⁴Eswi unu; mekpoo nkafu-igara unu, bu ophu ejeru unu ozi egu l'a-ọdu ata nri, a gwọ-phuberu agwọ-phube; pyashichaa ya unu; o buru ago-éze yee shovelu be e gude gwọ-phube iya. ²⁵Teke o rwuru mboku ono, ee-gbu nemadzu pyaapya ono; mbu teke ono, oje-ephekerephe e-zeshihukota ono; be mini a-wata aso gborogboro ge nggele; shigbaa l'ubvu, ha l'eli asoshihu; shikwapho le mkpogiji ophu habe nwahabe asoshihukwapho. ²⁶Onwa a-wata egbu nwainwii g'enyanwu; anwu akabaa echishi ike eme le g'oochi nta-a ugbo esaa; mbu l'oo-ọdu echibe g'anwu chiru ujiku esaa l'ophu l'ophu; teke Chipfu e-pfubechaa iphe l'eka o mekaru ndibe iya iphe; bya emee g'onya, o yeru phe kpohukota.

Aphu, Chileke a-nu ndu Asiriya

²⁷Unu lenu; Chipfu shi l'eka du enya abya. Ehu-eghu iya ọdu enwu phuruphuru g'oku; teme o ọdu akpu tututuutu g'enwuru-oku. Ogbogboronu iya bu iphe, jiru iya nu bu oke-ehu-eghu. Teme ire iya buru oku, enwu phoophoohoo. ²⁸Unme, ọotu atutu du ge mini, aso gborogboro, byaru kulakula bya aworu nemadzu l'olu. Ohamoha be onmaje yigayiga; mbu chiru phe ye le n-yo ola-l'iswi. O bya eworu iyagba-inya woru ye

ndiphe l'asha g'o duphua phe. ²⁹Noo teke unu awata agụ ebvu g'aaguje l'enyashi mbọku, unu abọ obo-iphe, dụ nsọ. Ehu atsoshikpoo unu uto ike ge ndu egbu opu eje l'ubvu ke Chipfu; mbu agbara-mkpuma ke ndu Izurelu.

³⁰Chipfu emekwa ge nemadzu numa g'olu iya du-be akpabiri; mekwapo g'ephe huma okpehu iya l'eka oje alwa l'ali l'eka ehu-eghu iya enwu phuruphuru; teme o gude oku, enwu phoophoophoo; bya edzekwapho oke mini, atu aka-mini. ³¹Olu Chipfu l'a-chikashi ndu Asiriya nanununu. Oo-gude mgboro-eze iya chitachaa phe togo. ³²Teke Chipfu gude oshi-mpaleka iya ono, o gude anu phe aphu ono chia phe gbaa; ebvu aswoshihu; mbu ebvu, aaku nkwa eye; bya akpo ogumogu eye iya; teke ono, o-nodu etso phe ugu echi phe aka gbaagbaa ono. ³³Noo kele Tofetu shihawaa le ndiche du. E doziwaru iya kwaberu eze. Nsukutu oku, du iya nu be e mewaru; o du omilomi bya adu osa. Oku yele nku kwatakporu paa ya aka. Unme, Chipfu turu soru gborogboro g'oku nshi-egbe sobata iya bya emee ya; o gbanwuhu oku nwuaaha phoophoophoo.

Oshi, ayoru ndu kporu obu yeru ndu Ijiputu

31 ¹Nshio unube ndu ono, agba ala ali ndu Ijiputu eje achọ n-yemeka; ndu daphuberu inya; bya akporu obu yeru ikpoto ugbo-inya, ephe nweru; yee oke okpehu du ndu ojogu phe, bu ndu egude-je inya eje ugu; ophu ephe adabeduru enya l'eka Onye nsọ ke ndu Izurelu no; mbu ophu ephe agbapfuduru Chipfu g'o yeru phe aka. ²Ole o bu; yebdua lonwiya bukwa onye maru iphe. O nodu ewotajeru nemadzu ola-l'iswi; ophu oopfujedu opfu laa azu azu. Oo-gbalihu tsoo ibe ndu ejo-iphe ugu; mekpoo ndu anoduje eyeru ndu eme ejo-ememe aka. ³Obenu le ndu Ijiputu bu nemadzu; ephe ta abudu Chileke. Inya phe be bu anu-ehu; o to budu maa. Chipfu -machiwaa aka be upfu a-du-a onye eye aka. Onye eeyeru aka adaa gwoo. Ephenebo atuko laa l'ite lanu.

⁴Wakwa iphe, Chipfu pfuru nu mu baa: "Oo goduma asuje ekiri; mbu goke-oduma asuje ekiri me o -gbua iphe, oo-ri; m'obetakpo e kua ikpoto ndu eche aturu; ephe tuko dzuko g'ephe tsoo ya ugu; mkpu, ephe tuko echi te emekpodanu ge ndu gu ya; ophu uzu, ephe atu akposhidu iya iphe, oome-a. Noo ge Chipfu, bu Okalibe-Kakota-Ike e-nyizeta bya alwu ugu l'eli ubvu Zayonu; mekpoo le mkpakponu ubvu ono. ⁵Chipfu, bu Okalibe-Kakota-Ike e-kpuchita Jierusalemu genu, ephe l'eli. Oo-kpuchi iya; teme lo nafutakwa iya pho; agbaru iya odzori, agbaru iya mkpu; go to du iphe, e-me iya nu."

⁶"Su-a; unube ndu Izurelu; unu lwaphutanu azu lwapfuta onye ono, unu kwefuru ike ono; ⁷kele o -rwua mboku ono be onyemonye le g'unu ha e-mechakwa jika nshi mkpola-ochaa ono; yee ke mkpola-ododo ono, unu gude aka iphe-eji unu mee ono. ⁸Ndu Asiriya be ee-gude ugu-echi,

abúdu k'amadú gude gbushia; mbú ọ búru ogu-echi, abúdu ké nemadzú mmanú bẹ ee-gude gbufu phẹ. Ẹphe a-gba ọso gbaláaru ogu-echi ono; l'a chíru ụnwokorobyá phẹ ye l'ozí mkpónwu-ẹhu. ⁹Agbarike phẹ a-dakọta; ẹka eeye phẹ ebvu. Ndu-ishi ndu ojọgu phẹ -humaepho g'ogú ọbu eje ala; ẹphe agbado ẹkwa-ọhubama phẹ phọta ọso gbalachaa." Noo iphe, Chipfu pfuru bú onoya; mbú onye ono, kpọberu ọku l'úbvú Zayọnu; bya azọbe ọta pfupufu ọku lẹ Jierúsalemú ono.

Onye eze, pfuberekoto

32 ¹Unu lenu; o nweru eze, abyanú a-búru eze, pfuberekoto. Ndu-ishi iya abúru ndu ekpe ikpe, pfuru nhamúnha. ²Onyemonye a-dú g'ẹka edomi onwonye, a nọ agbalarú phẹrephere; dúkwapho g'ẹka aanọduje ezeru ndú l'ẹka oke-mini edze; dúkwapho gẹ nggele, asọ l'alí, mini adúdu; dúkwapho g'ononyo oke agbara mkpuma, nọ l'alí, adúdu iphe, dú iya nù. ³Noo teke e tee meedu gẹ ndu aphú ọzo phú-buhu ọzo. Tẹme ndu anú iphe lẹ nchí awata anga nchí. ⁴Ndu iphe adúje ẹgwegwa e nweru egomunggo. Ndu epfu l'ọnu-ọku epfuahaa opfu gbururu; pfuahaa iphe, doru ẹnya. ⁵E tee kuhedu onye-eswe onye a maru ẹpha iya. Ọphu akwabeedu ẹjo nemadzú oke úbvú; ⁶kele onye-eswe epfuje mkpọkoropfu. Egomunggo iya búepho ẹjo-iphe bẹ ọonoduje arí. Iphe, ọonoduje eme ememe búru umere onye agubeduru Chileke iphe. Tẹme ọ nọdu anọduje ezi ẹjo-nzi l'opfu ẹhu Chipfu. Ndu ẹgu agú bẹ ọohaje; ẹphe adabyiru iphoro. O to kejedú ndu ẹgu-mini agú mini. ⁷Umere k'onye ẹjo nemadzú búkwaru ẹjo-iphe. Iphe, ọochije idzu ememe búkota ẹjo-ememe; g'o gude ntuphu-ire mebyishia ndu akpa nri; mbúkpo m'obetaru ndu ono, adúdu g'ọ dú phẹ ono nọdu eyekpọo ọnu, pfuru ọto. ⁸Obenu l'onye a maru ẹpha iya achije idzu, a maru ẹpha iya. Ọ búru iphe, a maru ẹpha iya, oomeje bẹ ogudeje pfuru pfushia ike.

Unwada Jierúsalemú

⁹Unubẹ ụnwanyi ono, nọ túsaru ẹhu; unu gbalihu ngaberu mu nchí! Unubẹ ụnwada ono, arí l'ọ tọ dúdu iphe, abya unu ememe ono; unu nưmakpodapho iphe, mu abya epfufu! ¹⁰A -nọepho apha ophu; tú-kobe iya iphe, ha nwanshíi bẹ unubẹ ndu ono, arí l'ọ tọ dúdu iphe, abya unu ememe ono a-wata anma jijijiji. Vayínu ta adúedu mebyi, ọo-míta. Ọ tọ dúedu iphe, aawọta l'oshi-ọmí ililekpọo. ¹¹G'ẹhu nmakwaa unu anmanma; unubẹ ụnwanyi, nọ túsaru ẹhu! G'ẹhu tekwaa unu kparíkpari; unubẹ ụnwada ono, arí l'ọ tọ dúdu iphe, abya unu ememe ono! Unu tọfukwa ẹkwa unu; chíta uwe-aphú gba-phua onwunu l'upfu! ¹²Unu phukwaru yoo l'opfu ẹhu ẹgu ono, dú úbvú l'ẹnya ono; mẹ ké vayínu ono, amije shii ono; ¹³mẹ k'alí ndibe mu l'ophu; mbú alí, bú iphe, rwuchiru iya nù bú obvu yẹ ẹwu-óbúvú. Ee-o! Unu watakwa agú aphú l'opfu ẹhu iphe, búkpoo ọlo, aanọduje abọ iphe; mẹ k'ẹhu mkpukpu-a,

aanọduje eme ẹmereme-a! ¹⁴Noo kele unuphu ibe eze ono bẹ ee-mechaa gbado. Mkpukpu ono, aatụ wọwoowoo ono adabyiru iphoro. Úbvú Ofẹlu; yẹ ọlo, a kpushiru ike, dọ iya nọ a-buru ochobu jasuru; buru ẹka dọ nkafu-igara-ọswa ree; yẹ ẹka eeche eghu mẹ aturu; ¹⁵gbiriri jasụ teke ee-shi l'eli wua anyi unme Chileke l'ẹhu. Noo teke ee-woru echięu mee ali, iphe a-nọdu emehuje; ali ẹka iphe emehuje abya ezee dọ g'ọswa. ¹⁶Ee-kpeahaa ikpe, pfun nhamunha l'echięu; haahaa enge, pfun ọto l'ali, emehuje iphe, a koru iya. ¹⁷Mebyi, apfubekoto a-mi bu lẹ nchi a-dụ doo. Iphe, e-goshi l'a pfberekoto aburu l'ekameka a-da nyonyoronyo; meji anmapfuru onyemonye jasụ l'ojejoje. ¹⁸Teme ndibe mu eburu l'unuphu ẹka nchi a-dụ pẹ doo; l'unuphu, adudu iphe, byaru eme pẹ n; l'eka ẹphe a-nọdu atuta unme; ọ to dudu iphe, akpo-byi pẹ iya n. ¹⁹Mbu l'igwe a-tu akamini gude tųyashia oke ọswa; tųyashia mkpukpu ono l'ophu l'ophu. ²⁰Ehu-utso bẹ a goru nọ unubẹ ndu ono, akụ iphe, unu akụ akụku l'eka mini d; mbu unubẹ ndu haru eswi unu; yẹ nkafu-igara unu; ẹphe nọdu akpa ntusaru-ẹhu.

33 ¹Nshio gube nwa mmebyi; l'ẹbe abụ l'o nweru onye mebyiru gu-bedua! Nshio gube nwoderu-oye; l'ẹbe abụ l'ọ duru onye deru ngu ye! Ọ kwa: i -haephō emebyishi; l'e mebyia gubedua. Teke i haerupho ederu nemadzụ ye; l'e deru gubedua ye.

²Gube Chipfu; menaru anyi eze-iphe-oma! Anyi pfukwaru echeru ngu. Bujenuru ike anyi l'utsu mboku-mboku. Li buru onye ndzota anyi; mẹ anyi nọdu l'iphe-ẹhuka. ³Qobujeru; olu ngu -daephō g'egbigwe; ndiphe agbalacha. Teke i kwolihuru ekwolihi; ohamoha agbakashihi. ⁴A kwaa pẹ ọkwata rwuko pẹ g'eka inyarinya erwu ekwo; mbu gbaa pẹ gorogoro g'eka igube wubaru.

⁵Chipfu bẹ goshiru l'ọ parụ ẹka; noo kele o bu l'ephekerephe. Úbvú Zayonu bẹ oo-me g'ọ buru iphe, e-ji iya nọ bu ikpe, pfun nhamunha; yẹ apfubekoto. ⁶Ọo ya a-buru onye e-me g'unu nguru anguru l'ogbo k'unu. L'ọ dzota unu ọkpobe adzota; mee g'unu maru iphe; kwaa ẹnya. Ọ buru atsu Chipfu ebvu a-buru ẹku k'unu.

⁷Lewaro; ndibe pẹ, bu ndu ọkpehu dọ l'echikwa mkpu l'oma gbororo. Ndu ẹphe ziru ozi, bu ndu byaru g'e doshia opfu nọdu akwa ntumatu. ⁸Eze gbororo bẹ a gbadoakwaru; ophu ọ duedu ndu ije, eshijekwadu iya n. Ẹphe mebyiwaru ogbandzu, ẹphe gbaru; ophu ọ duedu iphe, a guberu ndu ekebe. Ophu ọ duedu onye aakwabejekwadu ubvu. ⁹Ali-a nọdu agu aphu edideshihi edideshihi. Iphere dọ ọswa, nọ l'ubvu ubvu Lebanonu; ọ nọdu anwulwashihu anwulwashihu. Nsuda Sharonu dūephō g'echięu ẹka mini adudu. Teme oshi, nogbaa l'ali Beshanu; yẹle ubvu Kamelu nọdu alaephō ekwo kparakpara.

Okwa, Chipfu anmaru ndu ohogu iya

¹⁰Chipfu bya eyee onu su: “Ọo nta-a bẹ mu a-gbalihu agbalihu! Ọo nta-a bẹ mu e-goshi lẹ mu parụ ẹka! ¹¹Unu dọ ime ẹswa ọkponku; ọ buru

oshi ereshi bẹ unu a-nwụ. Unme, unu atụ buru iya bụ ọku, e-ke unu. ¹²Ọzo bụ lẹ ndu ono bẹ a-dụepho gẹ mkpuma layimụ, a kporu ọku; mbụ l'ọo g'e gbushije irwu obvu kùbe tsee ya ọku-a bụ g'ẹphe e-tsu gburugburu tsufu. ¹³Unubẹ ndu bu ụzenya; unu nụmakwa iphe, mu meru! Unubẹ ndu ọphu bu ntse; g'o donaa unu ẹnya l'ọkpehu dụ mu!"

¹⁴Ndu iphe-ẹji, bu l'eli úbvú Zayonu bẹ ndzụ-agụgu rwutaakwaru. Ndu ta adụdu iphe, ẹphe gùberu Chileke nọdu aphụwaa kpaakpaakpaa epfu su: “?Bụ onye ole lẹ g'anyi ha bẹ yee ọku, enwu enwunwu e-buru? ?Bụ onye ole lẹ g'anyi ha bẹ yee oku, etsu ojejoje e-buru?” ¹⁵Ọ kwa onye bụ onye emeje iphe, p̄furu ọto; tẹme ọ nọdu epfufe iphe, p̄furu nhamunha; onye ajikaje anata urwu, shi l'iphe, a nataru l'ike; tẹme ọ nọdu eselajẹ ẹka azu l'anata uphalazu; onye ta angabejedu nchi mẹ a -nọdu achi idzu gee-shi gburu ochi; tẹme ọphu ọosajedu ẹnya hụma iphe, bụ ẹjo-iphe. ¹⁶Noo ẹgube onye a-nọdu l'ephekerephe. Ọ buru ẹka oo-buru zee ndzụ bụ l'ulo, a kpushiru ike l'eli úbvú. Ẹka ono bẹ aa-nọdu anụ iya nri. Ọphu ọ dudu teke ọ byaru acho mini achocho.

G'iphe a-dụ-be ree l'iphu

¹⁷Gubedua e-gude ẹnya ngu hụma onye eze ono g'ọ dụ-be úbvú l'ẹnya; bya amaa ẹnya l'alị ono, nọru ogologo ono. ¹⁸Lị bya egude ọriri ngu bya alaphu azu l'akahu nggiri ono. Mbụ l'ị rịa su: “?Bunaa awe bẹ onye ono, shi edeje okpoga-akirikoko ono nọhunu? ?Buhunu awe bẹ onye ọphu e shi apfujeru ego ọbu nụ nọ? Mbụ ?bunaa awe bẹ onye ọphu shi agụ ulo-mgbobuta anyi ọgu nonaa?” ¹⁹Ị tịi hụmabaedu ndu ono, shi eku onwophe ono ẹnya ahuma ọphu; mbụ ndu ono, opfu p̄hẹ egbejeru egberu ono. Ndu atsụ ntsu; ọphu iphe, ẹphe epfu edojedu ẹnya. ²⁰Lenaa ẹnya lẹ Zayonu; mbụ mkpukpu ono, anyi anọduje abọ ọbo-iphe anyi ono! Ii-gudewarọ ẹnya ngu hụma Jierúsalemu; mbụ mkpukpu ono, bụ: i -buru iya; nchi adu ngu doo ono; bya adu g'ulo, e meru l'ekwa, adudu onye byaru aphoriberu iya aphoriberu; ọphu ọ dudu onye adu ike apho-lita itso iya apho-lita. Ọphu ọ dukwapho eri iya ọphu byaru agbabuhu agbabuhu. ²¹Lẹka ono bẹ Chipfu a-buru Onyibe k'anyi. Ẹka ono a-dụ g'ẹka nggele dụ ọsa; ẹnyimu dụ iya ọsa. Ọphu ọ dudu unwu ugbo-mini, nweru akwo-ugbo, byaru eshi iya nụ. Ọphu ọ dukwapho oke ugbo-mini, a byaru anga l'eli iya. ²²Noo kele ọo Chipfu bụ onye-ikpe k'anyi. Mbụ l'ọo Chipfu l'aturu anyi iphe, anyi a-nọdu eme. Tẹme ọ buru Chipfu bụ onye eze k'anyi. Ọo ya bụ onye a-dzota anyi. ²³Eri, e shi kee gube ugbo toshihuakwaru. Oshi, gube ugbo gude nguru anguru duchaakwa wogowogo. Ọphu ẹkwa-ugbo ngu adabyekwaru potoo. Ọo ya bụ l'aa-kwa okwata, parụ ẹka kee; mbụ lẹ ndu ẹniyeni a-kwachaa okwata. ²⁴Ọphu ọ duedu onye bu lẹ Zayonu a-sụ: “Iphe emekwa mu.” Tẹme iphe-ẹji ndu bu l'ẹka ono meru bẹ aa-gukotaru p̄hẹ nvụ.

Aphụ, Chileke a-nụ ndu ọhogu iya

34 ¹Unu kpịritaru ntse; unubẹ ọhamoha; unu bya anụmakpodapho! Unu ngabekpodapho nchi; unubẹ ndiphe! G'eliphe l'ophu nụma-kwa; iphemiphe, nọ iya nụ anụma! Gẹ mgboko nụma; iphemiphe, shi iya nụ anụma! ²Chipfu bẹ avụkwaru ọhamoha ọvuma. Oke ẹhu-eghu iya bẹ ọ tu-koshiakwaru ndu ojogu pẹ l'ophu. Oo-mebyishikotakwa pẹ g'ẹphe hakotakpoo rengurengu. Oo-woru pẹ haa g'e gbushia. ³Ndu nkephẹ, e gburu egbugbu bẹ aa-pajeru tuphaa etupha. Odzu pẹ awata eshi ishi; mee pẹ atuko úbvú úbvú swongaa. ⁴Laphụ akpaminigwe g'onye phuru utute. Kpokpode atuko adashihu l'alị g'ẹka ẹkwo vayinu, nwuru l'waa erishihu l'eri iya; mbụ g'akpuru oshi figu, nọ l'oshi figu gbanwushihuru agbanwushihu dashihu.

⁵Ogu-echi mu bẹ a nọkwa l'imigwe baa bata nkọ. Lekwa; a paakwa ya apazeta gude abya anụ ndu Edomu aphụ; mbụ ndu ono, bu ndu mu dochawaru edocha k'emebyishikota rengurengu ono. ⁶Ogu-echi Chipfu bẹ mee a-ngugukwa angugu. Iphe, e-ji iya nụ bukwa ẹba-iphe. Mee unwu-aturu; yee mee egbu; waa ẹba-iphe, shi l'akpuru ebili aduchaa ya. Noo kele Chipfu abya egwe ngweja le mkpukpu Bozura; iphe, ee-gbu egbugbu paa ẹka l'alị ndu Edomu. ⁷Atsu bẹ aa-tuko ephe l'ephe gbushikota; mekpoo oke-eswi ndu ophu ha nwanshii; me ndu ophu paru ẹka. Alị pẹ bẹ mee a-nodu aso gborogboro; l'eegude ẹba-iphe gwoo urwuku l'oburu epuchi. ⁸Noo kele Chipfu nweru eswe agwata ugwo iphe; bya enweru apha, ẹjo-iphe onye meru a-vo iya l'ehu; g'ooshi nno gbaaru ndu bu le Zayonu odzori.

⁹Nggele nggele, nọkota l'alị ndu Edomu a-wokota korota. Eja, du l'alị ono awokota oku-nshigbe. Alị ẹka ono l'ophu abukotaru korota, oku enwu taphutaphu. ¹⁰O to byadu anyihu anyihu eswe l'enyasi; enwuru iya akpu tuntuutuu jasụ l'ojejeje. Lo buru ochobu dabyiru nno shi l'ogbo sweru ogbo. O to dudu onye byaru eshibaa ya ghatakponu aghata ozobaa. ¹¹Okpo-ngwere yee ebyi esweta iya lo buru iphe pẹ; mbụ le mgbashi-ujiku yee okpoko-ohà akpashị epfuno l'ẹka ono. Chileke e-me alị ndu Edomu g'ọ du g'ọ shi du teke o meru eliphe k'ophúú le mbulembu. ¹²Ndu oke amadu pẹ ta aduedu ẹka ephe enwekwaduru, bu ẹka eekuje alị-eze. Ndu-ishi iya g'ephe ha a-chihukota. ¹³Ewu-óbvú erwuchia l'ulo-eli, du iya nụ. Ole-karara yee egbara atuko ulo iya, a kpushiru ike zechia. Iphe, a-nodu akpa iya uri aburu nkuta-oswa. Mgbashi-ujiku eworu iya mee ibe pẹ. ¹⁴Unwu anụ, bu lechiegu ephe l'achi-anmabu atuko edzudagbaa l'ẹka ono. Eghu-oswa araku ibe iya l'ora. O buru l'ẹka ono bẹ mgbashijiku anodukwapho atuta unme. O buru l'ẹka ono bẹ ephe achotaru onwophe ẹka ephe a-nodu atuta unme. ¹⁵Mgbashi-ujiku a-kpa epfuno l'ẹka ono nodu tushia ẹkwa. Lo kpua ya; vaa nodu l'ẹka ono kpuyabe

phẹ lẹ ñkù iya hee hetseshia. Ọ bụkwarupho ẹka ono bẹ égbé e-dzukwa-phọ okee lẹ nyee.

¹⁶Unu jenu elee ẹnya l'ẹkwo Opfu Chipfu; unu agụa ya agugu. Ụnwu iphe ono ta adụkwa mę nanu adu-phodo l'ẹka ono. Ọphu ọ duka ọphu byaru asu lẹ ya ta ahụmaduru okee ọzoo nyee ya; kele ọ kwa mbụdua turu ekemu sụ l'onoo g'ọo-dụ bụ ono. Teme ọ buru Unme mu a-nodu erwukọbe phẹ l'ẹka lanu. ¹⁷Ọo ya atuje g'ọo-duru phẹ. Ọ nọdu egudeje ẹka iya tya ya atutu kee. O je aburu nkephẹ jasụ l'ojejeje. Mbụ ephe ebularurọ l'ẹka ono gbẹ l'ogbo sweru ogbo.

Èhu-utso ndu a dzọtaru

35 ¹Echiegu yee ali, adudu
mini,
du iya nu bẹ ẹhu a-tso.
Mgbegu ali-evevee bẹ a-wata
ete ẹswa mehuaha iphe,
e meberu iya g'ẹka
okoko jashiru.

²Mbụ l'ọo-jashikpoo
igwerigwe.
Èhu atsọo ya tsoshikpoo
ya ike;
l'o rwua okwe kpua ya.
L'e mee ya g'ọ du biribiri
g'úbvú úbvú Lébanonu;
du akpabiri g'úbvú
Kamelu;
yee nsuda Sharonu.
Ephe egude ẹnya phẹ
huma
odu-biribiri ke Chipfu;
mbụ akpabiri ke Chileke
anyi.

³Unu menaa g'ẹka unu,
tsuru mee shihu ike.
Unu emee g'ikpere unu,
aphu kwekweekwee
nguru anguru.

⁴Unu pfiaru ndu nweru obu
ndzu-agugu sụ phẹ-a:
“Unu shihu obu ike;
ge ndzu ba agushi unu.

Lẹ Chileke unu a-bya;
 bya emelata nemadzụ iphe,
 o meru onye ọzo.
 Ọo-bya; bya adzọo unubẹdua
 ndzụ.”

⁵ Noo teke ẹnya a-sahụ ndu
 atsụ ishi.

Nchị ndu ada nkuchi emee
 phosangu.

⁶ Noo teke ndu ẹniyeni a-wata
 azọ garamu garamu
 g'ele.

Ire agbụtoshihu ndu te
 epfudu opfu;
 ẹphe awata erwu okwe
 ẹhu-utso.

Mini e-shi l'echięgu gbafuhu
 sọaha kẹ gborogboro.

Tẹme nggele eshi l'alị,
 mini te eshidu dụ gbafuhu
 sọaha gborogboro.

⁷ Eja evevee,
 l'ekpo phuruphuru
 l'a-bụru okpuru.

Alị, mini tahuru agbafushihi
 ọgba bụru nggele.

Ọ bụru ẹka ono,
 bụ nkuta-ọswa shi buru
 iya ono
 bẹ ẹswa e-fushi;
 eji efushia ya;
 ẹchara amishia ya.

⁸ L'a bya atogbo iya eze
 gbororo; l'e kua ya ụzo,
 dụ nsọ.

Ndu aasọ nsọ te eshidu iya.

Ndu a-nọdu eshi iya nụ
 kpoloko abụerupho
 ndu ọ dūru;
 ọphu ndu eme eswe
 aghaphedu l'ime iya.

⁹ Oduma taa nọdu iya.

Ophu ọ dudu anụ ọzo,
 eri anụ,
 byaru eshitakpọo ya
 eshita ophu.
 A taa humakpoda a pẹ nū
 ahuma ophu l'ẹka ono.
 Ọ buẹpho ndu a gbafutaru bu
 ndu a-nodu eshi iya nū.
 10 Mbụ lẹ ndu ono,
 Chipfu pfuru aswa pẹ
 ono a-lwa.
 Epe aguru ebvu lwatashia
 Zayonu.
 Epe ekpuru ẹhu-utso ojeje
 g'onye kpụ okpu eze.
 Ete ẹswa yẹ ẹhu-utso
 atuko pẹ ẹhu sweta.
 Aphụ yẹ atsụ ude agbaa
 oso gbalaa.

Senakeribu eye ndu Jierúsalemụ ebvu
(2Ndu 18:13-37; 2Iphe 32:1-19)

36 ¹Tobudu iya bu; o rwua l'apha, kwe eze, bu Hezekaya apha iri
 leno, o wataru aburu eze; Senakeribu, bu eze ndu Asiriya bya
 ogu l'ali ndu Jiuda; bya atuko mkpukpu pẹ g'ọ ha, bu mkpukpu, a kpụ-
 shiru ike l'wua l'wuta. ²No iya; eze ndu Asiriya ono bya agbe lẹ mkpukpu
 Lakishi zia onye-ishi ndu ojogu iya; yeru iya ndu ojogu, du igwerigwe;
 bya asu iya g'ephe jepfu eze, bu Hezekaya lẹ Jierúsalemụ. Onye-ishi ndu
 ojogu ono jerwua bya eje apfuru l'ishi mgbamini okpuru uto eli, du l'uzo
 ono, eeshije eje ẹka asaje uwe ono. ³O ndu l'ẹka ono; epe byapfuta iya;
 mbu Eliyakimu nwa Hilikaya, bu onye-ishi l'ibe eze; waa Shebuna, bu
 onye edeje ekwo; waa Jiowa nwa Asafu; yebedua bu onye nkwakobe.

⁴Onye-ishi ndu ojogu ono bya asu pẹ: “Unu je akaru Hezekaya lẹ-a:
 Wakwa iphe, o pfuru; mbu Okalibe eze, bu eze ndu Asiriya. O suru-a: ?Bu
 lẹ gunu be i chiru nwupfu ophu i nweru kwee? ⁵I suru l'i machawaru ẹre-
 gede ogu bya enweru ike, e gude alwu ogu. Obenu l'opfu ngu bu okorobo
 opfu. ?Bu onye be i dakoberu ekwefuru yẹbe eze ndu Asiriya ike? ⁶Lenu;
 o kwa ndu Ijiputu be i dakoberu; mbu Ijiputu ono, bu mgbawa-ẹchara,
 abujeru: onye dakoberu iya nu l'o yejashia ya ẹka meka iya iphe onoya. O
 kwa egube ono be Fero du; mbu eze ndu Ijiputu. O kwa nno bu g'ọ duru
 iphe, bukpo ndu dakoberu iya nu. ⁷Teke i sukwanuru mu l'oo Chipfu, bu
 Chileke unu be unu dakoberu; ?to budu Chipfu obu bu ophu Hezekaya

lwuru ẹka aagwajẹ iya; bya emebyishia ọru-ngweja iya; bya asu ndu Jiuda ẹphe lẹ ndu Jierúsalemu g'ẹphe byajẹ abaa ẹja l'atatiṣu ọru-ngweja-a?

⁸“Byalẹkwa-a g'unu lẹ nnajiuṣu mu, bu eze ndu Asiriya tuko chĩa idzù. I-kweta bẹ mu a-kpuru unu inya ise kpee ngu; mẹ ọ -buru l'iji-du ike yechaa ya ndu a-ṣodu agba iya nu. ⁹Odumeka; ?ḍenu g'i riru l'iji-du ike kpafu l'iphu onye-ishi ndu oṣoṣu nnajiuṣu mu; m'obeta ọ buru onye ẹnya kachaa alwalwa lẹ ndu-ishi ndu oṣoṣu iya; l'ẹka ọ bu ndu Ijiputu bẹ i dakoberu g'ẹphe chiẹ ngu ẹgbo-inya; chiẹ ngu ndu agba l'inya-ọgu? ¹⁰Ozo bu lẹ-a; ?i dobesu l'ọ tọ budu Chipfu bẹ mu nọ l'ẹka bya ọgu l'ali-a gẹ mu mebyishia ya? Ọ kwa Chipfu l'onwiya ziru mu gẹ mu bya ọgu l'ali-a mebyishia ya.”

¹¹Toṣudu iya bu; Eliyakimu; yee Shebuna; waa Jiowa bya asu onye-ishi ndu oṣoṣu ono-a: “Jiko gude opfu ndu Aramu pfuru yeru anyibe ndu-ozu ngu; eshinu anyi anu iya ree. Te egudeshi opfu ndu Jiuda pfuru yeru anyi; kele ndu nọ l'eli igbulọ anukwa iya.”

¹²Onye-ishi ndu oṣoṣu ono sọ phe: “?Bu unu lẹ nnajiuṣu unu kpoloko bẹ ọ du unu gẹ nnajiuṣu mu ziru mu gẹ mu bya ezia ozi-a? Waawakwa. Ọ kwa unu lẹ ndu ono, nọ l'eli igbulọ ono; mbu ndu ono, unu l'ẹphe e-mechaa ria nshi unu l'onu; ngua mamini, unu gboru ono bẹ mu epfuru iya.”

¹³Onye-ishi ndu oṣoṣu ono bya apfuru bya egude opfu ndu Jiuda bya arashia ya ike sọ: “Unu numakwa iphe, o pfuru; mbu Okalibe eze ono, bu eze ndu Asiriya! ¹⁴Wakwa iphe, eze ndu Asiriya pfuru: Unu te ekwekwa gẹ Hezekaya dephua unu. Ọ tọ dukwa ike adzo unu! ¹⁵Ophu unu ekwekwa gẹ Hezekaya deta unu g'unu dakobe Chipfu; l'ẹka oopfuru unu asuje lẹ Chipfu ta adukwa iphe, e-me g'ọ tọ dzota unu. Lẹ mkpukpu-a taa lakwa l'ẹka eze ndu Asiriya. ¹⁶Unu ta angakwaru Hezekaya nchi; kele eze ndu Asiriya sukwaru-a g'unu wufuta wu-pfuta iya gẹ yele unu doshia. Ọo ya bu g'on'yemonye lẹ g'unu ha eria iphe, shi lẹ vayinu iya; ria akpuru, shi l'oshi figu iya; bya angua mini, du lẹ welu iya; ¹⁷jasu teke ya a-bya eduta unu; lashia l'ali, du gẹ k'unu; mbu ali, ereshi du; mee ophuu du iya; ali, nri du; teme opfu-vayinu du iya.

¹⁸“Unu te ekwekwa gẹ Hezekaya dephua unu; kele oo-su unu lẹ Chipfu l'a-dzotakwa unu. ?O dukporu oha ophu agwa ali phe nafutajewaru l'ẹka eze ndu Asiriya? ¹⁹?Bu awe bẹ agwa ndu Hamatu yee ke ndu Apadu nọ? Agwa ndu Sefavayimu; ?ẹphe nọ l'awe? ?Epe duru-a ike dzota ndu Sameriya l'ẹka yee eze ndu Asiriya tọ? ²⁰?Bu agwa ole l'ime agwa ndu ali ono bẹ duru ike nafuta ndu ali iya l'ẹka iya? ?ḍenu gẹ Chipfu e-shi du ike nafuta ndu Jierúsalemu l'ẹka iya?”

²¹Ndu Jiuda ono, oopfuru eyeru ono noduepho nggujungguji; ophu ọ dudu onye ophu pfuru opfu yeru iya; kele eze, bu Hezekaya turu ekemu sọ g'ọ to dukwa onye e-yeru iya onu.

²²Toṣudu iya bu; Eliyakimu nwa Hilikaya, bu onye-ishi l'ibe eze; yee Shebuna, bu onye edejeru eze ekwo; waa Jiowa nwa Asafu, bu onye

nkwakòbe tǔgbua; o bǔru phẹ ejepfu Hezekáya. Ephe gbajachaa uwe phẹ agbaja. Ephe jerwua bya eje akòoru iya iphe, onye-ishi ndu ojogu ono pfuru.

Hezekáya epfu anụ Chileke

(2Ndu 19:1-13)

37 ¹Tòbudu iya bụ; Hezekáya nǔmaepfo iphe ono ọ gbajashia uwe iya; bya achita uwe-aphụ yee; ọ bǔru iya eje l'eze-ulo Chipfu. ²Ọ bya ezia Eliyakimu, bụ onye-ishi libe eze; yee Shebuna, bụ onye edejeru eze ẹkwò; waa ndu-ishi lẹ ndu-uke Chileke; g'ephe jepfu onye mpfuchiru Chileke ono, bụ Azáya nwa Emožu. Ephe tuko yee uwe-aphụ jeshia. ³Ephe je je asụ iya: "Hezekáya sǔru-a: 'Ntanu-a bụkwa mbòku, oke iphe-ẹhuka dapfutaru anyi; bya aburu mbòku, aahụ anyi ahụhụ; bya aburu mbòku, iphe-iphere jiru anyi iphu. Ọ dukwa g'ẹgube ime anọduje eme nwanyị; ọ tọ dudu ike nyia onyi nwua nwata obu-a ⁴O nweru g'oo-du; Chipfu, bụ Chileke ngu anuma iphe ono, onye-ishi ndu ojogu ono epfu ono; mbụ onye ono, nnajiuphu iya, bụ eze ndu Asiriya yeru g'ọ bya epfu-toshia Chileke ono, dzu ndzu ono; k'ophu bụ lẹ Chipfu a-baru iya mba l'opfu ono, yẹbe Chipfu, bụ Chileke ngu nǔmaru ono. Ọo ya bụ; pfuru nù Chileke l'opfu ẹhu ndu ophu phoduru nù.' "

⁵Ọo ya bụ; ndu ono, eze, bụ Hezekáya ziru ono bya abyapfuta Azáya; ⁶Azáya sụ phẹ: "Unu je asụ nnajiuphu unu lẹ Chipfu sǔru-a: 'Ba atsukwa ebvu lẹ k'iphe ono, ị nǔmaru ono; mbụ opfu ono, ndu-ozì eze ndu Asiriya gude bya epfutoshia mu ono. ⁷Huma lẹ mu e-woru unme lanu ye iya l'ẹhu; k'ophu bụ l'ọo-numa asulasu; lashia alị phẹ; mu emee g'e gude oguechi gbua ya l'alị phẹ gẹdegede.' "

⁸Onye-ishi ndu ojogu ndu Asiriya bya anuma l'eze ndu Asiriya lufuwaru lẹ mkpukpu Lakishi; ọ laphu azụ je ahuma onye eze ono l'eka ootso ndu Libuna ogu.

⁹Noo ya; a bya ezia Senakeribu lẹ Tirihaka, bụ eze ndu Kushi bẹ abyapfuta-tawa iya ogu; o zia ndu-ozì g'ephe je ezia Hezekáya sụ: ¹⁰"Waa iphe, unu e-pfuru Hezekáya baa; mbụ eze ndu Jiuda: 'B'ekwekwa gẹ Chileke ngu, bụ onye ono, i dakoberu ono duphua ngu; l'eka oopfu lẹ Jierúsalemu ta alwadu l'eka mube eze ndu Asiriya. ¹¹Ophu doru ẹnya bụ l'ị numahawaru iphe, ndu eze ndu Asiriya meru ndu alị ọzo; mbụ l'ọ mebyishikotaru phẹ. ?Aanafuta-chia gubedua tọ? ¹²Mbụ-a; ndu ohamoha ono, nna mu oche phẹ mebyishiru ono; ?agwa phẹ dzotaru phẹ-a tọ? Mbụ agwa ndu Gozanu; yee kẹ ndu Haranu; waa kẹ ndu Rezufu; mẹ kẹ ndu Édenu, bụ ndu shi nodu lẹ Telasa. ¹³?Bụ awe bẹ eze ndu Hamatu nọ nta-a; mẹ eze ndu Apadu; mẹ eze ndu mkpukpu Sefavayimu; ọzo kẹ ndu Hena; ọzo kẹ ndu Iva?' "

¹⁴Tòbudu iya bụ; Hezekáya bya anata ẹkwò-ozì ono l'eka ndu e ziru iya; bya eworu iya gụa. Ọ bya abahụ l'eze-ulo Chipfu bya eje eworu iya

tosaa l'iphu Chipfu. ¹⁵Hezekáya bya epfuru nù Chipfu sù: ¹⁶“Gùbe Chipfu, bù Okalibe-Kakòta-Ike; gùbe Chileke kẹ ndu Ízurelu; onye sùgaru l'aba-eze iya l'echilabọ chierobu. Oo ngu kpoloko bù Chileke, nwekọta alì-eze, dù lẹ mgboko mgburugburu. Oo ngu meru igwe bya emee eliphe. ¹⁷Ngabẹnu nchì gùbe Chipfu; nùma iphe, mu epfu. Sanaa ẹnya hụmadupho. Ngabẹkpodapho nchì; nùma opfu ono, Senakeribu ziru g'e gude bya epfutoshia gùbe Chileke, nọ ndzụ ono.

¹⁸“Gùbe Chipfu; ọ bụkwa eviya lẹ ndu eze ndu Asiriya mebyishiwaru ọhamoha; waa alì pẹ. ¹⁹Ephe chìwaru agwa ndu ono ye l'ọkụ; o kepyashia; kẹle agwa pẹ ọbụ ta adudu iphe ọzo, ọ bụ; gbahaa nkụ; yee mkpuma, bù iphe, nemadzụ gude ẹka mee. ²⁰Oo ya bù lẹ-a; gùbe Chipfu, bù Chileke anyi; dzonaa anyi l'ẹka eze ndu Asiriya ono; k'ọphu alì-eze, dükota lẹ mgboko l'ọphu a-maru l'ọo gùbedua kpoloko; mbụ gùbe Chipfu bẹ bù Chileke.”

Adada Senakeribu

²¹Tọbudu iya bụ; Azáya nwa Emožu bya ezia Hezekáya ozi sù: Chipfu, bù Chileke kẹ ndu Ízurelu sùru l'iphe ono, i pfuru nù iya l'opfu ẹhu Senakeribu, bù eze ndu Asiriya ono bẹ ya nùmawaru. ²²Waa iphe, Chipfu pfuru l'opfu ẹhu Senakeribu baa:

Nwada Zayọnu ta adụekwa
iphe, ọ gùberu ngu;
tẹme ọ nọdu aja ngu
ewenu.

Nwada Jierúsalemụ ekwe
l'ishi l'ẹka ñgba ọso lẹ
ndaba agbala.

²³?Bù onye bù onye ono,
i shi ephu iphu;
bya epfutoshi iya ono?
?Bù onye bẹ i shi atụ ụzu
ekpu-a;
mbụ onye ono,
i gude eku-onwonye
vọoru ẹnya ono?
Ọ kwa Onye dù Nso
kẹ Ízurelu!

²⁴I ziru ndu-ozì ngu;
ẹphe bya eburu iphu nyabẹ
Nnajiuphu.
I sùru l'i gudewaa ikpoto
ugbo-inya-ọgu ngu

- nyirwuchaa mkpakponu
 úbvú úbvú;
 Mbù l'i nyirwuwaru
 mkpakponu,
 ẹka úbvú úbvú
 Lébanonu jeberu;
 bya egbutsushiwa oshi sida,
 dù iya nù, bù ndu ọphu
 kachaa etse ogologo;
 mẹ oshi payinu iya
 ọphu kachaa adù ùbvù
 l'ẹnya;
 bya ejerwuwaa ẹka ọ
 kachaa aburu ẹpfukala;
 mẹ ẹka ọ kachaa aburu ọswa,
 dù ree.
- 25 Mbù l'i tųwaru wẹlu l'alì ndu
 ọhozo; bya angua ya mini;
 bya egudewaa
 ọbochi-ọkpa ngu zọọ iphe,
 bù nggele,
 dukota l'alì Ijiputu tọlitoli;
 jasù ọ tashihukota.
- 26 Sù-a; ?ọ dù g'ì tì nùmajeduru
 iya?
 Ọọ mu tubuhawaru g'ọ dù
 nno teke dųhawaa ẹnya.
 Mbù l'ọ bųro teke ndiche
 bẹ mu chihawaru iya
 rọọ dobe.
 Ọ bųru nta-a bẹ mu
 meru iya g'ọ vua;
 mbù mee;
 i woru mkpukpu,
 a kpugbaaru o shihu
 ike mebyishia;
 ọ bųru ikpo mkpuma.
- 27 Ọ bųru iya bų;
 ike bvù ndu bu iya nù.
 Ẹphe bųru ndu a tųru
 ẹberebete;
 e meru iphe-iphere

kpua phe.
 Ephe bya adu g'iphe,
 a kuru l'opfu; g'iphe,
 rwuru irwu k'òphúú;
 mbu du g'èswa,
 furu le mkpotsu ulo,
 anwu chigbushiru
 l'èbe adu g'o vutaberu l'eli.

28 “Obenu le gubedua be mube
 Chileke maru eka i no.
 Mu maru teke ibata abata;
 maru teke itugbu
 atugbu.

Mu maru giibataberu
 hanyihanyi ekpu mu.

29 Eshi ophu o bu mube Chileke
 be ibaru hanyihanyi;
 teme beebabee,
 iipfuru mu rwuwa mu
 nchi;
 be mu e-woru ikokoro
 dzube ngu l'imi;
 woru mkpurukpu-igwe
 ye ngu l'onu g'inya.

Mu emee ngu g'i shia ophu
 i shi laphu azu l'eka
 i shi.

30 “A -bya le gubedua, bu Hezekaya; waa iphe, a-buru ngu iphe-ohu-bama baa: Apha-a be ii-ri iphe, daru eda. O -be apha ozo l'i ria ophu shi l'ono futa. O -rwua l'apha k'eto iya; koo opfu kpata iphe, i koru iya. Gbaa opfu-vayinu; ria akpuru, e-shi iya nu. 31 Su-a; nwa ndu ono, a-phodu nu l'onu-ulo Jiuda be a-gba ogbarabvu l'ime ali; mia mebyi l'eli mgboko; 32 noo kele o nweru nwa ndu phoduru nu le Jierusalemu. Ikpoto ndu wafuru nu e-shi l'ubvu Zayonu. O buru Chipfu, bu Okalibe-Kakota-Ike e-gude go phu-be iya lehu mee ya.

33 “Oo ya bu; waa iphe, Chipfu pfuru lehu eze ndu Asiriya baa: O to byadu a-bata le mkpukpu-a; ophu o byadu agba go ka mma l'oo apfu l'eka-a. O too gudekpodanu iphe, eegbobutaje onwonye abyakube iya ntse; ophu o byadu ebvuphe iya ose-ogu. 34 Oo uzo, o shi bya be oo-shi laa. O to byadu abata le mkpukpu owa abata ophu.” Nokwa iphe, Chipfu eepfu. 35 “Su-a; mu e-gude k'epha mu; me opfu ehú Dévidi, bu onye-ozu mu gbobuta mkpukpu-a; dzoo ya.”

³⁶Tɔ̀budu iya bụ; ojozi Chipfu tɔ̀gbuepho bya eje l'ẹ̀ka ndu ojoḡu Asi-riya dɔ̀ru; bya eje egbua ɔ̀kpɔ̀ro ɔ̀nu ɔ̀madzu ugbo ɔ̀kpɔ̀ro l'eto l'ɔ̀nu ɔ̀madzu labo l'ɔ̀kpɔ̀ro ɔ̀madzu iri^a l'ime ndu ojoḡu ono. E tehushia l'utsu; odzu zeshiwaa ke bee. ³⁷Noo ya; Senakeribu, bụ eze ndu Asiriya tɔ̀gbua; ọ bụru iya alaphu azu. Ọ laphushia azu le Ninive je anodu. ³⁸O be ujiku lanu; ọ nodu agwa agwa iya, bụ Nisuroku; unwu iya, bụ Adurameleku; me Shareza je egude ogu-echi gbugbua ya; gbaru lashia ali Araratu. Ọo ya bụ; Esahadonu, bụ nwa iya buri eze nochia enya iya.

Iphe-ememe guderu Hezekáya

(2Ndu 20:1-11)

38 ¹Ọ buri teke ono be iphe-ememe guderu Hezekáya; k'ophu bụ l'ọ nowaa l'onu onwu. Onye mpfuchiru Chileke, bụ Azáya; nwa Emozụ bya ejepfu iya je asu iya: Chipfu sɔ̀ru-a: “Dozia ibe ngu ree; kele jibyawa anwuhu; i ti kadu mma.”

²Noo ya; Hezekáya bya aghaa iphu l'uzo igbulo pfuru nu Chipfu su: ³Gube Chipfu; nyatanu ge mu bu-be onye gude ire-lanu; me obu mu go ha tsoo uzo nkengu; me ge mu gude meberu iphe, du ree lenya ngu. Hezekáya raa ekwa kpoo pfula pfula.

⁴Tɔ̀budu iya bụ; Opfu Chipfu bya atuba Azáya le nchi su iya: ⁵“Je akaru Hezekáya le-a: Waa iphe, o pfuru; mbu Chipfu, mbu Chileke ke nna ngu, bu Dévidi: Mu numawaru epfupfu, i pfuru nu mu; bya ahumawaa enya-mini, shi ngu lenya. Mu e-yekwafua apha iri l'ise le ndzu ngu. ⁶Ọzo bu le mu a-nafuta ngu; nafuta mkpukpu-a l'eka eze ndu Asiriya. Mu a-gbaru mkpukpu-a odzori.

⁷“Waa iphe-ohubama, Chipfu e-goshi ngu baa; g'i gude maru le Chipfu e-me-a iphe ono, o pfuru ono. ⁸Nwonyonyo iphe ono, a kpushiru, ee gudeje enyi ulo-eli Ehazi ono; be mu e-me go gude ntu-okpa iri tsu-phu azu.” No iya; onyonyo ono tsua ribo; gude ntu-okpa iri tsu-phu azu eme le go shi habe ogologo.

⁹Ọwa-a bu iphe, Hezekáya deru; mbu eze ndu Jiuda g'iphe-ememe ono mechaaru iya; o kachaa mma.

¹⁰ Mu sukwaru: ?Bu le
mkpakponu ndzu mu-a
be mu jeru je eshisweta
onu oguzo ali-maa?

A naa mu nfu nafu mu nwa
apha ndzu mu ophu
phoduru nu?

¹¹ Mu sukwaru le mu taa

^a 37:36 Bu iya bu 185,000 le mbekee.

- hụmabaedu Chipfu
 l'ali ndu dzụ ndzụ.
 Ọphu mu egudebaedu
 ẹnya ahuma nemadzụ,
 dzụ ndzụ;
 ọzoo kẹ g'anyi lẹ ndu
 nọkwadu l'eliphe-a
 bubaaru.
- 12 A lashiru ndzụ mu g'onye lashiru
 ẹswa l'ulo unwu-eswi;
 mbụ l'ọo g'onye akpa iphe
 akpakpa aphukobeje iphe,
 ọ kpagheru akpaghe-a
 bụ gẹ mu
 phukobewaru ndzụ mu.
 Ọ bya atuwaa mu eri
 gbụpyia l'iphe, aakpajẹ iphe;
 bya egbubufu iya.
 Ọ buru-a shi l'eswe gẹ nchi
 jihu bẹ i mebufuwaru
 nụ kẹ ndzụ mu.
- 13 Mu nọdu atajekpoepfo
 nshi jasụ nchi abọhu.
 Obenu l'o gweru mu
 ọkpu arakabya g'ẹka
 oduma ata anụ.
 Ọ buru-a shi l'eswe gẹ nchi
 jihu bẹ i mebufuwaru
 nụ kẹ ndzụ mu.
- 14 Mu gbọaha chachacha
 g'apya ọzoo g'ẹsha.
 Mu deahaa kukuku
 g'ede-kuukuu.
 Mu lenyaa ẹnya l'eligwe;
 ẹnya meahaa mu ẹhuka.
 Mu sụ: Jiko Nnajiuphu;
 mu eje iphe-ẹhuka;
 byanụ agbaarụ mu
 mkpu!
- 15 Ọle ọ bụ; ?mu a-sukwanu
 agha?
 O pfuakwaru opfu nụ mu;

- mbụ ọ bụru yẹbedua
l'onwiya meru iphe ono.
Mu a-nọdukpoepfo eje
nwa gelee jasụ gẹ mu
a-nọ-beru;
kele obu atawa mu
nyikinyiki.
- 16 “Gụbe Nnajiuphu;
ọ kwa ụdu iphe,
dugbaa egube-a bẹ
nemadzụ gude buru.
Ọ bụkwaru iya phọ bẹ unme,
nọ mu l'ẹhu byaru bya
egudewaa nọdu ndzụ nta-a.
Jiko menaa gẹ mu wekọrohu;
menaa gẹ mu nọdu ndzụ!
- 17 Ọkpobe opfu;
ọ kwa g'ọo-duru mu lẹ ree
bẹ mu gude jee iphe-ẹhuka,
dụ nno.
Ọ bụru l'ọo l'i yeru mu obu
bẹ i ti kwedu gẹ mu
bahụ lẹ nsukutu ọla-l'iswi.
Ị bya atuko iphe-ẹji mu l'ophu
chịru ye onwongu l'azụ;
- 18 kele ndu nọwaa l'alị-maa te
etukwa ngu ẹpha.
Ọphu ndu nwụhuwaru anwụhu
agụkwa ebvu egude etu
ngu ẹpha.
Ọphu ndu e kpochiru l'ilu
elekwa ẹnya ire-lanụ
nkengu.
- 19 Ọ kwa ndu nọ ndzụ;
mbụ l'ọo ndu nọ ndzụ bụ ndu
anọduje etu ngu ẹpha gẹ
mu etu ngu iya ntanụ-a.
Ọ bụru ndu bụ nna anọduje
akọru unwu phẹ g'ị bụ-be
onye ire-lanụ.
- 20 Chipfu a-bya adzọo mu ndzụ.
Ọo ya bụ l'anyi a-nọdu agụ

ebvu akpọ iya l'une
 jasụ g'anyi a-nọ-beru ndzụ.
 Ọ buru l'eze-ulo Chipfu bẹ
 anyi a-nọdu gụa ya.”

²¹Azáya pfiwaru sụ g'e meta iphe oshi figu tsua etsutsu debechaa Hezekáya l'ejo-onwo ono, phokashiru iya l'ẹhu ono; l'o -mewaa ya nno; l'o wekorohu. ²²Hezekáya bya ajía sụ: “?Bụ gụnu bụ iphe-ọhubama, e-goshi lẹ mu e-mechaa bahụbaa l'eze-ulo Chipfu ọzo?”

Ndu nnochị-ẹnya, shi Bábilọnu

39 ¹Ọ buru teke ono bẹ Merodaku-Baladanu; mbụ nwa Baladanu, bụ eze ndu Bábilọnu deshiru ẹkwo-ozí nù g'e je anụ Hezekáya; bya eyekwaru iya ya phọ iphe-oma g'e gude bya iya ajiji; kẹle ọ nọmaru l'iphe shi eme iya; ọ kawaa mma. ²Hezekáya nabata ndu ono, e ziru ozi ono; bya egoshi phẹ iphe, nọkota l'ulo-ẹku iya; mbụ goshi phẹ mkpọla-ọchaa; yẹ mkpọla-ododo; mẹ manụ, eshi mkpọ; mẹ ngwọgu iya l'ophu; mẹ iphe, bụkota ẹku iya. Ọ tọ dudu iphe, dụ l'ibe iya; ọzo iphe, dụ l'alị-eze iya l'ophu, o to goshiduru ndu ono; mbụ Hezekáya.

³Tọbudu iya bụ; Azáya, onye mpfuchiru Chileke bya ejepfu eze, bụ Hezekáya je ajía ya sụ: “?Bụ awe bẹ ndu ono shi bya? ?Bụ gụnu bẹ ephe pfuru?”

Hezekáya sụ iya: “Ephe shikwa ẹka dụ ẹnya bya. Ephe shi Bábilọnu.”

⁴Azáya bya ajía ya sụ: “?Bụ gụnu bẹ ephe hụmaru l'ibe ngu?”

Hezekáya sụ iya: “Ephe tükokwaru iphemiphe, dụ l'ibe mu hụma-gbua. Ọ tọ dukwa iphe, dụ g'ẹku, mu nweru enweru, mu te egoshiduru phẹ.”

⁵Noo ya; Azáya bya asụ Hezekáya: “Nụma opfu, shi Chipfu l'onu; mbụ Okalibe-Kakọta-Ike ono. ⁶Ọ sụru-a: Lẹ mbọku abyawaa teke iphemiphe, dụ l'ulo eze ngu; mẹ iphe ono, nna ngu phẹ setarụ dobe; ọ nọ byasụ nta-a a-buru iphe, ee-vuta lashia Bábilọnu. Ọ tọ dudu m'ophu ee-wophodo. Noo iphe, Chipfu epfu. ⁷Tẹme unwu ngu unwoke, bụ ndu a nwutaru ngu bẹ aa-harụ kpukaa; ephe eje aburu ndu anọduje eleta ibe eze ndu Bábilọnu ẹnya.”

⁸Hezekáya sụ iya: “Opfu Chipfu ono, i pfuru ono dukwa ree.” Iphe, o gude pfua nno bụ l'ọ riru sụ lẹ nchị a-dụ-a doo; ophu ọ dudu iphe, bya l'eme teke ya nọkwadu ndzụ.

Adụ ndu kẹ Chileke obu

40 ¹Unu dūnaa ndibe mu obu! Unu dūnaa phẹ obu!
 Nokwa iphe, Chileke unu pfuru bụ onoya.

²Unu pfunaa opfu bebelebe

- yeru Jierúsalemu.
 Unu ranaa ya arara g'ò maru
 l'ozí-ike ono,
 ooje ono bẹ bvwáru nù.
 L'a pfwáru ugwo ejo-íphe,
 o meshíru.
 Lewere, Chipfu meru íya
 hawaa g'íphe-éji, o meru;
 mbù l'ò hawaa g'òo ya
 ugbo labò.
- 3 Ọ dũru onye ara íya arara sù:
 “Unu meziaru Chipfu ụzo
 l'echiégù.
 Unu mee eze gbororo íya g'ò
 dũgbaa nhamũnha lẹ
 mgbẹgu alì-evevee.
- 4 Ẹka dũ nsũda bẹ ee-nwuchi
 enwuchi.
 Íphe, bũ úbvú úbvú bẹ
 ee-gbuzekòta egbuze.
 Ẹka dũ nkwegbo-nkwagbo bẹ
 ee-mezi emezi.
 Ẹka dũ
 kpòkoro-kpòkoro-kpòkoro
 l'a rwazee ya arwaze g'ò
 kwọo akwọkwo;
- 5 k'òphu ee-kpuha ọdu-biribiri
 kẹ Chipfu g'a hũma.
 Íphe, bũkota nemadzũ l'ophu
 ahũmakota íya;
 kẹle Chipfu gudewaa ọnu
 pfua ya.”
- 6 Ọ dũru olu-opfu, epfu sù:
 “Chia mkpu!”
 Mu sù: “?Bũ gũnu bẹ mu
 e-chi lẹ mkpu?”
 Ọ sù: “Chia mkpu sù lẹ
 nemadzũ l'ophu
 dũkota g'ẹswa.
 Tẹme mma, ephe ama
 dũkwapho g'okoko ẹswa,
 dũ l'egu.

- 7 Ọobujeru;
 ẹswa -kpọhuwaa nkụ;
 okoko iya erishihu dashihu;
 ọkele udzu-ọnu Chipfu
 phushiru phe.
 Hoo haa; nemadzụ bukwa
 ẹswa.
- 8 Mbụ l'ọobujeru;
 ẹswa -kpọhuwaa nkụ;
 okoko iya erishihu dashihu;
 obenu l'opfu, Chileke anyi
 pfuru;
 a-pfuru pfushia ike jasụ
 l'ojejeje.”
- 9 Je apfuru l'eli úbvú, ha shii;
 gube Zayonu;
 onye byaru ezi ozi-oma.
 Gube Jierúsalemu,
 byaru ezi ozi-oma;
 wolinaa olu chia mkpu!
 Wolia olu; ge ndzụ ba agushi
 ngu!
 Sụ mkpukpu,
 dugbaa l'ali ndu Jiuda-a:
 “Wakwa Chileke unu baa!”
- 10 Lekwa! Nnajiuphu,
 bụ Chipfu gudekwa
 ike-okpu abya.
 Ọ buru okpehu iya be
 oo-gude buru eze.
 Lekwa! O gudekwa obunggo
 eje abya;
 bya egudekwapho ugwo
 oo-pfu.
- 11 Ndu ephe l'iya swi be
 ọonoduje eche g'onye
 eche aturu.
 Ọ nodu achikobeje unwu
 aturu ono heru l'eka;
 mbụ heru phe dobe onwiya
 ntse k'ophu ephe a-ọduje
 iya l'obu.

- Teme ọ nọdu atoje nwehu
erwu ndu ọphu he nwa.
- 12 ?Bụ onye dụjewaru ike
gbaa ẹka okorokoro
gude tụa mini,
nọ ọ mgboko l'ọphu atùtù;
ọzoo gude nkwo-ẹka
tụa akpaminigwe
l'ọphu?
- ?Bụ onye dụjewaru ike
kpokọo urwuku,
dụ l'eliphe l'ọphu kporu
ye ọ nkata;
ọzoo wota iphe-atùtù
gude tụa ẹrwa úbvú,
nọkota nù?
- 13 ?Bụ onye maru uche Chipfu?
tọo ?bụ onye a-sụ ọ ya
zijeru iya iphe;
ọ ya bụ onye akpọ-zijeru
Chileke ọzo?
- 14 ?Bụ onye bẹ Chipfu jeru
akpata ishi?
tọo ?bụ onye ziru iya
ọzo ọphu bụ ọkpobe
ọzo?
- ?Bụ onye bẹ ọ bụ;
mbụ onye ziru iya iphe,
ọ maru;
ọzoo onye goshiru iya ọzo,
oo-shi mee g'iphe doo
ya ẹnya?
- 15 Tororo opfu bụ l'ọhamoha
dụkwa gẹ mini,
daru kpọngu l'ime
bọketi.
- Iphe, a gụberu pẹ bụ-a
nwurwuku, dụ l'iphe,
egudeje tụa ẹrwa iphe.
Mbụ l'ọotùje ndu bukube
eze-ẹnyimu g'onye
kpokọberu urwuku,

dù rwukuru rwukuru
atù l'iphe.

16 Mbù l'òswa, dù l'úbvú úbvú
Lébanonu ta asúkwa aburu
nkù eye l'òku.

Ọphu anù, nọkota iya nù
asúkwapho
g'eegbushi iya gude
gweeru Chipfu
ngweja-akpo-òku.

17 L'iphu iya bẹ ọhamoha l'ophu
ta adúkwa iphe, o bú.

Ọ gùberu phẹ iphe,
adudu iphe, ọ bú;
mbù l'iphe-iphoro ka
phẹ shii.

18 ?Bù onye bẹ unu a-turu
Chileke yeru?

?Bù ntekpe gunu bẹ unu a-sù
lẹ yẹ ya bú iphe lanù?

19 L'a -bya l'iphe,
a kpuru akpukpu;
ono bú onye eme ọna
kpuru iya.

Ọ buru onye-úzá
mkpọla-ododo wuru
iya mkpọla-ododo;
bya emetaru iya
ẹgbirigba mkpọla-ọchaa.

20 Ọobujeru onye daru ọkpa
k'ophu ọ tọo dudu ike
anù Chileke egube
iphe ono;
l'ooje ahọta oshi,
kpọru akpaa;
bya eje achọo onye eme
ọna emegharu iya
ẹka kua
l'ọ bya apyia ntekpe
doberu iya; mbù ntekpe,
ta abyadu aharibejeru
ọkpa ahariberu.

- 21 ?Unu ta amahaada? Tọo
 ?unu teke anuma-swee?
 ?Te epfuduru iya unu e
 -shikpoo le mbu?
 ?Toko dodu unu enya g'e
 gude tọo okpa
 mgboko l'ophu?
- 22 Lọ nọ l'aba-eze iya
 l'ephekerephe;
 nọghata eliphe,
 gbaru mgburugburu.
 Ndu nọ l'eliphe dughbae ya
 pho ribariba g'unwu ogu.
 Eligwe l'ophu be o phushiru
 togbo g'onye phushiru
 ukpo;
 bya eworu iya togbo
 jakpata g'ulo-ekwa,
 aabya eburu eburu.
- 23 Ndu-ishi be oomeje;
 o to dudu iphe,
 ephe abu.
 Lọ bya emee ndu-ishi
 le mgboko-a;
 ephe aburu iphe-mmanu.
- 24 Sọ-a; oobujeru akuku,
 aaku phe l'ali;
 adzadza, aadza phe;
 ephe -jekwadu-a agbabe
 ogbarabvu l'ali;
 l'ophuwa phe onu;
 ephe anwulwashihu.
 Oke pherephere abya
 ezikota phe g'eswa ereshi.
- 25 Onye nsọ ono jiru sọ-a:
 “?Bụ onye be unu a-turu
 mu yeru?
 Mbu-a; ?bu onye be unu epfu
 le mu l'iya ha enya
 nhamunha?”
- 26 Palinaa enya lee
 l'akpaminigwe.

?Bụ onye meru iphemiphe
ono dobe?

Mbụ onye ono,
emeje kpokpode,
dụ igwerigwe l'ọofushi
nanūnanu;
tẹme ọ nọdu ekuje
pẹ ẹpha l'ẹhu l'ẹhu.

Ọ buru l'ike parụ onye
ono ẹka;
tẹme ọkpẹhu dū iya
meru g'o gude ọphu ọ
dudu kpokpode ono
mẹ nanū etuphahụje nū.

27 Unubẹ ndibe Jiékọpu;
?denu g'o gude unu
pfua ẹgube opfu-a?
Mbụ-a; unubẹ ndibe Ízurelu;
?denu g'o gude unu
nọdu agụ aphụ?
Kele unu sūru lẹ Chipfu ta
amadụ iphe-ẹhuka,
unu eje;
mbụ lẹ Chileke unu ta
adudu iphe,
ọ guberu iphe,
rwuberu unu?

28 ?Unu ta mahaada?
Tọo ?unu teke anuma-swee
lẹ Chipfu bụ Chileke,
l'a-nọ jasụ lẹ tuutuutuu
lẹ mijiimii?

Ọ buru iya meru eliphe
l'ophu jasụ l'ẹka o
jeberu.

Ike ta abvudu iya;
ọphu nkwo atsudu
iya mee;
ọphu ọ dudu onye
amakotaru nkwanenya
nkiya.

29 Ọo ya emeje g'ike dū

- onye ike bvuru.
 Teme o nọdu emeje g'onye
 dụ nmelenmele rọkota
 ike.
- 30 Mbụ ị-a; ụnwu oḡbo
 lanụ emenyakwaa iphe;
 ike abvụ phe;
 ephe emehu nmelenmele.
 Mbụ ị ndu bukwađu
 okoroḡbya abụjeru a -nọnya;
 ephe evukota iphe daa iko.
- 31 Obenu ị ndu daru ngabẹru
 Chipfu bẹ ike a-nọdu
 aka ađuđu.
 Ephe e-gude ñkù ephe
 l'eli l'eli g'ugo.
 Ephe agbaa oḡso;
 ike ta abvụđu phe.
 Ephe ejee ije; nkwo ta atsụđu
 phe mẹ.

Onye a-nọdu eyeru Ízurelụ ẹka

- 41** ¹Unubẹ ndu bukube
 eze-ẹnyimu;
 unu nọdukwa nggujingguji
 l'iphu mu!
 G'ike kabakwaa ađu
 ohamoha!
 G'ephe kpịritakwaru
 bya eyee onu!
 G'anyi je edzuda l'ulo-ikpe!
- ²“Sụ-a; ?bụ onye jeru
 je akpalia onye
 pfulberekoto l'uzo
 ẹnyanwu-awawa;
 mbụ onye abụjeru;
 o -halia okpa l'o lwụa lwụta.
 Mbụ ị Chipfu ewojeru
 ohamoha ye iya l'ẹka;
 bya akwatsushiaru
 iya ndu eze.
 O nọdu egudeje ogu-echi

- gwee phẹ arakabya;
 gbaa phẹ apfụ jasụ ẹphe
 phekashihu g'ẹswa ereshi.
- 3 Ọochije phẹ ọso;
 ejerọ l'iphu l'iphu.
 Ọ tọ dudu iphe, eme iya nụ.
 Mbụ eshichaa ọzo,
 ọkpa iya teke eshiswee
 lẹ mbụ.
- 4 ?Bụ onye meru iphemiphe
 ono; mee ya meghaa;
 mbụ shiepho lẹ mbụ ebụ
 ọgbo l'onwiya?
 Ọ kwa mbedua, bụ Chipfu;
 onye nọ swiru ndu kẹ mbụ;
 tẹme mu jekwa anọdu
 swiru ndu k'ikpazụ;
 ọo mu bụ onye ọbu!”
- 5 Ndu bukube eze-enyimu
 hụma iya; ndzụ gụhu phẹ.
 Ndu bu l'ẹka eliphe jeberu
 nọdu anma
 pyaapyaapya eje
 akpịritaru.
- 6 Onyenọnu nọdu eyeru nwibe
 iya ẹka.
 Ẹphe nọdu asuje nwibe phẹ-a:
 “Shihukpọekwapho ike!”
- 7 Ndu maru eme ọna nọdu
 adukpọepfo ndu ọzu
 mkpọla-ododo obu.
 Onye ọphu egudeje ọngu
 akwọ iphe tẹretere
 nọdu agba onye ọphu
 edzefufe iya edzefu
 unme.
 Ọ -nọdu l'ọ sụ onye ọphu
 agbajẹ iya ọku gude
 dzepfua ya: “Ọ dukwaa ree!”
 L'ọ bya akua ntekpe ono
 ngga g'o to rikashihu.
- 8 A -byakwanụ lẹ gube Ízurelụ,

- bụ onye-ozu mu;
 mbụ gube Jiékpó;
 onye mu gude ẹka mu
 họtá;
 mbụ gube oshilókpa
 Ébiríhamu, bụ onye mu l'íyá
 eshi ònyà;
- 9 mu jekpòeruro l'ẹka
 igwe beru alí beru je
 eduta ngu.
 Mbụ l'òo ẹka ọ kachaa
 omilomi bẹ mu jeru je
 ekua ngu.
 Mu sụ ngu: Ị bụakwaa
 onye-ozu mu.
 Mu họtáakwaru ngu;
 ọphu mu ajíkaekwa ngu.
- 10 Ọo ya bụ; ba atsúkwa ebvu;
 kele mu nọkwa swiru
 ngu.
 Gẹ meji ba tófukwa ngu;
 kele ọ kwa mu bụ
 Chileke ngu.
 Mu e-me g'ike dụ ngu;
 mu e-yeru ngu ẹka.
 Mu e-gude ẹkutara mu ono,
 bụ ẹka mu egudeje
 mee iphe, pfulu ọto
 ono gudeshia ngu.
- 11 Iphe, bụkpoo ndu aba
 hanyìhanyi ekpu ngu
 bẹ ọ tọ dudu iphe,
 e-me g'e te meru
 iphe-iphere kpua phẹ.
 Ndu etso ngu opfu bẹ ee-me;
 ẹphe alaa l'iyi bụru
 mkpurupyata.
- 12 Mbụ l'ìi-chìka ẹnya ndu
 ọhogu ngu;
 ị tìi hụmadu phẹ.
 Ndu etso ngu ọgu a-dụepho
 g'iphe-iphoro.

13 Noo kele ọo mbẹdua
 bu Chipfu;
 bya aburu Chileke ngu;
 onye sekpu ngu
 l'ekutara ngu;
 bya asu ngu gi ba
 tsushi ebvu;
 le mu e-yeru
 ngu-a eka.

14 "Ba atsukwa ebvu;
 gube nworishi ono,
 bu Jiekopu;
 mbu gube nwata-une,
 bu Izurelu;
 kele ọo mbẹdua
 lonwomu e-yeru
 ngu eka."

Noo iphe, Chipfu epfu;
 mbu onye ono,
 gbafutaru ngu nu ono;
 bya aburu Onye nsọ
 ke ndu Izurelu.

15 Lenu; mu e-mekwa ngu
 gi buru iphe,
 e gude echi ereshi;
 mbu iphe, bu k'ophuu;
 bya atsụ nkọ;
 bya enweru ezé.

Ii-chi ubvu ubvu
 gbiigbii tsutoo ya
 etsuto;
 mbu mee ya lo du
 swakiri-swakiri
 g'eswa ereshi.

16 Li phushia phe;
 pherephere apakaa ya.
 Mbu oke-pherephere
 atukaa ya nanunanu.
 Obenu le gubedua
 e-gude Chipfu ete eswa.
 Mbu lo Onye nsọ ke ndu
 Izurelu ono be ii-gude

- eku onwongu.
 17 “Ndu ụkpa mę ndu adụdu
 g'ọ dụ phẹ achọ mini
 angungu.
 Ọphu ọ dudu ọphu ẹphe
 humaru.
 Ire nọdu atụ phẹ heehee
 l'ẹka mini agụ phẹ.
 Ọle ọ bu-a mbedua,
 bu Chipfu a-za phẹ ẹnu.
 Mbụ lẹ mbedua, bu Chileke
 ndu Ízurelu taa
 hadu phẹ.
- 18 Mu e-me gẹ mini wata
 asoshi gẹ nggele
 l'ephekerephe ẹka
 dụ jakpọro jakpọro
 jakpọro.
 Ọgba eshi lẹ nsuda nsuda
 gbafushihu.
 Mu emee g'echiegu buru
 okpuru okpuru.
 Alị, dụ jakpọro-jakpọro
 aburu ẹka mini e-shi
 asoshihu.
- 19 Iphe, mu e-ye l'echiegu bu
 oshi sida;
 yẹe oshi akesha;
 mękpoo oshi mịturu;
 yẹe oshi olivu.
 Mbụ l'oshi payinu;
 yẹe oshi firu;
 yẹe oshi sipuresu bẹ
 mu a-tụko dzakọta
 lẹ chakiri chakiri
 chakiri alị;
- 20 k'ọphu ndu nemadzu
 a-huma; teme ẹphe
 amakwarupho.
 Ẹphe e-gbukwaa ya phọ igo;
 l'oodoo phẹ ẹnya l'ọo
 Chipfu gude ẹka iya

- mee iphe ono;
 l'ọọ Onye nsọ kẹ ndu
 Ízurelu bẹ meru
 iphemiphe ono dobe.”
- 21 Chipfu sụkwaru-a: “Unu
 byanụ edoo edo k'unu.”
 Mbụ l'eze ndibe Jiékọpu
 ono sụru-a: Unu byanụ
 epfua g'ọonwuru unu.
- 22 Unu jenu eduta agwa unu g'ọ
 bya epfuaru anyi iphe,
 e-me nụ.
 Ephe epfukwarupho anyi
 ọphu mehawaru nụ;
 k'ọphu anyi e-gbu
 iya igo maru iphe,
 o mechaarụ nwufuta.
 Ọdumeka; unu pfunaaru
 anyi iphe,
 e-mechaa mee nụ.
- 23 Unu pfuaru anyi iphe,
 e-me l'iphu k'ọphu
 anyi a-maru l'unu bụ
 agwa, ere ire.
 Unu menaa ọhumalenya.
 Unu menaa iphe,
 dụ ree; ọzo ọphu dụ eji;
 k'ọphu anyi a-nmahụkwanu
 pyaapyaapya;
 ndzụ aguaha anyi.
- 24 Obenu l'iphe-iphoro ka
 unu mma.
 Teme ọphu iphe,
 unu eme adụkpoda iphe,
 ọ bụkpoo ililekpoo.
 Onye họtaru unu bụkwa ebyi
 bẹ o meru.
- 25 “Mu jeakwaru akpalia onye
 shi l'uzo isheli;
 ọ nọdu abyawaa.
 Ọo-nọdu l'uzo
 enyanwu-awawa bya

- akpo-kua epha mu.
 Onye ono a-zo ndu-ishi
 pyakapyaka g'onye
 atsü nri l'ikwe;
 mbü g'eka onye akpu
 ite atsü urwa,
 o gude akpu iphe.
- 26 ?Bunaa onye pfuru iphe-a
 eshikpoö le mbü;
 k'ophu anyi a-maru iya?
 ?Bü onye nmahawaru iya
 g'okwa k'ophu anyi a-sü:
 'O pfukwaru ire-lanü?'
- Ö to düdu onye pfujeru
 iya nü.
 Öphu ö düdu onye nmajeru
 iya l'okwa.
 Öphu ö düdu onye numajeru
 olu unu.
- 27 Ö buru mbedua vuru üzo
 pfuaru Zayonu sü iya:
 'Lenu; wakwa phe baa!'
 Mbü; ö buru mu yeru onye
 jeru ezia Jierúsalemü
 ozi-oma ono.
- 28 Mu leru enya;
 ophu ö düdu g'ö ka mma
 l'oo onye lanü;
 mbü g'ö ka mma l'oo
 onye lanü,
 mu humaru l'echilabö phe,
 adü ike akpo-ziru mu üzo.
 Öphu ö dukwapho onye
 azaje enu me mu jia ya aji.
- 29 Lewarö; epe tukoru
 bukataru
 iphe-mmanü!
 Iphe, epe eme bukwarupho
 iphe-mmanü.
 Mbü l'agwa phe ono bukota
 pherephere yee
 iphe-iphoro.”

Onye-ozí kẹ Chipfu

- 42** ¹ Chipfu sùru-a:
 “Wakwa onye-ozí mu,
 bú onye mu gúdesi;
 mbú onye mu hòtaru;
 bya abúru onye emeje
 g'obu jídata mu.
 Mu yeakwaru iya Unme mu
 l'èhu.
 Oo-goshi òhamoha iphe,
 bú ikpe, pfulu òto.
- ² O too jekwa ara òrà;
 òphu oojekwa echi mkpu.
 Òphu ò dúkwa onye bya
 anuma olu iya l'etsuzò.
- ³ Mbú l'ekperema,
 jihuru ejihu bè ò tò
 gbajikpòkwanu;
 òphu òophunyikwa oròku,
 enwu rèswereswe.
 Oo-gude ire-lanù goshi iphe,
 bú ikpe, pfulu òto.
- ⁴ Òphu òdadu adada;
 òphu ò dùdu iphe,
 a-kpòshi iya iphe,
 oome jasù teke ikpe,
 pfulu òto e-keru l'eliphe.
 Ò búru ekemu iya bè òha,
 bukube eze-ényimu
 a-nòdu ele enya iya.”
- ⁵ Sù-a; wakwa iphe, Chileke,
 bú Chipfu epfu baa;
 mbú onye ono,
 bú iya meru eligwe
 l'ophu bya eworu iya tòsa;
 onye bú iya tòsaru eliphe
 l'ophu məkpuo
 iphemiphe, shi iya nù;
 bya anù ndu bu iya nù
 unme, ephe atù;
 bya eworu ndzù nù ndu eje

- ije l'eli iya.
 6 Ọ kwa mụbe Chipfu gude
 apfubekoto nkemu
 kua ngu.
 Mu je l'e-seta ngu l'ẹka
 gudeshia.
 Mu e-dobe ngu;
 mee ngu g'ị buru iphe,
 mu ị ndiphe e-gude
 gbaa ndzụ.
 Teme l'ị buru ìphóró,
 duru ohamoha.
 7 Li mee g'anya sahu ndu atsụ
 ishi;
 mee ge ndu a kpuru ị
 ndzụ nweru onwophe;
 mekwapho g'a haa
 ndu no ị mkporo
 l'ẹka gbahuru tsukiribaa.
 8 "Su-a; ọ kwa mbedua bu
 Chipfu.
 Ọ buru epha mu bu ono
 gedegede!
 Ọphu mu e-wokwaru úbvú,
 rwuberu mu nu anụ
 onye ozo.
 Ọphu mu ewokwaru
 etu epha,
 eetuje mu woru haarụ
 agwa.
 9 Lewaro; akahụ iphe,
 a sụru l'oo-me meakwaru.
 Mu nodu epfuwa k'òphúú.
 Mbụ ị mu epfujeekwaru
 iya pho unu teme
 l'owata ememe."

Ebvụ, e gude aja Chipfu

- 10 Unu gụa ebvu òphúú
 nụ Chipfu!
 Unu shikpọepho l'ẹka igwe
 beru alị beru tuta iya

- ẹpha;
 unubẹ ndu eje l'oma-mini;
 mẹ iphe, bu iphe,
 bu lẹ mini!
 Iphe, bu alị,
 nọ-kube eze-ẹnyimu;
 mẹ iphe, bu ndu bu iya nụ;
 unu tua ya ẹpha!
 11 G'echiẹgu mẹ ọha,
 bu iya nụ wata erwu
 okwe!
 Gẹ ndu bugbaa lẹ mkpukpu
 Keda tejekwa ẹswa!
 Gẹ ndu Sela gụa ebvu ẹhu-utso!
 G'ẹphe nọdu lẹ mkpakponu
 úbvú rwua okwe!
 12 G'ẹphe kwabekwa Chipfu
 ùbvù!
 Ẹphe anọdu l'alị,
 nọ-kube eze-ẹnyimu
 tua ya ẹpha!
 13 Chipfu a-zọ garamu garamu
 lufuta gẹ nwoke,
 dụ ike.
 L'ọ bya akpalia obu iya
 g'ojogu, ike dụ;
 l'ọ phuahaa ya l'ẹhu.
 L'ọ bya araa ọrà gude chia
 mkpu ọgu;
 lwua ọgu lwu-kpee
 ndu ọhogu iya.
 14 Chileke suru-a:
 “Mu shihaakwa ụzenya
 nọduta doo.
 Mu nọkpoepfo nwapyakọo
 esedekpọepfo
 onwomu.
 Obenu lẹ nta-a bẹ mu a-wata
 echi mkpu; atsụ ude;
 atụ hẹehee;
 gẹ nwanyi, ime eme.
 15 Mu e-me g'iphe, bu úbvú,

- nọkota nụ dabyikọtaru
iphoro.
Mu abya emee g'ẹswa,
rwuru iya nụ kpọshihu
nkụ.
Mu emee nggele nggele
g'ọ ghọshia alị ọkponku.
Mu abya emee g'okpuru
okpuru tashihu.
16 Mu e-duru ndu atsụ ishi
shia ụzo,
ẹphe amahaada.
Gbororo, ẹphe te eshijehaada
bẹ mu a-kpo-ziru pẹ
ụzo iya.
Mu e-me g'ọchii bụru ìphóró
l'iphu pẹ;
bya emee g'ụzo,
dụ kpọkoro kpọkoro
kpọkoro kwọru
pẹ akwọkwo.
Iphemiphe ono bụkota iphe,
mu e-me;
ọphu mu abyadu
aha pẹ.
17 Obenu ẹ ndu kpọru obu
yeru agwa;
mbụ ndu bụ iphe,
a kpọru akpukpu bẹ
ẹphe sụru l'ọ gude
ndzụ pẹ;
ndu ono bẹ ee-me
iphe-iphere chifu pẹ.”

Ndu Ízurelu atsụ ishi ada nkuchi

- 18 “Unubẹ ndu nkuchi;
unu nụmadupho iphe
ẹ nchị!
Unubẹ ndu atsụ ishi;
unu palidaphọ ẹnya
hụmakpodapho!
19 ?Bụkwanu onye atsụ ishi ọbu,

- abudu onye-ozí mu?
 Tọ ọ́bụ onye adabe nkuchi
 g'onye ono,
 mu ziru ozi ono?
 ọ́Bụ onye atsu-be ishi
 g'onye ọ́ mu l'ẹka?
 Mbụ ọ́bụ onye atsu-be ishi
 g'onye-ozí kẹ Chipfu?
 20 Ị hụmawaru iphe,
 dụ igwerigwe;
 ọ́phu ịingadu nchị.
 Nchị gheru ngu ọ́nu;
 ọ́phu ọ́ dudu iphe,
 ịinumaje.”
 21 Chipfu bẹ bụ onye
 p̄f̄uberekoto.
 Noo iphe, meru g'o gude ọ́ nụ
 p̄hẹ ekemu,
 ereshi ire ike bya
 adukwapho biribiri.
 22 Obenu l'ẹp̄he byaru
 bya aburu ndu a
 lwutaru iphe p̄hẹ l'ọ́gu;
 bya aburu ndu a kwaru
 l'okwata.
 Mbụ lẹ g'ẹp̄he ha bẹ
 nwulahukotaru
 kwaa l'ime nsukutu;
 mẹ ndu ọ́phu a
 turu mkporo woru
 domia edomi.
 Ẹp̄hebedua l'onwop̄hẹ bụwaa
 ndu a lwutaru l'ọ́gu.
 Ọ́phu ọ́ dudu onye gbaru
 p̄hẹ mkpu.
 Ẹp̄he bụwaa ndu a kwaru
 l'okwata.
 Ọ́phu ọ́ dudu onye pfuru
 sụ: “Unu chiphu p̄hẹ nụ
 azu-o!”
 23 ọ́Bụ onye ole lẹ g'unu
 ha a-ngabẹ nchị l'op̄fu-a;

ọzokwanu ọ́dukpoepho
 nwadoo nùma iphe,
 e-mechaa mee nù?
 24 ?Bù onye woru ndibe Jíékọpu
 haa g'ẹ́phe bụru iphe,
 a kwarụ l'ọkwata;
 mbụ haa ndu Ízuruẹlu
 g'ẹ́phe bụru ndu a
 lwutaru l'ọgu?
 ?Tọ́budu Chipfu l'onwiya
 meru iya;
 mbụ onye ono,
 bụ iya bẹ anyi meshiru
 iphe-ẹ́ji ono?
 Kele ẹ́phe te ekwedu etso
 ụzo iya.
 Ọ́phu ẹ́phe ekwedu eme
 ekemu iya.
 25 Ọ́ bụru iphe ono meru g'ọ
 gude ọ́ wụa phẹ oke
 ẹ́hu-ẹ́ghu iya;
 mee g'ẹ́jo ọ́gu dapfuta phẹ.
 Ọ́gu ono gude ọ́ku woru phẹ
 kee mbvu;
 ọ́phu iphe edoduru
 phẹ ẹ́nya.
 O kee phẹ phuruphuru g'ọ́ku;
 ọ́phu o rwuduru phẹ
 l'ọkpoma.

**Onye bụ iya kpoloko
 a-dzọ ndu Ízuruẹlu**

43 1 O be lẹ nta; wakwa iphe,
 Chipfu epfu;
 mbụ onye ono,
 bụ iya meru gube Jíékọpu;
 onye bụ iya kpuru
 gube Ízuruẹlu pfulube.
 Ọ́ sụru-a:
 B'atsushi ebvu;
 kele mu gbafutawaru ngu.
 Mu kuru ngu oku;

- kukpoo ngu epha ngu;
mbu l'i bu nkemu.
- 2 Teke o bu mini be iirwughata
be mu noepho swiru
ngu eswiru.
Teke o bu nggele be iime
g'i ghata;
o too ridu ngu.
Teke i jeru ije je aghabua oku;
o too hudu ngu;
ophu ire oku iya te
ekeyashidu ngu.
- 3 Noo kele o mbedua bu
Chipfu;
bya aburu Chileke ngu;
bya aburu Onye nsò
ke ndu Izurelu;
buru onye ndzota ngu.
Oo ndu Ijiputu be mu
nuru gude gbata ngu.
Mu woru ndu Kushi;
yele ndu Seba nu
l'ozori ngu.
- 4 Eshinu i du mu mkpa;
teme i buru onye
aakwabe ubvu l'enya mu;
teme eshinu mu yeru
ngu obu;
be mu e-woru ndu
nemadzú nu gude
gbanweta ngu;
nukwapho ndiphe gude
gbanweta ndzu ngu.
- 5 Ge ndzu ba agukwa ngu;
kele mu nokwa swiru
ngu eswiru.
Mu e-shi l'uzo
enyanwu-awawa
chilataru ngu unwu ngu;
bya ejekwapho l'uzo
enyanwu-ariba je
achilatachaa ndibe ngu.

- 6 Mu abya asụ isheli:
 “Pakwarụ phẹ haa!”
 Bya asụ ndòhali:
 “Be sedeekwa phẹ!”
 Sụ phẹ: Unu shikwa l'ẹka
 dụ ẹnya chitaru mu
 ụnwu mu kẹ nwoke!
 Unu eshi l'ẹka igwe
 beru alị beru chilaru
 mu ụnwada mu!
- 7 Mbụ iphe, bụkpoo
 onyemonye zarụ ẹpha
 laaru mu.
 Ndu mu meru g'e gude tua
 mu ẹpha.
 Ndu mu gude ẹka mu kpụ;
 gude ẹka mu mee g'ọo-dụ.
- 8 Dufutunu ndu ono,
 nweru ẹnya;
 obenu l'ẹphe atsụ ishi onoya;
 mẹ ndu ọphu nweru nchị;
 ẹphe nọdu ada nkụchi.
- 9 Ọhamoha l'ọphu dzukọru
 l'ẹka lanụ.
 Teme ndu nemadzụ
 dzukọkwaapho.
 Ọle ?bụ onye ole lẹ g'ẹphe ha
 pfuru iphe ono,
 eme nụ onoya;
 bya epfukwaphọ ọphu
 mehawaru nụ?
 G'ẹphe jenụ ekua ndu ekebe
 phẹ g'ẹphe bya egoshi
 lẹ nkephẹ bụ ire-lanụ;
 k'ọphu ndu ọzo a-nụma
 iya sụ: Ọ kwa eviya.
- 10 Wakwa iphe, Chipfu epfu baa:
 “Ọ kwa unu bụ ndu ekebe mu;
 unu bụkwarupho
 onye-ozu mu,
 mu họtaru l'onwomu;
 k'ọphu unu a-maru mu;

bya ekwetakwapho nkemu.
 L'ò dokwapho unu ɛnya
 l'oo mu bu onye obu.
 O to duedu Chileke ozo,
 e meru dobe,
 abudu mbedua;
 ophu o dudu ozo,
 a-dubaa nu gbahaa mbedua.

11 Mbedua; mbu mbedua
 gedegede;
 oo mu bu Chipfu;
 ophu o duedu onye
 ndzota ozo,
 du nu gbahaa mbedua.

12 Mu goshiwaru iya egoshi;
 bya adzota iya dobe;
 bya echia ya le
 mkpu l'oo mbedua bu
 Chileke;
 l'ò to budu agwa ndu
 ohozo ono,
 unu dobegbaaru ono.
 Mbu o buru unu bu ndu
 ekebe mu.”

Nokwa iphe, Chipfu eepfu.

13 “E -shikpoo l'ichee
 be o bue mu pho be
 bu iya nu;
 ophu o dudu onye adu
 ike anafu mu onye no
 mu l'eka.

Mu -mewaa iphe g'o du mu;
 ?bu onye suru g'oo-bya
 emee ya imephu?”

**Chileke l'e-me ge ndibe iya
 laphu azu l'onodu phe**

14 Wakwa iphe, Chipfu epfu
 baa; mbu onye ono,
 gbafutaru unu ono;
 bya aburu Onye Nso
 ke Izurelu.

- Ọ sùru-a: “Ọo l'iswi ẹhu
 unu bẹ mu e-gude
 zia g'e je Bábilọnu;
 je anyakashia
 ọguzo-igwe g'ọ ha.
 Noo teke okoo,
 ndu Bábilọnu atọ
 a-ghọ erwubvu.
- 15 Ọ kwa mbedua bu Chipfu
 ono;
 mbu Onye Nso k'unu ono.
 Mbu onye ono,
 bu iya meru unube
 ndu Izurelu dobe;
 bya aburu iya bu eze unu.”
- 16 Su-a; wakwa, iphe,
 Chipfu epfu;
 mbu onye ono, toru uto,
 o shijaa eze-enyimu;
 mbu togbo gbororo;
 o ghajaa eze mini;
- 17 mbu onye ono,
 chifutaru ugbo-inya-ogu;
 me inya;
 me ndu ojoju;
 mekpoo ndu gbaru
 mkparawa;
 chikobe phe dobe.
 Ephe zeshia l'eka ephe ta
 abyadu agbalihubaa ozo.
 Mbu o gbanyia phe;
 mbu phunya phe
 g'onye aphunyi oku
 oroku.
- 18 “Unu zohaa akahu iphe!
 G'ọ to bushi l'iphe, mehawaru
 nu be obu unu a-du!
- 19 ?Unu te eledu le mu wataru
 eme iphe ophuu!
 Mbu l'obyawaa efuta.
 ?Unu ta ahumaduru iya?
 Mu eyeakwa uto l'echiegu.

Teme mu nõdu emewaa
 nggele l'ali,
 dabyiru mgbegere.

- 20 Anu-egbudu akwabẹ mu ùbvù;
 mękpoo nkuta-ọswa yẹ
 mgbashi-ujiku;
 kele mu meru gẹ mini du
 l'echięgu;
 bya emee gẹ mini sọ
 gborogboro l'ali,
 dabyiru mgbegere;
 k'ọphu ndibe mu a-ngu
 mini; mbu ndu ono,
 mu gude ẹka mu họta
 ono;
- 21 ndu mu gude ẹka mu mee
 doberu onwomu
 g'ephe raa ya arara sọ g'e
 tuje mu ẹpha.”

Iphe-ẹji ndu Ízurelu

- 22 Obenu lẹ gube Jiékọpu
 te ekwedu raku mu.
 Mbụ-a; gube Ízurelu sọ l'ike
 mu bvụwaru ngu.
- 23 Ọphu ị kpọtaduru aturu
 gude gweeru mu
 ngweja-akpo-ọku.
 Ọphu i gweduru mu ngweja
 mmanu gude kwabẹ
 mu ùbvù.
 Ọ tọ bụdu lẹ mu bojeru ngu
 ivu-erwa sọ g'i gweeru
 mu ngweja-nri.
 Ọzokwanu lẹ mu mejeru
 g'ike bvụ ngu lẹ mu
 adaru ngu ngweja
 ùnwù-isensu.
- 24 I ti gudedu okpoga je azuta
 oshi omanko,
 eshi mkpọ gude bya
 anu mu.

- Ọphu i gweduru mu ngweja
 ẹba-anụ gude mee g'ẹpho
 ji mu.
 Ọ bụchia iphe, i meru bụ l'i
 mewaru mu iphe-ẹji jasụ
 ọ nọdu anyịwa mu ẹrwa.
 Mbụ l'i meswewaru mu jasụ
 ike ngu bụwa mu.
 25 Ọ bụru mbẹdua;
 mbụ l'ọo mu bụ onye
 e-hufu emeswe,
 i mesweru mu;
 g'ẹpha mu apfuru.
 Ọphu mu anyatabaẹdu iphe-ẹji,
 i meshiru ọzobaa.
 26 Sụ-a; nyatanuru mu iphe,
 mehawaru nụ.
 G'anyi tųkonu yee ọnu l'opfu
 ọbu.
 Donaa g'ọ nwuru g'a maru
 ?ọ kalẹru ngu?
 27 Nna ngu kẹ mbụ meru iphe-ẹji.
 Ndu-ishi ngu meswee mu.
 28 Noo g'o gude mu woru
 ndu-ishi ụlo-dụ-nso
 merwushia;
 bya ahaa g'e woru Jiékoṗu
 mebyishikọta l'ophu;
 l'e gude ndu Ízurelu
 ephu l'iphu.

Ízurelu bụ ndu Chileke ọtaru

- 44** ¹“Obenu ẹ-a; ngabẹ nchị
 nta-a; gụbe Jiékoṗu,
 bụ onye-ozu mu;
 mbụ gụbe Ízurelu ono,
 mu gude ẹka mu ọta ono.”
² Wakwa iphe, Chipfu epfu
 baa; mbụ onye ono,
 meru ngu nụ ono;
 onye bụ iya doziru
 ngu teke ị nọ l'ẹpho.

Teme ọ buru iya bu
 onye e-yeru ngu ẹka:
 Ta atsukwa ebvu;
 gube Jiékpọ, bu
 onye-ozí mu;
 mbu gube Jieshurunu,
 bu onye mu gude ẹka
 mu họtá.

³ Mu a-gba mini l'ali,
 ẹgu mini agu.
 Mbu le mu e-woru
 ọ-sọ-gborogboro
 mini wu l'ali,
 kpohuru jegiri-jegiri.
 Awa ngu be mu a-wu
 Unme nkemu.
 Mu abya awu iphe-oma,
 shi mu l'eka l'ehu ndu
 bu oshilokpa ngu.

⁴ Epe awata amishi g'eswa,
 amishi l'eka mini
 aduje shii;
 mbu g'oshi wilo,
 zeru l'aguga nggele,
 aso asoso.

⁵ O nweru onye asu:
 Mu bukwa ke Chipfu.
 Onye ozo ekua onwiya
 epha laaru Jiékpọ.
 Onye ozo edee l'eka iya su:
 Mu bukwa ke Chipfu!
 Epha mu bukwa Izurelu!

⁶ Wakwa iphe,
 Chipfu epfu baa;
 mbu onye ono,
 bu eze ndu Izurelu
 bya aburu onye
 gbafutaru phe nu;
 mbu Chipfu,
 bu Okalibe-Kakota-Ike:
 O kwa mbedua bu onye ivuzo;
 bya aburu onye ikpazu.

O tọ dọekwa Chileke ọzo,
 du nọ; gbahaa mbẹdua.
 7 Oo ya bu lẹ-a;
 ?bu onye bẹ unu
 a-nọdu atọ eyeru mu?
 G'onye ono pfunaa ya!
 G'onye ono menaa
 ya gẹ mu maru;
 g'o doo ya ishi rii
 l'iphu mu!
 Mbụ iphe, mekọtakporu nọ;
 eshinu mu meru ndibe
 mu, shi l'ichee.
 G'onye ono pfukwaphọ iphe,
 e-mechaa mee nọ;
 mbụ-a; g'ọ k'ọnaa iphe,
 abya ememe.
 8 G'ẹhu ba nmakwa unu
 anmanma;
 mbụ gẹ ndzụ ba agụkwa
 unu!
 ?Mu te epfuhaadaru iya
 unu eshi lẹ mbụ;
 mbụ pfua ya raa ya
 arara?
 Mbụ-a; ọ kwa unu bụ ndu
 ekebe mu.
 ?Ọ dọru Chileke ọzo, du nọ,
 abụdu mbẹdua?
 Waawakwa! Agbara mkpuma
 ọzo ta aduhekwa.
 O tọ dọekwa onye ọzo,
 mu maru.

Ndu eme ke ntẹkpe

9 Iphe, bukpo ndu eme ke ntẹkpe g'ẹphe ha ta aduakwa iphe, ẹphe bụ.
 Teme iphe ono, ẹphe sọru l'ọ bụ phe ọkpobe iphe ono buru iphe, adudu
 iphe, ọ bụ. Ndu agbaru phe ọdzori bukwa ishi bẹ ẹphe atsụ. Ophu ẹphe
 amadu iphe; k'ọphu iphere a-du phe. ¹⁰ ?Bụ onye jejeru je emeta agwa;
 mbụ kpua ntẹkpe, adudu iphe, ọo-baru iya? ¹¹ Lekwa; iphe, bukpo ndu
 ẹphe l'iya swi bẹ e-mechakwaa buru ndu iphere e-me. Ndu ono, akpuje

iya nù ono bünü nemadzù mmanù bẹ ẹphe bụ. G'ẹphe dzukọbenu bya apfuru hụma l'ee-ye phẹ oke ebvu meru iphere kpua phẹ g'ẹphe ha.

¹²Ọo onye-úzá ewotajẹ anma hùbe l'ọku icheku. L'ọ bya egude ọngu tsua ya gude meta ntẹkpe. Ọ bụru ike-ọkpu iya bẹ oogudeje mee ya. O -menyaa ya; ẹgu guahaa ya; ike abvụ iya. Teke ọ ngụduru mini; a -nonyaa; ẹgu mini atsua ya nkwo mẹe.

¹³Onye ekwo oshi bụ eri bẹ oogudeje atù nkiya. L'ọ bya egude iphe, aakajẹ iphe kaa gẹ ya e-me iya. L'ọ bya egude ayọ bya ebebashia ya. Gude kọmupasu mee ya l'ọ dọ gẹ nwoke; mbụ dukpoo akpabiri gẹ nwoke aduje; woru iya je ebvube l'ulo-nshi. ¹⁴Mbụ lẹ-a; o gbutsuru oshi sida; ọzoo oshi sipuresu; ọzokwanu achi, ọ haru; yele oshi ọzo, dọ l'oswa tuko vua. Ọzoo l'ọ woru oshi payinu dzaa; igwe dzee mini mee ya; o vuta. ¹⁵L'ọ bụwaruro nemadzù iphe, oo-gude eshi ite. L'ọ haru hata iya gude nyaa ọku. L'ọ gude iya phunwua ọku ghee buredi. Tẹmanu l'ọ gbutakwa iya phọ gude pyita agwa wata abaru ẹja. Mbụ pyita ntẹkpe phozeaharu iya. ¹⁶L'ọ bya ekee nkụ ọbu ẹbo chita ye l'ọku; shia ya ite. L'ọ hua ya anu taa; ẹpho eji iya. L'ọ gudekwa iya phọ nyaa ọku; l'ọ sụ: “Hm! Nta-a bẹ ẹhu evuwa mu ọku. Mu hụmawaru ọku nyaru.” ¹⁷L'ọ bya achita ọphu phoduru nù gude mee agwa; mbụ mee ya ntẹkpe; phozeru iya wata iya abaru ẹja. L'ọ bya epfua-haa nūahaa ya sụ iya: “Dzotanu mu; ọ kwa ngu bụ Chileke nkemu.”

¹⁸Sụ-a; ẹphe ta amakwa iphe; ọphu ọ dudu iphe, edoje phẹ ẹnya; kele a phuchiru phẹ iphe l'ẹnya; k'ọphu ẹphe ta aphudu ụzo. Tẹme e mechia phẹ egomunggo; g'ọ tọ dọ iphe, e-dojẹ phẹ ẹnya. ¹⁹Ọphu ọ dudu onye ọphu asuje gẹ ya rịa oriri. Mbụ ọphu ọ dudu onye ọphu iphe edoje ẹnya ke g'ọ sụ: “Nta bụ iphe-a, mu hataru ye l'ọku-a; bya egude icheku iya ghee bure-di-a; bya egude iya hua anu taa-a; bụ ọphu phoduru nù bẹ mu e-gude mee ẹbyi ?Bụ kpukuruku bẹ mu a-wata ephozeru?”

²⁰Ọ kwa ntu bẹ oorije. Ọ bụru obu iya, e dephuru edephu dephuru yẹbedua. Ọ tọ budu l'ọo-dụ ike adzo onwiya. Ọphu ọosudu: “?Ọ kwa l'iphe-a, ya gude l'ẹkutara-a bụ iphe, abudu ọkpobe iphe?”

Chipfu, bụ onye ndzota ke ndu Ízurelu

²¹“Nyatakwa iphe-a;
gube Jiékopu;
mbụ gube Ízurelu;
kele ọ kwa ngu bụ
onye-ozí mu.
Ọ kwa mu meru ngu dobe;
ì bụru onye-ozí mu.
Gube Ízurelu; mu ta abyakwa
azoha ngu azoha!

- 22 Mu rwufuwaru emeswe,
 i mesweru mu.
 O gbakahúwa g'ẹka igwe
 rwuchaaru erwurwu;
 gbakaa ya.
 Mu bya agbaka iphe-ẹji,
 i meru mu; o tahu g'iji,
 kwaru l'utsu atahuje-a.
 Lwapfutanu mu;
 kele mu gbafutawaru ngu.”
- 23 Gube imigwe;
 gunaa ebvu ẹhu-utso;
 kele o kwa Chipfu mewaru
 iphe-a!
 Chia mkpu g'a numa gube
 eliphe, no igwe le mkpula!
 Unu watanu agu ebvu;
 unube ubvu ubvu;
 mekpoo unube
 oswa oswa; yele iphe,
 bukpooshi,
 no iya nu!
 Noo kele Chipfu gbafutawaru
 Jiekopu!
 O gudewaa Izurelu goshi
 odu-biribiri iya.
- 24 Wakwa iphe, Chipfu epfu baa;
 mbu onye ono,
 gbafutaru ngu nu ono,
 bukwa iya pho bu onye
 kpuru ngu teke i
 nokwadu l'epho ono.
 O suru-a: “O kwa mu bu
 Chipfu;
 onye bu iya meru
 iphemiphe dobe.
 O buru mu tosaru eligwe
 nweka mu;
 o dabyiru swoo;
 bya abukwaru mu pho
 tosaru eliphe l'onwomu.
- 25 O kwa mu l'emebyije

iphe-òhumalenya, ẹ̀phe eme;
mbù ndu ono, epfu iphe,
mu epfuduru ono.

Mu nõdu emejekwapho
ndu aphù òphulenyà;
ẹ̀phe abùru ndu
eme eswe.

Ọ̀ bụ mu alo-phuje ndu
maru iphe azù
mee mmamiphe phe
l'òoburu iphe,
adudu iphe, ọ̀ bụ.

26 Opfu, onye ejeru mu
ozi pfuru bẹ̀ mu emeje
g'ọ̀ dọ̀ g'o pfuru iya.

Tẹ̀me teke ndu epfuchiru mu
nù pfukwarùpho iphe;
mu emee ya g'ẹ̀phe
pfuru iya;
mbù ndu pfuru opfu
ẹ̀hu Jierúsalemù
sù l'ee-mechakwaa buru
iya eburu ọ̀zo;
bya epfukwapho opfu
ẹ̀hu mkpùkpu lẹ̀ mkpùkpu,
nọ̀gbaa l'alì ndu Jiuda
sù l'ee-mechakwaa
kpùkwachaa ya;
mbù l'emebyishi ono,
e mebyishiru iya ono
bẹ̀ ya e-mechakwaa
mekwata g'ọ̀ dọ̀ g'o shi dọ̀.

27 Ọ̀o mu sùru ogbu-mini:
'Ngwa; tahù!

Mu e-mekwa gẹ̀ mini,
nọ̀gbaa
lẹ̀ nggele ngu tashìhu.'

28 Ọ̀o mu pfuru opfu ẹ̀hu
Sayìrosu sù l'ọ̀ bụ onye
echeru mu atùru mu.

L'oo-mekọ̀ta iphe,
dọ̀ mu l'obu g'o mee.

L'ọo-sụ g'a kpụ-phu
 Jierúsalemu azụ.
 L'ọ byakwapho asụ g'a tua
 ọkpa-ụlo
 eze-ụlo Chileke.”

45 ¹Wakwa iphe, Chipfu
 epfu anụ onye ono,
 ọ họtaru g'ọ bụru eze;
 mbụ Sayirosu,
 onye ọ lotaru l'ekutara
 gude kwatsushia ọha,
 dū ichiche, byaru iya
 l'iphu; gude nashia
 ndu eze ngwogu pẹ
 gbabẹ pẹ ẹka ọto;
 gūhashia ụzo gheberu
 iya ọnu;
 k'ọphu a taa gụ-chihedu
 iya agụ-chi.

² Ọ sụru-a: Mu e-vuru ngu ụzo
 je egbuzeru ngu úbvú
 úbvú egbuze;
 je agbakwoshia ọguzo,
 e meru l'oniyirubvu;
 bya egbukashia mgborígwè,
 e gude tị-chia ụzo.

³ Mu a-nụ ngu ẹku,
 e doberu l'ochii;
 mbụ iphe-enweru,
 e doberu l'ẹka e domiru
 edomi.

Ono e-me g'i maru lẹ mu
 bụ Chipfu bya aburu
 Chileke ndu Ízurelu;
 onye ekuje ngu ẹpha
 ngu gẹdegede.

⁴ Ọ kwa onye mu eme ele bụ
 Jiékpọ ono,
 bụ onye-ozu mu ono;
 mbụ Ízurelu ono,
 bụ onye mu họtaru
 l'onwomu ono.

- Ọ buru iya meru g'o gude mu
 kua ngu l'ep̄ha;
 bya eworu ọkwa,
 aakwabẹ ùbvù woru nù
 ngu l'ẹbe abù l'ì maru
 onye mu bù.
- 5 Ọ kwa m̀b̀dua b̀ Chipfu;
 ọphu ọ d̀ekwa onye ọzo,
 d̀ ǹ.
- Mb̀ l'a -g̀fu m̀b̀dua ta
 ad̀ekwa Chileke ọzo,
 d̀ ǹ.
- Ọo m̀b̀dua e-me g'ike d̀
 ngu l'ẹbe abù l'ì maru
 onye mu bù.
- 6 Ọ buru mu -mee ya nno;
 ndu nemadz̀ eshita l'ẹka
 ẹnyanwu awatajẹ jas̀
 l'ẹka ọodaje
 maru l'ọ t̀ d̀edu onye ọzo,
 d̀ ǹ, ab̀du m̀b̀dua.
- Ọ kwa m̀b̀dua b̀ Chipfu;
 ọphu ọ d̀ekwa onye ọzo,
 d̀ ǹ.
- 7 Ọ kwa m̀b̀dua emeje
 g'ìphóró d̀; bya emee;
 ọchii ad̀.
- Ọ kwa m̀b̀dua emeje g'e
 nweru ẹku;
 mu nòdu emejekwapho
 g'ọla-l'iswi bya.
- Ọ kwa m̀b̀dua, b̀ Chipfu
 t̀koru iphemiphe ono
 eme.
- 8 G̀be imigwe,
 ǹgbaa l'ephekerephe;
 dzenaa apf̀bekoto
 gẹ mini!
 G'urwukpu dzenaa ya
 yoyoyo!
 G'eliphe l'ọphu saa ọnu
 gabala!

- K'òphu ndzọta a-tùko
 ẹkameka sweta;
 apfubekoto atùko ẹkameka
 dzuru.
- Ọ kwa mbedua, bu Chipfu
 meru iya dobe.
- 9 Nshio onye etso onye meru
 iya nu uswo.
 Mbụ onye adudu iphe ọzo,
 ọ bu gbahaa ite,
 a kpuru l'urwa.
 Urwa; ọojije onye akpu ite
 su iya: “?Bu gunu be
 iikpu?”
 Iphe, i gude ẹka ngu mee;
 ?l'oo-nonyanya su ngu
 l'i mekwaru iya;
 ophu ya enwedu ẹka?
- 10 Aphu tsoru onye asu nna iya:
 “?Bu gunu be o gude i nwua
 mu egube-a?”
 Ozoo onye asu ne iya:
 “?Bu gunu be i nwuru mu
 egube owa-a?”
- 11 Wakwa iphe, Chipfu epfu
 baa;
 mbu Onye Nso ke
 ndu Izurelu;
 teme o buru iya bu onye
 meru Izurelu obu
 dobe.
 O suru-a: “?Unu a-wata
 mu aji njikpa-onu le
 k'unwegirima mu?
 To ọunu a-nodu aturu mu
 ekemu ge mu e-me iphe,
 mu gude ẹka mu mee?”
- 12 Ọ kwa mbedua meru eliphe
 dobe.
 Mu byakwapho bya emee
 nemadzụ dobe iya.
 Ọ kwa ẹka mu be mu gude

tosaa imigwe;
 bya edokaa ya kpokpode
 kpokpode l'ophu.

13 O kwa mbèdua meru gè
 Sayirosu futa
 gude goshi lè mu bụ onye
 p̄fuberekoto.

O b̄uru mbèdua e-me g'uzo,
 ooshi p̄fukotaru
 nhamunha.

Oo ya a-kp̄ukwa mkp̄ukpu
 mu ono mee gè ndibe mu,
 a kp̄uru lè ndzu
 nweru onwophè.

Ophu oomekwa iya g'apfua ya
 ugwo;
 ozoo g'e bua ya nggo.”

Nokwa iphe, oopfū;
 mb̄u Chipfu,
 b̄u Okalibe-Kakota-Ike.

14 Wakwa iphe, Chipfu epfu:
 “Iphe, e metaru l'alì Ijiputu;
 m̄ekpoo ngwaswa,
 shi l'alì Kushi;
 m̄ekpoo gwagoro-gwagoro
 ndu ono,
 shigba alì Seba ono;
 g'ò ha a-lwakotaru ngu;
 t̄ukoru b̄ukotaru nkengu.

Ephe a-t̄uko etso ngu;
 aw̄u l'odze aw̄u-pfuta ngu.

Ephe abya ephozeta l'iphu
 ngu rw̄ohaa ngu
 arw̄orwo epfu s̄u:

“Tororo opfu b̄u lè Chileke
 n̄okwa swiru ngu
 eswiru.

O t̄o d̄ukwa onye oz̄o,
 d̄u n̄u;
 mb̄u l'ò t̄o d̄ukwa onye oz̄o,
 d̄u n̄u gbahaa yèbedua.’

15 Tororo! I b̄ukwa Chileke,

- anọduje edomi onwiya
 edomi; gùbe Chileke,
 bụ onye dzọtaru ndu Ízùrèlu.
- 16 Iphe, bụ ndu agwọ ọbvu
 bẹ ee-me iphe-iphere
 meru ọtorii nụ pẹ.
 Mbụ l'ẹphe a-tụko mehu
 ọtorii g'ẹphe ha
 tųgbua.
- 17 Obenu lẹ ndu Ízùrèlu bụ
 Chipfu a-dzọta pẹ.
 Mbụ l'adzọdzo, ọo-dzọ pẹ
 a-buru ojejeje.
 Ọpụ a byadu eme unu
 iphe-iphere;
 ọpụ unu abyadu
 emephe ọtorii gburu
 jeye lẹ gbururu.”
- 18 Kẹle-a; wakwa iphe,
 Chipfu epfu; mbụ onye ono,
 bụ iya meru imigwe dobe.
 Ọ kwa iya bụ Chileke;
 onye bụ iya kpuru
 mgboko;
 bya aburu iya meru iya.
 Ọo ya tọru ọkpa iya;
 ọpụ o meduru iya g'ọ
 nọdu iphoro.
 O meru iya dobe g'e buru
 iya eburu.
 Ọ buru iya epfu sụ: “Ọ kwa
 mbẹdua bụ Chipfu;
 ọpụ ọ dọekwa onye ọzo,
 dụ nụ.
- 19 Iphe, mu pfuru bẹ mu
 te epfukwaru lẹ mpya.
 Mu te ejekwaru anọdu l'ẹka
 lanụ l'alị,
 ọchii agba pfua ya.
 Ọpụ mu asụkwaru oshilọkpa
 Jiékoṗu pẹ g'ẹphe ọọ
 mu kẹ mmanụ.

Mùbe Chipfu epfufe òkpobe
opfu; mu epfufe iphe,
dù k'epfufu.”

- 20 Unu dzukòbenu onwunu
byakòdapho!
Unu nòkobe l'èka lanù;
unubè ndu ono,
shi òhamoha tsoru agha
phurii ono!
Ndu amadù iphe bè ephe bù;
mbù ndu gwòru nshi,
a pyìru l'oshi parù aghaphe;
ndu epfufe anù iphe,
ta adzòjedu nemadzu.

- 21 Unu pfunaa iphe g'ò dù;
unu byanù edoo g'òonwuru
unu.
G'ephe nòkobe chìaru iya idzu.
?Bù onye bù onye pfuhawaru
iphe-a teke dù ènya?
?Bù onye meru g'a maru
iya teke dùhawaa
ùzenya-ùzenya?
?Tòbudu mbeɖua, bù Chipfu?
Òzo bù l'ò tò dùedu Chileke
òzo, dù nù,
abùdu mbeɖua.
Òo mbeɖua bù Chileke,
pfùberekoto;
bya abùru onye ndzòta.
Ò tò dùedu onye òzo,
dù nù abùdu mbeɖua.
- 22 Unu ghanaaru mu iphu;
hùma l'aa-dzòta unu;
unubè ndu mgboko l'ophu;
kèle òo mbeɖua bù Chileke;
ophu ò dùekwa onye òzo.
- 23 Mu gudewaa onwomu ria angù.
Mu gudewaa ònu mu pfua
opfu onye pfùberekoto.
Òphu mu abyadù asù g'ò
laa azù.

- Mu pfuru sù l'iphe,
 bù ikpere ndiphe l'ophu
 e-mechaa rwuchaaru
 mu ali.
- Ọ bụru mbèdua bè ndiphe
 l'ophu e-mechaa gude
 erije angu.
- 24 “Èphe e-pfu opfu ẹhu mu sù:
 ‘Ọo Chipfu nweka iya
 pfuberekoto;
 bya aburu
 iya bè ike dù kpèkpu.’
 Ndu ono g'èphe ha, shi
 abaru mu hanyihanyi
 ono l'a-byapfuta mu
 gude iphere bya.
- 25 Obenu ẹ-a; iphe,
 bukpuo oshilokpa Ízurelu
 l'a-nodu l'eka Chipfu
 buri ndu pfuberekoto;
 bya egude Chipfu
 eku onwophe.”

Agwa ndu Babilonu

- 46** ¹ Balu phozeakwaru;
 Nebo nodu ekpuwa
 ekpukpu.
 Mbù ẹ ntekphe phe ono
 buwaa onye vu iya nu
 bu anu, evuje iphe.
 Mbù l'iphe, o vu anyi iya
 ntumatu.
 Teme o buri ivu l'ehu nwanu,
 ike bvuru.
- 2 Agwa obu g'èphe ha tukoru
 ekpu ekpukpu bya
 atuko phozeta.
 Ophu ephe adudu ike
 dzota onwophe.
 Ochia l'ephebedua l'onwophe
 be a kpuru le ndzu.
- 3 Unu ngabenuru mu nchi;

unubẹ ọnu-ọlo Jíékọpu;
 mbụ g'ụnu ha bụru ndu
 phọduru nụ l'ọnu-ọlo
 Ízurelụ;
 mbụ unubẹ ndu ono,
 mu gudesi eshinu a tsuru
 ime unu ono;
 mu nọdu ehe unu eshinu a
 nwuru unu.

4 Mbụkpoo jasụ unu kahụ;
 ẹwó tuko unu ishi sweta;
 bẹ mu bụekwapho onye
 mu bụ;
 mu bụekwapho onye
 gude ndzụ unu.

Ọo mu meru unu;
 ọ bụru mu a-nọdu apa
 unu geleegelee.

Ọo mu a-nọdu edobe unu
 ndzụ;
 tẹme ọ bụru mu a-nọdu
 agbafutaje unu.

5 ?Bụ onye bẹ unu a-turu
 mu yeru?
 ?Bụ onye bẹ unu a-sụ lẹ mu
 l'iya ha?
 ?Bụ onye bẹ unu a-sụ l'ọ kwa
 onye dụ egube-a bẹ ọ
 dụ g'a turu yeru mu?

6 O nweru ndu evushije
 mkpọla-ododo l'ekpa phẹ.
 Ẹphe achikoo mkpọla-ochaa
 tịa àtùtù l'iphe,
 aatùje iphe.
 Ẹphe eje ebuta onye-úzá
 mkpọla-ododo g'ọ bya
 egude iya kputaru phẹ
 ntekpe.

A -kpuchaa ya;
 ẹphe awata iya abarụ ẹja.

7 Ẹphe apata iya tịa l'ukuvu
 phẹ parụ iya tugbua.

- Ephe eje eworu iya kpọbe
 l'ẹka ọo-nọdu.
 Ọ buru ẹka ono, a kpọberu
 iya ono bẹ oo-kpọru.
 Ọ tọ byadu eshi l'ẹka ono,
 a kpọberu iya ono
 kpիրiberu.
 Teke nemadzụ byaru bya
 echiku iya lẹ mkpu;
 ọ tọ zadụ iya ẹnu.
 Ọphu ọ dudu ike adzọta iya
 l'iphe-ẹhuka, byaru iya nụ.
 8 Sụ-a; unubẹ ndu ono,
 emeje iphe,
 Chileke sụru g'e be meshi
 ono;
 unu nyatakwa iphe-a!
 Unu mekwaa ya g'ọ kwaa
 unu l'egomunggo!
 Unu yekwa iya eyeye l'ọkpoma!
 9 Mbụ-a; unu nyatakwa
 akahụ iphe; mbụ iphe,
 shihawaa ụzenya.
 Ọ kwa mu bụ Chileke.
 Ọ tọ dụekwa onye ọzo.
 Ọ kwa mu bụ Chileke;
 ọ tọ dụekwa onye ọzo,
 dụ gẹ mu dụ.
 10 Mu eshijeepho lẹ mbụ mee
 g'a maru iphe,
 a-buru ikpazụ iphe.
 Mbụ lẹ mu anọdujero teke
 ndiche mee g'a maru iphe,
 eteke medu nụ.
 Mu sụru-a: Iphe,
 mu tųberu k'ememe bẹ
 mu mefutajekwa.
 Teme ọ buru iphe,
 dụ mu ree bẹ mu e-me.
 11 Mu jekpọruro l'uzo
 ẹnyanwu-awawa je ekua
 ẹnu, erije odzu;

bya ejemihu l'alì ẹka dọ
 ẹnya je ekua onye e-me iphe,
 mu tọberu.

Iphe, mu pfuru bẹ mu e-me!
 Iphe, mu chiru idzu iya bẹ
 mu e-mekwaphọ.

12 “Unu ngabẹru mu nchi;
 unubẹ ndu ono,
 ọkpoma kpọru gbengu ono!
 Mbụ unubẹ ndu ono,
 apfubekoto kwata dọ
 ẹnya ono.

13 Apfubekoto nkemu bẹ mu
 gudeakwa akpıritaru ntse.
 O tọ dọhekwa ẹnya.
 Ophu o dọekwa g'ọo-nọ-beru;
 ndzọta mu erwua.
 Mbụ lẹ mu a-dzọta ndu bu
 l'eli úbvú Zayonu.
 Mu eworu akpabiri mu nọ
 ndu Ízurelu.”

Adada Bábilọnu

47 1 “Gube nwada Bábilọnu;
 lwakwa alì alì;
 gwọdoshihukwa l'urwuku!
 Hakwaa anọdu l'aba-eze
 je anọdu l'alì;
 gube
 nwada ndu Bábilọnu!
 Kele e tee kuẹdu ngu nwanyi,
 dọ bebebe bya adọ
 nyẹgenyege.

2 Pata mkpuma, eegweje
 iphe wata egwe nri!
 Phufunu ẹkwa,
 ì phụ-chiru iphu!
 Phụ-linaa uwe ngu aphụ-li;
 l'ì gbaru ọkpa ọto je
 erwughashia nggele!

3 L'aa-gbabekwa ngu ọto;
 mee g'a hụma iphe-iphere

- ngu.
 Mu e-melatakwa; ophu o
 dukwa onye mu a-ha.”
- 4 Mbụ l'onye agbafutaje anyi
 ono
 be epha iya bu Chipfu.
 O bu Okalibe-Kakota-Ike;
 bya aburu Onye nsọ ke
 ndu Izurelu.
- 5 Nodukpoepho nwa
 ngguingguji!
 Je anodukpoepho l'eka
 gbakotaru ochii;
 gube
 nwada ndu Babilonu.
 Kele nta-a be e tee kubaedu
 ngu eze nwanyi,
 nwe ali-eze, iche iche.
- 6 Ndibe mu meru;
 ehu ghuaaha mu egbu.
 Mu turwua ndu ono,
 bu okiphe mu onoya.
 Mu woru phe ye ngu l'eka;
 ophu i phuduru phe
 obu-imemini.
 I bochaa phe ivu-erwa
 bochaa me ndibe phe,
 kahuru akahu.
- 7 I pfuru su l'ii-buwaruro
 eze-nwanyi jasụ lojeje.
 Ophu i ri-vukpodaru
 iphemiphe-a;
 ozokwanu chia idzu iphe,
 e-mechaa mee l'ikpazu
 iya.
- 8 Oo ya bu le-a;
 ngabekpodapho nchi;
 gube nwofhu kporu obu
 ye l'akpa ntusaru-ehu;
 mbu gube nwofhu arije
 lo to dudu iphe,
 byaru eme ngu nu;

tẹme ì nọdu asuje onwongu
 l'owa-a ngu kpoloko dụ;
 l'ọ tọ ọduedu onye ọzo
 gbahaa ngu;
 l'ì tì byadu abụ nwanyi,
 ji iya nwuhuru;
 ọphu ume nwa abyadu
 eme ngu.

9 Iphe labọ-a a-nwụkwaru
 ngu lẹ ntabu ọnya lanu.
 L'ujiku lanu bẹ unwu
 ngu a-nwushihu;
 ji ngu anwuhu.

Iphe labọ ono a-zue ngu pho
 gburumu pfulurii.
 I tii metadu iya l'agwugwo;
 ọphu iigwetadu iya
 l'ikpoto ngweja.

10 Kele ì kpọru obu ye l'ejo-iphe,
 iinoduje eme.
 I pfua sụ l'ọ tọ ọdu onye
 humaru ngu nụ.
 O buru mmamiphe ngu;
 yele iphe,
 ì nwutaru bẹ dephuru ngu nụ;
 mee ngu;
 ì sụ onwongu l'owa-a ngu
 kpoloko dụ;
 l'ọ tọ ọduedu onye ọzo
 gbahaa ngu.

11 Obenu l'ejo-iphe a-nwuru
 ngu;
 ọphu iimadu ẹka o shi.
 Eze iphe-ehuka a-dapfuta ngu;
 ì tii ọdu ike egbobuta
 iya.
 Ola-l'iswi a-tu ngu l'upfu;
 ọphu iimadu l'onoo
 g'oo-du.

12 Sụ-a; mekpọkwapho
 omamanshi ngu g'iime
 iya!

- Gwekpòekwapho ikpoto
 ngweja, iigwe; bụ iphe,
 i shi teke ì bụ nwata
 gweta.
- ?A maru bụ; i -menyaa ya
 l'òogbohuru ngu?
- Tọo ?bụ: i -menyaa ya
 l'ìikpatsu ndzụ-agụgu?
- 13 Iphe, bụkpoo idzu,
 a chì-koshiru ngu bụ iphe,
 o meru
 bụ l'ò tukurú mee;
 ike kabaa ngu abvubvu.
- Ngwanụ gẹ ndu aphujeru
 ngu ophulenyà
 kpìritanuru!
- Mbụ ndu ono, anọduje ele
 enya l'enyanwu yele
 kpokpode
 gude akọru ngu g'òo-duru
 ngu l'onwa l'onwa ono.
- G'ephe dzọnaa ngu l'iphe-a,
 abyarú ngu anwụrú-a!
- 14 "Ephe dụ g'ẹswa akpe,
 kpohuru nkụ.
 Ọ buru ọku e-mechaa kee
 phẹ kefu.
 Ọphu ọ bụdu l'ephe adụkponu
 ike adzọ onwophe;
 g'ọku ono te nwu
 phuruphuru kefu phẹ.
 L'ẹka-a bẹ icheku
 ọku k'anyaru ta adụkwa;
 ọphu ọ dụkwa ọku,
 a-dụ iya nụ k'anọdu lẹ
 mgboru iya.
- 15 Nokwa mkpakọ iphe,
 ephe e-meru ngu bụ ono;
 mbụ ndu-a,
 unu l'ephe shi teke ì bụ
 nwata seta akanya-a;
 zụta aswa-a.

G'èphe ha l'èhu l'èhu
 e-shiswekòtaepfo ụzọ;
 ọphu ọ dudu g'ọ ka mma
 l'oo onye lanu,
 byaru adu ike dzoo
 ngu nu."

Ízurelu ada ike

- 48** ¹Unu ngabè nchì l'opfu-a;
 unubè onu-ulo Jiékọpu;
 mbụ unubè ndu ono,
 eekujeru laaru Ízurelu ono;
 mbụ unubè eri Jiuda;
 mbụ unubè ndu egudeje
 ẹpha Chipfu eri nte;
 tẹme unu nọdu akpọ-kuje
 Chileke kẹ ndu Ízurelu;
 ọphu ọ dudu ọphu unu
 eme ire-lanu;
 ọphu ọ dudu ọphu unu
 pfulberekoto eme;
- ² mbụ unubè ndu ono,
 kuru onwunu ndu shi lẹ
 mkpukpu, du nsọ ono;
 tẹme ọ buru Chileke kẹ
 ndu Ízurelu bẹ unu kpọru
 obu yeru;
 Chipfu, bụ Okalibe-Kakọta-Ike;
 nokwa ẹpha iya bụ ono.
- ³ Ọ buru teke du ẹnya
 ẹnya bẹ mu pfuru iphe,
 mewaru nu.
 Mu gudekpọo onu mu pfua
 ya; raa ya arara;
 tẹme mu mekwaphọ g'a
 madzuru iya.
 A bya l'amaru; mu mee ya;
 ọ nwua gẹ mu pfuru iya.
- ⁴ Kẹle mu mahawaru g'iidabe
 ike;
 mbụ l'akwara olu ngu bụ
 mgborígwe;

- teme atatiphu ngu buru
onyirubvu.
- 5 O buru iphe ono meru g'o gude
mu pfuhawaru ngu
iphe-a teke du ɛnya;
mbu teme o nwuaha be
mu vuru uzo raaru ngu
iya arara;
k'ophu i ti sudu l'oo nshi
ngu meru iphemiphe
ono; l'oo ntekepe ono,
i pyiru apyipyi ono;
ozoo ophu i kpuru
l'onyirubvu ono be o shi
leka mee.
- 6 I numawaru iphemiphe-a.
Lewa iya ro ɛnya! ?Tii
kwetadu iya?
Nta-a be mu byaru awata
ngu egoshi iphe ophuu,
bu iphe, e domiru edomi,
bu iphe, imadu.
- 7 Iphe ono bu nta-a be e meru
iya;
e te mehaadaru
iya uzenya.
Mbu l'i tiki numaswee ya
abudu ntanu-a;
k'ophu bu l'i ti sudu l'i
machahawaru iya.
- 8 Su-a; i tiki numaswekwaa ya;
ophu i mahaakwaa ya;
eshinu i shi teke ndiche
data nkuchi.
Kele mu maru l'i bu
mebyikpoo onye
eregede; teme iphe,
i shikpoo l'epho ne
ngu zata buru Okwerike.
- 9 "O kwa gee-shi g'epha
mu apfuru meru g'o
gude mu sedekwadu

- ẹhu-eghu mu.
 Ọ buru g'ee-shi g'a jaje mu
 ajaja meru g'o gude
 ọphu mu teke
 atụ-koshidu ngu iya;
 k'ọphu mu te emedu
 ngu g'i chihu.
- 10 Tii ledu; mu hụchaakwaru
 ngu ahụcha;
 l'ẹbe abụ l'i bụ
 mkpọla-ọchaa.
 Mu byakwapho ahụa ngu
 l'ọku-uzu,
 bụ iya bụ iphe-ẹhuka.
- 11 Ọ kwa onwomu bẹ mu emeru
 iya.
 Mbụ lẹ mu eme iya emedoru
 iya onwomu.
 Kele-a; ?denu gẹ mu e-shi
 haa g'e woru ẹpha mu
 tūr wua?
 Mu te ewokwaru ùbvù,
 gbaru mu nụ aharu onye
 ọzo.”

Enweru onwonye ndu Ízurelu

- 12 Ngabẹkpodaru mu phọ nchị
 gube Jiékoṗu;
 mbụ gube Ízurelu,
 mu kuru l'onwomu.
 Ọ kwa mbedua bẹ ọ bụ.
 Ọ kwa mu bụ onye mbụ bya
 aburu onye ikpazụ.
- 13 Ọ kwa mbedua gude ẹka mu
 tụa ọkpa mgboko-a
 l'ọphu.
 Ọ buru mbedua gude ẹkutara
 mu tọsaa imigwe
 imigwe l'ọphu.
 Mu -kua phẹ oku;
 ẹphe atụkoephọ zelihi
 pfuru apfuru.

- 14 Unu tũko g'unu ha byakõta
 bya angabẽ nchĩ.
 Denu nshi õphu dũru ike
 pfularu unu iphe-a;
 mbũ l'onye ono,
 mũbe Chipfu hotaru ono
 l'e-me iphe,
 mu tũberu l'ẽhu ndu Bábilonu;
 mbũ l'oshi ẽka iya bẽ ọ
 dabewaru l'ẽhu ndu Bábilonu.
- 15 Ọ kwa mu; mbũ l'ọ kwa
 mu pfuru opfu-a.
 Ee! Ọ kwa mu kuru iya oku.
 Ọ buru mu e-duru iya bya;
 l'o mee iphe,
 ọ byaru ememe meghaa.
- 16 “Unu kpĩritaru mu ntse
 bya angabẽ nchĩ l'iphe-a.
 E -shikpọ lẹ mbũlembu,
 mu shi pfuta opfu bẹ
 mu teke epfuswee opfu
 lẹ mpya.
 Teke o mekpõoru lẹ mbũ
 bẹ mu nõepho l'eka
 ono.”
 Nta-a bẹ Nnajjuphu, bũ Chipfu;
 yẹle Unme nkiya;
 yewaru mu gẹ mu bya.
- 17 Wakwa iphe,
 Chipfu epfu baa;
 mbũ onye agbafutaje ngu
 nũ ono, bũ Onye Nso
 kẹ ndu Ízurelu.
 Ọ sũru: Ọ kwa mu bũ Chipfu,
 bũ Chileke ngu;
 onye bũ iya ezije ngu iphe,
 a-karũ ngu lẹ ree;
 bya abũru onye anõduje
 atũru ngu ẽka l'ũzo,
 ìi-nõdu eshi.
- 18 “Ọme ì ngaberu nchĩ mee
 iphe, mu sũru g'e mee;

- ẹhu-guu gege anọduepho
 asọru ngu gborogboro
 ge mini asọ asoso.
 Apfubekoto ngu atụ kpereree
 g'akpara-mini, atụ
 l'eze-ẹnyimu.
- 19 Oshilokpa ngu gege adụ
 igwerigwe g'eja,
 nọ l'alị.
 Ụnwegirima ngu aburu aguta
 aguta g'unwu akpuru
 ereshi.
 Epha phe ta abyadu achihu
 achihu;
 ophu a byadu emebyishi
 phe emebyishi
 l'iphu mu.”
- 20 Unu shikwa le Babilonu
 kwafu!
 Unu gbakwaa oso gbalaaru
 ndu Babilonu!
 Unu tya okoo gude pfa
 ya g'a numa-dzuru!
 Unu zia nzi g'o rwua aka
 igwe beru ali beru!
 Iphe, unu e-pfu bu le Chipfu
 gbatawaru ndu-ozu iya
 ono,
 bu ndu Jiekopu.
- 21 Egu-mini ta agukwaru phe
 teke o duru phe
 ghaa echiegu;
 mbu lo meru;
 mini shi l'agbara-mkpuma
 asoshiru phe.
 O gbajaru agbara-mkpuma;
 mini wata asoshi.
- 22 “Ndu ejo-iphe be ehu ta
 adujekwa guu.”
 Nokwa iphe, Chipfu eepfu
 bu ono.

Onye-ozí kẹ Chipfu

- 49 ¹ Unu ngabẹru mu nchì
 unubẹ ndu bukube
 eze-ẹnyimu!
 Unu nùmakpodapho iphe-a
 unubẹ ọha, bu l'ẹka dọ
 ẹnya!
 Chipfu vukwaru ọzo kua
 mu tẹme a nwụa mu.
 Ọ bụro teke mu nọkwadu
 l'ẹpho ne mu bẹ
 o kuru mu ẹpha.
- ² O meru ọnu mu;
 ọ nọdu atsu nkọ g'ogu-echi,
 a baru ababa;
 bya eworu mu domia l'ime
 ọbochi-ẹka iya.
 O meru mu; mu dọ g'apfọ,
 a rwacharu arwacha;
 bya eworu mu sụ-chia l'iphe,
 ooyeje apfọ iya.
- ³ Ọ sụ mu: “Ị bụkwa onye-ozí
 mu gube Ízurelu.
 Onye bụ ngu bẹ mu e-gude
 goshi gẹ mu dọ-be
 biribiri.”
- ⁴ Mbẹdua sụkwanu:
 “Mu seakwaru akanya
 ọla-l'iswi.
 Mu swishierupho ike mu
 k'iphoro l'iphe,
 bụ iphe-mmanụ.
 Ọle ọ bụ; iphe, rwuberu mu
 nụ bụ l'ẹka Chipfu
 bẹ ọ dọ.
 Tẹme obunggo mu bụru
 Chileke mu gude iya.”
- ⁵ O be nta-a Chipfu,
 bụ onye ono,
 meru mu rọ teke mu
 nọ l'ẹpho;

ge mu buru onye-ozí iya;
sù:

“Duphutaru mu unwu Jiékopu
azu.

Chíkobe unwu Ízurelu
chítaru mu.”

Kéle mu bú onye aakwabe
ùbvù l'ènya ké Chipfu;
tème o buru Chileke
mu bú ike nkemu.

6 Oo ya bú; o sù:

“O tó búlekwaá g'í buru
onye ejeru mu ozi
duphutaru mu ipfu ipfu
unwu Jiékopu azu;
wafuá g'í dulatakwaru
mu pho ndu ké Ízurelu,
bú nwa ndu ophu mu
doberu bé í no-doru.

Mu e-mekwa ngu pho
g'í buru íphóró,
duru ndu
abudu ndu Jiuda;
k'ophu ii-me ge ndzota mu
rwua éka igwe beru
alí beru.”

7 Wakwapho iphe, Chipfu epfu;

mbu onye ono,
bu onye agbafutaje anyi;
bya aburu Onye Nso
ke ndu Ízurelu.

Oopfu iya anu onye ono,
ohamoha jikaru ajika;
akpo-yiru iya ukuvu ono;
mbu onye ono,
bu onye-ozí ke ndu-ishi.

Waa iphe oopfu baa:

“Ndu eze e-mechakwaa
huma ngu wu-lihu.

Ndu-ishi a-huma ngu
phozeru ngu.”

O buru onye e-me iya nu

bù Chipfu; onye ono,
 apfùshije ike l'iphe,
 o pfuru;
 mbù Onye nsọ kẹ ndu
 Ízurelu,
 bù onye họtaru ngu nù.

Edophu Ízurelu azù l'onodu iya

- ⁸ Wakwa iphe, Chipfu epfu:
 Ọo teke mu a-wata eme
 eze-iphe-oma bẹ mu a-za
 ngu ẹnu.
 Ọ bụru mbọku,
 mu a-wata adzọta
 nemadzù bẹ mu e-yeru
 ngu ẹka.
 Mu a-kwakọbe ngu mee ngu
 g'ì bụru iphe,
 mu lẹ ndiphe e-gude gbaa
 ndzù;
 g'ì dophu alì ono azù
 l'onodu iya;
 mee g'ẹphe keta okiphe ono,
 shi dabyiru iphoru
 onoya.
- ⁹ Mbù-a; g'ì sù ndu ono,
 a kpùru lẹ ndzù ono
 g'ẹphe fùta;
 l'ì sùkwapho ndu nọ
 l'ochii g'ẹphe nweru
 onwophẹ.
 Ẹphe adù g'unwu-atùru,
 dọru ata nri l'agùga gbororo;
 hùmachaa nri l'úbvú úbvú,
 dùgbaa kpọkoro
 kpọkoro kpọkoro.
- ¹⁰ Ẹgu nri ta abyadù agù phẹ;
 ọphu egu mini agùdu
 phẹ; ọphu okpomọku,
 shi l'echiẹgu;
 ozoo ọphu shi
 l'ẹnyanwu ekpoẹdu

phẹ.

Ọ bụru onye aphuru phẹ
 obu-imemini a-nọdu
 edu phẹ duru phẹ
 shita aguga mini,
 asọ asoso.

11 “Mu e-me g'úbvú úbvú,
 mu nweru bụchaaru
 gbororo.

L'aabya atụa iphe,
 bụ oji mu mkpoli l'ọoha
 l'eli l'eli.

12 Lekwa; ẹphe e-shigbakwa
 ẹka dụ ẹnya.
 Ọ duru ndu ọphu e-shi
 l'isheli;
 ndu eshi l'uzo ẹnyanwu-adada;
 duru ndu ọphu e-shichaa
 ụzo alị Asụwanu.”

13 Unubẹ imigwe l'ọphu;
 unu rwua okwe!
 Gụbe eliphe; tenaa ẹswa!
 Unubẹ úbvú úbvú;
 unu watanụ agụ ebvu!
 Noo ọle Chipfu watawarụ
 adụ ndibe iya obu.
 Teme ọ bụru ndibe iya ono,
 shi eje iphe-ẹhuka ono
 bẹ ọo-phuru obu-imemini.

14 Obenu ọ Zayonu sụru:
 “Chipfu gbadoakwaru
 mu.
 Nnajiuphu mu zọhaakwaru
 mu.”

15 Ne; ọozohaje nwa, angụ iya
 ẹra l'obu;
 mbụ ọ g'ọ tọ phuru nwa,
 bụ iya nwuru iya
 obu-imemini?
 O -jekpọonu azọha bẹ
 ọo-zọhakwaa;
 obenu ọ mbedua ta

- azọhadu ngu!
 16 Tii ledu; mu deakwaru ẹpha
 ngu g'uri l'ọbochi-ẹka
 mu;
 ọphu mu azọhajedu igbulọ
 ngu ono azọha.
- 17 “Ụnwu ngu alwaakwa
 ẹgwegwa.
 Ndu ono, shi mee ngu;
 ị bụru ochobu ono nọdu
 alufuwaa.
- 18 Palinaa ẹnya ngu imeli
 lephee mgburugburu!
 Ụnwu ngu g'ẹphe ha
 anọkoakwa alwapfuta
 ngu.
 Wakwa iphe, mụbe Chipfu
 epfu baa:
 Eshinu mu nọ ndzụ gẹ mu nọ
 iya-a bẹ ii-mechaa yee
 phẹ g'ẹphe hakọta g'onye
 yeru uwe.
 Mbụ l'ii-gude phẹ kwaa
 ngwa gẹ ngwa nwanyị,
 aabya alụ k'ọphúú.
- 19 A makwaru-a l'e shi
 mebyishia ngu tọgbo
 ngu ị bụru ochobu;
 alị ngu dabyiru iphoro.
 Nta-a bẹ ị tị sụkpoedunu
 ndibe ngu ebubu.
 Teme ndu ono,
 shi mebyishia ngu nụ
 ono nọdu ngu
 ụzenya.
- 20 Ụnwegirima, a nwuru teke
 ono,
 iije iphe-ẹhuka ono
 e-mechakwaphọ pfua
 l'ị numa lẹ nchị ngu sụ:
 Ẹka-a paakwaru anyi
 nwanshị ebubu;

- chòbanaaru anyi alì
 ẹka anyi e-buru!
- 21 Noo teke ii-pfu l'òkpoma
 ngu sù:
 ‘?Bù onye nwùshiru mu ikpoto
 ụnwegirima ọwa-a?
 Mu shi eje iphe-ẹhuka;
 tẹme ọphu mu atsùdu ime.
 Mbù lẹ mu shi bụru onye
 a jìkaru ajìka;
 a bya akpua mu lẹ ndzù
 laa alì ndu ọhozo.
 ?Bùkwanu onye
 hefutaru mu ụnwegirima
 ọwa-a?
 Lẹ mụbe onye e shi haa;
 mu nọdu nkinyi mu.
 ?Igwerigwe ndu ọwa-a
 shihunu awe?’ ”
- 22 Wakwa, iphe Nnajiuphu,
 bụ Chipfu epfu baa:
 “Lenu; mu e-pheru
 ọhamoha ẹka.
 Mu e-woru ẹkwa-ọhubama
 mu paliaru ọhamoha.
 Ẹphe egude ẹka phe
 kulataru ngu ụnwu ngu
 unwoke;
 kwọru ụnwada ngu
 l'ukuvu kwọataru ngu.
- 23 Ndu eze a-buru nna,
 ehe ngu nù.
 Ndu eze-nwanyị aburu ne,
 ehe ngu nù.
 Ẹphe a-nọdu ephozeru ngu;
 bubechaa iphu l'alì.
 Ẹphe erichachaa urwuku,
 dù ngu l'òkpa.
 Noo teke ịi-maru l'oo mu
 bụ Chipfu;
 lẹ ndu ẹnya dù l'ẹka mu
 nọ bẹ iphere te emedu.”

- 24 ?Aa-nata ndu dū ike
 l'ogu iphe, ephe kwaru
 l'okwata to?
 To ?aanafo ndu iwashi ndu
 ephe kpuru le ndu?
- 25 Obenu le-a; wakwa iphe,
 Chipfu epfu baa:
 "Ee! Ndu a kpuru le ndu be
 aa-nafu l'eka ndu ike
 du l'ogu!
 Temel'a nata ndu iwashi iphe,
 ephe kwaru l'okwata.
 Ole ndu etso ngu ogo be
 mu e-tso ogo.
 Mu adzoo unwu ngu ndu.
- 26 Ndu emekpa ngu ehu be mu
 e-me g'ephe taa anu
 onwophe.
 Ephe angua mee onwophe jasu
 l'ootsuahaa phe ge mee.
 Noo teke nemadzu l'ophu
 a-maru le mbedua,
 bu Chipfu bu onye adzoje
 ngu nu;
 bya aburu onye agbataje
 ngu nu;
 bya aburu Okalibe
 ke Jiekopu."

50 ¹Wakwa iphe, Chipfu
 epfu:

- ?Denu ekwo, mu deru nu ne
 unu gude chifu iya-a?
 To ?bu ndu mu ji ugwo onye
 ole be mu woru unu
 ree?
 O kwa iphe-eji unu kpataru
 iphe,
 mu gude woru unu ree.
 O buru ejo-ememe,
 unu eme meru g'o gude
 a chifu ne unu.
- ²Teke mu byaru; ?bu gunu

meru g'o gude ọ́phu ọ́
 dudu onye nọ́ l'ẹ́ka
 ono?

Teke mu shi eku oku;
 ?bụ́ gụ́nu meru g'o gude
 ọ́phu ọ́ dudu onye zarú
 ẹ́nu?

?Bụ́ ẹ́ka parú mu mkpúrurkpu
 kẹ́ gẹ́ mu ta agbata
 unu tọ́o?

?Bụ́ ike anafuta unu ta adudu
 mu tọ́o?

Ọ́ kwa mba mmanụ́ bẹ́ mu
 abaje;
 mini atahụ́ l'eze-ẹ́nyimu.

Mu eworu ọ́ma nggele mee;
 l'ọ́ buru echiegu.

Ẹ́ma, shi dụ́ iya nụ́ ereshihu
 kele mini ta adudu
 iya.

Egu mini eworu phe
 gu-gbushia.

³ Akpaminigwe bẹ́ mu eyeje
 uwe, bụ́ iya bụ́ ọ́chii.

Mu nọ́du achieje iya
 uwe-aphụ́ g'o kpuchije
 onwiya.

⁴ Nnajiuphu, bụ́ Chipfu
 nụ́waru mu ire ndu nwuru
 ẹ́kwo gẹ́ mu maru opfu,
 mu e-pfuje g'ike dụ́ ndu
 ike bvuru.

Ookuteje mu l'utsu g'utsu;
 l'ọ́ bya emee mu echilibe
 nchị́ ngabẹ́ g'onye eezi
 iphe.

⁵ Nnajiuphu, bụ́ Chipfu
 ghebechaekwarupho
 nchị́ mu ọ́nu;
 ọ́phu mu ekwefujeduru iya ike;
 ọ́phu mu aladu
 azu azu.

- 6 Mu woru okpurukpu mu
doberu ndu echi mu
iphe;
bya eworu agba mu doberu
ndu pheshiru mu
éjǐ-agba.
Ọphu mu ewohaduru iphu
mu g'a ta chí mu
ọchí ọphu a gbụ mu
iya ọnu-mini.
- 7 Eshinu Nnajiuphu, bụ Chipfu
eyejeru mu ẹka
bẹ ọ tọ dudu iphere,
byaru eme mu nụ.
Ọ bụru iphe ono meru g'ọ
gude mu woru iphu
mu kpọo gbengu gẹ
mkpuma;
tẹme o doo mu ẹnya
l'iphere tee medu mu.
- 8 Onye aharu mu enge
nọ mu ntse.
?Bụ onye sụru g'ọobyá
aguaharu mu iphe,
mu meru?
G'anyi pfunuru dogba iya!
?Bụ onye bụ onye ọbu,
epfu iphe,
ọ sụru ẹ mu meru ọbu?
G'onye ọbu byanụ apfuru
mu l'iphu pfua ya!
- 9 Ọ kwa Nnajiuphu,
bụ Chipfu bụ onye eyejeru
mu ẹka.
?Bụ onye bụ onye ọbu,
l'a-bya mu anma
ikpe-ọnwu?
Ndu ọbu a-tuko kahụ g'uwe;
ọ bụru mkpu a-takashị pẹ.
- 10 ?Bụ onye l'echilabọ unu
atsụ Chipfu ebvu;
tẹme ọ nọdu emeje iphe,

onye-ozí Chipfu sùru
 g'e meje?
 Mbù-a; g'onye eje ije l'òchii;
 mbù onye enwedù ìphóró,
 e gude aphù ọ̀zọ̀;
 g'onye ono kpọ̀ru obu
 ye l'ẹ̀pha Chipfu!
 G'onye ono chiru ọ̀pfu kwẹ̀
 lẹ̀ Chileke iya!
 11 Obenu nta-a; iphe,
 bụ̀ g'unu ha bụ̀ru ndu
 aphù-nwu ọ̀ku;
 mbù unubẹ̀ ndu nwùru
 ọ̀ku yegbaa l'orọ̀ku parù;
 unu jenu;
 unu gude ìphóró ọ̀ku unu
 je ije!
 Unu gude orọ̀ku,
 unu nwùru ọ̀ku ye;
 ọ̀ nọ̀du enwu;
 je ije!
 Iphe, unu a-nata l'ẹ̀ka
 mu bụ̀kwa l'ọ̀ l'eje
 iphe-ẹ̀huka
 bẹ̀ unu a-nọ̀duepho!

Aa-dzọ̀ta Zayọ̀nu ojejeje

51 ¹“Unu ngabẹ̀ru mu nchì;
 unubẹ̀ ndu eme g'unu
 bụ̀ru ndu pfùberekoto;
 mbù unubẹ̀ ndu achọ̀
 Chipfu.
 G'ẹ̀nya unu dụ̀kwa
 l'agbara-mkpuma ono,
 bụ̀ ẹ̀ka a kùkpofutaru
 unu ono;
 mbù lẹ̀ wukirima ẹ̀ka ono,
 e bvutaru unu ono!
² Mbù-a; g'ẹ̀nya unu dụ̀kwa
 lẹ̀ Ébirihamu, bụ̀ nna unu!
 Wafù lẹ̀ Sera; onye bụ̀ iya
 tsùru ime unu!

- Teke mu kuru iya bukwa
 onye lanu be o shi buru.
 Mu bya ekebe iya loma
 bya emee ya;
 o du igwerigwe.
- 3 Chipfu te nwedu iphe,
 e-me go to du Zayonu obu;
 bya egude obu-imemini
 lee enya l'iswi,
 yiru iya nu.
- Alì iya ono, shi buwaru
 echiegu ono be oo-me
 go du ge Ede nu.
- Alì iya ono, dabyiru iphoro
 ono adu ge mgbabu
 Chipfu onoya.
- Noo teke ehu a-wata iya
 atsoto;
 loowata ete eswa;
 lo keleahaa ekele;
 guahaa ebvu.
- 4 Unu ngabekpodaaru mu pho
 nchi; ndibe mu!
 Unu numakpodapho iphe,
 mu epfu;
 unube oha mu!
- Mu a-tukwaru unu ekemu;
 mbu l'ikpe, pfuru oto ono,
 mu ekpeje ono
 a-bukwaru iphoro,
 duru ohamoha.
- 5 Mu a-nafuta unu egwegwa.
 Mbu le mu abyaakwa unu
 adzota.
- O buru eka mu be mu
 e-gude kpee ohamoha
 ikpe.
- Ndu bukube eze-enyimu
 bu mu be ephe a-nodu
 ele enya l'eka.
- Teme ephe anodu kwabe;
 ele enya g'ephe maru iphe,

mu e-me l'ẹka.

6 Unu palinaa ẹnya unu
lee l'imeli!

Unu lenaa ẹnya l'eliphe-a!
Igwe e-mechakwaa chíhu
g'ẹnwuru-ọku.

Eliphe-a l'ophu anwachaa
anwacha g'uwe.

Ndu bu iya nù anwùshihu
g'ijiji.

Obenu lẹ ndzọta nkemu
a-dù ojejeje.

Apfubekoto nkemu taa dadù
adada.

7 Unu nùmakpodapho iphe,
mu epfu;
unubẹ ndu maru iphe,
pfuru nhamunha;
mbù unubẹ ndu ekemu
mu dù l'ọkpoma!

Unu ba atsùjekwa ebvu
l'ọkonu, nemadzù akọ unu;
ophu iphu, oophu unu
eyejekwa unu ebvu;

8 kẹle nsù e-mecha sùkashia
phẹ g'uwe.

Ẹka-alì atakashia phẹ g'ukpo.
Obenu l'apfubekoto nkemu
a-nọ jasù l'ojejeje.

Ndzọta nkemu a-nọ shi
l'ọgbo sweru ọgbo.”

9 Tehunu etehu! Tehu etehu
yena onwongu
ọkphehu g'uwe;
gùbe oshi-ẹka kẹ Chipfu!

Tehunu etehu dù g'i shi
adùjehewaa teke k'azù;
mbù l'ọgbo teke ndiche.

?Tọ bụnaa ngu-a bụ onye
gbubushiru Réhabu
mkpirikpu mkpirikpu;
mbù gùbe onye mekarù ẹjo

- nwanụ-ẹgbudu ono
 iphe?
- 10 ?Tọ bụnaa ngu-a bụ onye ono,
 meru eze-ẹnyimu;
 ọ tahu;
 mbụ mee; mini,
 nọ l'ogbu-ẹnyimu tahu;
 i woru gbororo ọgbo l'oma
 ọhulohu ẹnyimu
 k'ọphu ndu ono,
 a gbafutaru ono wughataru?
- 11 Ọo ya bụ ọghe ndu ono,
 a gbatarụ ono alwa.
 Ẹphe aguru ebvu bahu ọ
 Zayonu.
 Ẹhu-utso ojeje aburu
 okpulishi,
 ẹphe e-kpuru.
 Ete ẹswa; yele ẹhu-utso
 asopyabe phe
 asopyabe.
 Agụ aphụ; yele atsu ude
 e-gude ọso ghata.
- 12 “Ọ kwa mbedua;
 mbụ mbedua ọgedede
 bụ onye eyeru unu
 ọkpukpu-ike.
 ?Bụ ole be bụ ke g'unu ọdu
 atsu nemadzụ mmanụ
 ebvu;
 mbụ nwa ndiphe,
 bụ iphe yee ya gba nanụ
 bụ ẹswa;
- 13 ke g'unu zohaa Chipfu,
 bụ onye meru unu;
 bya aburu iya bụ onye
 ọsaru eligwe;
 ọ dabyiru;
 bya aburu iya turu
 ọkpa mgboko l'ophu;
 ke ọghe ndzụ rwutaje
 unu tekenteke ẹgube ono;

opfu l'onye eme unu
 ewere be ɛhu eghu
 oke eghu;
 mbu onye bu iphe,
 o shiberu ite iya bu g'o
 mebyia unu?

Kele-a; ?denu oke ɛhu-eghu
 onye obu,
 eme unu ewere obu?

14 Ndu ono, a turu mkporo
 ono l'e-me ɛgwegwa
 k'ophu ee-me g'ephe
 nweru onwophe;
 g'ephe ta nwuhu l'oka;
 ophu egu nri eme phe.

15 Kele o kwa mbedua bu
 Chipfu;
 bya aburu Chileke unu;
 mube onye abujeru:
 mu -kpakobe mini
 l'eze-ɛnyimu;
 akpara-mini iya asua ekiri.

Chipfu,
 bu Okalibe-Kakota-Ike
 bu epha mu.

16 Mu woakwaru opfu
 mu ye unu l'onu;
 bya egude obochi-eka mu
 kpuchia unu.

Mbu mube onye ono,
 bu mu dobegbaaru igwe
 l'oru iya;
 bya aburu mu turu okpa
 mgboko l'ophu;
 teme o buru mu suru ndu
 Zayonu-a: 'Unu buakwaa
 ndibe mu.' "

Okoro k'oke ɛhu-eghu Chipfu

17 Tehu etehu! Tehu etehu!
 Gbalihu agbalihu gube
 Jierusalemu;

- mbụ gụbe onye ono,
 shiwaa l'ẹka Chipfu
 nata okoro k'oke
 ẹhu-eghu iya ngụ;
 mbụ gụbe onye pataru
 ipoti mée,
 emeje gẹ nemadzụ kpọ
 galagala ngụ;
 ngụ ụrwuku ụrwuku iya.
- 18 Lime ikpoto ụnwu ono,
 ọ nwụshiru ono ta
 adudu g'ọ ka mma
 l'ọo onye lanu
 letaru iya ẹnya.
 Likpoto ụnwu ono,
 o metaru ono bẹ ọ tọ
 dudu mẹ nanu setaru
 iya l'ẹka.
- 19 Mkpamehu-a uzi labo-a
 dapfutawaru ngu;
 lẹ babu l'ọ duru onye
 duu ngu obu.
 Ola-l'iswi yele mgbu-onwu;
 okpa-nri yele ogu-echi;
 mbu-a;
 ?bu onye a-suje ngu
 gberuma?
- 20 Ụnwu ngu kurwuwaru ẹnya.
 Epe dabyigbaaru l'ishi
 gbororo gẹ mgbada,
 kolahuru l'ugbu.
 Iphe, zuru phe gburumu
 pfuurii bu oke
 ẹhu-eghu ke Chipfu;
 yele aba mba ke
 Chileke ngu.
- 21 Oo ya bu lẹ-a;
 numakpodapho iphe-a;
 gube onye ono,
 eemekpa ẹhu;
 mbu onye e meru;
 o nodu akpo garigari

l'èbe ọ ngu m̄e;
 22 Wakwa iphe, Nnajiuphu,
 bụ Chipfu epfu baa;
 mbụ Chileke ngu;
 onye ono,
 agbajeru ndibe iya ọdzori
 ono.

Ọ s̄uru: “Tii ledu;
 mu nafuakwaru ngu
 okoro ono l'eka bụ
 ọphu meru;
 ị n̄odu akpọ garigari.

Oke ẹhu-eghu mu ono,
 d̄u l'ipoti ono b̄e ị t̄i
 ngu edu.

23 Mu e-woru iya p̄e ndu ono,
 an̄u ngu aph̄u ono,
 b̄u ndu ono, s̄uru ngu-a:
 ‘Dabyiru kpube iphu l'al̄i;
 g'anyi bya eswee ngu
 godogodogodo!’

I woru okpurukpu ngu
 mee al̄i; mb̄u mee ya;
 ọ d̄u ḡe gbororo,
 nemadzu eshi.”

52 ¹ Tehu etehu! Tehu etehu;
 ḡube Zayonu!

Yenaa onwongu ọkpehu
 g'uwe!

Yenaa uwe ngu ono,
 emeje ngu g'ị d̄u biribiri
 l'anya onoya;
 ḡube Jierúsalem̄u,
 b̄u mkpukpu ono,
 d̄u nsọ ono.

Ndu ebuduru úbv̄u;
 ẹphe l̄e ndu ono,
 aasọ nsọ ono taa
 bah̄ubaekwa l'ime ngu
 ozo baa.

² Gbalihu agbalihu!
 J̄ishia urwuku, d̄u ngu l'ehu!

Nòdu anọ; gùbe Jierúsalemu!
 Tùkufu onwongu egbirigba,
 a tųru ngu l'olu;
 gùbe ada Zayọnu ono,
 a kpųru lẹ ndzọ ono!

³Wakwa iphe, Chipfu epfu baa: “E shi ree unu erere; ọphu a natadu-ru aswa unu. Nta-a bẹ e tee gudekwanų okpoga agbata unu.” ⁴Kele-a; wakwa iphe, Nnajiųphu, bu Chipfu epfu: “Lẹ mbų bẹ ndibe mu shi laa alı ljiptu je eburu. Tẹme ndu Asiriya bu-wokwadu bẹ ẹphe shi emekpa phe ẹhu.” ⁵Wakwa iphe, Chipfu aji baa: “A -bya lẹ kẹ nta-a; ?ọwa-a buhunu ole? Kele ndibe mu bẹ a kpųtaru kẹ mmanų. Tẹme ndu-ishi phe gude phe eme iphe-ọchi.” Nokwa olu Chipfu. “Tẹme mkpųrumkpuru bẹ eepfubiyi-shiępho ẹpha mu shi l'ųtsu jasų nchi ejihu. ⁶Ọo ya bu lẹ ndibe mu a-maru ẹpha mu. Mbų l'o -be mbọku ono bẹ ẹphe a-maru l'ọo mbẹdua pfuhawaru iya tẹme ọ nwųje. Ee! Ọo mbẹdua!”

⁷Lenu g'ọoma l'eli úbvú ono;
 mbų ọkpa ndu eje abya ezi
 ozi-ọma;
 ndu ezi ozi nchị-adų-doo;
 ndu nzi, ẹphe gude abya dų ree;
 ndu byaru ezi ozi kẹ ndzọta;
 ndu asuje Zayọnu-a:
 “Ọ kwa Chileke ngu bu eze!”

⁸Ngabẹkpodapho nchị!
 Ndu nche ngu wolikwaru
 olu phe ewoli.
 Ẹphe tųkoru erwu okwe;
 kele ẹphe e-gude ẹnya
 hųma Chipfu teke ọo-nọdu
 alwa Zayọnu.

⁹Unu tųko wata ebvu ẹhu-ųtso
 mgbo lanų;
 unubẹ mkpọkpo iphe,
 tųkoru lẹ Jierúsalemu;
 kele Chipfu dųwaru
 ndibe iya obu.

Ọ gbatawaru Jierúsalemu.

¹⁰Chipfu a-gbabe onwiya ẹka
 ọto l'iphu ọhamoha l'ophu;
 mbų ẹka iya ono, dų nsọ ono;
 k'ophu aa-hųmachaa gẹ
 Chileke anyi e-gude dzọta

ndibe iya jasụ l'ẹka igwe
beru alị beru.

- 11 Unu tųgbua! Unu tųgbua!
Unu lųfu l'ẹka ono!
Unu te edenyikwa ẹka l'iphe,
aasọ nsọ!
Unu shikwa l'ẹka ẹphe
nọ futa!
Unu bukwaru ndu dųebe ree;
unubẹ ndu ono,
apajeru iphe ke Chipfu,
bųgbaa iphe, dųgbaa iche
iche!

- 12 Ọle unu ta alakwa
gburugburu;
ọphu unu agbakwa
phuphuphu ala;
kele Chipfu e-vuru unu
ųzo eje.
Mbụ l'ọo Chileke ke ndu
Ízurelu l'a-buru onye
e-kperu unu azụ.

**Eje iphe-ẹhuka yele ọdu-biribiri
k'onye-ozì Chipfu ono**

- 13 “Lekwa; onye-ozì mu
e-mekwa umere onye
maru iphe.
Aa-pali iya eli;
wolia ya ephekerephe;
shi nno kutsee ya.
14 G'o gude gbaa ųgbugba meru;
ẹkpa-oyi nwụa ndu dų
igwerigwe l'ẹhu g'ẹphe
humaru iya.
Ọ gbachihucharu nchi
ẹgube adụdu onye
gbachihujewaru iya nų;
ọphu ọ dųkpodaa ge nemadų
ililekpọo.
15 Nokwaphọ g'ọo-dų-dzuru ọha,
dų igwerigwe biribiri.

Mbù lẹ ndu eze bẹ ọo-kpọ
 ọnu opfu;
 kele ẹphe a-huma iphe,
 e pfuduru phe; teme iphe,
 ẹphe anumajeduru edoo
 phe ẹnya.”

53 ¹?Bù onye kwetarù ozi,
 anyi ziru?

Tọo ?bù onye bẹ e meru g'ọ
 maru g'ike Chipfu
 habe shii?

² Kele ọ nọ iya l'iphu vua
 g'oshi, rwuru irwu òphúú;
 mbù g'ogbarabvu-oshi,
 gbafutaru iphe l'alì
 ọkponku.

Ọ tọ madu mma;
 ọphu ọ dudu ùbvù
 l'ẹnya ke g'ọ
 gu anyi ẹgu anọ-kube.

Mbù l'ọ tọ dudu ugbugba,
 du iya l'ẹhu, bù iphe,
 aasù l'ọo ya meru;
 ọ nọdu agù ẹgu.

³ Ndiphe nmarù iya phulaphula
 bya ajika iya.

Ọ bù nwoke, aphù tsọru;
 bya aburu onye eje
 iphe-ẹhuka kwowaru ẹhu;
 onye ndiphe abujeru:
 ẹphe -huma iya;
 ẹphe aghaa iphu l'ibiya
 ọzo.

Mbù l'a nmarù iya phulaphula;
 ọphu ọ dudu iphe,
 anyi guberu iya.

⁴ Tororo opfu bù l'o jeru
 iphe-ẹhuka, anyi gege
 eje;
 bya evuta aphù gege
 atsọru anyi.

Anyi gbẹ dobesù l'ọo Chileke

echi iya iphe;
 l'oo ya chitsuru iya;
 anụ iya aphụ.

- 5 Obenu l'e mekarụ iya iphe;
 kele anyi mesweru.
 Mbụ l'e tsuru iya pyaapya;
 kele anyi meru ejo-iphe.
 Aphụ, a nuru iya mecharu
 mee;
 ẹhu bya adụ anyi guu.
 Teme ọ buru ọnyá,
 e chibashiru iya be e
 gude eme g'ẹhu dụ
 anyi ike.

- 6 G'anyi hakota
 kpaphuhuakwaru
 akpaphuhu g'aturu.
 G'anyi ha l'onye l'onye
 ghawarụ iphu eshi ụzo
 ophu dụ iya ree.
 Ole Chipfu woru ejo-iphe
 anyi l'ophu woru
 tu-kobe iya l'ishi.

- 7 "A kpapyarụ iya ishi bya
 emekpaa ya ẹhu;
 ophu ọ saduru onu pfua
 opfu.
 A kputaru iya g'onye kpụ
 nwaturu eje aphuphu.
 O nọduepho nggujinguji
 g'aturu,
 nọ l'iphu ndu ebushi iya
 ẹji.

- 8 E meru iya mkpawere;
 bya ekpee ya mpfụ-gbu;
 kpuru iya je emegbua.
 A -bya l'ogbo ke teke nkiya;
 ?bukwanu onye
 kpakwanuru ishi?
 Kele e meru iya;
 ọ chihu l'alị ndu dzu
 ndzu.

- Ọ bụru emeswe,
 ndibe mu mesweru bẹ e
 gude chia ya iphe.
 9 E doberu iya ilu l'ẹka eelije
 ndu ejo-iphe.
 Ọ nwụhu; e lia ya l'ilu
 oke amadụ;
 ọle o to wejeduru iwashi;
 ọphu ntuphu-ire adujeduru
 iya l'ọnu."
- 10 "Obenu l'ọo Chipfu bẹ ọ bụ
 uche iya g'o gwee ya
 arakabya ono;
 mee ya g'o jee iphe-ẹhuka
 ono.
 Teme Chipfu bya eworu
 ndzụ iya mee iphe
 ngweja-apfụ-ugwo.
 Ọo-mecha hụma unwu
 nwanwa iya;
 bya anọdu ndzụ ogologo.
 L'ọ bụru l'ẹka iya bẹ aa-gbẹ
 eme uche Chipfu
 emeshi iya ike.
- 11 O -jehaa iphe-ẹhuka ono;
 l'ọ bya ahụma ìphóró
 kẹ ndzụ;
 ono abya eji iya ẹpho.
 Ọ bụru amaru ono,
 onye ono, pfụberekoto,
 ejeru mu ozi a-maru
 iya ono l'e-me gẹ ndu
 dụ igwerigwe bụru
 ndu aa-gụ lẹ ndu
 pfụberekoto
 Yẹbedua evutakwanụ
 ejo-ememe, ẹphe meru.
- 12 Ọo ya bụ lẹ mu a-ẹ iya oke,
 a ẹrụ ndu oke amadụ.
 Ọ bụru ẹphe lẹ ndu dụ ike
 l'ọgu l'e-ke iphe,
 a kwatarụ l'ọkwata;

noo keḽe ọ miru ẹn̄ya
 ẹ́ ndzụ iya nwụhu;
 tẹme a gụru iya yeru
 ndu ejo-iphe;
 keḽe o vutaru iphe-ẹ́ji
 ndu dụ igwerigwe;
 tẹme ọ rwochiru ndu
 ejo-ememe arwọrwo.”

Obu, Chipfu yeru Jierúsalemụ

54 ¹“Gua ebvu; gube nwanyi,
 ta atsudu ime!

Mbụ gube onye teke
 ezedaswee nwa.

Chikpota ebvu!

Rwua gerwugerwu;

mbụ gube onye ono,
 ime teke emeswee ono;
 keḽe ụnwu gube nwanyi,
 dabyiru mgbegere
 a-kakwa shii eme
 l'ụnwu nwanyi alu ji.”

Nokwa iphe, Chipfu eepfu.

² Phoribekwaru ụlo-ekwa,
 i bu ebubu g'ọ ka ọsa!

Mee g'ekwa, e gude mee
 ụlo ngu obu ha
 phalaphala;

ba lo-phukwa iya azu!

Mekwaa g'eri iya kabaa
 ogologo!

Mekwaa g'abara iya kabaa
 anguru anguru!

³ Noo keḽe ii-mechaa jaa àjàjà
 buru laa l'ekutara
 buru laa l'ekicha.

Awa ngu phe l'a-naphuchaa
 ohamoha ono azu;
 je ebuchishichaa mkpukpu
 phe ono,
 bugbaa ochobu ono.

⁴ Ge ndzụ ba agukwa ngu!

- E tee mekwa ngu
 iphe-iphere.
 Gẹ ndzụ ba agụkwa ngu
 k'a nọnyaa e kpua
 ngu iphu ị ntụ!
 Kẹle a ta abyadụ eme
 ngu iphe-iphere.
 Ii-mecha zọhachaa iphere
 ono,
 meru ngu teke ị bụ
 ọgbolanu ono;
 ọphu ị byadu anyatabaa
 mkpatsu aphụ,
 dụ l'abụ onye ji iya
 nwụhuru;
- 5 kẹle ọo onye ono meru ngu
 nụ ono bụ ji, alụ ngu nụ.
 Chipfu,
 bụ Ọkalibe-Kakọta-Ike
 bụ epha iya.
 Ọ kwa Onye nsọ kẹ ndu
 Ízurelu ono bụ onye
 gbataru ngu nụ.
 Iphe, eekuje iya bụ Chileke
 kẹ mgboko l'ophu.
- 6 “Kẹle Chipfu ono e-kuphu
 ngu azụ;
 g'ị bụ nwanyị, aalụ alulu,
 a tọgboru mgbegere;
 ọphu obu adụdu iya ree;
 mbụ nwanyị,
 a luru teke ọ bụ nwata;
 ji iya parụ iya haa.”
 Nokwa iphe, Chileke ngu epfu.
- 7 “Mu harụ ngu kpọo nwụpфу
 nwanshị;
 ọle mu a-phụkwanuru ngu
 eze obu-imemini gude
 duphuta ngu azụ.
- 8 Ehu ghuru mu eghu nwanshị.
 Mu woru iphu mu
 domiaru ngu kpọo

nwupfu nwanshii.
 Obenu lẹ mu e-ye ngu obu
 ojejeje gude phuru
 ngu obu-imemini.”

Nokwa iphe, oopfu;
 mbu Chipfu,
 bukwapfo onye agbafutaje
 ngu.

9 “Lẹhu nkemu be owa-a
 dukwaa ge teke ke
 Nuwa,
 bu teke mu riru nte su l'utso,
 du teke ono taa dubaedu
 le mgboko ozobaa.

Nta-a be mu riwaru nte su
 lẹhu tee ghubaedu mu
 egbu l'opfu ehu ngu;
 ophu mu ababaeduru
 ngu mba ozo.

10 O -betakpo ubvu l'opfu
 nmakota jijijiji;
 a pashia obvu obvu,
 l'eka epe nogbaa;
 be n-yemobu ojejeje ono,
 mu yeru ngu ono ta
 apongakwa aponga;
 ophu ogbandzu
 ehu-guu nkemu ono
 egbukahukwa egbukahu.”

Nokwa iphe, oopfu;
 mbu Chipfu ono,
 aghuru ngu obu-imemini
 ono.

11 Gube mkpukpu ono,
 eje iphe-ehuka ono,
 oke pherephere enwunga;
 ophu o dudu onye
 agbaru ngu mkpu;
 mu e-gude mkpuma,
 amashi mma ike
 kpukpu-phu ngu azu.

Mu egude mkpuma safaya

- tụ-phu ọkpa-ulo
igbulọ ngu azụ.
- 12 Mu e-me g'eli igbulọ
ngu ono g'ọ ha
bụkotaru
mkpuma rubi.
Mu egude mkpuma,
aphụ ngerengere,
gude kpụa ọnu-abata
ngu;
gude mkpuma,
vu oke aswa kpụkota
igbulọ ngu l'ophu.
- 13 Ụnwegirima ngu g'ephe ha
bụ mụbe Chipfu e-zi
phe iphe l'onwomu.
Teme unwu ngu be ẹhu
a-dụkpoo guu mebyi
adudu.
- 14 Ee-me g'i nguru anguru l'uzo,
pfuru ọto.
Ọ tọ dudu onye byaru eme
ngu mmegbu;
ophu ọ dudu iphe,
byaru eme ngu g'i
tsua ebvu.
Ndzu-agugu be ee-wofu
l'eka i no je edobe ụzenya;
ophu ọobyadu ngu
ntse ililekpoo.
- 15 O -nweru onye tsoru ngu
opfu;
ọ tọ bụduru mu be o
shi l'eka.
Onye etso ngu opfu bụ:
o -mechaa l'o yeru
ngu ẹka l'alị.
- 16 “Tii ledu; ọ kwa mbẹdua
meru onye-úzu ono,
anmajẹ eko l'icheku
jasu l'o nwuhu ọku ono;
gude iya kpụa ngwa

ọgu l'ọ dụ k'egude
 alwu ọgu.
 Teme ọ bukwarupho mbeđua
 meru onye mmebyi g'o
 mebyishia iphe.
 17 Ọ tọ dukwa iphe,
 a kpuru g'e
 gude meka ngu iphe,
 byaru evujeru ire.
 Teme iphe, bukpoo onye ebo
 ngu ibo be ire
 a-gwoje eji.
 Nokwa iphe, ndu-ozì ke
 mube Chipfu eketa
 l'eka mu.
 Teme ọ bukwarupho ono
 bu ọdzori;
 mu ọdu agbaru phe iya.”
 Nokwa iphe, Chipfu eepfu.

Oku, eeku ndu mini agu

55 ¹Unu gebekwa-o! G'iphe,
 bukpoo onye mini agu
 byakwa anguta mini!
 G'onye enwedu okpoga
 byakwa azu nri ria!
 G'ọ byakwa agata mee;
 zuta era-eswi,
 e gudedu okpoga azu;
 ophu ọ dudu aswa.
² ?Denu g'o gude unu ọdu
 emebyishi okpoga l'iphe,
 abudu nri;
 teme unu ọdu ese akanya
 l'iphe, tee jidu epho?
 Unu ngabekwa;
 unu ngabekpodaru mu
 pho nchi; g'unu eria iphe,
 du ree; mbu g'unu eria nri,
 kachaa aburu okpobe nri.
³ “Unu ngabe nchi! Unu
 kpiritaru mu nu ntse!

Unu n̄makpodapho
 iphe, mu epfu;
 k'ophu unu a-n̄odu ndz̄u.
 Mu l'unu a-gbakwa ndz̄u
 ojejoje.
 Ono b̄uru iphe-oma, mu kweru
 Dévidi ukwe l̄e mu
 e-meru iya;
 t̄eme mu b̄uru onye
 apf̄ushije ike l'iphe,
 mu kweru ukwe iya.

4 Lewar̄o; mu meakwaru iya
 g'ò b̄uru onye a-n̄odu agba
 ndiphe ekebe;
 g'ò b̄uru iya a-b̄uru ishi;
 m̄e onye a-n̄oduje
 at̄uru ndiphe iphe,
 ephe e-me.

5 Lewar̄o; oha, ì mad̄u ndu
 ephe b̄u b̄e ii-kukwa oku;
 ephe egude oso byapfuta
 ngu;
 l'ò b̄ukwaru oha,
 amad̄u ndu unu b̄u.

Ò b̄uru onye a-kpa iya
 n̄u b̄u Chipfu,
 b̄u Chileke ngu;
 mb̄u Onye Nso k̄e Ízurelu;
 k̄ele o doziwaru ngu;
 ì d̄u akpabiri.”

6 Ch̄onaa Chipfu teke ìi-h̄uma
 iya!
 Rakua ya teke ò n̄okwadu
 ntse!

7 G'onye ejo-iphe haa ụzo ono,
 ootso ono;
 onye okpoma mgbashì
 ahaa ejo oriri iya.

G'onye ono lwapfuta Chipfu
 h̄uma l'oo-ph̄uru iya
 obu-imemini.

Mb̄u-a; g'onye obu lwapfuta

Chileke anyi;
 keḷe ọ-ọ-guru iya nvu
 ke mmanu.

8 “Oriri mu ta abukwa oriri
 ngu;
 ọphu ọ budu g'iimeje bu
 ge mu emeje.”

Nokwa iphe, Chipfu eepfu.

9 Ọ kwa g'igwe du-be ali
 enya-a; bu g'iphe,
 mu emeje du-be enya
 l'iphe, iimeje.

Ọ buru g'oriri mu du-be
 oriri ngu enya.

10 Ọ kwa ge mini;
 yeḷe aka-mini-sunoo eshije
 l'igwe dzee;
 ọ toọ laphuheedu iya azu;
 abudu l'ọ gbaru mini
 l'eliphe-a;
 mee ya l'o gua egugu
 fushiaha iphe l'ali;
 k'ọphu ọ-mitaru ndu
 ako iphe akpuru-iphe;
 teme ndu eri eriri enweru
 iphe, ephe e-ri;

11 nokwa g'opfu,
 shi mu l'onu du bu onoya.

Ọ toọ gbakwaru eka
 alwaphutaru mu azu.

Ọ chia iphe, oo-me bu iphe,
 bu obu mu; mbu mee iphe,
 mu ziru iya g'o je emee.

12 “Unu e-gude ehu-utso lufu;
 leeduta unu dufu
 l'ehu-guu.

Iphe, bu ubvu ubvu
 aswokobe wata agu
 ebvu l'iphu unu.

Nokwapho g'iphe,
 bukpooshi,
 nokota l'egu a-nodu

akukota ẹka.
 13 O -beta g'ogarambo fushia;
 oshi payinu efushichia.
 Oo lashia ophu obyambvu
 e-fushi;
 oshi mituru efushichia.
 Ono a-buru iphe,
 Chipfu e-gude zaa ẹpha;
 kele oo-buru iphe-ohubama,
 a-du ojejoje;
 ophu a byadu emebyi
 iya emebyi.”

Aa-dzotakwapho ndu ohozo

56 ¹Wakwa iphe, Chipfu epfu: “Unu kpeje ikpe, pfuru nhamunha; unu emeje iphe, pfuru oto; kele teke mu a-dzo nemadzu dukwaa ntse; teme apfube-koto nkemu ta adukwa g'oo-no-beru le kpuhaa ya goshi. ²Onye a goru onu-oma nu be bu onye eme iphe-a; mbu onye gudeshiru iya ike; onye doberu eswe-atuta-unme nsq; ophu ooturwujedu iya; bya eselaje ẹka iya go to du ejo-iphe, oo-meta.”

³G'o to dukwa onye shi eshishi bya atugbabe onwiya lehu Chipfu, a-su le Chipfu a-gufu iya le ndibe iya.

Ophu o dukwa onye te eyedu ime a-su le ya bu oshi, kpohuru nkpu nodu; ⁴kele-a; wakwa iphe, Chipfu epfu baa lehu onye te eyedu ime, bu onye ophu edobeje eswe-atuta-unme iya nsq; mbu onye ophu ahataje eme iphe, du Chipfu ree; teme o nodu egudeshije ogbandzu iya ẹka: ⁵“O kwa phe be mu a-nu iphe nkomepha l'ime eze-ulo mu. Mu agukwaa phe pho ẹpha, la-ka la nwutaru unwegirima. Mu a-gu phe ẹpha, a-no jasu lojejoje; ophu oochihudu echihu.”

⁶Teme ndu ono, shi eshishi ono, bu ndu woru onwophe tugbabe lehu Chipfu gephe jeeru iya ozi ono; gephe yee ẹpha Chipfu obu; teme epe abakwaru iya pho eja ono; iphe, bu ndu ono, doberu eswe-atuta-unme nsq; ophu epe aturwuduru iya ono; ndu ono, noshiru ike logbandzu yele epe ono be Chipfu epfu su: ⁷“Oo ndu ono be mu e-gude je l'eli ubvu mu ono, du nsq ono. Mu emee g'ehu tsoo phe utso l'ulo, eepfuje anu mu. Ngweja-akpo-oku phe; yele ngweja ozo, epe gude abyapfuta mu be aa-natachaa l'oru-ngweja mu. Noo kele iphe, ee-ku ulo mu bu ulo, ohamoha a-noduje epfu anu mu.”

⁸Nnajiuphu, bu Chipfu epfukwa su-a; mbu onye ono, aachilata ndu Izu-relu ono, a kpuru le ndzu ono: “Mu a-chilatabakwa ndu ozo bya eyeru phe; a -gufukwaro ndu ophu mu chilatawaru.”

Iphe, Chileke epfu le ndu ejo-iphe meru

⁹Unu byakwa; iphe, bukpuo anu, bu legbudu l'ophu! Unu bya atapya-shia iphe; unube anu, bu loswa l'ophu! ¹⁰Ndu nche ndu Izurelu atsukwa

ishi. Eṗhe ta adúdu iphe, eṗhe nwútaru. Eṗhe bukota nkúta, nọ ngguji-ngguji. Eṗhe ta agbọdu ire. Ọ buerupho nrwọ bẹ eṗhe azẹshije arwo. Mbú l'iphe, aduje pḥe ree buẹpho mgbenya. ¹¹Eṗhe bú nkúta ughoro; ndu epho te ejijedu ejiji. Eṗhe bú ndu eche atúru; búru ndu iphe te edojedu ẹnya. G'ẹpḥe ha atúkoje gha iphu l'úzo k'ẹka pḥe. G'ẹpḥe ha achoro iphe, eṗhe erita l'urwu. ¹²Eṗhe nọdu atúkoje sù: “Unu bya g'anyi je agata mẹe! G'anyi ngua mẹe, atsù atsùtsu g'o ji anyi! Echele a-dùlekwa gẹ ntanu. Mbú l'ọgbenu ka ree ọkpobe akaka.”

57 ¹Onye pḥuberekoto abujeru; ọ -nwúhu; ọ tọ dudu onye oorwu l'ẹhu. Teke a kputaru onye obu-imemini je egbua; ọ tọ dudu onye oodo ẹnya. Iphe, te edojedu ẹnya búru l'edufu ono, e dufuru onye pḥuberekoto ono bú g'ẹjo-ememe te erwu iya ẹka. ²Iphe, bukpo onye eme iphe, pḥuru ọto l'abujeru; ọ -nwúhu; l'ọ zẹe guu wata atuta unme.

³Obe l'unubedua; unu byakpodapho l'ẹka-a; unubẹ unwu ndu agba ẹja! Unubẹ eri ndu eri ogori yele ndu agba ukpara ono! ⁴?Bú onye bẹ unu gude eme iphe ọchi? ?Bú onye bẹ unu aphushiru ugbonu ahashiru ire? Unu bukwa unwu, ndu ono, l'ada ike nwushiru ono; mbú awa ndu adzujẹ ọka! ⁵Unubẹ ndu ọonoduje anma ẹhu anmanma agwa iphe l'upfu achi; mẹkpoo l'upfu iphe, bú oshi, jaru àjàjà! Unubẹ ndu ejeje lẹ nsuda nsuda je anọdu egbushi unwu unu gude agwa iphe lẹ mgbaka ọgba agbara-mkpuma! ⁶Ọ búru nshi ono, nọ l'echilabo mkpuma, akwo teretere, nọ lẹ nsuda bú okiphe unu. Ọo ya bẹ ọ bú. Mbú l'ọo ya bú iphe, unu ketaru. Ee! G'ọ bú iya bẹ unu agbaru mẹe gude agwa; bya egude iphe, unu metaru l'egu unu gude agwa iya. ?Bú unu -nọdu eme iphemiphe ono; unu asu gẹ mu palia pazeta tọo? ⁷Unu jeru je eworu iphe-azẹe unu gbaa l'eli eli úbvú, ha l'eli. Ọ búru ẹka ono bẹ unu nyihuru je anọdu agwa iphe unu. ⁸L'abata-aghachi ọlo mẹ l'azu-mgbo ọlo unu bẹ unu dobechaaru ọbvú unu. Unu jika mu bya eworu iphe-azẹe unu ghebe ọnu; mbú nyihu iya ghebe iya karaphongu. Unu lẹ ndu ono, unu yeru iphe-azẹe pḥe obu ono gbaa ndzụ. Unu je anọdu ele iya ẹnya l'ẹka ọ gba ọto. ⁹G'unu jiru manụ, eshi kwee-kweekwee bya egude manụ olivu jee l'agwa, bú Moleku; bya ezia ndu nọ-chiru unu; eṗhe jee l'ọbvú l'ẹka dọ ẹnya ẹnya; mbú jerwuchaa alı-maa l'onwiya. ¹⁰Unu mee iphe ono, unu eme ono jasụ ike bvú unu. Ọphu unu adukwapho ike sù l'iphe-a ta adukwa iphe, ọ bú. Ọ gbẹ anọduje adu unu obu; ọphu ike iya abvujedu unu abvubvu.

¹¹“?Bú onye bẹ ndzụ iya shi agụ unu; mbú onye unu tsuru ebvu k'ophu unu wataru adzuru mbedua ọka? Ọphu unu anyataduru mu anyata ophu; ọphu ọ búro kẹ g'unu jekpo ya ariri l'obu unu? ?Tobudu l'ole mu shi teke-a gbata nkuchi meru g'o gude ọphu unu atsudu mu ebvu? ¹²Mu e-me g'a maru g'unu bú-be ndu pḥuberekoto; yele iphe, unu emegbabe; ọphu eṗhe abakwa abaru unu urwu. ¹³Gẹ ribaribariba ọbvú ono, unu gwoshiru dobe ono dzowaro unu! Ọo pḥerephere a-tuko g'ẹpḥe ha pata pafu;

mẹ unu -wata o-ji-l'ẹka-togbo. G'ò bú phẹphẹ a-tùko iya paphua; mbù l'ọo unme, a tũru atũtu a-patakọta iya paphua apaphu. Obenu l'onye gbabarù l'ime mu je anọdu ezeru ndzù bú alì-a l'a-bùru okiphe iya; tẹme l'ọ búru iya e-nweru úbvú, dù nsọ mu onoya.”

Aadù ndu izimanù lwarù azù obu

¹⁴Ee-mecha sù: “Unu kpunaa ya; unu kpunaa ya; unu dozinnaa ọzo! Unu wofuchaa iphe, a-nọ-chi ndibe mu ọzo.” ¹⁵Kẹle-a; wakwa iphe, onye ono epfu; mbù onye ono, ha shii; tẹme e kutsee ya ephekerephe; mbù onye ono, nọ ndzù ojejoje; onye ẹpha iya dù nsọ: “Ẹka mu bu bukwa ẹka dù l'eli bya abùru ẹka dù nsọ. Tẹme mu bukwarùpho l'ẹka o bu; mbù onye izimanù iphe-ẹji iya lwarù azù; bya ewoze onwiya alì; gẹ mu mee g'obu gù-zeta onye wozeru onwiya alì; mu emekwaphọ g'obu gù-zeta onye izimanù iphe-ẹji iya lwarù azù. ¹⁶Mu taa nọduadaro l'epfu iphe, e meru mu jasùwaruro ya; ọphu ẹhu a-nọduadaro egbu mu egbu; ọdumeka bẹ ndzù nemadzù a-dùkwa nyẹgenyege l'iphu mu; mbù unme nemadzù, bú mu gude ẹka mu mee ya dobe. ¹⁷Iphe, shi ghua mu egbu bú ọghoro ono, shi paa ẹka l'ẹhu iya ono. Mu hùà ya ahùhù; woru iphu wohaarù iya l'ẹka ẹhu egbu mu egbu. Ọ nọdu emekwaphọ iphe, o lekeberu ẹnya eme.

¹⁸“Mu hùmaakwaru iphe, ẹphe emeje. Ọle mu e-me g'ẹphe wekọrohu. Mu e-du phẹ l'onwomu mee g'obu nmapfuru phẹ. ¹⁹Mu e-me g'ajaja dù l'ogbogboromọnu ndu ono, agù aphù lẹ Ízurelù ono. Ẹhu-guu dùkwaru ndu nọ ẹnya mẹ ndu nọ ntse; ọzo bú lẹ mu e-me g'ẹphe wekọrohu.” Nokwa iphe, Chipfu eepfu. ²⁰“Obenu lẹ ndu ẹjo-iphe dùa g'oke-ẹnyimu, atù akpara, ata atùtajedu unme atùta, bú ọphu akpara-mini iya anọduje atsùshi ọrwukutu yẹle ẹpuchi. ²¹Ndu ẹjo-iphe bẹ ẹhu ta adùjekwa guu.” Nokwa iphe, Chileke mu epfu.

Ọkpobe aswìru Chileke ẹgu

58 ¹“Chia ya lẹ mkpu g'a nùma! B'eselakwa olu azù! Wolia olu chia mkpu, a-da g'ẹka eegbu opu! Karù ndibe mu l'ẹphe kwefuru mu ike; l'ì karù ọnu-ùlo Jiékoju iphe-ẹji phẹ. ²Ọle ẹphe anọduje achọ mu mbọku-mbọku. Ẹphe -nọdu ẹphe eme g'ọgu phẹ ẹgu amaru ọzo mu. Ẹphe eme g'ẹphe bú ọha, anọduje eme iphe, dù nhamunha; g'ẹphe taa jìkadu eme iphe, Chileke phẹ sùru g'ẹphe meje. Ẹphe nọdu asùje gẹ mu pfua iphe, pfuru nhamunha mu e-meru phẹ. Ọ nọdu agù phẹ ẹgu gẹ mụbe Chileke kpìritaru phẹ ntse.”

³“Ẹphe -nọdu ẹphe asù: ‘?Bunaa gunu meru g'o gude anyi nọdu aswì ẹgu epfu anù Chileke; ọphu Chileke ahumaduru iphe anyi eme? ?Bunaa gunu meru g'o gude anyi wozechaa onwanyi alì ọphu o rwuduru Chileke l'ẹhu?’

“Ọle mbọku ono, unu aswì ẹgu epfu anù mu ono bẹ bukwa iphe, dù unu ree bẹ unu anọduje eme; mbù erichaa mẹ ndu ejeru unu ozi urwu.

⁴Aswì ẹ̀gu unu bukwa iphe, unu egudeje kpochia ya ishi bu aba mba yele ese opfu; yele egude iwashì echi nwibe unu gbaagbaa. Ẹdu aswì ẹ̀gu ono, unu anọduje aswì ono tee mekwa gẹ mu nọdu l'imigwe numa olu unu.

⁵?Bù ẹ̀gube aswì ẹ̀gu ono bẹ mu hatarù tọ; mbù g'ọ buerupho lẹ nema-dzù wotaru ujiku lanù woze onwiya alì? ?Bù iphe, ọ bu bu ephuru yoo g'ẹswa ekperema; yele aze l'uwe-aphù; yele aze lẹ ntù? ?Bù iphe ono bẹ iiku aswìru Chileke ẹ̀gu; leswe, dù Chipfu ree?

⁶“Wakwa ọdu aswì ẹ̀gu, dù mu ree baa: Unu gbùtoshia ẹ̀gbirigba, unu tųru ndu unu eme omeliwe! Unu abya atọshikwapho eri odogoro, unu yeru ndu unu akpa ẹ̀hu; haa phẹ g'ẹphe nweru onwophe! Unu atùko odogoro ono nyakwoshia anyakwoshi! ⁷Iphe ọzo, ọ bufua bu g'unu l'onye ẹ̀gu agù gbarù mgba lẹ nri ngu! Unu abya achọoru ndu akpa nri, enwedu ọlo ẹka ẹphe e-buru. Unu -huma onye gba ọto; unu anmabe iya iphe! Ọphu unu ewofukwa iphu l'ẹhu onye unu l'iya bu mee lanù!

⁸“Noo teke iphóró unu e-nwu phoo g'iphóró nchi-abọhu; ewekọrohu unu emee phuruphuru. Noo teke apfubekoto unu e-vuru unu ọzo; unu etso iya etsotso. Ọdu-biribiri kẹ Chipfu aburu iphe, a-nọdu etso unu l'azù.

⁹Noo teke unu e-ku oku; Chipfu aza unu ẹnu. Unu echia o-ji-l'ẹka-tọgbo; l'ọ sù unu lẹ ya nọ-a.

“Ọ -bùru l'unu a-tọshi eri odogoro ono, unu yeru ndu unu akpa ẹ̀hu ono; bya ahaa amaru nemadzù ejo ẹka ono; hakwaphọ epfu ejo-opfu; ¹⁰ọ -bùru l'unu a-wata anù ndu ẹ̀gu agù nri; wata emeru ndu eeme ewere mkpa phẹ; bẹ iphóró e-nwuru unu phoo l'ẹka ọchii agba; ẹnyashi adù unu g'echi eswe. ¹¹Ọo-bùru Chipfu a-nọdu edu unu mkpùrumkpuru. Lọ meeru unu iphe, bu mkpa unu l'ẹka kpọru gbengu; mekwaphọ g'ọkpù shihu unu ike l'ẹhu. Unu abya adù gẹ mgbabu, a gbaru mini ree; g'ogba, ta anwù-buhujedu shokoshoko anwù-buhu. ¹²Ndibe unu akpùkwaa akahù ọlo ono, shi dakpọ-shihuwa nù ono; bya akpù-lia akahù ọkpa-ọlo ono, shi lẹ ndiche ono. Lẹ kuahaa unu: ‘Ọ-kpùkwa-mkpọkpo-igbulọ’; yele ‘Ọ-kpùkwa-ọlo-l'aguga-ọji.’”

Obunggo, ee-bu onye doberu eswe-atùta-unme

¹³“Unu -chifukpowaa ọkpa unu l'emebyi eswe-atùta-unme; ọphu unu emejeedu g'ọ dù unu l'eswe, dùru mu nsọ ono; unu -gùbekpowaa eswe-atùta-unme iphe; mbù-a; unu -kua eswe ono, dùru mube Chipfu nsọ ono eswe aakwabẹ ùbvù; ọ -bùru l'unu doberu iya iche; ọphu unu ahatajẹdu ẹnu ẹka unu; ọphu unu emedu g'ọ dù unu; ọphu unu epfudu okorobo opfu; ¹⁴noo teke unu a-nọdu Chipfu l'ẹhu wata ete ẹswa. Tẹme ọ buri l'ẹka kachaa ephekerephe l'eliphe bẹ mu e-me g'unu ngakojeru tųa okoo. Unu eketa okiphe, shi lẹ nna unu ono, bu iphe Jiékọpu; ọ buri iya bẹ mu e-gude azù unu.” Nokwa ọnu, Chipfu yeru.

59 ¹Tororo opfu bu l'ẹka Chipfu ta adùkwa tsọkpuru kẹ g'ọ tọ dzọ-ta nemadzù. Ọphu nchì echihukwaru iya echihu g'ọ tọ numa iya

iphe. ²Ọ chia ẹjo-ememe unu dokaharu unu ẹ Chileke unu. Ọo iphe-ẹji unu meru; o wofu iphu l'ẹka unu nọ; k'ọphu bụ l'ọ tọ nuedu olu unu; ³kele ẹka unu bẹ mee ọchi tūrwwaru. Mbụ ẹ mkpūshi-ẹka unu rwukatawaru ẹjo-iphe. Ogbogboromonu unu dzūwaru ụka; ẹme unu nọdu atụ ẹjo opfu ke tootoo.

⁴Ọ tọ dudu g'unu ha onye ọphu epfu g'e kpeje ikpe, pfulu ọto. Ọphu ọ dudu onye edoje opfu iya ire-lanu. Ẹphe achijeru upfu kwee ẹ mkpọkoro opfu, adzushi ụka. Ẹphe nọdu atsutaje ime nchoko-opfu nwua ẹjo-iphe. ⁵Iphe, ẹphe ekpuje ekpukpu kputa iya nwa buru ẹkwá ogiji. Ẹme ọghú, ẹphe agbajẹ buru oghu udude. Iphe, bụ onye taru ẹkwa iphe pẹ nwuhufutaje. Teke ọ dukwanuru ọphu tukpohuru nū l'ọ vua nwa ogiji. ⁶Udude, ẹphe kweru ta adukwa k'akpa uwe. Ọphu ẹphe egudekotadu iphe, ẹphe gude ẹka pẹ mee gbobuta onwophe. Iphemiphe, ẹphe eme bukota ẹjo-iphe. Ọ buerupho iphe ike iphe ike aduje pẹ l'ẹka. ⁷Okpa pẹ ekwoje gburumu bahụ l'eme iphe-ẹji. Ọphu egbu onye adudu iphe, o meeru adudu iphe, ọobujeru pẹ. Oriri pẹ bukota ẹjo oriri. Mkpurupyata yee ọla-l'iswi buru iphe, anọduje egoshi ụzo, ẹphe shiru. ⁸Uzo, eeshije; nchị-adu-doo bẹ ẹphe ta amadu. Ọphu ikpe, pfulu ọto adudu l'uzo, ẹphe eshi. Ẹphe tukowaru iya mee; ọ bukataru ụzo, dū nggodogo nggodogo. Ọphu ọ dudu onye eshi iya nū, byaru amaru iphe, bụ nchị-adu-doo.

Ndu Ízurelụ epfushi iphe-ẹji, ẹphe meru

⁹Ọo ya bụ l'ikpe, pfulu ọto nọ anyi ẹnya. Ọphu apfulbekoto erwuduru anyi ẹka. Anyi leri ẹnya iphóró; iphemiphe bukataru ọchii. Anyi lee ẹnya g'iphè gbuchafu egbuchafu. Obenu l'ẹka anyi nọ aghaphe bụ oke ọchii. ¹⁰Ọ buru gẹ ndu atsụ ishi anọduje aduda ẹka-a bụ g'anyi aduda ẹka l'igbulọ. Mbụ gude ẹka achọ ụzo anyi gẹ ndu enwedu ẹnya. O -be l'echi eswe; anyi evuko iphe evuko g'ọ bụ echi abali. Teke anyi nọ l'echilabọ ndu ike dū; anyi aduepho gẹ ndu nwuhuru anwuhu. ¹¹Anyi atukoje aba hanyihanyi g'oke-ẹjo-nkuta-oswa; atsuru ntsuru gẹ ndo. Anyi lee ẹnya ikpe, pfulu ọto. Ọphu ọ dudu ọphu rwuru anyi ẹka. Anyi lee ẹnya g'a dzọo anyi. Adzọta duro anyi ụzenya ụzenya.

¹²Ọ buru iphe, kparu iya nū bụ l'iphe-ẹji anyi paru ẹka l'iphu ngu. Ọ buru iphe-ẹji anyi agba anyi ekebe. Emeswe, anyi mesweru ngu adujeepho anyi l'egomunggo. Ẹme anyi maru ẹjo-iphe, anyi meru ree. ¹³Anyi mesweru Chipfu; ẹme anyi nọdu ejephe iya. Mbụ l'anyi woru azu ghaar Chileke anyi. Opfu, eshije anyi l'onu afushi buerupho eme ewere; yele agirigo; mekpoo adzu ụka, bụ ọphu tukoru anyi obu sweta. ¹⁴Ọo iphe ono meru g'o gude ọphu e kpeedu ikpe, pfulu ọto. Apfulbekoto pfuluro ụzenya ụzenya. Ire-lanu dawaa kpoo mkpomishaku l'oma gbororo. Ọphu abụ onye ọkpobe opfu adudu ike batakpọnu abata ọphu. ¹⁵Ire-lanu bẹ ta adudu ẹka a humaru iya. Onye jeru g'o zehuru ẹjo-ememe l'a vua ya kpatakpata.

Noo ya bú lẹ Chipfu elee ya ẹnya; ọ dú iya eji; kele ikpe, p̄furu ọto ta ad̄edu. ¹⁶Ọ h̄uma l'ọ t̄o d̄edu onye dú n̄u. Mb̄u-a; ọ nȳia ya ẹhu kpa-laa l'ọ t̄o d̄du onye gbaa mkpu, dú n̄u. Ọo ya bú; o gude ẹka iya dz̄oo ya l'onwiya. T̄eme ọ b̄uru ap̄f̄ubekoto nkiya sederu iya. ¹⁷Ọ bya eworu ap̄f̄ubekoto mee uwe-ígwè onye eje ọgu chibe l'ọkpoma; bya eworu adz̄ota kpuru l'ishi g'okpu-ígwè. Ọ bya eyee agwata ụgwọ-iphẹ g'uwe; bya eworu iphe enwu ọku l'obu gbaphua onwiya g'onye gbaphuru ẹkwa. ¹⁸Ọ b̄uru g'iphe, ẹphe meru gbaru bú g'oo-gude p̄fua p̄hẹ ụgwọ. Mb̄u l'ọo-tu-koshi ndu ọhogu iya oke ẹhu-eghu iya. L'ọ bya agwata ndu opfu iya ụgwọ iphe, ẹphe meru iya. L'ọ bya ap̄f̄ua ndu bukube eze-ẹn̄yimu iphe, rwuberu p̄hẹ n̄u. ¹⁹Ọo ya bú ḡe nemadz̄u ats̄uaha ẹpha Chipfu ebvu jas̄uchaa l'uzo ẹn̄yanwu-adada. Ẹphe eshikwaph̄o l'uzo ẹn̄yanwu-awawa akwabẹ ọdu-biribiri iya úbv̄ú; kele ọo-tu kpereree bya g'utso; ọ b̄uru unme kẹ Chipfu a-n̄odu ad̄ube iya ikike.

²⁰Onye agbaf̄utaje anyi a-bya úbv̄ú Zayonu; mb̄u byapfuta oshilokpa Jiékp̄u, bú ndu izimanu iphe-ẹji p̄hẹ lwaru azu. Nokwa iphe, Chipfu eepfu. ²¹Wakwa iphe, Chipfu epfu baa: “A -bya l'ẹhu m̄bẹ Chipfu; wakwa ọgbandzu mu l'ẹphe baa: Unme mu, bú ọphu n̄o ngu l'ẹhu; yele opfu mu, bú ọphu mu yeru ngu l'onu ta abyakwa abvu ngu l'onu; ọphu ọobvudu l'onu unwu ngu; ọphu ọobvudu l'onu oshilokpa p̄hẹ e -shi nta-a jas̄u l'ojejeje.” Nokwa iphe, Chipfu eepfu.

Zayonu e-mechaa dú akpabiri

60 ¹Gbalihu agbalihu!
Wata egbu nw̄inwii;
kele ìph̄óró nkengu byawaru!

T̄eme Chipfu n̄odu egbuwa
nw̄inwii l'ẹhu ngu!

²Tii ledu; ọchii t̄ukoakwaru
eliphe l'ophu gbachia.

T̄eme oke-ọchii gbapyabẹ
ndiphe l'ophu.

Obenu lẹ Chipfu gbalihuru
p̄furu p̄f̄u-doru ngu.

T̄eme e je ah̄uma
o-gbu-nw̄inwii ya l'eli
ẹhu ngu.

³Ndu ọhozo a-bya an̄odu
l'ìph̄óró, d̄uru ngu n̄u.

Ndu eze abya an̄odukwapho
l'ìph̄óró ono, d̄uru ngu n̄u ono;
mẹ nchi b̄ohueru ngu ph̄o.

- 4 Palinaa ɛnya lephee
 mgburugburu h́ma gɛ
 ndibe ngu dzukoberu
 awu awupfuta ngu.
 Unwu ngu kɛ nwoke shi ɛka
 du ɛnya alwa.
 Tɛme ɛphe kworu
 unwuada ngu l'ukuvu
 akwɔlataru ngu.
- 5 Noo teke ii-le iya ɛnya
 nwujaa.
 Okpoma evuahaa ngu evuvu;
 l'i wata anya ndu.
 Le shi l'oke-ɛnyimu kporu
 ɛku kpotaru ngu.
 Tɛme l'ɔ bukwaru ngu pho
 be aa-chitaru ɛku
 ohamoha.
- 6 O-doru-nyimunyimu
 inya-kamelu atuko ali
 ngu sweta.
 Mbɔ unwu inya-kamelu,
 shigba ali ndu
 Midiyanu yeke kɛ
 ndu Ifa.
 Tɛme iphe, bu ndu shi ali
 Sheba azaru bya.
 Ephe eguderu ngu
 mkpola-ododo yeke
 unwu-isensu.
 Tɛme ɛphe ara iya arara g'e
 tua Chipfu epha.
- 7 Eghu me aturu ndu Keda g'o
 ha be aa-tuko chitaru ngu.
 Mbɔ-a; ebili ndu Nebayotu
 e-mechakwaa jeeru
 ngu ozi.
 La nata phe gude gweeru mu
 ngweja l'oru-ngweja
 mu.
 Mu abya eworu eguru
 eze-ulo mu mee g'o du

ùbvù l'ènya.

8 ?Bù ndu ole baa? ?Bù ndu
ole asọ raaraa g'urwukpu,
asọ l'igwe phọ;
mbù ndu ono,
eze gbiigbiigbi g'èka
ndo-nwènu
l'eze gbiigbiigbi ephe
ala l'èpfune iya
ono?

9 Tororo bù lẹ ndu bukube
eze-ènyimu bù mu bẹ
èphe achọ abya.
Ụgbo, vutagbaaru phẹ ụzo
bùru ụgbo-mini ndu
Tashishi.

Ọ bùru ndu èphe achilata
bù ụnwu ngu,
shi èka dù ènya;
yẹle mkpọla-ọchaa mẹ
mkpọla-ododo,
èphe vugbaa alwa.

Ono bùru ùbvù,
aakwabẹ Chipfu,
bù Chileke ngu ono;
mbù onye ono,
bù Onye Nsọ kẹ ndu Ízurelu;
kẹle o meru g'ị dù akpabiri.

10 Ọo ndu shi eshishi
a-kpukwa igbulọ ngu
ono.

Ọ bùru ndu eze phẹ a-nọdu
ejeru ngu ozi.

A makwaru-a lẹ mu gude
èhu-eghu chitsua ngu.

Obenu lẹ mu e-mechaa gude
n-yemobu phuru ngu
obu-imemini.

11 Ọnu-abata gube mkpukpu
ono e-ghejeru onu
mkpurumkpuru.

A ta abyadu agu-chije iya

- agu-chi eswe l'enyashi.
 Oo ya bu ge ndiphe anodu
 achibatara ngu eku
 unwu-eliphe.
 O buru ndu eze phe a-chijeru
 phe abya;
- 12 kele iphe, bu oha;
 ozoo ali-eze, a-jika
 l'ephe te ejeduru
 ngu ozi
 a-buru mkpurupyata;
 ndu ono be
 ee-mebyishikota l'opfu.
- 13 Iphe, ali ubvu ubvu
 Lebanonu gude du
 akpabiri a-laru ngu;
 mbu oshi payinu;
 mekpoo oshi firu;
 mechakpoo oshi
 sayipuresu, bukota oshi,
 du iya nu.
 G'o ha be ee-gude mee g'eka
 duru mu nsọ maa
 mma.
 Teme mu emekwapho g'eka
 mu azoje okpa buru eka
 du akpabiri.
- 14 Unwu ndu ono, eme ngu
 ewere ono e-mechaa
 bya l'ipfu ngu bya
 ephozeru ngu.
 Iphe, bukpo ndu ono,
 agubeduru ngu iphe
 ono e-mechaa bya
 le mgboru okpa ngu bya
 ephozeru ngu.
 Ephe e-mechaa tuko kuahaa
 ngu Mkpukpu ke Chipfu;
 Ubvu Zayonu ke Onye Nso
 ke ndu Izurelu.
- 15 A makwaru-a l'a jikaru ngu
 bya akpo ngu ashi;

ophu o dudu onye
aghajaje ngu nu.

Obenu le mu e-mechaa mee ngu
mkpukpu, ogbo l'ogbo
e-gude eku onwophe;
gude iya ete eswa.

O buru g'oo-duwaro bu ono
jasu l'ojejeje.

16 Ii-ngu era ohamoha;
mbu l'oo era ndu eze be
ee-gude hee ngu.

Noo teke ii-maru l'oo
mbedua, bu Chipfu be
bu onye ndzota ngu;
buru onye aagbafuta
ngu nu;
bya aburu Okalibe ke
Jiekopu.

17 O buru mkpola-ododo be
mu a-nu ngu l'ozori
onyirubvu.

Mu anu ngu mkpola-ochaa
l'ozori mgbuguru-igwe.
Onyirubvu be mu a-nukwanu
ngu l'ozori oshi-nku.

Mu anu ngu
mkpurukpu-igwe
l'ozori mkpuma.

O buru nchi-odu-doo be
l'a-nodu aturu ngu iphe,
ii-nodu eme.

Apfubekoto aburu iya a-nodu
edu ngu.

18 A ta abyadu anumabaa
l'iphe-kpangangaa
leme l'alì ngu
l'ophu.

Ophu aanumabaedu
k'ola-l'iswi ozoo
mgbu-onwu l'alì ngu
gbaa mgburugburu.

Iphe, ii-nodu eku igbulu ngu

- a-buru: Ndzọta;
 l'i kua ọnu-abata mkpukpu
 ngu "Ajaja".
- 19 "Ọ tọ bueduru ẹnyanwu
 bẹ ii-gude aphụ ọzo l'eswe;
 ọphu ọnwa echieduru ngu
 phuuuphuu l'enyashi.
 Noo kẹle Chipfu a-buru
 ìphóró duru ngu nù
 jasụ l'ojejeje.
 Mbụ l'ọo Chileke ngu ono
 a-buru
 ọdu-biribiri nkengu.
- 20 Ẹnyanwu ta arībaedu arība;
 ọphu ọnwa arībaedu arība.
 Ọ buru Chipfu
 a-buru ìphóró
 ojejeje nkengu.
 Ọ tọ duedu mbọku, aphụ
 byaru atsọbaaru ngu.
- 21 Noo teke ndibe ngu l'ọphu
 a-bukotaru
 ndu p̄f̄uberekoto.
 Ẹphe enweru aḷi ono jasụ
 l'ojejeje.
 Mbụ-a; ọ kwa ẹphebedua
 bụ irwu oshi ono,
 mu dzaberu ono; mbụ ozi,
 mu gude ẹka mu jee;
 g'e gude hụma gẹ
 mu d̄u-be akpabiri.
- 22 Ndu ọphu kachaa alwa aḷi lẹ
 g'unu ha a-d̄uje unu labo
 l'ukporo iri;
 t̄eme ndu kachaa nwansh̄i
 lẹ g'unu ha aburu
 mkpukpu, ike d̄u.
 Ọ kwa mb̄edua bụ Chipfu.
 Iphemiphe-a bẹ mu e-mekwa
 ẹgwegwa m̄e o -rwuepho
 teke mu e-me iya."

Apha, Chipfu e-me eze-iphe-oma

- 61** ¹ Unme Nnajiuphu,
 bụ Chipfu dū mu l'ehu;
 kele ọ họtaru mu ge mu
 je ezia ndu wozeru
 onwophe ali ozi-oma.
 Ndu meji tofuru be o
 ziru mu ge mu je emee
 ge meji nmapfuru
 phe;
 ge mu je ezia ndu a
 kputaru le ndzu l'ephe
 e-nweru onwophe.
 Mu epfukwarupho ndu no
 l'oka-mkporo l'aa-ha
 phe.
- ² Teme ge mu bya arakaa
 l'apha, Chipfu e-meru
 ndu nkiya eze-iphe-oma
 rwuwaru;
 yele eswe mboku,
 Chileke anyi a-gbaru
 ndibe iya odzori.
 Mu adu ndu agu aphu
 obu g'ephe ha.
- ³ Teme mu eyekwarupho ndu
 Zayonu aka;
 mbu ndu ophu aphu
 tsoru.
 Mu eworu eguru okpu-eze
 kpube phe l'ishi l'ozori
 ntụ,
 ephe shi kpube onwophe;
 wu phe manu ehu-utso;
 l'ozori agu aphu;
 yee phe uwe,
 bu aja Chileke ajaja;
 l'ozori anodu yokoo.
 Iphe, aa-nodu eku phe
 aburu "Achi k'apfubekoto";
 Oshi, Chipfu kuru l'onwiya

- g'e gude hùma g'ò
 dū-be akpabiri.
- 4 Èphe a-kpùkwa akahù igbulò
 ono,
 dakashihuru e -shi teke
 ndiche ono;
 bya atùko akahù ẹka ono,
 bñhawaa ochobu ono
 doziphuchaa azù.
- Mkpùkpu ono,
 dakpòshihuchaaru
 adakpòshihu nõdu nno
 shi l'ogbo sweru ogbo
 ono bẹ ẹphe a-tùko
 kpuzi-kõtachaa.
- 5 Ọ bñru ndu shi eshishi
 a-nõdu echeru unu egbu
 mẹ atùru unu.
 Ndu ọhozo abñru ndu
 a-nõdu ejeru unu ozi ẹgu;
 yẹle ozi opfu-vayĩnu
 unu.
- 6 Iphe, aa-nõdu eku unu abñru
 “ndu-uke kẹ Chipfu”.
 Iphe, aa-gùbe unu a-bñru
 “ndu ejeru Chileke
 anyi ozi”.
- Ọ bñru ẹku unwu-eliphe bẹ
 unu a-nõdu eri.
 Mbù ọ bñru iphe-enweru phẹ
 bẹ unu e-gude eku
 onwunu.
- 7 L'ozori iphe-iphere,
 e gege anõdu eme ndibe
 mu bñ-chia iphe,
 e-me nù bñ lẹ ndibe mu
 a-nata okiphe
 nnakwasẹ l'ẹka phẹ.
- Tẹme l'ozori ekpu iphu lẹ
 ntù bẹ ẹphe a-nõdu
 etechia ẹswa l'okiphe,
 ẹphe ketarù.

Èhu-ùtso ojejoje abùru nkepè.

- 8 “Kèlè mbedua, bù Chipfu bù iphe,
 aduje mu ree bù ikpe,
 pfuru nhamunha.
 Ophu dukwanu mu ashì buru
 ana nfu yèlè eme
 èjo-ememe.
 Ozo bù lè mu e-me
 ire-lanù bua ndibe
 mu obunggo.
 Tème mu l'èphe agbaa ndzù
 ojejoje.

- 9 Oshilòkpa phè abùru
 ndu a maru amaru
 l'òhamoha.
 Nokwaphò gè ndiphe a-maru
 awa phè.
 Iphe, bukpoò onye hùmaru
 phè nù a-majeerupho
 l'èphe bù ndu Chipfu
 keberu l'òma.”

- 10 Mu a-òdu Chipfu l'èka
 tee èswa.
 Mbù l'obu mu bè èhu atso
 l'ime Chileke mu;
 kèlè o yewaru mu ndzòta
 g'uwe;
 bya egude apfùbekoto
 kwaa mu yègèlè g'onye
 yeru uwe mkpèlanu.
 O meru mu; mu dù gè nwoke,
 abya alù nwanyì
 k'òphúú;
 mu kpuchia iphe l'ishi
 g'onye uke Chileke;
 mbù mee mu;
 mu òdu ama gè nwanyì,
 akwakò ala jì;
 mbù nwanyì,
 gude iphe-nchì yèlè
 iphe-olu kwaa onwiya

akwa.

- 11 Kẹle ọọ g'alì emeje g'iphe
 fushia-a;
 tẹme mgbabu nọdu emeje
 g'iphe,
 a kuru iya mehu-a;
 nokwaphọ gẹ Nnajiuphu,
 bu Chipfu e-me
 g'apfubekoto yẹle
 ajaja kpọ-futa l'iphu
 ohamoha.

Epha ọphúú ndu Zayonu

62 1 Ọ kwa l'iswi ẹhu Zayonu
 bẹ mu e-gude;
 mu taa nọdudu doo.

Mbụ lẹ mu e-gude l'iswi ẹhu
 Jierúsalemu;
 mu tee dobedu ọnu doo;
 gbiriri jasụ teke
 apfubekoto iya achafuta
 g'a hụma iya g'ẹka
 nchi bọhuru;
 ndzọta iya enwua kẹ phoo
 g'oroṣku, eke jajaja.

2 Ọhamoha a-hụma apfubekoto
 nkengu.

Ndu eze l'ophu ahuma
 ogbu-nwịnwii nkengu.
 L'a gụa ngu epha ọphúú,
 bu Chipfu e-gude ọnu iya
 gụa ngu iya l'onwiya.

3 Gụbedua a-dụ g'okpu-eze,
 dụ ùbvù l'ẹnya,
 nọ l'ẹka Chipfu.

Mbụ l'ìi-nọdu l'ẹka Chileke
 ngu dụ iya g'okpu-eze,
 onye eze kpu l'ishi.

4 Ẹphe te ekubaedu ngu
 “onye a gbagharu agbagharu”.
 Ọphu e kuedu alì ngu “ochobu”.
 Iphe, aa-gụ ngu bu

“òtsomahu Chileke”.

L'a gùà alì ngu “nwanyị,
a luru k'òphúú”;
kele Chipfu e-gude ngu
ete ẹswa.

Tẹme alì ngu
adù gẹ nwanyị,
a luru k'òphúú.

5 Mbù l'ọo ẹgube ono,
nwokorọbya aluje
nwamgbọko ono
bù g'unwu ngu a-luru gùbe
Zayọnu.

Ọ bọru g'onye eme ekele nwanyị
egudeje nyee ya ete ẹswa-a;
nokwaphọ gẹ Chileke ngu
e-gude ngu ete ẹswa.

6 Mu woakwaru ndu nche
dobechara l'eli igbulọ,
a kpụ-pheru gùbe
Jierúsalemụ.

Ọphu ẹphe abyakwa e-dobe
ọnu doo eswe l'enyashi.

Mbù-a; unubẹ ndu eku
ẹpha Chipfu;
unu ba tụtakwa unme!

7 Ọphu unu ahakwa iya g'ọ
tùta unme jasù teke
oo-me Jierúsalemụ g'ọ
nguru anguru;
mee ya g'ọ bọru iphe,
eliphe l'ophu e-gude
aja Chileke ajaja.

8 Chipfu gudeakwa ẹkutara
iya;
yẹle ogwe-ẹka iya l'ophu
ria angù sù:

“Ọ tọ dukwa teke
mu byaru
ewobaaru iphe,
ì kọberu l'alì nù ndu
ohogu ngu g'ọ bọru

- nri phe.
 Ophu ndu ohozo abyadu
 angubaa mee ophúú ono,
 bu ngu seru akanya
 iya ono.
- 9 O chia ndu kpataru iya nu e-ri
 iya jaa Chipfu ajaja iya.
 Teme ndu awo akpuru
 vayinu angua mee ya
 l'oma-unuphu ibe mu ono,
 du nsọ onoya.”
- 10 Unu ghajaa ya;
 unu ghajaa onu-abata
 mkpukpu ono!
 Unu dozia ọzo, ndu ono
 a-nodu eshi!
 Unu tua mkpoli;
 unu tua mkpoli leze
 oji ono!
 Unu wofuchaa ya mkpuma
 mkpuma, du iya nu!
 Le wolia ekwa-ohubama ono
 pfuberu ohamoha
 g'ephe huma!
- 11 Lenu; Chipfu raakwaru iya;
 o jedzuru mgboko jasọ
 l'eka igwe beru ali
 beru su:
 “Unu su ndu Zayonu g'ephe
 humakwa l'onye ndzota
 phe abyakwa!
 O gudekwa obunggo iya;
 bya egude iphe,
 oo-gude pfua ugwo.”
- 12 “Iphe, ee-ku ndu ono bu
 ‘Ndu-nsọ ke Chileke’;
 ozoo ‘Ndu Chipfu gbataru’.
 Le kua gube Zayonu
 ‘Nwanchota’;
 ozoo ‘mkpukpu,
 a ta gbadoeduru agbado.’”

Eswe mbòku, Chipfu a-gwata ugwo iphe

63 ¹“Bụ onye bụ ọphuu? Bụ onye shi l'alì Edomu abya phọ; mbụ onye ono, yeru uwe, dụ meeme, shi lẹ mkpukpu Bọzura eje abya ono? Bụ onye bụ ono yeru akpabiri g'onye yeru kpowula-kpowula uwe; mbụ onye ono, azọ garamugaramu eje l'iphu l'iphu gude egoshi g'ọ kabe ọkpehu ono?”

“Ọ kwa mbedua. Mu p̄fubekwaru ẹka ọto epfu iphe, mu epfu. Teme ike adzota nemadzụ dukwa mu pho.”

²“?Bukwanu gunu meru g'o gude uwe ngu nọdu eke meeme; g'onye azocha akpuru-iphe, e meje mee?”

³“Ọ kwa mu zoshiru mee ono nweka mu. Ohamoha l'ophu ta adukwa onye byaru ekwe mu ẹbo. Mu gude ẹhu-eghu zọo ya zoshia; mbụ gude oke ẹhu-eghu mu zọo ya ọtilitoli. Ọ buru mee p̄he gbakarụ kpua l'uwe mu. Ọ buru iya bụ lẹ mee, atuko uwe mu l'ophu sweta. ⁴Ọ buru iphe, kparụ iya nū bụ l'eswe agwata ugwo iphe nọ mu l'okpoma. Teme apha aagbata mu ono rwuwa. ⁵Mu leri ẹnya; ọphu ọ dudu onye gbaa mkpu, dū nū. Ọ nyia mu ẹhu kpala l'ọ tọ dudu onye byaru agbaaru mu mkpu. Ọ buru ọkpehu mu bẹ mu gude dzọo onwomu. Teme ọ buru oke ẹhu-eghu mu bẹ gudesi mu nū. ⁶Mu gude ẹhu-eghu mu zọo ohamoha pyakapyaka; gude oke ẹhu-eghu mu mee; mee tsuaha p̄he. Mu woru mee p̄he wua l'alì.”

Ajaja yele epfu anụ Chileke

⁷Mu e-pfu k'obu, Chipfu eyeje ndibe iya.

Mbụ iphe, Chipfu meshiru
anyi, kparụ iphe,
ọ gbaru g'a jaa ya ajaja;
mbụ ikpoto iphe, dū ree,
o meru onu-ulo Izurelu;
kele ọophushi
obu-imemini ike;
teme ọ nọdu eyeje obu
yegharu iya ẹka.

⁸Ọ sūru: “Eviya eviya; ndu-a bụ ndibe mu; unwu mu, ata abyadu adzuru mu uka.” Ọ buru iphe ono meru g'o gude a dzota p̄he. ⁹Ep̄he nọdu ejekpo iphe-ehuka, ep̄he jeru g'ọ ha; ọ nọdu atsue ya pho l'ehu. Ọ buru ojozi-imigwe, shi l'eka ọ nọ jeru je adzọo p̄he. Ọ buru eye obu, o yeru p̄he; yele obu-imemini, ọophuru p̄he bẹ o gude gbata p̄he. Ọ palia p̄he ephekerep̄he; heru p̄he eheru teke ndiche ono l'ophu l'ophu. ¹⁰Ọle ọ bụ; ep̄he jikale-a l'ep̄he tee medu iphe, ọ sūru p̄he g'ep̄he mee; shi nno mee Unme-dū-Nso nkiya iphe aphū. Ọ buru iya meru g'o gude ọ ghakoḅe bya aburu onye opfu p̄he. Mbụ yebedua l'onwiya bya etsoaha p̄he ọgu.

¹¹A nɔnyaa; ɛphe nyata teke ndiche; mbụ teke Mósísu yẹle ndu nkiya nọ. Ɛphe ría sụ: “?Bụ awe bẹ onye ono, dugharu phẹ eze-ɛnyimu ono nɔhunú; mbụ onye dugharu ndu nche aturu yẹle aturu mẹ egbu iya-a? ?Bụ awe bẹ ọ nọ; mbụ onye ono, woru Unme-dụ-Nsọ nkiya ye; ephe l'iya swiru ono; ¹²onye ono, woru ọkphehu iya ọphu dụ biribiri ye Mósísu l'ẹkuta; o woru eze-ɛnyimu kee ẹbo l'iphu phẹ; k'ọphu aa-maru ẹpha iya jasụ l'ojejoje; ¹³mbụ onye ono, duru phẹ ghaa ogbumini ono. Ɛphe gbaa kwaakwa g'inya agba l'echiegu. Ọphu opfu aduduru phẹ l'okpa. ¹⁴Unme Chipfu rwukpoo phẹ pho g'onye erwu eswi eje lẹ mbarabata; je adobe l'eka ɛphe nọru tuta unme. Ọ bụ ẹgube ono bụ g'i gude dua ndibe ngu; k'ọphu ii-me g'ẹpha ngu buru iphe, a-dụ akpabiri.”

¹⁵Gbenu l'imigwe; mbụ l'ephekerephe ẹka ono, aba-eze ngu nọ ono; mbụ ẹka ono, dụ nsọ bya adu akpabiri ono; gbenu l'eka ono tufu ɛnya humakpodapho! ?Bụ awe bẹ n-yemobu ngu; yẹle ọkphehu ngu nọ? Eme odoo ngu yẹle aphụ obu-imemini ngu ono ta adukwa ọphu i kweru g'oro rwua anyi ẹka. ¹⁶Obenu l'oo ngu bụ nna anyi. A makwaru-a lẹ Ẹbirihamu ta amadu anyi. Ọphu Ịzuru amadu onye anyi bụ. Obenu l'oo gube Chipfu bụ nna anyi; bya aburu onye aagbata anyi. Epha ngu shi l'ojejoje duta. ¹⁷Su-a; gube Chipfu; ?bụ gunu meru g'oro gude i mee g'anyi phukuru lufu l'uzo nkengu; i sụ-chia ọkpoma anyi k'ọphu bụ l'anyi ta tsuduru ngu ebvu? Lwanu azu m'obvu ndu-ozu ngu; mbụ ọkpa-ipfu ono, bụ okiphe ngu ono!

¹⁸Alì nsọ ngu ono ta noduru ndibe ngu ọdu l'eka. Ndu ohogu ngu bya eworu ẹka ono, duru ngu nsọ ono zoọ tilitoli. ¹⁹Ole anyi bukwapho nke-ngu e -shi lẹ ndiche. Ọ gbẹ dụ g'i tiki bụ-swee ishi anyi; g'e teke ekuswee anyi laaru l'ẹpha ngu.

64 ¹Ọ dụ g'a sụ g'i gbajaa igwe ẹbo nyizeta! G'oke úbvú nmaa jiiijiii l'iphu ngu! ²Mbụ-a; ẹgube ono, ọku etsuje nkụ, enwu ọku ono; ẹgube ono, ọku emeje gẹ mini, shiru iya nụ phuhu uphu ono; nyizeta-nụ bya emee gẹ ndu ohogu ngu maru ẹpha ngu! Byanu emee g'ohamoha phua kpaakpaakpa l'iphu ngu; ³kele teke ono, i meru iphe, dugbaa oke ebvu onoya, bụ iphe, anyi amadu l'ii-me ono bẹ i nyizetaru. Oke úbvú nmaa jiiijiii l'iphu ngu. ⁴E -shi kẹ teke ndiche ta adukwa onye numajewaru nụ. Ọphu ọ tubajeduru lẹ nchi. Ọphu ɛnya ahumajeduru Chileke ozo, dụ nụ, abudu gubedua, bụ Chileke, emejeru ndu ele iya ɛnya l'eka iphe, ɛphe ele ɛnya iya. ⁵Igbajeru phẹ mkpu; mbụ ndu egudeje ẹhu-utso eme iphe, pfuru oto. Mbụ ndu nyataru iphe, i suru g'e meje. Obenu lẹ teke anyi emekwapho iphe-ẹji ekpu phẹ; ẹhu eguaha ngu egbu. ?Denuhunu g'ee-shi dzotaba anyi? ⁶G'anyi ha dukwaa g'iphe, aaso nsọ. Teme apfubekoto anyi dukotawa gẹ nkirika ẹkwa, dụ ideyideyi. G'anyi ha nwewaru enwenwe dụ gẹ mkpekwo. Iphe-ẹji anyi nodu apa anyi nganganga gẹ pherephere. ⁷Ọ tọ duedu onye eku ẹpha ngu. Ọphu ọ duedu onye eme gẹ

ya e-me wõru ngu ẹka; keḗle i woharu anyi iphu; bya eworu anyi wehaaru ejo-ememe, anyi eme.

⁸Obenu ẹ-a; gũbe Chipfu; ọ kwa ngu bũ nna anyi. Anyịbedua bũkwa urre; gũbedua bũru onye akpũ ite. Anyi tũkoru bũru iphe, i gude ẹka ngu mee. ⁹G'ẹhu te eghughakwaru ngu egħu ẹka jiko Chipfu. Ba gũko-bekwaru anyi iphe-ẹji anyi g'ọ nọo jasũ l'ojejeje! Jikonu lenaa anyi ẹnya; keḗle anyi tũkokwaru bũru ndibe ngu! ¹⁰Mkpũkpũ ngu, dũgbaa nsọ ono tũkoakwaru bũru ẹjagiri echięgu. Mbũ je akpachaa ẹ Zayonu bũchakwaa ẹjagiri echięgu. Teme Jierusalemu bũru ochobu. ¹¹Eze-ulo ngu ono, dũ nsọ; bya adũ akpabiri ono, anyi shi nweru ono, bũ ẹka nna anyi oche phe shi anọduje aja ngu ajaja ono be a tũakwaru ọku; o tsua ya tsufu. Teme iphe, bũkpoo ẹka ono, anyi yeru obu ono g'ọ ha bũkotaru ọla-l'iswi. ¹²G'ọ dũ ẹgube ono gũbe Chipfu; ?ii-gudeshikwapho onwongu? ?Ii-nọ-kirishi nwadoo hũa anyi ahũhũ hũgharu iya ẹka tọ?

Ikpe yeḗle ndzota

65 ¹Mu shi ekpuhaje onwomu goshi ndu akpaduru ishi mu. Ndu achoduru mu achocho be mu shi emeje g'ephe hũma mu. O bũru ọha ono, te eshidu ekuje epha mu ono be mu shi asuje: Wakwa mu-o! Wakwa mu-o! ²Mboku-mboku be mu amachije ẹka togboru ndu ejo-okpo-ma. Mbũ ndu ono, uto epe eshi adudu ree ono, buepho iphe, epe ritaru be epe anọduje eme g'ephe mee ono; ³mbũ ndu bũ mkpũrumkpuru be epe anọduje akpatsu mu iwe l'iphu mu gedegede; ejeje anodu ẹ mgba-bu agwa iphe; kpokobe buloku mee ya ẹnya ẹka aakpoje unwũ-isensu ọku; ⁴ndu ejeje anodu l'eka eelije odzu; kwaa akwakwa l'eka ono nwũkota ẹnya ẹnyashi eme ke maa l'edomi; ndu anọduje ata anũ ezi; eshi mini iphe l'ite phe, bũ mini anũ, aasọ nsọ; ⁵ndu anọduje epfu sũ: O-nọ-l'uto gbalakwaa! G'ọ tọ dukwa onye a-byakube mu ntse; keḗle mu dukwa nsọ! Mu kakwa ngu adũ nsọ! Ẹgube ndu ono bũ ẹnwuru, akpũ tũuu ala mu l'imi. Epe bũ ọku, enwuje phoophoophoo mkpũrumkpuru.

⁶"Lekwa; e dekwaru iya edede dobe mu l'iphu sũ: Mu taa nọdukwa doo. Mu a-pfũkwa ugwo pfũ-dzua apfũ-dzu. Mu a-pfũ phe iya nwuru iya enwuru ye phe l'eka; ⁷mekpoo iphe-ẹji nkephe; me ke nna phe oche phe." Nokwa iphe, Chipfu eepfu. "O bũru iphe, kparũ iya nũ bũ l'ephe jeru je anodu l'eli ubvũ agwa iphe; je anodu l'eli obvu epfubyishi mu. Oo iphe ono meru g'ọ gude mu je apfũ phe ugwo iphe, epe meru; nwuru iya enwuru de phe adẹ l'utapfu."

⁸Wakwa iphe, Chipfu epfu baa: "O kwa ẹgube ono, mee abujeru: o -dũkwadu l'ojopfula akpũru vayĩnu; l'aasũ g'e te mebyishikwa iya ẹ nwiphe, dũ ree hakwaru dukwadu iya ono; nokwa ge mu e-me ke ndu ejeru mu ozi bũ ono; mu taa tũkokwa g'ephe ha emebyishi. ⁹Mu e-mekwa g'awa Jiękọpu phodu. Mbũ ẹ mu e-me g'ọ dũru ndu Jiuda e-nweru oke ubvũ

mu ono. Mbù l'ọo ndu ono, mu họtaru ono bẹ ọo-buru okiphe phe. Ọ bụ-ru ẹka ono bẹ ndu ono, ejeru mu ozi ono e-buru. ¹⁰Nsuda Sharonu a-buru ẹka aa-nodu eche iphe-edobe. Teme nsuda Akoru aburu ọdu-eswi duru ndibe mu, bu ndu achọ mu nu.

¹¹“Obenu k'unubedua, bu ndu jikaru mube Chipfu; bya azoha eze ubvu mu ono, du nso ono; mbu ndu meru nri doberu Omelonwiya; bya agbajia mee l'okoro siberu Okpuluwa; ¹²egube ndu ono bẹ mu a-gbakọ doberu ogu-echi. Teme g'unu ha e-phuretaepho g'a phushia unu terii; kele mu kuru unu oku; ophu unu azaduru enu. Mu pfua opfu yeru unu; ophu unu angaduru nchi. Unu nodu mu l'iphu mee ejo-ememe. Teme o buru iphe, du mu eji bẹ unu hataru ememe.” ¹³Oo ya bu le-a; wakwa iphe, Nnajiuphu, bu Chipfu epfu baa: “Ndu ejeru mu ozi e-rikwa nri; unubedua aswiru egu. Ndu ejeru mu ozi angua iphe-angungu; unubedua akpohu onu nkụ. Ndu ejeru mu ozi e-tekwa eswa; unubedua aburu ndu e meru iphe-iphere kpua. ¹⁴Ndu ejeru mu ozi a-gu ebvu; ebvu, shi l'ehu-utso, jiru phe obu; obenu l'unubedua a-ra ekwa aphu, tukoru unu obu sweta; unu echia mkpu l'eka meji tofuwaru unu ree. ¹⁵Epha unu a-buru iphe, ndu mu hotaru e-gudeje ephu l'iphu. O buru Nnajiuphu, bu Chipfu e-mechaa gbua unu. Obenu le ndu ejeru iya ozi bẹ ọo-gu epha ophuu. ¹⁶Onye ago-kpo onu-oma anu nemadzu l'ali ono l'e-gude Chileke ire-lanu ono ago iya. Onye erikwanu nte l'ali ono egude Chileke ire-lanu ono ria nte obu; kele iphe-ehuka, shi duhawaa nu bẹ aa-tuko zohachaa woru iya domia ge mu ta ahumajehe iya.

¹⁷“Lekwa; mu e-metakwa igwe ophuu; bya emeta eliphe ophuu. Akahu iphe bẹ a taa nyatabaedu; ophu obatabaedu l'egomunggo. ¹⁸O chia g'ehu tsoo unu utso; unu ete eswa ojejoje ekpu iphe ono, mu e-meta ono; kele mu e-me Jierusalemu g'o buru mkpukpu ehutso. Teme ndu no iya nu aburu ndu emeje g'ehu tsoo nemadzu. ¹⁹Mu e-te eswa kpua Jierusalemu. Teme ndibe mu a-buru ndu e-me g'ehu tsoo mu utso. Ophu aanumaedu olu-ekwa; ozoo echi mkpu l'ime iya ozobaa. ²⁰O to dubaedu nwata, a-no ujiku olemole nwuhu l'ime mkpukpu ono; ozoo onye bu ogerenya, ata akafudu nka l'ishi. Onye noru ukporo apha ise bya anwuhu bẹ aa-suje lo gbakwohuru agbakwohu. Onye iphe-eji, anorwuduru ukporo apha ise bẹ aa-suje la turu iya onu. ²¹Ephe a-kpushi ulo buru iya. Ephe agbaa opfu-vayinu ria akpuru iya. ²²Ephe taa kpuedu ulo aharu ndu ozo g'ephe buru. Ophu ephe akpedu opfu aharu ndu ozo g'ephe ria; kele oo g'oshi akabeje nka bu ge ndibe mu a-ka nka. Mbù le ndu ono, mu hotaru ono e-rije iphe, ephe seru akanya iya; ria ya noo ọdu. ²³Ephe te eseedu akanya olal'iswi. Ophu ephe anwushiedu unwegirima, ehenu a-nodu etso; kele ephe a-buru ndu Chipfu keberu l'oma; ephebedua g'ephe ha; mekpoo awa phe l'ophu. ²⁴Ephe -bya eku oku; mu evuwaru uzo za phe enu. Ephe -gudekwadu-a opfu l'onu epfu; mu anumawa iphe, ephe epfu. ²⁵Ejo-nkuta-oswa

ẹphe l'unwu aturu a-tukoje akpa nri l'ẹka lanu. Teme oduma awata ata eswa g'eswi. O buru iphe, agwo e-rije bu urwuku. Iphe ono ta aduedu ophu emeka iphe; ozoo gbu iphe egbugbu leli ubvu mu ono, du nsọ ono l'ophu." Nokwa iphe, Chipfu eepfu.

Ikpe yele ẹka obu a-du

66 ¹Wakwa iphe, Chipfu epfu: "Imigwe bukwa aba-eze mu. Eliphe buru okposhi, mu tu-koberu okpa. Denu egube ulo, unu a-kpu-ru mu? ?Bu egube awe be mu a-noduje iya atuta unme obu? ²?Tobudu mbedua gude ẹka mu mee iphemiphe ono g'o ha meru g'o gude ẹphe du?" Nokwa iphe, Chipfu eepfu. "Wakwa egube onye mu a-gube iphe baa: onye wozeru onwiya ali; yele onye obu iya du agu; onye anumaje opfu mu; ndzu erwuta iya.

³"Obenu l'onye buepho loogburu mu eswi; dukwa g'onye egbu nemadzu. Onye gude nwaturu agwa mu dukwanu g'onye aswikwo nkuta olu. Onye gude iphe, o kotaru l'opfu bya mu anunu dule mu-a g'onye agbashi mu mee ezi. Onye akpokwanuru mu unwu-isensu oku duepho g'onye agwa nshi. Noo kele ẹphe hatawaru enu ẹka phe. Teme o buru iphe, aduje phe ree bu ejo ahuma, ẹphe anoduje eme. ⁴Oo ya bu le mbedua a-cho-takwapho iphe, mu e-gude mekpaa phe eh. Mbua-a; mu e-mee phe pho iphe, ẹphe atsụ ebvu; kele teke mu kuru oku ta adudu onye zaru mu enu. Ophu o dudu onye yeru mu onu teke mu pfuru opfu. ẹphe nodu mu l'iphu eme ejo-ememe. Teme o buru iphe, ẹphe hotaru eme bu iphe, adudu mu ree."

⁵Unu numakwa Opfu Chipfu; unube ndu anmajeru opfu iya pyaapyaapya: "Unwunna unu, bu ndu kporu unu ashi bya ewuchia unu ewuchi l'opfu eh mu be pfuwaru su: 'Ge Chipfu goshinu lo bu onye gbaru g'a kwabeje iya ubvu; k'ophu anyi a-huma eh-utso unu!' Ole ee-mechanaa mee ndu ono iphe-iphere. ⁶Numakpodapho utsu, ada le mkpukpu! Numakpodapho uzu, aatu leze-ulo Chileke. O kwa iphe, ada nu bu le Chipfu apfu ndu ohogu iya iphe, rwuberu phe nu.

⁷"Zayonu be ime byaru awata ememe; o nwuwa nwa. Mbua l'upfu byaru awata iya eme ehuka; o nwuwa nwa nwoke. ⁸?Bu onye numajeru egube iphe ono? ?Bu onye humajeru egube iphemiphe ono? ?Aanwuje oha l'ophu l'ujiku lanu? To o aa-du ike zeda ndu a-buru oha ẹka phe le mgbo lanu? Ole o bu; o kwadu-a ime, wataru eme Zayonu; o nwuwanu unwegirima iya. ⁹?Mu e-mechaa g'ime merwua l'anwunwu; mu emedu g'a nwua ya too?" Nokwa iphe, Chipfu eepfu. "Su-a; ?mu a-gbe su-chia ẹkpa-nwa l'eka mu gbẹ mewaa ge nwa rwua l'anwunwu?" Nokwa iphe, Chileke unu epfu.

¹⁰G'ehu tuko unu le

Jierusalemu tsoo utso!

G'unu gude Jierusalemu

tee ẹswa; iphe,
 bukpoo unube ndu yeru
 iya obu!
 G'ehu tsoshikpoo unu l'iya
 ike;
 mbu unube ndu rarú
 iya ẹkwa;
 11 kele unu a-ngu ẹra ngu-jia
 ẹpho l'era iya ono,
 bu ẹra ndumobu ono.
 Unu a-ngukpoo ya mia ya
 pyopyopyo l'ọ tsoo
 unu uto;
 kele oo-nodu agbo ke jojojo.

¹²Kele-a; wakwa iphe, Chipfu epfu baa: “Mu e-me g'ehu-guu soro iya gborogboro ge nggele. Temẹ ẹku, shi ohamoha alwaru iya ge nggele, aso asoso. Ee-che ngu ẹra; hee ngu lonwiya; tee ngu ebvu l'utapfu. ¹³Oo ge ne aduje nwa iya obu bu ge mu a-nodu adu unu obu. O buru le Jierúsalemu be mu a-nodu adu unu obu obu. ¹⁴Unu -humaepho iphe ono be obu a-tsoahaa unu uto. Unu abyaahaa pulapula g'ẹswa. Iphe ono, Chipfu e-me l'ehu ndu ejeru iya ozi ono; be l'e-me g'a maru iya. Obenu le ndu ohogu iya be oo-tukoshi oke ehu-eghu iya.”

¹⁵Unu lekwa; Chipfu gudekwa oku abya. Temẹ ugbo-inya iya dugbaa g'oke pherephere. O buru oke iwe be oo-gude tukoshi phe ehu-eghu iya. Lo gude oku, enwu phoophoophoo baaru phe mba; ¹⁶kele oo oku yele ogu-echi iya be Chipfu ee-gude kpee ndiphe ikpe; mbu le ndu Chipfu aphu terii a-dukwa igwerigwe.

¹⁷“Ndu ono, doru onwophe nsọ bya asachaa onwophe awu eje lenyagwa; mbu ndu awu lodze etso onye ono, no l'echilabo ndu ata anu ezi; me ndu ata okerepfu; me ikpoto anu ozo, aasogba nsọ; ndu ono g'ephe ha l'a-tuko tabuhu onu l'ugbo lanu.” Nokwa iphe, Chipfu eepfu. ¹⁸“Temẹ eshinu ephe eme egube umere ono; temẹ ephe nodu ari egube oriri ono be mu abyaakwaa achikobe ohamoha; mekpoo ndu epfu egube opfu, ephe epfu g'ephe bya ahuma ge mu du-be akpabiri.

¹⁹“Mu e-me iphe-ohubama l'echilabo phe. Mu abya aharu nwa ndu ophu waru nu zia g'ephe jedzuru ohamoha ono, bu ndu teke anuma-swee idu mu; ophu ephe eke ahuma-swee ge mu du-be akpabiri ono; mbu g'ephe jee mkpukpu Tashishi; waa ali Pulu; yele ali ndu Lidiya; mbu ndu ono, agbaje apfu ono. Ephe eje ali ndu Tubalu; yele ke ndu Jiavanu; jekota ali ndu bu uzenya uzanya le mgboru eze-enyimu. Ephe eje emee g'ohamoha ono maru ge mu du-be akpabiri. ²⁰Ephe a-tuko unwunna unu l'ophu, shigbaa l'ohamoha chita bya l'ubvu mu, du nsọ le Jierúsalemu. Ephe

a-buru iphe, e gude gwaa Chipfu. Ēphe anodu l'inya abya; mē l'ugbo-inya; mēkpoo l'ugbo-alì, ōphu aakpu akpukpu. Ēphe anodu l'eli ìnya-mulu; mēkpoo l'eli ìnya-kamèlu awu abya.” Noo iphe, Chipfu epfu. “Su-a; aa-chìru phè bya egube ono, ndu Ízurēlu eyeje ngweja-nri l'ite, a ta sōdu nsò gude bya mu anunu l'eze-ulo mube Chipfu ono. ²¹ Teme mu a-hakwaru phè phò hòta g'èphe buru ndu-uke mube Chileke; yēle ndu Lívayi.” Nokwa iphe, Chipfu eepfu.

²² “Su-a; ō kwa g'igwe òphúú; yēle eliphe òphúú, mu e-me a-nò jasuwaruroya l'iphu mu; nokwa g'èpha unu; yēle awa unu a-nò.” Nokwa iphe, Chipfu eepfu. ²³ “Ee-shije l'iphe, bū Obo Onwa-òphúú jasù l'iphe, bukota onwa afufu ozo; teme l'e shijekwaphò l'iphe, bū eswe-atùta-unme lanu jasù l'iphe, bukota eswe-atùta-unme ozo; mbū lè nemadzù l'ophu a-byajè bya abaarù mu eja.” Nokwa iphe, Chipfu eepfu. ²⁴ “Ozo bū l'èphe a-lufuje je ahuma odzu ndu kwefuru mu ike. Èka ono bè èkà, a-nòdu ata phè nū taa nwuhukwa anwuhu. Ōphu oku, enwu iya nū anyìhodu anyìhu. Ēphe aburu iphe, ndiphe l'ophu a-nòdu akpo-yiru ukuvu.”